



UNIVERSITY OF TORONTO



3 1761 00004234 1








E. L. PATAYNE

HISTORICAL

TOWN

IN 1870-1871



**T. LIVII PATAVINI
HISTORIARUM**

TOMUS IV.

LIB. XXXVII.—XLV.

T. LIVII PATAVINI

HISTORIARUM

TOMUS IV.

LIB. XXXVII—XLV.

~~1808 Dec 2~~ LIVY
(T. LIVII PATAVINI)

HISTORIARUM

QUÆ SUPERSUNT,

EX RECENSIONE

ARN. DRAKENBORCHII.

CUM INDICE RERUM.

ACCEDUNT

GENTES ET FAMILIÆ ROMANORUM,

AUCTORE R. STREINNIO.

NECNON

ERNESTI GLOSSARIUM LIVIANUM,

AUCTIUS NONNIHIL, ET IN LOCIS QUAMPLURIMIS
EMENDATUM.

TOMUS IV.

OXONII,

E TYPOGRAPHEO CLARENDONIANO.

MDCCCXIII.



594

b

PA
6452
A2
1800
t. 4

T. LIVII PATAVINI HISTORIARUM

AB URBE CONDITA

LIBRI.

EPITOME LIBRI XXXVII.

L. CORNELIUS SCIPIO consul, legato P. Scipione Africano (qui se legatum fratris futurum dixerat, si ei Græcia provincia decerneretur, quum C. Lælio, qui multum in senatu poterat, ea provincia dari videretur) profectus ad bellum adversus Antiochum gerendum, in Asiam primus omnium Romanorum ducum trajecit. Æmilius Regillus adversus regiam classem Antiochi feliciter pugnavit ad Myonnesum, Rhodiis adjuvantibus. Filius Africani, ab Antiocho captus, patri remissus est. M. Acilius Glabrio de Antiocho, quem Græcia expulerat, et de Ætolis triumphavit. Victo deinde Antiocho a L. Cornelio Scipione, adjuvante Eumene rege Pergami, Attali filio, pax data est ea conditione, ut omnibus provinciis citra Taurum montem cederet. Eumeni, quo juvante Antiochus victus erat, regnum ampliatum. Rhodiis quoque, qui et ipsi juverant, quadam civitates concessæ. Colonia deducta

est Bononia. Æmilius Regillus, qui præfectos Antiochi navali certamine vicerat, navalem triumphum duxit. L. Cornelius Scipio, qui cum Antiocho debellaverat, cognomine fratri exæquatus, Asiaticus adpellatus est.

T. LIVII PATAVINI

LIBER XXXVII.

L. CORNELIO SCIPIONE, C. Lælio consuli-
bus, nulla prius secundum religiones acta in
senatu res est, quam de Ætolis. Et legati eorum
institere, quia brevem induciarum diem habebant;
et ab T. Quinctio, qui tum Romam ex Græcia redi-
erat, adjuti sunt. Ætoli, ut quibus plus in miseri-
cordia senatus, quam in caussa, spei esset, supplici-
ter egerunt, veteribus benefactis nova pensantes
maleficia. Ceterum et præsentis interrogationibus
undique senatorum, confessionem magis noxæ, quam
responsa, exprimentium, fatigati sunt, et, excedere
curia jussi, magnum certamen præbuere. Plus ira,
quam misericordia, in caussa eorum valebat; quia
non ut hostibus modo, sed tamquam indomitæ et in-
sociabili genti, succensebant. Per aliquot dies quum
certatum esset, postremo neque dari, neque negari
pacem placuit: duæ conditiones eis latæ sunt: vel
senatui liberum arbitrium de se permetterent; vel
mille talentum darent, eosdemque amicos atque ini-
micos haberent. Exprimere cupientibus, quarum
rerum in se arbitrium senatui permetterent, nihil
certi responsum est: ita infecta pace dimissi, urbe
eodem die, Italia intra quindecim dies excedere jussi.
Tum de consulum provinciis cœptum est agi. Ambo
Græciam cupiebant. Multum Lælius in senatu po-
terat: is, quum senatus aut sortiri, aut comparare

U. C. 562.

A. C. 190.

Ætoli lega-
ti, infecta
pace, di-
missi.

U. C. 562. inter se provincias consules jussisset, elegantius fac-
 A. C. 190. turos dixit, si iudicio Patrum, quam si sorti, eam
 rem permisissent. Scipio, responso ad hoc dato,
cogitaturum, quid sibi faciendum esset, cum fratre uno
locutus, jussusque ab eo permittere audacter senatui,
renunciat collegæ, facturum se, quod is censeret.
 Quum res, aut nova, aut vetustate exemplorum me-
 moriæ jam exoletæ, relata expectatione certaminis
 senatum erexisset, P. Scipio Africanus dixit, *Si L.*
Scipioni fratri suo provinciam Græciam decrevissent,
se legatum iturum. Hæc vox, magno adsensu audita,
 sustulit certamen. Experiri libebat, utrum plus regi
 Antiocho in Hannibale victo, an in victore Africano
 consuli legionibusque Romanis, auxilii foret: ac
 prope omnes Scipioni Græciam, Lælio Italiam
 decreverunt.

Africanus
 fratri le-
 gatus.

II. Prætores inde provincias sortiti, L. Auruncu-
 leius urbanam, Cn. Fulvius peregrinam, L. Æmilius
 Regillus classem, P. Junius Brutus Tuscos, M. Tuc-
 cius Apuliam et Bruttios, C. Atinius Siciliam. Con-
 suli demde, cui Græcia provincia decreta erat, ad
 eum exercitum, quem a M. Acilio (duæ autem legi-
 ones erant) accepturus esset, in supplementum ad-
 dita peditum civium Romanorum tria millia, equites
 centum, et sociûm Latini nominis quinque millia,
 equites ducenti: et adjectum, ut, quum in provin-
 ciam venisset, si e republica videretur esse, exerci-
 tum in Asiam trajiceret. Alteri consuli totus novus
 exercitus decretus; duæ legiones Romanæ, et soci-
 ûm Latini nominis quindecim millia peditum, equi-
 tes sexcenti. Exercitum ex Liguribus Q. Minucius
 (jam enim confectam provinciam scripserat, et Li-
 gurum omne nomen in deditionem venisse) tradu-

cere in Boios, et P. Cornelio proconsuli tradere, U. C. 562. jussus. Ex agro, quo victos bello multaverat Boios, A. C. 190. deductæ urbanæ legiones, quæ priore anno conscriptæ erant, M. Tuccio prætori datæ, et sociûm ac Latini nominis peditum quindecim millia, equites sexcenti, ad Apuliam Bruttiosque obtinendos. A. Cornelio superioris anni prætori, qui Bruttios cum exercitu obtinuerat, imperatum, si ita consuli videretur, ut legiones in Ætoliâ trajectas M. Acilio traderet, si is manere ibi vellet: si Acilius redire Romam mallet, ut A. Cornelius cum eo exercitu in Ætoliâ remaneret. C. Atinium Labeonem provinciam Siciliam exercitumque a M. Æmilio accipere placuit, et in supplementum scribere ex ipsa provincia, si vellet, peditum duo millia, et centum equites. P. Junius Brutus in Tuscos exercitum novum, legionem unam Romanam, et decem millia sociûm ac Latini nominis scribere, et quadringentos equites; L. Æmilius, cui provincia maritima erat, viginti naves longas, et socios navales a M. Junio prætore superioris anni accipere jussus, et scribere ipse mille navales socios, duo millia peditum: cum iis navibus militibusque in Asiam proficisci, et classem a C. Livio accipere. Duas Hispanias Sardiniamque obgentibus prorogatum in annum imperium est, et iidem exercitus decreti. Siciliæ Sardiniaque binæ eo anno decumæ frumenti imperatæ: Siculum omne frumentum in Ætoliâ ad exercitum portari jussum: ex Sardinia pars Romam, pars in Ætoliâ, eodem quo Siculum.

III. Priusquam consules in provincias proficiscentur, prodigia per pontifices procurari placuit. Romæ Junonis Lucinæ templum de cœlo tactum

U. C. 562. erat, ita ut fastigium valvæque deformarentur. Pu-
 A. C. 190. teolis pluribus locis murus et porta fulmine icta, et
 duo homines exanimati. Nursiæ sereno satis con-
 stabat nimbum ortum: ibi quoque duos liberos ho-
 mines exanimatos. Terra apud se pluisset Tusculani
 nunciabant, et Reatini mulam in agro suo peperisse.
 Ea procurata, Latinæque instauratæ; quod Lauren-
 tibus carnis, quæ dari debet, data non fuerat. Sup-
 plicatio quoque earum religionum causa fuit, qui-
 bus Diis decemviri ex libris ut fieret, ediderunt.
 Decem ingenui, decem virgines, patrimi omnes ma-
 trimique, ad id sacrificium adhibiti: et decemviri
 nocte lactentibus rem divinam fecerunt. P. Corne-
 lius Scipio Africanus, priusquam proficisceretur,
 fornicem in Capitolio adversus viam, qua in Capito-
 lium adscenditur, cum signis septem auratis, et duo-
 bus equis, et marmorea duo labra ante fornicem po-
 suit. Per eosdem dies principes Ætolorum tres et
 quadraginta, inter quos Damocritus et frater ejus
 erant, ab duabus cohortibus, missis a M. Acilio,
 Romam deducti, et in Lautumias coniecti sunt: co-
 hortem inde ad exercitum redire, L. Cornelius consul
 jussit. Legati a Ptolemæo et Cleopatra, regibus
 Ægypti, gratulantes quod M. Acilius consul Anti-
 ochum regem Græcia expulisset, venerunt; adhor-
 tantesque, ut in Asiam exercitum trajicerent: *omnia*
perculsa metu non in Asia modo, sed etiam in Syria,
esse; reges Ægypti ad ea, quæ censuisset senatus, pa-
ratos fore. Gratia regibus actæ: legatis munera
 dari jussa, in singulos quaternum millium æris.

IV. L. Cornelius consul, peractis, quæ Romæ a-
 genda erant, pro concione edixit, ut milites, quos
 ipse in supplementum scripsisset, quique in Bruttis

cum A. Cornelio proprætore essent, ut hi omnes Idi- U. C. 562.
 bus Quinctilibus Brundisium convenirent. Item tres A. C. 190.
 legatos nominavit, Sex. Digitium, L. Apustium, C. Scipio cos.
 Fabricium Luscinum, qui ex ora maritima undique proficiscitur.
 naves Brundisium contraherent: et, omnibus jam
 paratis, paludatus ab urbe est profectus. Ad quin-
 que millia voluntariorum ex Romanis sociisque, qui
 emerita stipendia sub imperatore P. Africano habe-
 bant, præsto fuere exeunti consuli, et nomina dede-
 runt. Per eos dies, quibus est profectus ad bellum
 consul, ludis Apollinaribus, ante diem quintum Idus
 Quinctiles, cælo sereno interdiu obscurata lux est,
 quum luna sub orbem solis subisset. Et L. Æmilius
 Regillus, cui navalis provincia evenerat, eodem tem-
 pore profectus est. L. Aurunculeio negotium ab se-
 natu datum est, ut triginta quinqueres, viginti tri-
 meres faceret; quia fama erat, Antiochum post præ-
 lium navale majorem classem aliquanto reparare.
 Ætoli, postquam legati ab Roma retulerunt, nullam Ætolorum
 spem pacis esse, quamquam omnis ora maritima eo- conatus.
 rum, quæ in Peloponnesum versa est, depopulata ab
 Achæis erat, periculi magis, quam damni, memores,
 ut Romanis intercluderent iter, Coracem montem
 occupaverunt: neque enim dubitabant, ad obpug-
 nationem Naupacti eos principio veris redituros esse.
 Acilio, qui id exspectari sciebat, satius visum est,
 inopinatam adgredi rem, et Lamiam obpugnare.
 Nam et a Philippo prope ad excidium adductos esse; Lamia
 et tunc eo ipso, quod nihil tale timerent, obprimi in- obpugnata
 cautos posse. Profectus ab Elatia primum in hostium
 terra circa Sperchium annem posuit castra: inde
 nocte motis signis, prima luce corona mœnia est
 adgressus.

U. C. 562.
A. C. 190.

V. *Magnus pavor ac tumultus, ut in re improvisa, fuit : constantius tamen, quam quis facturos crederet, in tam subito periculo, quum viri propugnarent, feminae tela omnis generis saxaque in muros gererent, jam multifariam scalis adpositis, urbem eo die defenderunt. Acilius, signo receptui dato, suos in castra medio ferme die reduxit : et tunc cibo et quiete refectis corporibus, priusquam prætorium dimitteret, denunciavit, ut ante lucem armati paratique essent : nisi expugnata urbe, se eos in castra non reducturum.* Eodem tempore, quo pridie, pluribus locis adgressus, quum oppidanos jam vires, jam tela, jam ante omnia animus deficeret, intra paucas horas urbem cepit. Ibi, partim divendita, partim divisa præda, consilium habitum, quid deinde faceret. Nemini ad Naupactum iri placuit, occupato ad Coracem ab Ætolis saltu : ne tamen segnia æstiva essent, et Ætoli non inpetratam pacem ab senatu nihilominus per suam cunctationem haberent, obpugnare Acilius Amphissam statuit : ab Heraclea per Ætam exercitus eo ductus. Quum ad mœnia castra posuisset, non corona, sicut Lamiam, sed operibus obpugnare urbem est adortus. Pluribus simul locis aries admovebatur ; et quum quaterentur muri, nihil adversus tale machinationis genus parare, aut comminisci oppidani conabantur : omnis spes in armis et audacia erat : eruptionibus crebris et stationes hostium, et eos ipsos, qui circa opera et machinas erant, turbabant.

Amphissa
obpugnata.

Consul in
provinciam
venit.

VI. Multis tamen locis murus decussus erat, quum adlatum est, successorem, Apolloniæ exposito exercitu, per Epirum ac Thessaliam venire. Cum tredecim millibus peditum et quingentis equitibus consul veniebat. Jam in sinum Maliacum venerat : et

præmissis Hypatam, qui tradere urbem juberent, ^{U. C. 562.}
 postquam responsum est, nihil, nisi ex communi ^{A. C. 190.}
 Ætolorum decreto, facturos; ne teneret se obpug-
 natio Hypatæ, nondum Amphissa recepta, præmisso
 fratre Africano, Amphissam ducit. Sub adventum
 eorum oppidani, relictæ urbe, (jam enim magna ex
 parte nudata mœnibus erat) in arcem, quam inex-
 pugnabilem habent, omnes armati atque inermes
 concessere. Consul sex millia ferme passuum inde
 posuit castra: eo legati Athenienses primum ad ^{Ætoli pa-}
 P. Scipionem, prægressum agmen, (sicut ante dic- ^{cem quæ-}
 tum est) deinde ad consulem venerunt, deprecantes ^{runt.}
 pro Ætolis. Clementius responsum ab Africano tu-
 lerunt: qui, causam relinquendi honeste Ætolici
 belli quærens, Asiam et regem Antiochum spectabat,
 jusseratque Athenienses, non Romanis solum, ut pa-
 cem bello præferrent, sed etiam Ætolis persuadere.
 Celeriter, auctoribus Atheniensibus, frequens ab
 Hypata legatio Ætolorum venit: et spem pacis eis
 sermo etiam Africani, quem priorem adierunt, auxit,
 commemorantis, *multas gentes populosque in Hispania*
prius, deinde in Africa, in fidem suam venisse: in om-
nibus se majora clementiæ benignitatisque, quam vir-
tutis bellicæ, monumenta reliquisse. Perfecta videba-
 tur res, quum aditus consul idem illud responsum
 retulit, quo fugati ab senatu fuerant. Eo tamquam
 novo quum icti Ætoli essent, (nihil enim nec lega-
 tione Atheniensium, nec placido Africani responso
 profectum videbant) referre ad suos dixerunt velle.

VII. Reditum inde Hypatam est, nec consilium
 expediebatur: nam neque, unde mille talentum da-
 retur, erat; et, permissio libero arbitrio, ne in cor-
 pora sua sæviretur, metuebant. Redire itaque eos-

U. C. 562. dem legatos ad consulem et Africanum jusserunt, et
 A. C. 190. petere, ut, si dare vere pacem, non tantum ostendere, frustrantes spem miserorum, vellent, aut ex summa pecuniæ demerent, aut permissionem extra civium corpora fieri juberent. Nihil inpetratum, ut mutaret consul: et ea quoque irrita legatio dimissa est. Secuti et Athenienses sunt: et princeps legationis eorum Echedemus fatigatos tot repulsis Ætolos, et complorantes inutili lamentatione fortunam gentis, ad spem revocavit; auctor inducias sex mensium petendi, ut legatos Romam mittere possent. *Dilationem nihil ad præsentia mala, quippe quæ ultima essent, adjecturam: levari per multos casus, tempore interposito, præsentis clades posse.* Auctore Echedemo iidem missi, prius P. Scipione convento, per eum inducias temporis ejus, quod petebant, a consule inpetraverunt: et, soluta obsidione Amphissæ, M. Acilius, tradito consuli exercitu, provincia decessit: et consul ab Amphissa Thessaliam repetit, ut per Macedoniam Thraciamque duceret in Asiam. Tum Africanus fratri, *Iter, quod insistis, L. Scipio, ego quoque adprobo: sed totum id vertitur in voluntate Philippi. Qui, si imperio nostro fidus est, et iter, et commentus, et omnia, quæ in longo itinere exercitus alunt jurantque, nobis subpeditabit: si is destituat, nihil per Thraciam satis tutum habebis.* Itaque prius regis animum explorari placet: optime explorabitur, si nihil ex præparato agentem obprimet, qui mittetur. Ti. Sempronius Gracchus, longe tum acerrimus juvenum ad id delectus, per dispositos equos præpe incredibili celeritate ab Amphissa (inde enim est dimissus) die tertio Pellam pervenit. In convivio rex erat, et in multum vini processerat: ea ipsa remissio animi suspi-

Inducias
inpetrant.

Cos. ducit
in Asiam.

cionem demisit, novare eum quidquam velle. Et tum ^{U. C. 562.}
 quidem comiter acceptus hospes : postero die com- ^{A. C. 190.}
 meatus exercitui paratos benigne, pontes in fluminibus factos, vias, ubi transitus difficiles erant, munitas vidit. Hæc referens eadem, qua ierat, celeritate Thaumacis obcurrit consuli. Inde certiore et maiore spe lætus exercitus ad præparata omnia in Macedoniam pervenit. Venientes regio adparatu et accepit, et prosecutus est rex. Multa in eo et dexteritas, et humanitas visa, quæ commendabilia apud Africanum erant ; virum sicut ad cetera egregium, ita a comitate, quæ sine luxuria esset, non aversum. Inde non per Macedoniam modo, sed etiam Thraciam, prosequente et præparante omnia Philippo, ad Hellespontum perventum est.

VIII. Antiochus post navalem ad Corycum pugnam, quum totam hiemem liberam in adparatus terrestres maritimosque habuisset, classi maxime reparandæ, ne tota maris possessione pelleretur, intentus fuerat. Subcurrebat, *superatum se, quum classis abfuisset Rhodiorum : quod si ea quoque (nec commissuros Rhodios, ut iterum morarentur) certamini adesset, magno sibi navium numero opus fore, ut viribus et magnitudine classem hostium æquaret.* Itaque et Hannibalem in Syriam miserat ad Phœnicum arcessendas naves, et Polyxenidam, quo minus prospere gesta res erat, eo enisius et eas, quæ erant, reficere, et alias parare naves jussit. Ipse in Phrygia hibernavit, undique auxilia arcessens : etiam in Gallogræciam miserat. Bellicosiores ea tempestate erant, Gallicos adhuc, nondum exoleta stirpe gentis, servantes animos. Filium Seleucum in Æolide reliquerat cum exercitu ad maritimas continendas urbes :

U. C. 562. quas illinc a Pergamo Eumenes, hinc a Phocæa
 A. C. 190. Erythrisque Romani sollicitabant. Classis Romana,
 sicut ante dictum est, ad Canas hibernabat. Eo
 media ferme hieme rex Eumenes cum duobus milli-
 bus peditum, equitibus centum, venit. Is, quum
 magnam prædam agi posse dixisset ex hostium agro,
 qui circa Thyatira esset, hortando perpulit Livium,
 ut quinque millia militum secum mitteret: missi in-
 gentem prædam intra paucos dies averterunt.

IX. Inter hæc Phocææ seditio orta, quibusdam
 ad Antiochum multitudinis animos avocantibus.
 Gravia hiberna navium erant; grave tributum, quod
 togæ quingentæ imperatæ erant, cum quingentis tu-
 nica; gravis etiam inopia frumenti, propter quam
 naves quoque et præsidium Romanum excessit:
 tum vero liberata metu factio erat, quæ plebem in
 concionibus ad Antiochum trahebat. Senatus et op-
 timates in Romana societate perstandum censebant:
 defectionis auctores plus apud multitudinem vaine-
 runt. Rhodii, quo magis cessatum priore æstate
 erat, eo maturius æquinotio verno eundem Pau-
 sistratum classis præfectum cum sex et triginta navi-
 bus miserunt. Jam Livius a Canis cum triginta na-
 vibus et septem quadriremibus, quas secum Eumenes
 rex adduxerat, Hellespontum petebat; ut ad trans-
 itum exercitus, quem terra venturum opinabatur,
 præpararet, quæ opus essent. In portum, quem vo-
 cant Achæorum, classem primum advertit: inde
 Ilium adscendit, sacrificioque Minervæ facto, lega-
 tiones finitimas ab Elæunte, et Dardano, et Rhæteo,
 tradentes in fidem civitates suas, benigne audivit.
 Inde ad Hellesponti fauces navigat; et, decem na-
 vibus in statione contra Abydum relictis, cetera

Classis
 Rom. Hel-
 lespon-
 tum petit.

classe in Europam ad Sestum obpugnandam trajecit. U. C. 562.
 Jam subeuntibus armatis muros fanatici Galli primum A. C. 190.
 cum sollemni habitu ante portam obcurrunt. Jussu
 se matris Deûm famulos Deæ venire memorant, ad
 precandum Romanum, ut parceret mœnibus urbi-
 que. Nemo eorum violatus est: mox universus se-
 natus cum magistratibus ad dedendam urbem pro-
 cessit. Inde Abydum trajecta classis: ubi quum,
 tentatis per colloquia animis, nihil pacati respon-
 deretur, ad obpugnationem sese expediebant.

X. Dum hæc in Hellesponto geruntur, Polyxeni-
 das regius præfectus, (erat autem exsul Rhodius) Polyxeni-
 das frau-
 quum audisset, profectam ab domo popularium suo-
 sistrato
 rum classem, et Pausistratum præfectum superbe
 struit.
 quædam et contentim in se concionantem dixisse,
 præcipuo certamine animi adversus eum sumto, ni-
 hil aliud dies noctesque agitabat animo, quam ut
 verba magnifica ejus rebus confutaret. Mittit ad
 eum hominem et illi notum, qui diceret, *Et se Pau-*
sistrato patriæque suæ magno usui, si liceat, fore; et a
Pausistrato se restitui in patriam posse. Quum, quo-
 nam modo ea fieri possent, mirabundus Pausistratus
 percunctaretur, fidem petenti dedit agendæ commu-
 niter rei, aut silentio tegendæ. Tum internuncius,
regiam classem aut totam, aut majorem ejus partem,
Polyxenidam traditurum ei: pretium tanti meriti nul-
lum aliud pacisci, quam redditum in patriam. Magni-
 tudo rei, nec ut crederet, nec ut adspernaretur dicta,
 effecit. Panormum Samiæ terræ petit; ibique ad
 explorandam rem, quæ oblata erat, substitit. Ultro
 citroque nuncii cursare: nec fides ante Pausistrato
 facta est, quam coram nuncio ejus Polyxenidas sua
 manu scripsit, *se ea, quæ pollicitus esset, facturum,*

U. C. 562. signoque suo inpressas tabellas misit. Eo vero
 A. C. 190. pignore velut auctoratum sibi proditorem ratus est.

Neque enim eum, qui sub rege viveret, commissurum fuisse, ut adversus semet ipsum indicia manu sua testata daret: inde ratio simulatæ proditionis composita, *Omnium se rerum adparatum omissurum, Polyxenidas dicere; non remigem, non socios navales ad classem frequentes habiturum: subducturum per simulationem reficiendi quasdam naves, alias in propinquos portus dimissurum: paucas ante portum Ephesi in salo habiturum; quas, si exire res cogeret, objecturus certamini foret.* Quam negligentiam Polyxenidam in classe sua habiturum Pausistratus audivit, eam ipse extemplo habuit: partem navium ad commeatus arcessendos Halicarnassum, partem Samum ad urbem misit: ut paratus esset, quum signum agrediendi a proditore accepisset. Polyxenidas augere simulando errorem: subducit quasdam naves, alias velut subducturus esset, navalia reficit: remiges ex hibernis non Ephesum arcessit, sed Magnesiam occulte cogit.

XI. Forte quidam Antiochi miles, quum Samum rei privatæ caussa venisset, pro speculatore deprehensus deducitur Panormum ad præfectum: is percunctanti, quid Ephesi ageretur, incertum metu, an erga suos haud sincera fide, omnia aperit: classem instructam paratamque in portu stare: remigium omne Magnesiam ad Sipylum missum; perpaucas naves subductas esse, et navalia tegi: numquam intentius rem navalem administratam esse. Hæc ne pro veris audirentur, animus errore et spe vana præoccupatus fecit. Polyxenidas, satis omnibus comparatis, nocte remige a Magnesia arcessito, deductis-

que raptim, quæ subductæ erant, navibus, quum U. C. 562.
 diem non tam in adparatu absumsisset, quam quod A. C. 190.
 conspici proficiscentem classem nolebat; post solis
 occasum profectus septuaginta navibus tectis, vento
 adverso, ante lucem Pygela portum tenuit: ubi quum Eum in-
 interdiu ob eandem causam quiesset, nocte in prox- cautum ob-
 ima Samiæ terræ trajecit. Hinc Nicandro quodam primit.
 archipirata quinque navibus tectis Palinurum jusso
 petere, atque inde armatos, qua proximum per agros
 iter esset, Panormum ad tergum hostium ducere,
 ipse interim, classe divisa, ut ex utraque parte fau-
 ces portus teneret, Panormum petit. Pausistratus
 primo, ut in re necopinata, turbatus parumper, de-
 inde vetus miles, celeriter conlecto animo, terra me-
 lius arceri, quam mari, hostes posse ratus, armatos
 duobus agminibus ad promontoria, quæ cornibus
 objectis ab alto portum faciunt, ducit; inde facile
 telis ancipitibus hostem submoturus: id inceptum
 ejus Nicander a terra visus quum turbasset, repente
 mutato consilio, naves conscendere omnes jubet.
 Tum vero ingens pariter militum nautarumque tre-
 pidatio orta, et velut fuga in naves fieri, quum se
 mari terraque simul cernerent circumventos. Pau-
 sistratus, unam viam salutis esse ratus, si vim facere
 per fauces portus, atque erumpere in mare apertum
 posset, postquam conscendisse suos vidit, sequi ce-
 teris jussis, ipse princeps concitata nave remis ad
 ostium portus tendit. Superantem jam fauces na-
 vem ejus Polyxenidas tribus quinquereuib; circum-
 sistit. Navis rostris iecta subprimitur: telis obruun-
 tur propugnatores: inter quos et Pausistratus inpi-
 gre pugnans interficitur. Navium reliquarum ante
 portum aliæ, aliæ in portu deprehensæ, quædam a

U. C. 562. Nicandro, dum moliuntur a terra, captæ: quinque
 A. C. 190. tantum Rhodiæ naves cum duabus Cois effugerunt, terrore flammæ micantis via sibi inter confertas naves facta: contis enim binis a prora prominentibus trullis ferreis multum conceptum ignem præ se portabant. Erythrææ triremes, quum haud procul a Samo Rhodiis navibus, quibus ut essent præsidio, veniebant, obviæ fugientibus fuissent, in Hellespontum ad Romanos cursum averterunt. Sub idem tempus Seleucus proditam Phocæam, porta una per custodes aperta, recepit; et Cyme aliæque ejusdem oræ urbes ad eum metu defecerunt.

XII. Dum hæc in Æolide geruntur, Abydus quum per aliquot dies obsidionem tolerasset, præsidio regio tutante mœnia, jam omnibus fessis, Philota quoque præfecto præsidii permittente, magistratus eorum cum Livio de conditionibus tradendæ urbis agebant: rem distinebat, quod, utrum armati, an inermes, emitterentur regii, parum conveniebat. Hæc agentibus quum intervenisset nuncius Rhodiorum cladis, emissa de manibus res est: metuens enim Livius, ne successu tantæ rei elatus Polyxenidas classem, quæ ad Canas erat, obprimeret, Abydi obsidione custodiaque Hellesponti extemplo relicta, naves, quæ subductæ Canis erant, deduxit. Et Eumenes Elæam venit. Livius omni classe, cui adjunxerat triremes duas Mitylenæas, Phocæam petit: quam quum teneri valido regio præsidio audisset, nec procul Seleuci castra esse; depopulatus maritimam oram, et præda maxime hominum raptim in naves inposita, tantum moratus, dum Eumenes cum classe adsequeretur, Samum petere intendit. Rhodiis primo audita clades simul pavorem, simul luc-

Rhodi-
 rum luc-
 tus.

tum ingentem fecit: nam, præter navium militum-^{U. C. 562.}
 que jacturam, quod floris, quod roboris in juventute^{A. C. 190.}
 fuerat, amiserant; multis nobilibus secutis inter ce-
 tera auctoritatem Pausistrati, quæ inter suos merito
 maxima erat: deinde, quod fraude capti, quod a Dein ira.
 cive potissimum suo forent, in iram luctus vertit.
 Decem extemplo naves, et diebus post paucis decem
 alias, præfecto omnium Eudamo, miserunt: quem,
 aliis virtutibus bellicis haudquaquam Pausistrato pa-
 rem, cautio rem, quo minus animi erat, ducem futu-
 rum credebant. Romani et Eumenes rex in Ery-
 thræam primum classem adplicuerunt: ibi noctem
 unam morati, postero die Corycum Teiorum pro-
 montorium tenuerunt: inde quum in proxima Sa-
 miæ vellent trajicere, non expectato solis ortu, ex
 quo statum cœli notare gubernatores possent, in
 incertam tempestatem miserunt. Medio in cursu,
 aquilone in septentrionem verso, exasperato flucti-
 bus mari jactari cœperunt.

XIII. Polyxenidas, Samum petituros ratus hostes,
 ut se Rhodiæ classi conjungerent, ab Epheso pro-
 fectus, primo ad Myonnesum stetit: inde ad Ma-
 crin (quam vocant) insulam trajecit, ut præterve-
 hentis classis si quas aberrantes ex agmine naves
 posset, aut postremum agmen opportune adoriretur.
 Postquam sparsam tempestate classem vidit, occa-
 sionem primo adgrediendi ratus, paullo post incre-
 brescente vento, et majores jam volvente fluctus,
 quia pervenire se ad eos videbat non posse, ad Æ-
 thaliam insulam trajecit, ut inde postero die Samum
 ex alto petentes naves adgrederetur. Romani, pars
 exigua, primis tenebris portum Samiæ desertum te-
 nuerunt: classis cetera, noctem totam in alto jac-

U. C. 562. tata, in eundem portum decurrit. Ibi ex agresti-
 A. C. 190. bus cognito, hostium naves ad Æthalam stare, con-
 silium habitum, utrum extemplo decernerent, an
 Rhodiam expectarent classem: dilata re, (ita enim
 placuit) Corycum, unde venerant, trajecerunt. Po-
 lyxenidas quoque, quum frustra stetisset, Ephesum
 rediit. Tum Romanæ naves vacuo ab hostibus
 mari Samum trajecerunt. Eodem et Rhodia classis
 Romana post dies paucos venit: quam ut expectatam esse
 classis ante Ephesum. adpareret, profecti extemplo sunt Ephesum, ut aut
 decernerent navali certamine, aut, si detractaret
 hostis pugnam, (quod plurimum intererat ad animos
 civitatum) timoris confessionem exprimerent. Con-
 tra fauces portus instructa in frontem navium acie
 stetere: postquam nemo adversus ibat, classe divisa,
 pars in salo ad ostium portus in anchoris stetit;
 pars in terram milites exposuit. In eos, jam ingen-
 tem prædam late depopulato agro agentes, Andro-
 nicus Macedo, qui in præsidio Ephesi erat, jam
 mœnibus adpropinquantes eruptionem fecit, exutos-
 que magna parte prædæ ad mare ac naves redegit.
 Postero die, insidiis medio ferme viæ positis, ad eli-
 ciendum extra mœnia Macedonem, Romani ad ur-
 bem agmine iere: inde, quum ea ipsa suspicio, ne
 quis exiret, deterruisset, redierunt ad naves: et,
 terra marique fugientibus certamen hostibus, Sa-
 mum, unde venerat, classis repetit. Inde duas so-
 ciorum ex Italia, duas Rhodias triremes cum præ-
 fecto Epicrate Rhodiorum ad fretum Cephallenia
 tuendum prætor misit. Infestum id latrocinio La-
 cedæmonius Hybristas cum juventute Cephallenum
 faciebat: clausumque jam mare commeatibus Itali-
 cis erat.

XIV. Piræei L. Æmilio Regillo, succedenti ad U.C. 362.
 navale imperium, Epicrates occurrit: qui, audita A.C. 190.
 elade Rhodiorum, quum ipse duas tantum quinque-
 remes haberet, Epicratem cum quatuor navibus in Æmilius
 Asiā secum reduxit: prosecutæ etiam apertæ Athe-
 niensium naves sunt. Ægeο mari trajecit. Eodem
 Timasirates Rhodius cum duabus quadrirenibus ab
 Samo nocte intempesta venit: deductusque ad Æmi-
 lium, præsidii causa se missum, ait, quod eam oram
 maris infestam onerariis regiæ naves excursionibus
 crebris ab Hellesponto atque Abydo facerent. Tra-
 jicienti Æmilio a Chio Samum duæ Rhodiæ quadri-
 remes missæ obviam ab Livio, et rex Eumenes cum
 duabus quinquereimis occurrit. Samum postquam
 ventum est, accepta a Livio classe, et sacrificio, ut
 adsolet, rite facto, Æmilius consilium advocavit. Ibi
 C. Livius, (is enim est primus rogatus sententiam) Consilium
Neminem fidelius dare posse consilium, dixit, quam eum, advocat.
qui id alteri suaderet, quod ipse, si in eodem loco esset,
facturus fuerit. Se in animo habuisse, tota classe
Ephesum petere, et onerarias ducere multa saburra
gravatas, atque eas in faucibus portus subprimere: et
eo minoris molimenti ea claustra esse, quod, in fluminis
modum, longum, et angustum, et vadosum ostium por-
tus sit. Ita ademturum se maris usum hostibus fuisse,
inutilemque classem facturum.

XV. Nulli ea placere sententia. Eumenes rex
 quæsit, *Quid tandem? ubi demersis navibus frenas-*
sent claustra maris, utrum libera sua classe abscessuri
inde forent ad opem ferendam sociis, terroremque hos-
tibus præbendum? an nihilominus tota classe portum
obsessuri? Sive enim abscedant, cui dubium esse, quin
hostes extracturi demersas moles sint, et minore moli-

U. C. 562. *mento aperturi portum, quam obstruatur? Sin autem*
 A. C. 190. *manendum ibi nihilominus sit, quid adtinere, claudi*
portum? Quin contra, illos, tutissimo portu, opulen-
tissima urbe fruentes, omnia Asia præbente, quieta
æstiva acturos: Romanos, aperto in mari fluctibus
tempestatibusque objectos, omnium inopes, in adsidua
statione futuros; ipsos magis adligatos inpeditosque,
ne quid eorum, quæ agenda sint, possint agere, quam
ut hostes clausos habeant. Eudamus, præfectus Rho-
diæ classis, magis eam sibi displicere sententiam
ostendit, quam ipse, quid censeret faciendum, dixit.
Epicrates Rhodius, Omissa in præsentia Epheso, mit-
tendam navium partem in Lyciam, censuit, et Patara,
caput gentis, in societatem adjungenda: in duas res
magnas id usui fore; et Rhodios, pacatis contra insu-
lam suam terris, totis viribus incumbere in unius belli,
quod adversus Antiochum sit, curam posse; et eam
classem, quæ in Lycia compararetur, intercludi, ne
Polyxenidæ conjungatur. Hæc maxime movit senten-
tia: placuit tamen, Regillum tota classe evehi ad
portum Ephesi, ad inferendum hostibus terrorem.

Livius
mittitur in
Lyciam.

XVI. C. Livius cum duabus quinquereimis Ro-
 manis, et quatuor quadriremibus Rhodiis, et duabus
 apertis Smyrnæis, in Lyciam est missus, Rhodum
 prius jussus adire, et omnia cum iis communicare
 consilia. Civitates, quas prætervectus est, Miletus,
 Myndus, Halicarnassus, Cnidus, Cous, imperata
 enise fecerunt. Rhodum ut est ventum, simul et,
 ad quam rem missus esset, iis exposuit, et consuluit
 eos. Adprobantibus cunctis, et ad eam, quam habe-
 bat, classem adsumtis tribus quadriremibus, navigat
 Patara. Primo secundus ventus ad ipsam urbem
 ferebat eos; sperabantque, subito terrore aliquid

moturos : postquam, circumagente se vento, fluctibus dubiis volvi cœptum est mare, pervicerunt quidem remis, ut tenerent terram : sed neque circa urbem tuta statio erat, nec ante hostium portus in salo stare poterant, aspero mari, et nocte imminente. Prætervecti mœnia portum Phœnicunta, minus duûm millium spatio inde distantem, petiere, navibus ab maritima vi tutum : sed altæ rupes insuper iminebant, quas celeriter oppidani, adsumtis regiis militibus, quos in præsidio habebant, ceperunt : adversus quos Livius, quamquam erant iniqua ac difficilia ad exitus loca, Issæos auxiliares et Smyrnæorum expeditos juvenes misit. Ii, dum missilibus primo et adversus paucos levibus excursionibus lacescebatur magis, quam conserebatur, pugna, sustinuerunt certamen : postquam plures ab urbe adfluebant, et jam omnis multitudo effundebatur, timor incessit Livium, ne et auxiliares circumvenirentur, et navibus etiam ab terra periculum esset : ita non milites solum, sed etiam navales socios, remigum turbam, quibus quisque poterat telis, armatos in prælium eduxit. Tum quoque anceps pugna fuit ; neque milites solum aliquot, sed L. Apustius tumultuario prælio cecidit : postremo tamen fusi fugatique sunt Lycii, atque in urbem compulsi : et Romani cum haud incruenta victoria ad naves redierunt. Inde in Telmissicum profecti sinum, qui latere uno Cariam, altero Lyciam contingit, omissa Patara amplius tentandi spe, Rhodii domum dimissi sunt. Livius, prætervectus Asiam, in Græciam transmisit, ut, conventis Scipionibus, qui tum circa Thessaliam erant, in Italiam trajiceret.

U. C. 562.

A. C. 190.

U. C. 562. XVII. Æmilius, postquam omissas in Lycia res,
 A. C. 190. et Livium profectum in Italiam cognovit, quum ipse
 ab Epheso, repulsus tempestate, irrito incepto Sa-
 mum revertisset, turpe ratus, tentata frustra Patara

esse, proficisci eo tota classe, et summa vi adgredi
 urbem statuit. Miletum et ceteram oram sociorum
 prætervecti, in Bargylietico sinu exscensionem ad
 Iassum fecerunt. Urbem regium tenebat præsidium:

agrum circa Romani hostiliter depopulati sunt. Missis deinde, qui per colloquia principum et magistratuum tentarent animos, postquam nihil in potestate sua responderunt esse, ad urbem obpugnandam ducit. Erant Iassensium exsules cum Romanis: ii frequentes Rhodios orare institerunt, *Ne urbem, et vicinam sibi, et cognatam, innoxiam perire sinerent. Sibi exsilii nullam aliam causam esse, quam fidem erga Romanos. Eadem vi regionum, qua ipsi pulsi sint, teneri eos, qui in urbe maneant: omnium Iassensium unam mentem esse, ut servitutem regiam effugerent.* Rhodii, moti precibus, Eumene etiam rege adsumto, simul suas necessitudines commemorando, simul obsessæ regio præsidio urbis casum miserando, pervicerunt, ut obpugnatione absisteretur. Profecti inde, pacatis ceteris, quum oram Asiæ legerent, Loryma (portus adversus Rhodum est) pervenerunt. Ibi in principiis sermo primo inter tribunos militum secretus oritur, deinde ad aures ipsius Æmilii pervenit, abduci classem ab Epheso, ab suo bello: ut ab tergo liber relictus hostis in tot propinquas sociorum arbes omnia inpune conari posset. Movere ea Æmilius: vocatosque Rhodios quum percunctatus esset, utrumnam Pataris universa

classis in portu stare posset, quum respondissent, non posse; caussam nactus omittendæ rei, Samum re-
duxit naves.

U. C. 562.

A. C. 190.

Repetit

Samum.

XVIII. Per idem tempus Seleucus, Antiochi filius, quum per omne hibernorum tempus exercitum in Æolide continuisset, partim sociis ferendo opem, partim, quos in societatem perlicere non poterat, depopulandis, transire in fines regni Eumenis, dum is procul ab domo cum Romanis et Rhodiis Lyciæ maritima obpugnaret, statuit. Ad Elæam primo infestis signis accessit: deinde, omissa obpugnatione urbis, agros hostiliter depopulatus, ad caput arcemque regni Pergamum ducit obpugnandum. Attalus primo, stationibus ante urbem positis, et excursionibus equitum levisque armaturæ, magis lacescebat, quam sustinebat, hostem: postremo, quum, per levia certamina expertus, nulla parte virium se parem esse, intra mœnia se recepisset, obsideri urbs cœpta est. Eodem ferme tempore et Antiochus, ab Apamea profectus, Sardibus primum, deinde, haud procul Seleuci castris, ad caput Caici annis stativa habuit, cum magno exercitu mixto variis ex gentibus. Plurimum terroris in Gallorum mercede conductis quatuor millibus erat: hos, paucis admixtis, ad pervastandum passim Pergamenum agrum misit. Quæ postquam Samum sunt nunciata, primo Eumenes, avocatus domestico bello, cum classe Elæam petit: inde, quum præsto fuissent equites peditumque expediti, præsidio eorum tutus, priusquam hostes sentirent, aut moverentur, Pergamum contendit: ibi rursus levia per excursiones prælia fieri cœpta, Eumene summæ rei discrimen haud dubie detractante. Paucos post dies Romana Rhodiaque classis, ut regi

Seleucus
Antiochi F.
Pergamum
obpugnat.

U. C. 562. opem ferrent, Elæam ab Samo venerunt. Quos ubi
 A. C. 190. exposuisse copias Elææ, et tot classes in unum con-
 venisse portum, Antiocho adlatum est; et sub idem
 tempus audivit, consulem cum exercitu jam in Ma-
 cedonia esse, pararique, quæ ad transitum Helles-
 ponti opus essent; tempus venisse ratus, prius,
 quam terra marique simul urgeretur, agendi de
 Antiochus pace, tumulum quemdam adversus Elæam castris
 de pace a- cepit: ibi peditum omnibus copiis relictis, cum
 git. equitatu (erant autem sex millia equitum) in cam-
 pos sub ipsa Elææ mœnia descendit, misso caducea-
 tore ad Æmilium, velle se de pace agere.

XIX. Æmilium, Eumene a Pergamo adcito, ad-
 hibitis et Rhodiis, consilium habuit. Rhodii haud
 adspernari pacem: Eumenes, *nec honestum esse, di-
 cere, eo tempore de pace agi; nec exitum rei inponi
 posse.* Qui enim, inquit, aut honeste, inclusi mœnibus
*et obsessi velut, leges pacis accipiemus? aut cui rata
 ista pax erit, quam sine consule, non ex auctoritate se-
 natus, non jussu populi Romani pepigerimus? Quæro
 enim pace per te facta, rediturusne extemplo in Italiam
 sis, classem exercitumque deducturus? an expectatu-
 rus, quid de ea re consuli placeat, quid senatus censeat,
 aut populus jubeat? Restat ergo, ut maneat in Asia, et
 rursus in hiberna copiæ reductæ, omisso bello, exhauri-
 ant commeatibus præbendis socios: deinde (si ita visum
 sit iis, penes quos potestas fuerit) instauremus novum de
 integro bellum: quod possumus, si ex hoc inpetu rerum
 nihil prolatando remittitur, ante hiemem, Diis volenti-
 bus, perfecisse.* Hæc sententia vicit, responsumque
 Renuit Æmilium. Antiocho est, ante consulis adventum de pace agi
 non posse. Antiochus, pace nequidquam tentata,
 evastatis Elæensium primum, deinde Pergamenorum

agris, relicto ibi Seleuco filio, Adramytteum hostili- U. C. 562: 1
 ter itinere facto, petit agrum opulentum, quem vo- A. C. 190.
 cant Thebes campum, carmine Homeri nobilitatum:
 neque alio ullo loco Asiæ major regiis militibus par-
 ta est præda. Eodem Adramytteum, ut urbi præsi-
 dio essent, navibus circumvecti, Æmilius et Eu-
 menes venerunt.

XX. Per eosdem forte dies Elæam ex Achaia Achæi
 mille pedites cum centum equitibus, Diophane om- Pergamum
 nibus his copiis præposito, accesserunt: quos egres- intromissi.
 sos navibus obviam missi ab Attalo nocte Per-
 gamum deduxerunt. Veterani omnes et periti belli
 erant, et ipse dux Philopœmenis, summi tum omni-
 um Græcorum imperatoris, discipulus: qui biduum
 simul ad quietem hominum equorumque, et ad vi-
 sendas hostium stationes, quibus locis temporibusque
 accederent reciperentque sese, sumserunt. Ad ra-
 dices fere collis, in quo posita est urbs, regii succe-
 debant: ita libera ab tergo populatio erat, nullo ab
 urbe, ne in stationes quidem qui procul jacularetur,
 excurrente. Postquam semel compulsi metu se mœ-
 nibus incluserunt, contemptus eorum, et inde negli-
 gentia, apud regios oritur; non stratos, non infre-
 natos magna pars habebant equos: paucis ad arma
 et ordines relictis, dilapsi ceteri sparserant se toto
 passim campo, pars in juvenales lusus lasciviamque
 versi, pars vescentes sub umbra, quidam somno
 etiam strati. Hæc Diophanes ex alta urbe Pergamo
 contemplatus, arma suos capere, et ad jussa præsto
 esse jubet: ipse Attalum adiit, et in animo sibi esse
 dixit, hostium stationem tentare. Ægre id permit-
 tente Attalo, quippe qui centum equitibus adversus
 trecentos, mille peditibus cum quatuor millibus pug- Eorum
 virtus,

U. C. 562. naturum cerneret, porta egressus, haud procul statione hostium, occasionem obperiens, consedit. Et qui Pergami erant, amentiam magis, quam audaciam credere esse: et hostes, paullisper in eos versi, ut nihil moveri viderunt, nec ipsi quidquam ex solita negligentia, insuper etiam eludentes paucitatem, mutarunt. Diophanes quietos aliquamdiu suos, velut ad spectaculum modo eductos, continuit: postquam dilapsos ab ordinibus hostes vidit, peditibus, quantum accelerare possent, sequi jussis, ipse princeps inter equites cum turma sua, quam posset effusissimis habenis, clamore ab omni simul pedite atque equite sublato, stationem hostium improvise invadit. Non homines solum, sed equi etiam territi, quum vincula abruptissent, trepidationem et tumultum inter suos fecerunt; pauci stabant inpavidi equi: eos ipsos non sternere, non infrenare, aut adscendere facile poterant, multo majorem, quam pro numero equitum, terrorem Achæis inferentibus. Pedites vero ordinati et præparati sparsos per negligentiam, et semisomnos prope adorti sunt: cædes passim fugaque per campos facta est. Diophanes, secutus effusos, quoad tutum fuit, magno Achæorum genti decore parto, (spectaverant enim e mœnibus Pergami non viri modo, sed feminæ etiam) in præsidium urbis rediit.

XXI. Postero die regiæ, magis compositæ et ordinatæ, stationes quingentis passibus longius ab urbe posuerunt castra: et Achæi eodem ferme tempore, atque in eundem locum processerunt. Per multas horas intenti utrimque velut jam futurum impetum expectavere: postquam haud procul occasu solis redeundi in castra tempus erat, regii signis

conlatis abire agmine, ad iter magis, quam ad pugnam, composito, cœpere. Quievit Diophanes, dum in conspectu erant: deinde eodem, quo pridie, inpetu in postremum agmen incurrit; tantumque rursus pavoris ac tumultus incussit, ut, quum terga cæderentur, nemo pugnandi caussa restiterit. trepidantesque, et vix ordinem agminis servantes, in castra compulsi sunt. Hæc Achæorum audacia Seleucum ex agro Pergameno movere castra coëgit. Antiochus, postquam Romanos et Eumenem ad tuendum Adramytteum venisse audivit, ea quidem urbe abstinuit, depopulatus agros. Peræam inde, coloniam Mitylenæorum expugnavit. Cotton, et Corylenus, et Aphrodisias, et Grene, primo inpetu captæ sunt: inde per Thyatira Sardes rediit. Seleucus, in maritima ora permanens, aliis terrori, aliis præsidio erat. Classis Romana cum Eumene Rhodiisque Mitylenen primo, inde retro, unde profecta erat, Elæam rediit. Inde Phocæam petentes ad insulam, quam Bachium vocant, (inminet urbi Phocæensium) adpulerunt, et, quibus ante abstinerant templis signisque, (egregie autem exornata insula erat) quum hostiliter diripuissent, ad ipsam urbem transmiserunt: eam divisis inter se partibus quum obpugnant, et viderent, sine operibus, armis scalisque capi non posse; missum ab Antiocho præsidium trium millium armatorum quum intrasset urbem; exemplo, obpugnatione omissa, classis ad insulam se recepit, nihil aliud quam depopulato circa urbem hostium agro.

Pergami
obsidio
solvitur.

XXII. Inde placuit Eumenem domum dimitti, et præparare consuli atque exercitui, quæ ad transitum Hellesponti opus essent: Romanam Rhodiamque

U. C. 562. classem redire Samum, atque ibi in statione esse, ne
 A. C. 190. Polyxenidas ab Epheso moveret. Rex Elæam, Ro-
 mani et Rhodii Samum redierunt. Ibi M. Æmilius,
 Rhodii ad- frater prætoris, decessit. Rhodii celebratis exse-
 versus quibus, adversus classem, quam fama erat ex Syria
 classem venire, tredecim suis navibus, et una Coa quinque-
 Syriacam remi, altera Cnidia, Rhodum, ut ibi in statione es-
 tendunt. sent, profecti sunt. Biduo ante, quam Eudamus
 cum classe a Samo veniret, tredecim a Rhodo naves
 cum Pamphilida præfecto adversus eandem Syria-
 cam classem missæ, adsumtis navibus quatuor, quæ
 Cariæ præsidio erant, obpugnantibus regiis, Dædala
 et quædam alia parva castella obsidione exemerunt.
 Eudamum confestim exire placuit: additæ huic quo-
 que sunt ad eam classem, quam habebat, sex apertæ
 naves. Profectus quum, quantum adcelerare pote-
 rat, maturasset, ad portum, quem Megisten vocant,
 prægressos consequitur: inde uno agmine Phaselide-
 dem quum venissent, optimum visum est, ibi hos-
 tem obperiri.

XXIII. In confinio Lyciæ et Pamphyliæ Phaselis
 est: prominet penitus in altum, conspiciturque
 prima terrarum Rhodum a Cilicia petentibus, et
 procul navium præbet prospectum: eo maxime, ut
 in obvio classi hostium essent, electus locus est.
 Ceterum, quod non providerunt, et loco gravi, et
 tempore anni, (medium enim æstatis erat) ad hoc
 insolito odore ingruere morbi vulgo, maxime in re-
 niges, cœperunt: cujus pestilentiae metu profecti,
 quum præterveherentur Pamphylium sinum, ad Eu-
 rymedontem annum adpulsæ classe, audiunt ab As-
 pendiiis, ad Sidam jam hostes esse. Tardius navi-
 gaverant regii, adverso tempore Etesiarum, quod

velut statum Favoniis ventis esset. Rhodiorum ^{U. C. 562.}
 duæ et triginta quadriremes, et quatuor triremes ^{A. C. 190.}
 fuere. Regia classis septem et triginta majoris formæ navium erat, in quibus tres hepteres et quatuor hexeres habebat: præter has decem triremes erant: et hi adesse hostes ex specula quadam cognovere. Utraque classis postero die luce prima, tamquam eo die pugnatura, e portu movit: et, postquam superare Rhodii promontorium, quod ab Sida prominet ^{Pugna inter}
 in altum, extemplo et conspecti ab hostibus sunt, et ^{regios et}
 ipsi eos viderunt. Ab regiis sinistro cornu, quod ab ^{Rhodios.}
 alto objectum erat, Hannibal, dextro Apollonius, purpuratorum unus, præerat: et jam in frontem directas habebant naves. Rhodii longo agmine veniebant: prima prætoria navis Eudami erat; coge-
 bat agmen Chariclitus; Pamphilidas mediæ classi præerat. Eudamus, postquam hostium aciem instructam et paratam ad concurrendam vidit, et ipse in altum evehitur, et deinceps, quæ sequebantur, servantes ordinem in frontem dirigere jubet. Ea res primo tumultum præbuit: nam nec sic in altum evectus erat, ut ordo omnium navium ad terram explicari posset: et festinans ipse præpropere cum quinque solis navibus Hannibali obcurrit: ceteri, quia in frontem dirigere jussi erant, non sequebantur. Extremo agmini loci nihil ad terram relictum erat; trepidantibusque iis inter se, jam in dextro cornu adversus Hannibalem pugnabatur.

XXIV. Sed momento temporis et navium virtus, et usus rei maritimæ terrorem omnem Rhodiis demisit: nam et in altum celeriter evectæ naves locum post se quæque venienti ad terram dedere; et, si qua concurrerat rostro cum hostium navi, aut pro-

U. C. 562. ram lacerabat, aut remos detergebat, aut, libero in-
 A. C. 150. ter ordines discursu prætervecta, in puppim inpetum

Rhodii
 victores.

dabat: maxime exterruit hepteris regia, a multo minore Rhodia nave uno ictu demersa. Itaque jam haud dubie dexterum cornu hostium in fugam inclinabat. Eudamum in alto, multitudine navium maxime Hannibal, ceteris omnibus longe præstantem, urgebat: et circumvenisset, ni, signo sublato ex prætoria nave, (quo dispersam classem in unum conligi mos erat) omnes, quæ in dextro cornu vice-rant, naves ad opem ferendam suis concurrissent: tum et Hannibal, quæque circa eum erant naves, capessunt fugam: nec insequi Rhodii, ex magna parte ægris, et ob id celerius fessis remigibus, potuerunt. Quum in alto, ubi substiterant, cibo reficerent vires, contemplatus Eudamus hostes, claudas mutilatasque naves apertis navibus remulco trabentes, viginti paullo amplius integras abscedentes, e turri prætoriæ navis silentio facto, *Ersurgite*, inquit, *et egregium spectaculum capessite oculis!* Consurrexere omnes, contemplatique trepidationem fugamque hostium, prope una voce exclamavere omnes, ut sequerentur. Ipsius Eudami multis ictibus vulnerata navis erat. Pamphilidam et Chariclitum insequi, quoad putarent tutum, jussit. Aliquamdiu secuti sunt: postquam terræ adpropinquabat Hannibal, veriti ne includerentur vento in hostium ora, ad Eudamum revecti, hepterem captam, quæ primo concursu icta erat, ægre Phaselidem pertraxerunt: inde Rhodum, non tam victoria læti, quam alius alium accusantes, quod, quum potuisset, non omnis submersa aut capta classis hostium foret, redierunt. Hannibal, ictus uno prælio adverso, ne tum quidem

prætervehi Lyciam audebat, quum conjungi veteri U C. 562.
regiæ classi quamprimum cuperet. Et, id ne ei fa- A. C. 190.
cere liberum esset, Rhodii Chariclitum cum viginti
navibus rostratis ad Patara et Megisten portum mi-
serunt. Eudamum cum septem navibus maximis ex
ea classe, cui præfuerat, Samum redire ad Romanos
jusserunt; ut, quantum consilio, quantum auctori-
tate valeret, compelleret Romanos ad Patara ob-
pugnanda.

XXV. Magnam lætitiâ Romanis jam prius nun-
cius victoriæ, deinde adventus adtulit Rhodiorum:
et adparebat, si ea cura Rhodiis demta esset, vacuos
eos tuta ejus regionis maria præstaturos: sed, pro-
fectio Antiochi ab Sardibus, ne obprimerentur urbes
maritimæ, abscedere custodia Ioniæ atque Æolidis
prohibuit. Pamphilidam cum quatuor navibus tec-
tis ad eam classem, quæ circa Patara erat, miserunt.

Antiochus non civitatum modo, quæ circa se erant, Antiochus
contrahebat præsidia; sed ad Prusiam, Bithyniæ re- Prusiam ad
gem, miserat legatos literasque, quibus transitum in bellum
conceitat.

Asiam Romanorum increpabat: *Venire eos ad omnia
regna tollenda, ut nullum usquam orbis terrarum, nisi
Romanum, imperium esset. Philippum et Nabin ex-
pugnatos; se tertium peti: ut quisque proximus ab ob-
presso sit, per omnes velut continens incendium perva-
surum. Ab se gradum in Bithyniam fore, quando
Eumenes in voluntariam servitutem concessisset.* His

motum Prusiam literæ Scipionis consulis, sed magis Prusias a
ejus fratris Africani, ab suspicione tali averterunt: Rom. ad
qui, præter consuetudinem perpetuam populi Ro- pacis con-
mani augendi omni honore regum sociorum majes- silia revo-
tatem, domesticis ipse exemplis Prusiam ad prome- catur.
rendam amicitiam suam compulit. *Regulos se ac-*

U. C. 562. *ceptos in fidem in Hispania reges reliquisse. Masinissum non in patrio modo locasse regno, sed in Syphacis, a quo ante expulsus fuisset, regnum inposuisse: et esse eum non Africæ modo regum longe opulentissimum, sed toto in orbe terrarum cuius regum vel majestate, vel viribus parem. Philippum et Nabin, hostes bello superatos ab T. Quinctio, tamen in regno relictos. Philippo quidem anno priore etiam stipendium remissum, et filium obsidem redditum: et quasdam civitates extra Macedoniam, patientibus Romanis imperatoribus, recepisse eum. In eadem dignitate et Nabin futurum fuisse, nisi eum suus primo furcr, deinde fraus Ætolorum absumsisset. Maxime confirmatus est animus regis, postquam ad eum C. Livius, qui prætor ante classi præfuerat, legatus ab Roma venit, et edocuit; quanto et spes victoriæ certior Romanis, quam Antiocho, et amicitia sanctior firmiorque apud Romanos futura esset.*

Antiochus
it ad clas-
sem.

XXVI. Antiochus, postquam a spe societatis Prusiæ decidit, Ephesum ab Sardibus est profectus ad classem, quæ per aliquot menses instructa ac parata fuerat, visendam; magis quia terrestribus copiis exercitum Romanum et duos Scipiones imperatores videbat sustineri non posse; quam quod res navalis ipsa per se aut tentata sibi umquam feliciter, aut tunc magnæ et certæ fiduciæ esset. Erat tamen momentum in præsentia spei, quod et magnam partem Rhodiæ classis circa Patara esse, et Eumenem regem cum omnibus navibus suis consuli obviam in Hellespontum profectum audierat: aliquid etiam inflabat animos classis Rhodia, ad Samum per occasionem fraude præparatam absumta. His fretus, Polyxenida cum classe ad tentandam omni modo

certaminis fortunam misso, ipse copias ad Notium U. C. 562.
 ducit: id oppidum Colophonium, mari imminens, A. C. 190.
 abest a vetere Colophone duo ferme millia passuum:
 et ipsam urbem suæ esse potestatis volebat, adeo
 propinquam Epheso, ut nihil terra marive ageret,
 quod non subjectum oculis Colophoniorum, ac per
 eos notum extemplo Romanis esset: quos, audita
 obsidione, non dubitabat ad opem ferendam sociæ
 urbi classem a Samo moturos: eam occasionem
 Polyxenidæ ad rem gerendam fore. Igitur, operi-
 bus obpugnare urbem adgressus, et ad mare parti-
 bus duabus pariter munitionibus deductis, utrimque Colopho-
nem ob-
pugnat.
 vineas et aggerem muro injunxit, et testudinibus ari-
 etes admovit. Quibus territi malis Colophonii ora-
 tores Samum ad L. Æmilium, fidem prætoris popu-
 lique Romani inplorantes, miserunt. Æmilium et
 Sami segnis diu mora obfendebat, nihil minus opi-
 nantem, quam Polyxenidam, bis nequidquam ab se
 provocatum, potestatem pugnæ facturum esse: et
 turpe existimabat, Eumenis classem adjuvare consu-
 lem ad trajiciendas in Asiam legiones; se Colopho-
 nis obsessæ auxilio, incertam finem habituro, adli-
 gari. Eudamus Rhodius, qui et tenuerat eum Sami,
 cupientem proficisci in Hellespontum, cunctique in-
 stare et dicere, *Quanto satius esse, vel socios obsidione*
eximere, vel victam jam semel classem iterum vincere,
totamque maris possessionem hosti eripere, quam, de-
sertis sociis, tradita Antiocho Asia terra marique, in
Hellespontum, ubi satis esset Eumenis classis, ab sua
parte belli discedere?

XXVII. Profecti ab Samo ad petendos com-
 meatus, consumtis jam omnibus, Chium parabant
 trajicere: id erat horreum Romanis; eoque omnes

U. C. 562. ex Italia missæ onerariæ dirigebant cursum. Cir-
 A. C. 190. cumvecti ab urbe ad aversa insulæ (objecta aqui-

loni ad Chium et Erythras sunt) quum pararent
 trajicere, literis certior fit prætor, frumenti vim
 magnam Chium ex Italia venisse; vinum portan-
 tes naves tempestatibus retentas esse. Simul ad-
 latum est, Teios regiæ classi benigne commeatus
 præbuisse; quinque millia vasorum vini esse polli-
 citos. Teum ex medio cursu classem repente aver-
 tit, aut volentibus iis usurus commeatu parato hos-
 tibus, aut ipsos pro hostibus habiturus. Quum di-
 rexissent ad terram proras, quindecim ferme eis na-
 ves circa Myonnesum adparuerunt, quas primo ex
 classe regia prætor esse ratus, institit sequi: adpa-
 ruit inde, piraticas celoces et lembos esse. Chio-
 rum marinam oram depopulati, cum omnis ge-
 neris præda revertentes, postquam videre ex alto
 classem, in fugam verterunt: et celeritate supera-
 bant, levioribus et ad id fabrefactis navigiis, et
 propiores terræ erant. Itaque, priusquam adpro-
 pinquaret classis, Myonnesum perfugerunt: unde
 se a portu ratus abstracturum naves, ignarus loci
 sequebatur prætor. Myonnesus promontorium in-
 ter Teum Samumque est: ipse collis est in modum
 . metæ in acutum cacumen a fundo satis lato fasti-
 gatus: a continenti artæ semitæ aditum habet: a
 mari exesæ fluctibus rupes claudunt; ita ut quibus-
 dam locis superpendentia saxa plus in altum, quam,
 quæ in statione sunt, naves, promineant. Circa ea
 adpropinquare non ausæ naves, ne sub ictu super-
 stantium rupibus piratarum essent, diem trivere:
 tandem, sub noctem vano incepto quum abstitis-
 sent, Teum postero die accessere: et, in portu, qui

Æmilius
 Teum petit.

ab tergo urbis est, (Geræsticum ipsi adpellant) na- U. C. 562.
vibus constitutis, prætor ad depopulandum circa ur- A. C. 190.
bem agrum milites emisit.

XXVIII. Teii, quum in oculis populatio esset, oratores cum infulis et velamentis ad Romanum miserunt: quibus purgantibus civitatem omnis facti dictique hostilis adversus Romanos, *et juisse eos commeatu classem hostium arguit, et quantum vini Polyxenidæ promisissent: quæ si eadem classi Romanæ darent, revocaturum se a populatione militem; sin minus, pro hostibus eos habiturum.* Hoc tam triste responsum quum retulissent legati, vocatur in concionem a magistratibus populus, ut, quid agerent, consultarent. Eo forte Polyxenidas cum regia classe a Colophone profectus, postquam movisse a Samo Romanos audivit, et, ad Myonnesum piratas persecutos, Teiorum agrum depopulari, naves in Geræstico portu stare, ipse adversus Myonnesum in insula (Macrin nautici vocant) ancoras portu oc- Polyxeni-
culto jecit: inde ex propinquo explorans, quid hos- das ad
tes agerent, primo in magna spe fuit, quemadmo- Macrin.
dum Rhodiam classem ad Samum, circumsessis ad exitum faucibus portus, expugnasset, sic et Romanam expugnaturum: nec est dissimilis natura loci. Promontoriis coëuntibus inter se ita clauditur portus, ut vix duæ simul inde naves possint exire. Nocte occupare fauces Polyxenidas in animo habebat, et, denis navibus ad promontoria stantibus, quæ ab utroque cornu in latera exeuntium navium pugnarent, ex cetera classe, sicut ad Panormum fecerat, armatis in litora expositis, terra marique simul hostes obprimere. Quod non vanum ei consilium fuisset, ni, quum Teii facturos se imperata

U. C. 562.
A. C. 190.

promisissent, ad accipiendos commeatus aptius visum esset Romanis, in eum portum, qui ante urbem est, classem transire. Dicitur et Eudamus Rhodius vitium alterius portus ostendisse, quum forte duæ naves in arto ostio implicitos remos fre-gissent : et inter alia id quoque movit prætorem, ut traduceret classem, quod ab terra periculum erat, haud procul inde Antiocho stativa habente.

Æmilius
contendit
ad hostem.

XXIX. Traducta classe ad urbem, ignaris omnibus, egressi milites nautæque sunt ad commeatus et vinum maxime dividendum in naves ; quum medio forte diei agrestis quidam, ad prætorem adductus, nunciat, *alterum jam diem classem stare ad insulam Macrin, et paullo ante visas quasdam moveri, tamquam ad profectionem, naves.* Re subita percussus prætor tubicines canere jubet, ut, si qui per agros palati essent, redirent : tribunos in urbem mittit ad cogendos milites nautasque in naves. Haud secus, quam in repentino incendio aut capta urbe, trepidatur, aliis in urbem currentibus ad suos revocandos, aliis ex urbe naves cursu repetentibus : incertisque clamoribus (quibus ipsis tubæ obstreperent) turbatis imperiis, tandem concursum ad naves est. Vix suam quisque noscere aut adire prætumultu poterat : trepidatumque cum periculo et in mari, et in terra foret, ni, partibus divisus, Æmilius, cum prætoria nave primus e portu in altum evectus, excipiens insequentes, suo quoque ordine in frontem instraxisset ; Eudamus Rhodiaque classis substitissent ad terram, ut et sine trepidatione conscenderent, et, ut quæque parata esset, exiret navis. Ita et explicuere ordinem primæ in conspectu prætoris, et coactum agmen ab Rhodiis est :

instructaque acies, velut cerneret regios, in altum U. C. 562.
processit: inter Myonnesum et Corycum promon- A. C. 190.
torium erant, quum hostem conspexere. Et regia
classis, binis in ordinem navibus longo agmine ve-
niens, et ipsa aciem adversam explicuit; tantum
lævo erecta cornu, ut amplecti et circumire dex-
terum cornu Romanorum posset: quod ubi Euda-
mus, qui cogebat agmen, vidit, non posse æquare
ordinem Romanos, et tantum non jam circumiri a
dextro cornu, concitat naves; (et erant Rhodiæ
longe omnium celerrimæ tota classe) æquatoque
cornu, prætoriæ navi, in qua Polyxenidas erat,
suam objecit.

XXX. Jam totis classibus simul ab omni parte Pugna
committitur.
pugna conserta erat. Ab Romanis octoginta naves
pugnabant, ex quibus Rhodiæ duæ et viginti erant.
Hostium classis undenonaginta navium fuit, et max-
imæ formæ naves tres hexeres habebat, duas hep-
teres. Robore navium et virtute militum Romani
longe regios præstabant: Rhodiæ naves agilitate,
et arte gubernatorum, et scientia remigum. Max-
imo tamen hostibus terrori fuere, quæ ignes præ
se portabant: et, quod unum iis ad Panormum cir-
cumventis saluti fuerat, id tum maximum momen-
tum ad victoriam fuit. Nam metu ignis adversi re-
giæ naves, ne prora concurrerent, quum declinas-
sent, neque ipæ ferire rostro hostem poterant, et
obliquas se ipsæ ad ictus præbebant: et, si qua
concurrerat, obruebatur infuso igni; magisque ad
incendium, quam ad prælium, trepidabant. Pluri-
mum tamen, quæ solet, militum virtus in bello va-
luit: mediam namque aciem hostium Romani quam
rupissent, circumvecti ab tergo pugnantibus adver-

U. C. 562.
A. C. 190.

Romani
victores.

sus Rhodios regiis sese objecere: momentoque temporis et media acies Antiochi, et lævo in cornu circumventæ naves mergebantur. Dexteræ pars integra, sociorum magis clade, quam suo periculo, terrebatur: ceterum, postquam alias circumventas, prætoriam navem Polyxenidæ, relictis sociis, vela dantem videre, sublatis raptim dolonibus (et erat secundus petentibus Ephesum ventus) capessunt fugam, quadraginta duabus navibus in ea pugna amissis; quarum decem et tres captæ in potestatem hostium venerunt, ceteræ incensæ aut demersæ. Romanorum duæ naves fractæ sunt, vulneratæ aliquot. Rhodia una capta memorabili casu: nam, quum rostro percussisset Sidoniam navem, ancora, ictu ipso excussa e nave sua, unco dente, velut manu ferrea injecta, adligavit alterius proram: inde tumultu injecto, quum, divellere se ab hoste cupientes, inhiberent Rhodii, tractum ancorale et inplectum remis, latus alterum detersit: debilitatam ea ipsa, quæ icta cohæserat, navim cepit. Hoc maxime modo ad Myonnesum navali prælio pugnatum est.

Antiochus
Lysimachiam deserit.

XXXI. Quo territus Antiochus, quia, possessione maris pulsus, longinqua tueri diffidebat se posse, præsidium ab Lysimachia, ne obprimeretur ibi ab Romanis, deduci pravo, ut res ipsa postea docuit, consilio jussit. Non enim tueri solum Lysimachiam a primo inpetu Romanorum facile erat: sed obsidionem etiam per totam hiemem tolerare, et obsidentes quoque ad ultimam inopiam adducere extrahendo tempus, et interim spem pacis per occasiones tentare. Nec Lysimachiam tantum hostibus tradidit post adversam navalem pugnam, sed etiam

Colophonis obsidione abscessit, et Sardes recepit U. C. 562.
 se : atque inde in Cappadociam ad Ariarathen, qui A. C. 190.
 auxilia arcesserent, et quocumque alio poterat ad
 copias contrahendas, in unum jam consilium, ut acie Copias
 dimicaret, intentus, misit. Regillus Æmilius, post contrahit.
 victoriam navalem profectus Ephesum, directis ante
 portum navibus, quum confessionem concessi maris
 ultimam hosti expressisset, Chium, quo ante navale
 prælium cursum a Samo intenderat, navigat : ibi
 naves in prælio quassatas quum refecisset, L. Æmi-
 lium Scaurum cum triginta navibus Hellespontum
 ad exercitum trajiciendum misit : Rhodias, parte
 prædæ et spoliis navalibus decoratas, domum redire
 jubet. Rhodii inpigre prævertere, ad trajiciendas-
 que copias consulis iere : atque, eo quoque functi
 officio, tum demum Rhodum rediere. Classis Ro-
 mana ab Chio Phocæam trajecit : in sinu maris in- Phocææ
 timo posita hæc urbs est, oblonga forma. Duûm situs.
 millium et quingentorum passuum spatium murus
 amplectitur ; coit deinde ex utraque parte in ar-
 tiorem velut cuneum, Lamptera ipsi adpellant :
 mille et ducentos passus ibi latitudo patet ; inde
 in altum lingua mille passuum excurrrens me-
 dium fere sinum velut nota distinguit ; ubi cohæ-
 ret faucibus angustis, duos in utranque regionem
 versos portus tutissimos habet : qui in meridiem
 vergit, ab re adpellant Naustathmon, quia ingen-
 tem vim navium capit : alter prope ipsum Lam-
 ptera est.

XXXII. Hos portus tutissimos quum occupasset Eam classis
 Romana classis ; priusquam aut scalis, aut operi- Romana
 bus, mœnia adgrederetur, mittendos censuit prætor, obpugnat.
 qui principum magistratumque animos tentarent :

U. C. 562. postquam obstinatos vidit, duobus simul locis ob-
 A. C. 190. pugnare est adortus. Altera pars infrequens ædifi-
 ciis erat; templa Deum aliquantum tenebant loci:
 ea prius ariete admoto, quaterne muros turresque
 cœpit: deinde, quum eo multitudo obcurreret ad
 defendendam, altera quoque parte admotus aries:
 et jam utrinque sternebantur muri. Ad quorum
 casum quum inpetum Romani milites per ipsam
 stragem ruinarum facerent, alii scalis etiam adscen-
 sum in muros tentarent; adeo obstinate restiterunt
 oppidani, ut facile adpareret, plus in armis et vir-
 tute, quam in mœnibus, auxilii esse: coactus ergo
 periculo militum prætor receptui cani jussit, ne ob-
 jiceret incautos furentibus desperatione ac rabie.
 Diremto proelio, ne tum quidem ad quietem versi;
 sed undique omnes ad munienda et obmolienda,
 quæ ruinis strata erant, concurrerunt. Huic operi
 intentis supervenit Q. Antonius, a prætore missus:
 qui, castigata pertinacia eorum, *Majorem curam Ro-*
manis, quam illis, ostenderet, esse, ne in perniciem
urbis pugnaretur: si absistere furore vellent, potesta-
tem iis dare eadem conditione, qua prius C. Livii in
fidem venissent, se tradendi. Hæc quum audissent,
 quinque dierum spatio ad deliberandum sumto, ten-
 tata interim spe auxilii ab Antiocho, postquam le-
 gati missi ad regem, nihil in eo esse præsidii, retu-
 lerant; tum portas aperuerunt, pacti ne quid hos-
 tile paterentur. Quum signa in urbem inferrentur, et
 pronunciasset prætor, parci se deditis velle, clamor
 undique est sublatus, *indignum facinus esse, Phocæ-*
enses, nunquam fidos socios, semper infestos hostes, in-
pune eludere. Ab hæ voce, velut signo a prætore
 dato, ad diripiendam urbem passim discurrerunt.

Phocæen-
 ses portas
 aperuerunt.

Æmilius primo resistere et revocare, dicendo, *cap-* U. C. 562.
tas, non deditas, diripi urbes: et in his tamen arbi- A. C. 190.
trium esse imperatoris, non militum. Postquam ira Urbs di-
 et avaritia imperio potentiora erant, præconibus per ripitur.
 urbem missis, liberos omnes in forum ad se conve-
 nire jubet, ne violarentur: et in omnibus, quæ
 ipsius potestatis fuerunt, fides constitit prætoris.
 Urbem, agrosque, et suas leges iis restituit: et, quia
 jam hiems adpetebat, Phocææ portus* ad hibernan-
 dum classi delegit.

XXXIII. Per idem fere tempus consuli, trans- Cos. Lysi-
 gresso Æniorum Maronitarumque fines, nunciatur, machiam
 victam regiam classem ad Myonnesum, relictamque venit.
 a præsidio Lysimachiam esse. Id multo, quam de
 navali victoria, lætius fuit: utique postquam eo ve-
 nerunt, refertaque urbs omnium rerum commeati-
 bus, velut in adventum exercitus præparatis, eos
 excepit; ubi inopiam ultimam laboremque in obsi-
 denda urbe sibi proposuerant. Ibi paucos dies sta-
 tiva habuere, ut impedimenta ægrique consequeren-
 tur, qui passim per omnia Thraciæ castella, fessi
 morbis ac longitudine viæ, relictæ erant. Receptis
 omnibus, ingressi rursus iter per Chersonesum, Hel- Hellespon-
 lespontum perveniunt: ubi, omnibus cura regis Eu- tum tra-
 menis ad trajiciendum præparatis, velut in pacata jicit.
 litora, nullo prohibente, aliis alio delatis navibus,
 sine tumultu trajecere. Ea vero res Romanis auxit
 animos, concessum sibi transire cernentibus in Asi-
 am; quam rem magni certaminis futuram credide-
 rant. Stativa deinde ad Hellespontum aliquamdiu
 habuerunt, quia dies forte, quibus ancilia moventur,
 religiosi ad iter inciderant: iidem dies P. Scipionem
 propiore etiam religione, quia Salius erat, disjunct-

U. C. 562. erant ab exercitu ; caussaque et is ipse moræ erat,
 A. C. 190. dum consequeretur.

Legatus
 Antiochi
 de pace.

XXXIV. Per eos forte dies legatus ab Antiocho in castra venerat Byzantius Heraclides, de pace adferens mandata : quam inpetrabilem fore, magnam ei spem adtulit mora et cunctatio Romanorum ; quos, simul Asiam adtigissent, effuso agmine ad castra regia ituros crediderat. Statuit tamen non prius adire consulem, quam P. Scipionem : et ita mandatum ab rege erat : in eo maximam spem habebat, præterquam quod et magnitudo animi et satietas gloriæ placabilem eum maxime faciebat ; notumque erat gentibus, qui victor ille in Hispania, qui deinde in Africa fuisset : etiam quod filius ejus captus in potestate regis erat. Is ubi, et quando, et quo casu captus sit, sicut pleraque alia, parum inter auctores constat : alii principio belli, a Chalcide Oreum petentem, circumventum ab regiis navibus tradunt : alii, postquam transitum in Asiam est, cum turma Fregellana missum exploratum ad regia castra, effuso obviam equitatu, quum reciperet sese, in eo delapsum tumultu ex equo, cum duobus equitibus obpressum, ita ad regem deductum esse. Illud satis constat, si pax cum populo Romano maneret, hospitiumque privatim regi cum Scipionibus esset, neque liberalius, neque benignius haberi collique adolescentem, quam cultus est, potuisse. Ob hæc quum adventum P. Scipionis legatus expectasset, ubi is venit, consulem adit, petitque, ut mandata audiret.

Legati oratio
 de pace.

XXXV. Advocato frequenti consilio, legati verba sunt audita. Is, multis ante legationibus nequidquam ultro citroque de pace missis, eam ipsam fiduciam in-

petrandi sibi esse, dixit, quod priores legati nihil in- U. C. 562.
A. C. 190.
petrassent. Smyrnam enim, et Lampsacum, et Alex-
andriam Troadem, et Lysimachiam in Europa, jacta-
tas in illis disceptationibus esse: quarum Lysimachia
jam cecidisse regem, ne quid in Europa habere eum di-
cerent; eas, quæ in Asia sint, civitates tradere, para-
tum esse, et si quas alias Romani, quod suarum par-
tium fuerint, vindicare ab imperio regio velint. In-
pensæ quoque, in bellum factæ, partem dimidiam re-
gem præstaturum populo Romano. Hæ conditiones
erant pacis. Reliqua oratio fuit, Ut memores rerum
humanarum, et suæ fortunæ moderarentur, et alienam
ne urgerent. Finirent Europa imperium: id quoque
immensum esse. Et parari singula acquirendo facilius
potuisse, quam universa teneri posse: quod si Asiæ
quoque partem aliquam abstrahere velint, dummodo
non dubiis regionibus finiant, vinci suam temperantiam
Romana cupiditate, pacis et concordiae causa, regem
passurum. Ea, quæ legato magna ad pacem inpe-
trandam videbantur, parva Romanis visa. Nam, et Respon-
inpensam, quæ in bellum facta esset, omnem præstare sum Ro-
regem, æquum censebant, cujus culpa bellum excita- manorum.
tum esset; et, non Ionia modo atque Æolide deduci
debere præsidia regia: sed, sicut Græcia omnis libe-
rata esset, ita, quæ in Asia sint, omnes liberari urbes.
Id aliter fieri non posse, quam ut cis Taurum montem
possessione Asiæ Antiochus cedat.

XXXVI. Legatus, postquam nihil æqui in con- Africani
animum
tentat le-
gatus.
 silio inpetrare se censebat, privatim (sic enim inpe-
 ratum erat) P. Scipionis tentare animum est cona-
 tus. Omnium primum, filium ei sine pretio reddi-
 turum regem, dixit: deinde, ignarus et animi Sci-
 pionis, et moris Romani, auri pondus ingens est

U. C. 562. pollicitus, et, nomine tantum regio excepto, societatem omnis regni, si per eum pacem inpetrasset.

A. C. 190. Responsum Africani. Ad ea Scipio: *Quod Romanos omnes, quod me, ad quem missus es, ignoras, minus miror; quum te fortunam ejus, a quo venis, ignorare cernam. Lysimachia tenenda erat, ne Chersonesum intraremus; aut ad Hellespontum obsistendum, ne in Asiam trajiceremus: si pacem tamquam ab sollicitis de belli eventu petituri eratis. Concesso vero in Asiam transitu, et non solum frenis, sed etiam jugo accepto, quæ disceptatio ex æquo, quum imperium patiendum sit, relicta est? Ego ex munificentia regia maximum donum filium habebo: aliis, Deos precor, ne umquam fortuna egeat mea; animus certe non egebit. Pro tanto in me munere gratum me esse in se sentiet, si privatam gratiam pro privato beneficio desiderabit: publice nec habeo quidquam ab illo, nec dabo. Quod in præsentia dare possim, fidele consilium est. Abi, nuncia meis verbis, bello absistat, pacis conditionem nullam recuset. Nihil ea moverant regem, tutam fore belli aleam ratum, quando perinde ac victo jam sibi leges dicerentur: omissa igitur in præsentia mentione pacis, totam curam in belli adparatum intendit.*

Consul ad Antiochum ducit.

XXXVII. Consul, omnibus præparatis ad præposita exsequenda, quum ex stativis movisset, Dardanum primum, deinde Rhœteum, utraque civitate obviam effusa, venit: inde Ilium processit, castrisque in campo, qui est subjectas mœnibus, positus, in urbem arcemque quum escendisset, sacrificavit Minervæ præsidi arcis; et Iliensibus in omni rerum verborumque honore ab se oriundos Romanos præferentibus, et Romanis lætis origine sua: inde profecti sextis castris ad caput Caici amnis pervenerunt.

Eo et Eumenes rex, conatus primo ab Hellesponto U. C. 562.
 reducere classem in hiberna Elæam, adversis deinde A. C. 190.
 ventis quum aliquot diebus superare Lecton pro-
 montorium non potuisset, in terram egressus, ne
 deesset principiis rerum, qua proximum fuit, in cas-
 tra Romana cum parva manu contendit. Ex castris
 Pergamum remissus ad commeatus expediendos, tra-
 dito frumento, quibus jusserat consul, in eadem sta-
 tiva rediit: inde, plurium dierum præparatis cibariis,
 consilium erat ire ad hostem, priusquam hiems ob-
 primeret. Regia castra circa Thyatira erant: ibi
 quum audisset Antiochus, P. Scipionem ægrum E- Antiochus
 læam delatum, legatos, qui filium ad eum reduce- Africano
 rent, misit. Non solum animo patrio gratum mu- filium re-
 nus, sed corpori quoque salubre gaudium fuit: sa- mittit.
 tiatusque tandem complexu filii, *Renunciate, inquit,*
gratias regi me agere: referre gratiam aliam nunc
non posse, quam ut suadeam, ne ante in aciem descen-
dat, quam ut in castra me redisse audierit. Quam-
 quam sexaginta duo millia peditum, plus duodecim
 millia equitum animos interdum ad spem certaminis
 faciebant; motus tamen Antiochus tanti auctoritate
 viri, in quo ad incertos belli eventus omnis fortunæ
 posuerat subsidia, recepit se, transgressus Phrygium
 amnem, circaque Magnesiam, quæ ad Sipylum est,
 posuit castra: et, ne, si extrahere tempus vellet,
 munimenta Romani tentarent, fossam sex cubita
 altam, duodecim latam quum duxisset, extra duplex
 vallum fossæ circumdedit: interiore labro murum
 cum turribus crebris objecit; unde facile arceri
 transitu fossæ hostis posset.

XXXVIII. Consul, circa Thyatira regem esse
 ratus, continuis itineribus quinto die ad Hyrcanum

U. C. 562. campum descendit : inde quum profectum audisset,
 A. C. 190. secutus vestigia citra Phrygium amnem, quatuor millia ab hoste posuit castra. Eo mille ferme equites, (maxima pars Gallogræci erant, et Dahæ quidam aliarumque gentium sagittarii equites intermixti) tumultuose amne trajecto, in stationes inpetum fecerunt. Primo turbaverunt incompósitos : deinde, quum longius certamen fieret, Romanorum, ex propinquis castris facili subsidio, cresceret numerus, regii, fessi jam et plures non sustinentes, recipere se conati, circa ripam amnis, priusquam flumen ingrederentur, ab instantibus tergo aliquot interfecti sunt. Biduum deinde silentium fuit, neutris transgradientibus amnem : tertio post die Romani simul omnes transgressi sunt, et duo millia fere et quingentos passus ab hoste posuerunt castra. Metantibus et muniendo occupatis, tria millia delecta equitum peditumque regionum magno terrore ac tumultu advenire : aliquanto pauciores, qui in statione erant, duo tamen millia, per se, nullo a munimento castrorum milite avvocato, et primo æquum prælium sustinere, et, crescente certamine, pepulerunt hostes, centum ex his occisis, centum ferme captis. Per quatrimum insequens instructæ utrimque acies pro vallo steterē : quinto die Romani processere in medium campi. Antiochus nihil promovit signa, ita ut extremi minus mille pedes a vallo abessent.

XXXIX. Consul, postquam detractari certamen vidit, postero die in consilium advocavit. *Quid sibi faciendum esset, si Antiochus pugnandi copiam non faceret ? Instare hiemem : aut sub pellibus habendos milites fore, aut, si concedere in hiberna vellent, differendum esse in æstatem bellum.* Nullum unquam hos-

tem Romani æque contemserunt: conclamatum un- U. C. 562.
dique est, *duceret extemplo, et uteretur ardore mili-* A. C. 190.
tum: qui, tamquam non pugnandum cum tot milli-
bus hostium, sed par numerus pecorum trucidandus
esset, per fossas, per vallum castra invadere parati
erant, si in prælium hostis non exiret. Cn. Domi-
tius, ad explorandum iter, et qua parte adiri vallum
hostium posset, missus, postquam omnia certa retu-
lit, postero die propius castra admoveri placuit:
tertio signa in medium campi prolata, et instrui
acies cœpta est. Nec Antiochus ultra tergiversan- Acies
dum ratus, ne et suorum animos minueret detrac- utrimque
tando certamen, et hostium spem augeret, et ipse instruun-
copias eduxit; tantum progressus a castris, ut di- tur.
micaturum adpareret. Romana acies unius prope Romana.
formæ fuit, et hominum et armorum genere: duæ
legiones Romanæ, duæ sociûm ac Latini nominis
erant: quina millia et quadringenos singulæ habe-
bant. Romani mediam aciem, cornua Latini tenu-
erunt: hastatorum prima signa, deinde principum
erant: triarii postremos claudebant. Extra hanc
veluti justam aciem, a parte dextera consul Achæ-
orum cætratis inmixtos auxiliares Eumenis, tria
millia ferme peditum, æquata fronte instruxit: ultra
eos equitum minus tria millia obposuit; ex quibus
Eumenis octingenti, reliquus omnis equitatus Ro-
manus erat: extremos Tralles et Cretenses (quin-
gentorum utrique numerum explebant) statuit. Læ-
vum cornu non videbatur egere talibus auxiliis, quia
flumen ab ea parte ripæque deruptæ claudebant:
quatuor tamen inde turmæ equitum obpositæ. Hæc
summa copiarum erat Romanis, et duo millia mix-
torum Macedonum Thracumque, qui voluntate se-

U. C. 562. cuti erant. Hi præsidio relictis sunt castris. Sex-
 A. C. 190. decim elephantos post triarios in subsidio locaverunt: nam, præterquam quod multitudinem regionum elephantorum (erant autem quatuor et quinquaginta) sustinere non videbantur posse, ne pari quidem numero Indicis Africi resistunt; sive quia magnitudine, (longe enim illi præstant) sive robore animorum vincuntur.

Regia.

XL. Regia acies varia magis multis gentibus, dissimilitudine armorum auxiliorumque erat: decem et sex millia peditum more Macedonum armati fuere, qui phalangitæ adpellabantur: hæc media acies fuit in fronte, in decem partes divisa. Partes eas interpositis binis elephantis distinguebat: a fronte introrsus in duos et triginta ordines armatorum acies patebat: hoc et roboris in regiis copiis erat, et, perinde quum alia specie, tum eminentibus tantum inter armatos elephantis, magnum terrorem præbebat. Ingentes ipsi erant: addebant speciem frontalia, et cristæ, et tergo inpositæ turres, turribusque superstantes, præter rectorem, quaterni armati. Ad latus dexterum phalangitarum mille et quingentos equites Gallogræcorum obposuit: his tria millia equitum loricatorum (cataphractus ipsi adpellant) adjunxit: addita his ala mille ferme equitum: agema eam vocabant. Medi erant lecti viri, et ejusdem regionis mixti multarum gentium equites: continens his grex sedecim elephantorum est obpositus in subsidiis: ab eadem parte, paullulum producto cornu, regia cohors erat: Argyraspides a genere armorum adpellabantur. Dahæ deinde, equites sagittarii, mille et ducenti: tum levis armatura trium millium, pari ferme numero pars Cretenses, pars

Tralles: duo millia et quingenti Mysi sagittariis U. C. 562.
 adjuncti erant. Extremum cornu claudebant qua- A. C. 190.
 tuor millia mixti Cyrtæi funditores, et Elymæi sagittarii. Ab lævo cornu phalangitis adjuncti erant Gallogræci equites mille et quingenti: et similiter his armati duo millia Cappadocum: (ab Ariarathe missi erant regi). Inde auxiliares mixti omnium generum duo millia et septingenti, et tria millia cataphractorum equitum, et mille alii equites, regia ala levioribus tegumentis suis equorumque, alio haud dissimili habitu: Syri plerique erant Phrygibus et Lydis inmixti. Ante hunc equitatum falcatae quadrigæ et cameli, quos adpellant dromadas: his insidebant Arabes sagittarii, gladios habentes tenues, longos quaterna cubita, ut ex tanta altitudine contingere hostem possent. Inde alia multitudo, par ei, quæ in dextro cornu erat; primi Tarentini, deinde Gallogræcorum equitum duo millia et quingenti, inde Neocretes mille, et eodem armatu Cares et Cilices mille et quingenti, et totidem Tralles, et tria millia cætratorum; (Pisidæ hi erant, et Pamphylii, et Lycii) tum Cyrtæorum et Elymæorum paria in dextro cornu locatis auxilia, et sexdecim elephanti modico intervallo distantes.

XLI. Rex ipse in dextero cornu erat: Seleucum filium et Antipatrum fratris filium in lævo præposuit: media acies tribus permissa, Minioni, et Zeux- Pugna.
 idi, et Philippo magistro elephantorum. Nebula matutina, crescente die levata in nubes, caliginem dedit: humor inde, ab austro velut, perfudit omnia. Quæ nihil admodum Romanis, eadem perincommoda regiis erant: nam et obscuritas lucis in acie modica Romanis non adimebat in omnes partes conspectum; et humor, toto fere gravi armatu, nihil

U.C. 562. gladios aut pila hebetabat. Regii, tam lata acie, ne
 A. C. 190. ex medio quidem cornua sua circumspicere poterant, nedum extremi inter se conspicerentur: et humor arcus fundasque et jaculorum amenta emollierat. Falcatae quoque quadrigae, quibus se perturbaturum hostium aciem Antiochus crediderat, in suos terrorem verterunt: armatae autem in hunc maxime modum erant: cuspides circa temonem ab jugo decem cubita exstantes, velut cornua, habebant; quibus, quidquid obvium daretur, transfigerent: et in extremis jugis binæ circa eminebant falces; altera æquata jugo, altera inferior in terram devexa: illa, ut, quidquid ab latere objiceretur, absunderet; hæc, ut prolapsos subeuntesque contingeret: item ab axibus rotarum utrimque binæ eodem modo diversæ deligabantur falces. Sic armatas quadrigas, quia, si in extremo, aut in medio locatæ forent, per suos agendæ erant, in prima acie, ut ante dictum est, locaverat rex. Quod ubi Eumenes vidit, haud ignarus pugnae, et quam anceps esset auxilii genus, si quis pavorem magis equis injiceret, quam justa adoriretur pugna, Cretenses sagittarios, funditoresque, et jaculatores equitum, non confertos, sed, quam maxime possent, dispersos, excurrere jubet; simul omnibus partibus tela ingerere. Hæc velut procella, partim vulneribus missilium undique conjectorum, partim clamoribus dissonis, ita consternavit equos, ut repente, velut effrenati, passim incerto cursu ferrentur: quorum inpetus et levis armatura, et expediti funditores, et velox Cretensis momento declinabant: et eques insequendo tumultum ac pavorem equis camelisque, et ipsis simul consternatis, augebat, clamore et ab alia circumstantium turba multiplici adjecto. Ita medio inter duas acies campo exi-

guntur quadrigæ: amotoque inani ludibrio, tum de-
 mum ad justum proelium, signo utrimque dato, con-
 cursum est.

U. C. 562.

A. C. 190.

XLII. Ceterum vana illa res veræ mox cladis
 caussa fuit: auxilia enim subsidiaria, quæ proxima
 locata erant, pavore et consternatione quadrigarum
 territa, et ipsa in fugam versa, nudarunt omnia us-
 que ad cataphractus equites: ad quos quum, dissi-
 patis subsidiis, pervenisset equitatus Romanus, ne
 primum quidem inpetum pars eorum sustinuerunt:
 alii fusi sunt; alii propter gravitatem tegumento-
 rum armorumque obpressi sunt. Totum deinde
 lævum cornu inclinavit; et, turbatis auxiliaribus,
 qui inter equites, et quos adpellant phalangitas,
 erant, usque ad mediâ aciem terror pervenit. Ibi
 simul perturbati ordines, et inpeditus intercurso
 suorum usus prælongarum hastarum, (sarissas Ma-
 cedones vocant) intulere signa Romanæ legiones, et
 pila in perturbatos coniecere: ne interpositi quidem
 elephantum militem Romanum deterrebant, aduetum
 jam ab Africis bellis et vitare inpetum belluæ, et ex
 transverso aut pilis incessere, aut, si propius subire
 posset, gladio nervos incidere. Jam media acies
 fere omnis a fronte prostrata erat, et subsidia cir-
 cumita a tergo cædebantur: quum in parte alia fu-
 gam suorum, et prope jam ad ipsa castra clamorem
 paventium acceperet. Namque Antiochus a dextro
 cornu, quum ibi fiducia fluminis nulla subsidia cer-
 neret, præter quatuor turmas equitum, et eas, dum
 adplicant se suis, ripam nudantes, inpetum in eam
 partem cum auxiliis et cataphracto equitatu fecit:
 nec a fronte tantum instabat, sed, circumito a flu-
 mine cornu, jam ab latere urgebat; donec fugati

U. C. 562. equites primum, deinde proximi peditum effuso cursu
A. C. 190. ad castra compulsi sunt.

XLIII. Præerat castris M. Æmilius tribunus militum, M. Lepidi filius, qui post paucos annos pontifex maximus factus est. Is, qua fugam cernebat suorum, cum præsidio omni obcurrit; et stare primo, deinde redire in pugnam, jubebat, pavorem et turpem fugam increpans. Minæ exinde erant, in perniciem suam cæcos ruere, ni dicto parerent: postremo dat signum suis, ut primos fugientium cædant, turbam insequentium ferro et vulneribus in hostes redigant. Hic major timor minorem vicit: ancipiti coacti metu primo constiterunt; deinde et ipsi redierunt in pugnam, et Æmilius cum suo præsidio (erant autem duo millia virorum fortium) effuse sequenti regi acriter restitit. Et Attalus, Eumenis frater, a dextro cornu, a quo lævum hostium primo inpetu fugatum fuerat, ut ab sinistro fugam suorum et tumultum circa castra vidit, in tempore cum ducentis equitibus advenit. Antiochus, postquam et eos, quorum terga modo viderat, repetentes pugnam, et aliam et a castris et ex acie adfluentem turbam conspexit, in fugam vertit equum. Ita utroque cornu victores Romani per acervos corporum (quos in media maxime acie cumulaverant, ubi et robur fortissimorum virorum, et arma gravitate fugam inpedierant) pergunt ad castra diripienda: equites primi omnium Eumenis, deinde et alius equitatus toto passim campo sequuntur hostem, et postremos, ut quosque adepti sunt, cædunt. Ceterum fugientibus major pestis, intermixtis quadrigis, elephantisque, et camelis erat, et sua ipsorum turba: quum, solutis ordinibus, velut cæci super alios alii ruentes, incursu

Fugit Antiochus.

belluarum obtererentur. In castris quoque ingens, U.C. 562.
et major prope quam in acie, cædes est edita: nam A.C. 190.
et primorum fuga in castra maxime inclinavit; et
hujus fiducia multitudinis, qui in præsidio erant,
pertinacius pro vallo pugnarunt: retenti in portis
valloque, quæ se inpetu ipso capturos crediderant,
Romani, postquam tandem perruperunt, ab ira gra-
viores ediderunt cædem.

XLIV. Ad quinquaginta millia peditum cæsa eo
die dicuntur, equitum tria millia; mille et quadrin-
genti capti, et quindecim cum rectoribus elephantibus.
Romanorum aliquot vulnerati sunt; ceciderunt non
plus trecenti pedites, quatuor et viginti equites; et
de Eumenis exercitu quinque et viginti. Et illo qui-
dem die victores, direptis hostium castris, cum mag-
na præda in sua reverterunt; postero die spoliabant
cæsorum corpora, et captivos contrahebant. Legati
ab Thyatira et a Magnesia ad Sipylum ad dedendas
urbes venerunt. Antiochus, cum paucis fugiens, in
ipso itinere pluribus congregantibus se, modica ma-
nu armatorum media ferme nocte Sardes contendit:
inde, quum audisset, Seleucum filium et quosdam
amicorum Apameam prægressos, et ipse quarta vi-
gilia cum conjuge ac filia petit Apameam, Zenoni
tradita custodia urbis, Timone Lydiæ præposito:
quibus spretis, consensu oppidanorum et militum
qui in arce erant, legati ad consulem missi sunt.

XLV. Sub idem fere tempus et ab Trallibus, et a
Magnesia, quæ super Mæandrum est, et ab Epheso
legati ad dedendas urbes venerunt. Reliquerat E-
phesum Polyxenidas, audita pugna, et, classe usque
ad Patara Lyciæ pervectus, metu stationis Rhodia-
rum navium, quæ ad Megisten erat, in terram egres-

U. C. 562. sus, cum paucis itinere pedestri Syriam petiit. Asiæ
A. C. 190.

Antiochi
legatus pa-
cem petit.

civitates in fidem consulis ditionemque populi Romani sese tradebant. Sardibus jam consul erat: eo et P. Scipio ab Elæa, quum primum pati laborem viæ potuit, venit. Sub idem fere tempus caduceator ab Antiocho per P. Scipionem a consule petiit, inpetravitque, ut oratores mittere liceret regi. Paucos post dies Zeuxis, qui præfectus Lydiæ fuerat, et Antipater fratris filius venerunt: hi, prius Eumene convento, quem propter vetera certamina aversum maxime a pace credebant esse, et placatiore eo et sua et regis spe invento, tum P. Scipionem, et per eum consulem, adierunt: præbitoque iis petentibus frequenti consilio ad mandata edenda, *Non tam, quid ipsi dicamus, habemus, inquit Zeuxis, quam ut a vobis quæramus, Romani, quo piaculo expiare errorem regis, pacem veniamque inpetrare a victoribus possimus. Maximo semper animo victis regibus populisque ignoristis: quanto id majore et placatiore animo decet vos facere in hac victoria, quæ vos dominos orbis terrarum fecit? Positis jam adversus omnes mortales certaminibus, haud secus quam Deos, consulere et parcere vos generi humano oportet. Jam ante, quam legati venirent, decretum erat, quid responderetur: respondere Africanum placuit. Is in hunc modum locutus fertur: Romani ex iis, quæ in Deum immortalium potestate erant, ea habemus, quæ Dii dederunt. Animos, qui nostræ mentis sunt, eosdem in omni fortuna gessimus, gerimusque: neque eos secundæ res extulerunt, nec adversæ minuerunt. Ejus rei, ut alios omittam, Hannibalem vestrum vobis darem testem, nisi vos ipsos dare possem. Postquam Hellespontum trajecimus, priusquam castra regia, priusquam aciem*

videremus, quum communis Mars et incertus belli even-
tus esset, de pace vobis agentibus, quas pares paribus
ferebamus conditiones, easdem nunc victores victis feri-
mus. Europa abstinete, Asiaque omni, quæ cis Tau-
rum montem est, decedite. Pro impensis deinde in bel-
lum factis quindecim millia talentum Euboicorum da-
bitis: quingenta præsentia; duo millia et quingenta,
quum senatus populusque Romanus pacem comprobave-
rint; millia deinde talentum per duodecim annos. Eu-
meni quoque reddi quadringenta talenta, et quod fru-
menti reliquum ex eo, quod patri debitum est, placet.
Hæc quum pepigerimus, facturos vos ut pro certo ha-
beamus, erit quidem aliquod pignus, si obsides viginti
nostro arbitrato dabitis: sed numquam satis liquabit
nobis, ibi pacem esse populo Romano, ubi Hannibal
erit: eum ante omnia deposcimus. Thoantem quoque
Ætolum, concitorem Ætolici belli, qui et illorum fidu-
cia vos, et vestra illos in nos armavit, dedetis, et cum
eo Mnasimachum Acarnana, et Chalcidenses Philonem
et Ebulidam. In deteriore sua fortuna pacem faciet
rex, quia serius facit, quam facere potuit. Si nunc
moratus fuerit, sciat, regum majestatem difficilius ab
summo fastigio ad medium detrahi, quam a mediis ad
ima præcipitari. Cum his mandatis ab rege missi
erant legati, ut omnem pacis conditionem accipe-
rent: itaque Romam mitti legatos placuit. Consul
in hiberna exercitum Magnesiam ad Mæandrum et
Tralles Ephesumque divisit. Ephesum ad consulem
paucos post dies obsides ab rege adducti sunt: et
legati, qui Romam irent, venerunt. Eumenes quo-
que eodem tempore profectus est Romam, quo le-
gati regis: secutæ eos sunt legationes omnium Asiæ
populorum.

U. C. 562.

A. C. 190.

Pacis con-
ditiones.

U. C. 562. XLVI. Dum hæc in Asia geruntur, duo fere sub
 A. C. 190. idem tempus cum triumphi spe proconsules de provinciis Romam redierunt; Q. Minucius ex Liguri-
 bus, M'. Acilius ex Ætolia. Auditis utriusque rebus
 gestis, Minucio negatus triumphus, Acilio magno
 consensu decretus: isque triumphans de rege An-
 tiocho et Ætolis urbem est invectus. Præolata sunt
 in eo triumpho signa militaria ducenta triginta: et
 argenti infecti tria millia pondo; signati tetra-
 drachmûm Atticûm centum tredecim millia, cisto-
 phorûm ducenta quadraginta octo: vasa argentea
 cælata multa, magnique ponderis. Tulit et supellec-
 tilem regiam argenteam, ac vestem magnificam;
 coronas aureas, dona sociarum civitatum, quadra-
 ginta quinque; spolia omnis generis: captivos no-
 biles, Ætolos et regios duces, sex et triginta duxit.
 Damocritus Ætolorum dux paucos ante dies, quum
 e carcere nocte effugisset, in ripa Tiberis consecutis
 custodibus, priusquam comprehenderetur, gladio se
 transfixit. Milites tantum, qui sequerentur currum,
 defuerunt: alioqui magnificus et spectaculo et fama
 rerum triumphus fuit. Hujus triumphi minuit læti-
 tiam nuncius ex Hispania tristis, adversa pugna in
 Vastetanis, ductu L. Æmilii proconsulis, apud oppi-
 dum Lyconem cum Lusitanis sex millia de exercitu
 Romano cecidisse. Ceteros, paventes intra vallum
 compulsos, ægre castra defendisse, et in modum fugi-
 entium magnis itineribus in agrum pacatum reductos.
 Hæc ex Hispania nunciata. Ex Gallia legatos Placen-
 tinorum et Cremonensium L. Aurunculeius prætor in
 senatum introduxit: iis querentibus inopiam colo-
 norum, aliis belli casibus, aliis morbo absumtis,
 quosdam tædio adcolarum Gallorum reliquisse colo-

M'. Acilius
 de Antiocho
 triumphat.

Æmilius
 Paullus in
 Hispania
 victus.

nias, decrevit senatus, *Uti C. Lælius consul, si ei vi-* U. C. 562.
deretur, sex millia familiarum conscriberet, quæ in eas A. C. 190.
colonias dividerentur : et ut L. Aurunculeius prætor tri-
umviros crearet ad eos colonos deducendos. Creati M.
 Atilius Serranus, L. Valerius P. F. Flaccus, L. Vale-
 rius C. F. Tappo.

XLVII. Haud ita multo post, quum jam consula-
 rium comitiorum adpeteret tempus, C. Lælius con-
 sul ex Gallia Romam rediit : is non solum, ex facto
 absente se senatusconsulto, in supplementum Cre-
 monæ et Placentiæ colonos scripsit ; sed, ut novæ
 coloniæ duæ in agrum, qui Boiorum fuisset, deduce-
 rentur, et retulit, et auctore eo Patres censuerunt.
 Eodem tempore L. Æmilii prætoris literæ adlatae
 de navali pugna ad Myonnesum facta, et L. Scipio-
 nem consulem exercitum in Asiam trajecisse. Vic-
 toriæ navalis ergo in unum diem supplicatio decreta
 est : in alterum diem, quod exercitus Romanus tum
 primum in Asia posuisset castra, ut ea res prospera
 et læta eveniret : vicenis majoribus hostiis in singu-
 las supplicationes sacrificare consul est jussus. Inde
 consularia comitia magna contentione habita. M.
 Æmilius Lepidus petebat adversa fama hominum,
 quod provinciam Siciliam petendi caussa, non con-
 sulto senatu, ut sibi id facere liceret, reliquisset :
 petebant cum eo M. Fulvius Nobilior, Cn. Manlius
 Vulso, M. Valerius Messalla. Fulvius consul unus
 creatur, quum ceteri centurias non explessent : is-
 que postero die Cn. Manlium, Lepido dejecto, (nam
 Messalla tacuit) collegam dixit. Prætores exinde
 facti, duo Q. Fabii, Labeo et Pictor, (flamen Qui-
 rinalis eo anno inauguratus fuerat) M. Sempronius

Tuditanus, Sp. Postumius Albinus, L. Plautius Hypsæus, L. Bæbius Dives.

U. C. 563. XLVIII. M. Fulvio Nobiliore et Cn. Manlio

A. C. 189. Vulsone consulibus, Valerius Antias auctor est, rumorem celebrem Romæ fuisse, et pene pro certo habitum, recipiendi Scipionis adolescentis caussa, consulem L. Scipionem, et cum eo P. Africanum, in conloquium evocatos regis, et ipsos comprehensos esse; et, ducibus captis, confestim ad castra Romana exercitum ductum, eaque expugnata, et deletas omnes copias Romanorum esse. Ob hæc Ætolos sustulisse animos, et abnuisse imperata facere, principesque eorum in Macedoniam, et in Dardanos, et in Thraciam, ad conducenda mercede auxilia profectos. Hæc qui nunciarent Romam, A. Terentium Varronem et M. Claudium Lepidum ab A. Cornelio proprætore ex Ætolia missos esse. Subtexit deinde fabulæ huic, legatos Ætolos in senatu inter cetera hoc quoque interrogatos esse; unde audissent, imperatores Romanos in Asia captos ab Antiocho rege, et exercitum deletum esse; Ætolos respondisse, ab suis legatis se, qui cum consule fuerint, certiores factos. Rumoris hujus quia neminem alium auctorem habeo, neque adfirmata res mea opinione sit, nec pro vana prætermissa.

Legati
Ætolorum
infecta pace
dimissi.

XLIX. Ætoli legati in senatum introducti, quum et caussa eos sua et fortuna hortaretur, ut conitendo seu suæ culpæ seu errori veniam peterent supplices; orsi a beneficiis in populum Romanum, et prope exprobrantes virtutem suam in Philippi bello, et obfenderunt aures insolentia sermonis; et eo, vetera et oblitterata repetendo, rem adduxerunt, ut

haud paullo plurium maleficiorum gentis, quam U. C. 563.
 beneficiorum, memoria subiret animos Patrum, et, A. C. 189.
 quibus misericordia opus erat, iram et odium irrita-
 rent. Interrogati ab uno senatore, *permitterentne*
arbitrium de se populo Romano? deinde ab altero,
habiturine eosdem, quos populus Romanus, socios et
hostes essent? nihil ad ea respondentes, egredi tem-
 plo jussi sunt. Conclamatum deinde prope ab uni-
 verso senatu est, *Totes adhuc Antiochi Ætolos esse, et*
ex unica ea spe pendere animos eorum. Itaque bellum
cum haud dubiis hostibus gerendum, perdomandosque
feroces animos esse. Etiam illa res accendit, quod
 eo ipso tempore, quo pacem ab Romanis petebant,
 Dolopiæ atque Athamaniæ bellum inferebant. Se-
 natusconsultum in M. Acilii sententiam, qui Antio-
 chum Ætolosque devicerat, factum est, *Ut Ætoli eo*
die juberentur proficisci ab urbe, et intra quintumdecim-
um diem Italia excedere. A. Terentius Varro ad
 custodiendum iter eorum missus, denunciatumque,
Si qua deinde legatio ex Ætolis, nisi permissu impe-
ratoris, qui eam provinciam obtineret, et cum legato
Romano, venisset Romam, pro hostibus omnes futuros.
 Ita dimissi Ætoli.

L. De provinciis deinde consules retulerunt: sor-
 tiri eos Ætoliam et Asiam placuit: qui Asiam sor-
 titus esset, exercitus ei, quem L. Scipio haberet, est
 decretus, et in eum supplementum quatuor millia
 peditum Romanorum, ducenti equites, et sociorum
 ac Latini nominis octo millia peditum, et quadrin-
 genti equites: his copiis ut bellum cum Antiocho
 gereret. Alteri consuli exercitus, qui erat in Æto-
 lia, est decretus; et, ut supplementum scriberet,
 permissum, civium sociorumque eundem numerum,

U. C. 563. quem collega: naves quoque idem consul, quæ
A. C. 189. priore anno paratæ erant, ornare jussus, ac ducere
secum: nec cum Ætolis solum bellum gerere, sed
etiam in Cephalleniam insulam trajicere. Manda-
tum eidem, ut, si per commodum reipublicæ facere
posset, ut ad comitia Romam rediret: nam, præ-
terquam quod magistratus annui subrogandi essent,
censores quoque placere creari: si qua res eum te-
neret, senatum certiolem faceret, se ad comitiolum
tempus obcurrere non posse. Ætolia M. Fulvio,
Asia Cn. Manlio sorte evenit. Prætores deinde sor-
titi sunt, Sp. Postumius Albinus urbanam et inter
peregrinos, M. Sempronius Tuditanus Siciliam, Q.
Fabius Pictor flamen Quirinalis Sardiniam, Q. Fa-
bius Labeo classem, L. Plautius Hypsæus Hispan-
iam citeriorem, L. Bæbius Dives Hispaniam ulte-
riorem. Siciliæ legio una et classis, quæ in ea pro-
vincia erat, decreta; et ut duas decumas frumenti
novus prætor imperaret Siculis, earum alteram in
Asiam, alteram in Ætoliam mitteret. Idem ab
Sardis exigi, atque ad eosdem exercitus id frumen-
tum, ad quos Siculum, deportari jussum. L. Bæbio
supplementum in Hispaniam datum mille Romani
pedites, equites quinquaginta, et sex millia peditum
Latini nominis, ducenti equites. Plautio Hypsæo
in Hispaniam citeriorem mille Romani dati sunt pe-
dites, duo millia sociûm Latini nominis, et ducenti
equites: cum his supplementis ut singulas legiones
duæ Hispaniæ haberent. Prioris anni magistratibus,
C. Lælio cum suo exercitu prorogatum in annum
imperium est: prorogatum et P. Junio proprætori
in Etruria cum eo exercitu, qui in provincia esset;
et M. Tuccio proprætori in Brutiis et Apulia.

LI. Priusquam in provincias prætores irent, cer-
 tamen inter P. Licinium pontificem maximum fuit
 et Q. Fabium Pictorem flaminem Quirinalem, quale
 patrum memoria inter L. Metellum et Postumium
 Albinum fuerat. Consulem illum, cum C. Lutatio
 collega in Siciliam ad classem proficiscentem, ad
 sacra retinuerat Metellus pontifex maximus; præ-
 torem hunc, ne in Sardiniam proficisceretur, P. Li-
 cinius tenuit. Et in senatu, et ad populum magnis
 contentionibus certatum est; et imperia inhibita
 ultro citroque, et pignora capta, et multæ dictæ, et
 tribuni adpellati, et provocatum ad populum est.
 Religio ad postremum vicit, ut dicto audiens esset
 flamen pontifici; et multæ ex jussu populi remissæ.
 Ira provinciæ ereptæ prætorem magistratu abdicare
 se conantem Patres auctoritate sua deterruerunt:
 et, ut jus inter peregrinos diceret, decreverunt. De-
 lectibus deinde intra paucos dies (neque enim multi
 milites legendi erant) perfectis, consules prætores-
 que in provincias proficiscuntur. Fama deinde de
 rebus in Asia gestis temere vulgata sine auctore: et
 post dies paucos nuncii certi literæque imperatoris
 Romam adlatæ; quæ non tantum gaudium ab re-
 centi metu adtulerunt, (desierant enim victum in
 Ætolia metuere) quam averterunt famam: quod in-
 euntibus id bellum gravis hostis et suis viribus, et
 quod Hannibalem rectorem militiæ haberet, visus
 fuerat. Nihil tamen aut de consule mittendo in
 Asiam mutandum, aut minuendas ejus copias, cen-
 suerunt; metu, ne cum Gallis foret bellandum.

LII. Haud multo post M. Aurelius Cotta, legatus
 L. Scipionis, cum Antiochi regis legatis, et Eu-
 menes rex Rhodique Romam venerunt. Cotta in
 senatu primum, deinde in concione jussu Patrum,

U. C. 563.

A. C. 189.

Certamen

inter pont.

max. et fl.

Quirina-

lem.

U. C. 563. quæ acta in Asia essent, exposuit. Supplicatio inde
A. C. 189. in triduum decreta est, et quadraginta majores hos-

Senatus
Eumeni
datus.

tiae immolari jussæ. Tum omnium primum Eumeni senatus datus est. Is quum breviter et egisset gratias Patribus, quod obsidione se ac fratrem exemissent, regnumque ab injuriis Antiochi vindicassent: et gratulatus esset, quod mari terraque prospere res gessissent; quodque regem Antiochum, fustum fugatumque et exutum castris, prius Europa, post et Asia, quæ cis Taurum montem est, expulissent: sua deinde merita malle eos ex imperatoribus suis legatisque, quam se commemorante, cognoscere, dixit. Hæc adprobantibus cunctis, jubentibusque dicere ipsum, omissa in id verecundia, quid sibi a senatu populoque Romano tribui æquum censeret: propensius cumulatusque, si quo possit, prout ejus merita sint, senatum facturum; ad ea rex: Si ab aliis sibi premiorum optio deferretur, libenter, data modo facultate consulendi senatum Romanum, consilio amplissimi ordinis usurum fuisse, ne quid aut immoderate cupisse, aut petisse parum modeste videri posset: verum enimvero, quum ipsi daturi sint, multo magis munificentiam eorum in se fratresque suos ipsorum arbitrii debere esse. Nihil hac oratione ejus Patres conscripti deterriti sunt, quo minus dicere ipsum juberent: et quum aliquamdiu, hinc indulgentia, hinc modestia, inter permittentes in vicem, non magis mutua, quam inexplicabili facilitate, certatum esset, Eumenes templo excessit. Senatus in eadem prestare sententia, ut absurdum esse diceret, ignorare regem, quid sperans, aut petens venerit: quæ adcommodata regno suo sint, ipsum optime scire: Asiam longe melius, quam senatum, nosse: revocandum igitur et cogendum, quæ vellet, quæque sentiret, expromere.

LIII. Reductus a prætore in templam rex, et di- U. C. 563.
 cere jussus: *Perseverassem, inquit, tacere, Patres* A. C. 189.
conscripti, nisi Rhodiorum legationem mox vocaturos Oratio
vos scirem: et, illis auditis, mihi necessitatem fore di- Eumenis.
cendi. Quæ quidem eo difficilior oratio erit, quod ea
postulata eorum futura sint, ut non solum nihil, quod
contra me sit, sed ne quod ad ipsos quidem proprie
pertineat, petere videantur. Agent enim causam civi-
tatum Græcarum, et liberari eas dicent debere: quo
inpetrato, cui dubium est, quin et a nobis reversuri sint
non eas modo civitates, quæ liberabuntur, sed etiam
veteres stipendiarias nostras; ipsi autem tanto obligatos
beneficio verbo socios, re vera subjectos imperio et ob-
noxios habituri sint? Et, (si Diis placet) quum has
tantas opes adfectabunt, dissimulabunt, ulla parte id
ad se pertinere: vos modo id decere, et conveniens esse
antefactis, dicent. Hæc vos ne decipiat oratio, provi-
dendum vobis erit; neve non solum inæqualiter alios
nimum deprimatis ex sociis vestris, alios præter modum
extollatis; sed etiam, ne, qui adversus vos arma tulerint,
in meliore statu sint, quam socii et amici vestri.
Quod ad me attinet, in aliis rebus cessisse intra finem
juris mei cuilibet videri malim, quam nimis pertinaciter
in obtinendo eo tetendisse; in certamine autem ami-
citiae nostræ, benevolentiae erga vos, honoris, qui a vobis
habebitur, minime æquo animo vinci possum. Hanc
ego maximam hereditatem a patre accepi, qui primus
omnium Asiam Græciamque incolentium in amicitiam
vestram venit, eamque perpetua et constanti fide ad ex-
tremum finem vitæ perduxit: nec dumtaxat animum
vobis bonum ac fidelem præstitit, sed omnibus interfuit
bellis, quæ in Græcia gessistis, terrestribus, navalibus;
omni genere commeatum ita, ut nemo sociorum res-

U. C. 563. *trorum æquari ulla parte posset, vos adjuvit. Post-*
 A. C. 189. *remo quum Bæotos ad societatem vestram hortaretur,*
in ipsa concione intermortuus, haud multo post exspi-
ravit. Hujus ego vestigia ingressus, voluntati quidem
et studio in colendis vobis adjicere (etenim inexcuper-
abilia hæc erant) nihil potui: rebus ipsis meritisque et
impensis officiorum ut superare possem, fortuna, tem-
pore, Antiochus, ei bellum in Asia gestum præbuerunt
materiam. Rex Asiæ et partis Europæ Antiochus fi-
liam suam in matrimonium mihi dabat; restituebat ex-
templo civitates, quæ defecerant a nobis; spem magnam
in posterum amplificandi regni faciebat, si secum ad-
versus vos bellum gessim. Non gloriabor eo, quod
nihil in vos deliquimus: illa potius, quæ vetustissima
domus nostræ vobiscum amicitia digna sunt, referam.
Pedestribus navalibusque copiis, ut nemo vestrorum so-
ciorum me æquiparare posset, imperatores vestros ad-
juvi; commensus terra marique subpeditavi; navalibus
præliis, quæ multis locis facta sunt, omnibus adfui;
nec labori meo, nec periculo usquam peperci. Quod
miserrimum est in bello, obsidionem passus sum, Per-
gami inclusus cum discrimine ultimo simul vitæ regni-
que. Liberatus deinde obsidione, quum alia parte An-
tiochus, alia Seleucus circa arcem regni mei castra
haberent, relictis rebus, tota classe ad Hellespontum
L. Scipioni consuli vestro obcurri, ut eum in trajiciendo
exercitu adjuvarem: postquam in Asiam exercitus vester
est transgressus, numquam a consule abcessi: nemo
miles Romanus magis assiduus in castris vestris fuit,
quam ego fratresque mei: nulla expeditio, nullum
equestre prælium sine me factum est. In acie ibi steti,
eam partem sum tutatus, in qua me consul esse voluit.
Non sum hoc dicturus, Patres conscripti, quis hoc bello

meritis ergu vos mecum comparari potest? Ego nulli U. C. 563.
 omnium neque populorum, neque regum, quos in magno A. C. 189.
 honore habetis, non ausim me comparare. Hostis Ma-
 sinissa ante vobis, quam socius, fuit: nec incolumi
 regno cum auxiliis suis, sed extorris, expulsus, amissis
 omnibus copiis, cum turma equitum in castra confugit
 vestra: tamen eum, quia in Africa adversus Syphacem
 et Karthaginienses fideliter atque impigre vobiscum ste-
 tit, non in patrium solum regnum restituitis, sed, ad-
 jecta opulentissima parte Syphacis regni, præpotentem
 inter Africæ reges fecistis. Quo tandem igitur nos
 præmio atque honore digni apud vos sumus, qui num-
 quam hostes, semper socii fuimus? Pater, ego, fratres-
 que mei non in Asia tantum, sed etiam procul ab domo
 in Peloponneso, in Bæotia, in Ætolia, Philippi, An-
 tiochi, Ætolico bello, terra marique pro vobis arma-
 tulimus. Quid ergo postulatis? dicat aliquis. Ego,
 Patres conscripti, quoniam dicere utique volentibus vo-
 bis parendum est, si vos ea mente ultra Tauri juga
 emostis Antiochum, ut ipsi teneretis eas terras, nullos
 adcolas, nec finitimos habere, quam vos, malo; nec
 ulla alia re tutius stabiliusque regnum meum futurum
 spero. Sed si vobis decedere inde, atque exercitus de-
 ducere in animo est; neminem digniorem esse ex sociis
 vestris, qui bello a vobis parta possideat, quam me, di-
 cere ausim. At enim magnificum est liberare civitates
 servas. Ita opinor, si nihil hostile adversus vos fe-
 cerunt: sin autem Antiochi partis fuerunt; quanto est
 vestra prudentia et æquitate dignius, sociis bene me-
 ritis, quam hostibus, vos consulere?

LIV. Grata oratio regis Patribus fuit: et facile
 adparebat, munifice omnia et propenso animo fac-
 turos. Interposita Smÿrnæorum brevis legatio est,

U. C. 563. quia non aderant quidam Rhodiorum. Conlauda-
 A. C. 189. tis egregie Smyrnæis, quod omnia ultima pati,
 quam se regi tradere, maluissent, introducti Rhodii
 sunt : quorum princeps legationis, expositis iniitiis

Rhodiorum
 legatorum
 oratio.

amicitiæ cum populo Romano, meritisque Rhodio-
 rum Philippi prius, deinde Antiochi bello : *Nihil,*
inquit, nobis tota nostra actione, Patres conscripti,
neque difficilius, neque molestius est, quam quod cum
Eumene nobis disceptatio est : cum quo uno maxime
regum et privatum singulis, et, quod magis nos movet,
publicum civitati nostræ hospitium est. Ceterum non
animi nostri, Patres conscripti, nos, sed rerum natura,
quæ potentissima est, disjungit ; ut nos liberi etiam
aliorum libertatis causam agamus ; reges serva omnia
et subjecta imperio suo esse velint. Utcumque tamen
res se habet, magis verecundia nostra adversus regem
nobis obstat, quam ipsa disceptatio aut nobis impedita
est, aut vobis perplexam deliberationem præbitura vider-
tur. Nam, si aliter socio atque amico regi, et bene
merito hoc ipso in bello, de cujus præmiis agitur, ho-
nos haberi nullus posset, nisi liberas civitates ei in ser-
vitutem traderetis, esset deliberatio anceps ; ne aut re-
gem amicum inhonoratum dimitteretis, aut decederetis
instituto vestro, et gloriam, Philippi bello partam,
nunc servitute tot civitatum deformaretis. Sed ab
hac necessitate, aut gratiæ in amicum minuendæ, aut
gloriæ vestræ, egregie vos fortuna vincat. Est enim
Deum benignitate non gloriosa magis, quam dives,
victoria vestra : quæ vos facile isto rebus are alieno
exsolvat : nam et Lycaonia, et Phrygia utraque, et
Pisidia omnis, et Chersonesus, quæque circumjacent
Europæ, in vestra sunt potestate : quarum una que-
libet regi adjecta multiplicare regnum Eumenis potest :

omnes vero datæ maximis eum regibus æquare. Licet U. C. 563.
ergo vobis, et præmiis belli ditare socios, et non dece- A. C. 189.
dere instituto vestro, et meminisse, quem titulum præ-
tenderitis prius adversus Philippum, nunc adversus
Antiochum, belli: quid feceritis, Philippo victo; quid
nunc a vobis, non magis quia fecistis, quam quia id
vos facere decet, desideretur atque expectetur. Alia
enim aliis et honesta est et probabilis caussa armorum.
Illi agrum, hi vicos, hi oppida, hi portus, oramque
aliquam maris ut possideant. Vos nec cupistis hæc,
antequam haberetis: nec nunc, quum orbis terrarum
in ditioe vestra sit, cupere potestis. Pro dignitate et
gloria apud omne genus humanum, quod vestrum no-
men imperiumque juxta ac Deos immortales jam pri-
dem intuetur, pugnastis: quæ parare et quærere ar-
duum fuit, nescio an tueri difficilius sit. Gentis ve-
tustissimæ nobilissimæque, vel fama rerum gestarum, vel
omni commendatione humanitatis doctrinarumque, tu-
endam ab servitio regio libertatem suscepistis: hoc pa-
trocinium receptæ in fidem et in clientelam vestram
universæ gentis perpetuum vos præstare decet. Non,
quæ in solo modo antiquo sunt, Græcæ magis urbes
sunt, quam coloniæ earum, illinc quondam profectæ in
Asiam. Nec terra mutata mutavit genus aut mores:
certare pio certamine cujuslibet bonæ artis ac virtutis
ausi sumus cum parentibus quæque civitas et condito-
ribus suis. Adistis Græciæ, adistis Asiæ urbes pleri-
que: nisi quod longius a vobis absumus, nulla vinci-
mur alia re. Massilienses, quos, si natura insita velut
ingenio terræ vinci posset, jam pridem efferassent tot
indomitæ circumfusæ gentes, in eo honore, in ea me-
rito dignitate audimus apud vos esse, ac si medium
umbilicum Græciæ incolerent: non enim sonum modo

U. C. 563. *linguæ vestitumque et habitum, sed ante omnia mores,*
 A. C. 189. *et leges, et ingenium sincerum integrumque a conta-*
gione adcolarum, servarunt. Terminus est nunc im-
perii vestri mons Taurus: quidquid intra eum cardini-
em est, nihil longinquum vobis videri debet: quo ar-
ma vestra pervenerunt, eodem jus hinc profectum per-
veniat. Barbari, quibus pro legibus semper domino-
rum imperia fuerunt, quo gaudent, reges habeant:
Græci suam fortunam, vestros animos gerunt. Do-
mesticis quondam viribus etiam imperium amplecte-
bantur; nunc, imperium ubi est, ibi ut sit perpetuum,
optant: libertatem vestris tueri armis satis habent,
quoniam suis non possunt. At enim quædam civitates
cum Antiocho senserunt. Et aliæ prius cum Philippo,
et cum Pyrrho Tarentini. Ne alios populos enume-
rem, Karthago libera cum suis legibus est. Huic ves-
tro exemplo quantum debeatis, videte, Patres con-
scripti. Inducetis in animum negare Eumenis cupidi-
tati, quod justissimæ iræ vestræ negastis. Rhodii et in
hoc, et in omnibus bellis, quæ in illa ora gessistis,
quam forti fidelique opera vos adjuxerimus, vestro judi-
cio relinquimus: nunc in pace id consilium adferimus,
quod si comprobaveritis, magnificentius vos victoria usos
esse, quam vicisse, omnes existimaturi sint. Aptâ mag-
nitudini Romanæ oratio visa est.

LV. Post Rhodios Antiochi legati vocati sunt. Ii, vulgato petentium veniam more, errorem fassi regis, obtestati sunt Patres conscriptos, *Ut suæ potius clementiæ, quam regis culpæ, qui satis superque pænarum dedisset, memores consulerent: postremo pacem datam a L. Scipione imperatore, quibus legibus dedisset, confirmarent auctoritate sua. Et senatus* *eam pacem servandam censuit, et paucos post dies*

Pax cum
 Antiocho
 confirmata.

populus jussit. Fœdus in Capitolio cum Antipatro U. C. 563.
 principe legationis, et eodem fratris filio regis An- A. C. 189.
 tiochi, est ictum. Auditæ deinde et aliæ legationes
 ex Asia sunt. Quibus omnibus datum est respon-
 sum, *Decem legatos more majorum senatum missurum*
ad res Asiæ disceptandas componendasque. Summam
tamen hanc fore : ut cis Taurum montem, quæ intra
regni Antiochi fines fuissent, Eumeni adtribuerentur,
præter Lyciæ Carianque usque ad Maandrum am-
nem : ea civitatis Rhodiorum essent. Ceteræ civita-
tes Asiæ, quæ Attali stipendiariæ fuissent, eadem Eu-
meni vectigal penderent : quæ vectigales Antiochi fu-
issent, eæ liberæ atque immunes essent. Decem lega- Decem le-
 tos hos decreverunt, Q. Minucium Rufum, L. Fu- gati in A-
 rium Purpureonem, Q. Minucium Thermum, Ap. tuntur.
 Claudium Neronem, Cn. Cornelium Merulam, M.
 Junium Brutum, L. Aurunculeium, L. Æmiliū
 Paullum, P. Cornelium Lentulum, P. Ælium Tu-
 beronem.

LVI. His, quæ præsentis disceptationis essent,
 libera mandata : de summa rerum senatus consti-
 tuit : *Lycaoniam omnem, et Phrygiam utramque, et* Senatus-
Mysiam, regias silvas, et Lydiæ Ioniæque, extra ea consultum
oppida, quæ libera fuissent, quo die cum rege Antio- de Asia.
cho pugnatum est, et nominatim Magnesiam ad Sipy-
lum, et Cariam, quæ Hydrelæ adpellatur, agrumque
Hydrelatanum ad Phrygiam vergentem, et castella vi-
cosque ad Mæandrum amnem, et oppida, nisi quæ li-
bera ante bellum fuissent ; Telmissum item nominatim,
et castra Telmissium, præter agrum, qui Ptolemæi
Telmissii fuisset : hæc omnia, quæ supra scripta sunt,
regi Eumeni jussa dari. Rhodiis Lycia data, extra
eundem Telmissum, et castra Telmissium, et agrum,

U. C. 563. qui *Ptolemæi Telmissii* fuisset : hæc et ab *Eumene*, et
 A. C. 189. ab *Rhodiis* excepta. Ea quoque his pars data *Cariæ*,

Soli Cili-
 ciæ.

quæ propior *Rhodum* insulam trans *Mæandrum* am-
 nem est ; oppida, vici, castella, agri, qui ad *Pisidiam*
 vergunt : nisi quæ eorum oppida in libertate fuissent,
 pridie quam cum *Antiocho* rege in *Asia* pugnatum est.
 Pro his quum gratias egissent *Rhodii*, de *Solis* ur-
 be, quæ in *Cilicia* est, egerunt : *Argis* et illos, sicut
 sese, oriundos esse : ab ea germanitate fraternam sibi
 cum iis caritatem esse. *Petere* hoc extraordinarium
 munus, ut eam civitatem ex servitute regia eximerent.
 Vocati sunt regis *Antiochi* legati, actumque cum iis
 est : nec quidquam inpetratum, testante foedera *An-
 tipatro*, adversus quæ ab *Rhodiis* non *Solos*, sed *Ci-
 liciam* peti, et juga *Tauri* transcendendi. Revocatis in
 senatum *Rhodiis*, quum, quantopere tenderet lega-
 tus regius, exposuissent *Patres*, adjecerunt ; Si uti-
 que eam rem ad civitatis suæ dignitatem pertinere cen-
 serent *Rhodii*, senatum omni modo expugnaturum per-
 tinaciam legatorum. Tum vero impensius, quam ante,
Rhodii gratias egerunt, cessurosque se potius ad-
 rogantiæ *Antipatri*, quam causam turbande pacis
 præbituros, dixerunt : ita nihil de *Solis* mutatum
 est.

LVII. Per eos dies, quibus hæc gesta sunt, le-
 gati *Massiliensium* nunciarunt, *L. Bæbium prætorem*,
 in provinciam *Hispaniam* proficiscentem, ab *Liguri-
 bus* circumventum ; magna parte comitum cæsa, vul-
 neratum ipsum, cum paucis, sine lictoribus, *Massiliam*
 perfugisse, et intra triduum exspirasse. Senatus, ea
 re audita, decrevit, uti *P. Junius Brutus*, qui præ-
 tor in *Etruria* esset, provincia exercituque traditis uni,
 cui videretur, ex legatis, ipse in ulteriorem *Hispaniam*

proficisceretur, eaque ei provincia esset. Hoc senatusconsultum literæque a Sp. Postumio prætore in Etruriam missæ sunt : profectusque in Hispaniam est P. Junius proprætor. In qua provincia prius aliquanto, quam successor veniret, L. Æmilius Paulus, qui postea regem Persea magna gloria vicit, quum priore anno haud prospere rem gessisset, tumultuario exercitu conlecto, signis conlatis cum Lusitanis pugnavit. Fasi fugatique sunt hostes : cæsa decem et octo millia armatorum ; tria millia trecenti capti, et castra expugnata. Hujus victoriæ fama tranquilliores in Hispania res fecit. Eodem anno ante diem tertium Kalendas Januarias Bononiam Latinam coloniam ex senatusconsulto L. Valerius Flaccus, M. Atilius Serranus, L. Valerius Tappus triumviri deduxerunt : tria millia hominum sunt deducta : equitibus septuagena jugera, ceteris colonis quinquagena sunt data. Ager captus de Gallis Boiis fuerat : Galli Tuscos expulerant. Eodem anno censuram multi et clari viri petierunt : quæ res, tamquam in se parum magni certaminis causam haberet, aliam contentionem multo majorem excitavit. Petebant T. Quinctius Flamininus, P. Cornelius Cn. F. Scipio, L. Valerius Flaccus, M. Porcius Cato, M. Claudius Marcellus, M. Acilius Glabrio, qui Antiochum ad Thermopylas Ætolosque devicerat : in hunc maxime, quod multa congiaria habuerat, quibus magnam partem hominum obligaverat, favor populi se inclinabat. Id quum ægre paterentur tot nobiles, novum sibi hominem tantum præferri ; P. Sempronius Gracchus et C. Sempronius Rutilus, tribuni plebis, ei diem dixerunt, quod pecuniæ regiæ prædæque aliquantum,

U. C. 563.
A. C. 189.

Æmilius
Lusitanos
vincit.

Certamen
de censura.

U. C. 563. captæ in Antiochi castris, neque in triumpho tulisset, neque in ærarium retulisset. Varia testimonia legatorum tribunorumque militum erant. M. Cato ante alios testes conspiciebatur: cujus auctoritatem, perpetuo tenore vitæ partam, toga candida elevabat. Is testis, quæ vasa aurea atque argentea, captis castris, inter aliam prædam regiam vidisset, ea se in triumpho negabat vidisse. Postremo in hujus maxime invidiam desistere se petitione Glabrio dixit; quando, quod taciti indignarentur nobiles homines, id æque novus competitor inæstimabili perjurio incesset.

LVIII. Centum millium multa inrogata erat: bis de ea re certatum est: tertio, quum de petitione destitisset reus, nec populus de multa suffragium ferre voluit, et tribuni eo negotio destiterunt. Censores T. Quinctius Flamininus, M. Claudius Marcellus creati. Per eosdem dies L. Æmilio Regillo, qui classe præfectum Antiochi regis devicerat, extra urbem in æde Apollinis quum senatus datus esset, auditis rebus gestis ejus, quantis cum classibus hostium dimicasset, quot inde naves demersisset aut cepisset, magno consensu Patrum triumphus navalis est decretus. Triumphavit Kalendis Februariis: in eo triumpho undequinquaginta coronæ aureæ translatae sunt: pecunia nequaquam tanta, pro specie regii triumphii; tetradrachma Attica triginta quatuor millia septingenta, cistophori centum triginta unum millia trecenti. Supplicationes deinde fuerunt ex senatusconsulto, quod L. Æmilius in Hispania prospere rempublicam gessisset. Haud ita multo post L. Scipio ad urbem venit: qui, ne cognomini fratris cederet, Asiaticum se adpellari

Triumphus
navalis L.
Æmilii.

Scipio
Asiaticus.

voluit. Et in senatu, et in concione de rebus ab se ^{U. C. 563.} gestis disseruit. Erant, qui fama id majus bellum, ^{A. C. 189.} quam difficultate rei, fuisse interpretarentur; uno memorabili prælio debellatum, gloriamque ejus victoriæ præfloratam ad Thermopylas esse. Ceterum vere æstimanti Ætolicum magis ad Thermopylas bellum, quam regium fuit. Quota enim parte virium suarum ibi dimicavit Antiochus? in Asia totius Asiæ steterunt vires, ab ultimi Orientis partibus omnium gentium contractis auxiliis.

LIX. Merito ergo et Diis immortalibus, quantus maximus poterat, habitus est honos, quod ingentem victoriam facilem etiam fecissent, et imperatori triumphus est decretus. Triumphavit mense ^{Triumphat de Antiocho.} intercalario pridie Kalendas Martias: qui triumphus spectaculo oculorum major, quam Africani fratris ejus, fuit; recordatione rerum et æstimatione periculi certaminisque non magis comparandus, quam si imperatorem imperatori, aut Antiochum ducem Hannibali conferres. Tulit in triumpho signa militaria ducenta triginta quatuor; oppidorum simulacra centum triginta quatuor; eburneos dentes mille ducentos triginta unum; aureas coronas ducentas triginta quatuor; argenti pondo centum triginta septem millia et quadringenta viginti; tetradrachmum Atticorum ducenta viginti quatuor millia; cistophorum trecenta triginta unum millia et septuaginta; nummos aureos Philippeos centum quadraginta millia; vasorum argenteorum (omnia cæcata erant) mille pondo et quadringenta viginti quatuor, aureorum mille pondo viginti quatuor: et duces regii, præfecti, et purpurati duo et triginta ante currum ducti. Militibus quini viceni denarii dati,

U. C. 563. duplex centurioni, triplex equiti : et stipendium militare et frumentum duplex post triumphum datum : prælio in Asia facto, duplex dederat. Triumphavit anno fere post, quam consulatu abiit.

Fabius in
Cretam
trajicit.

LX. Eodem fere tempore et Cn. Manlius consul in Asiam, et Q. Fabius Labeo prætor ad classem venit. Ceterum consuli non deerat cum Gallis belli materia : mare pacatum erat, devicto Antiocho. Cogitanti Q. Fabio, cui rei potissimum insisteret, ne otiosam provinciam habuisse videri posset, optimum visum est, in Cretam insulam trajicere. Cydoniataë bellum adversus Gortynios Gnossiosque gerebant, et captivorum Romanorum atque Italici generis magnus numerus in servitute esse per totam insulam dicebatur. Classe ab Epheso profectus, quum primum Cretæ litus adtigit, nuncios circa civitates misit, ut armis absisterent, captivosque in suis quæque urbibus agrisque conquisitos reducerent, et legatos mitterent ad se, cum quibus de rebus ad Cretenses pariter Romanosque pertinentibus ageret. Nihil magnopere ea Cretenses moverunt : captivos, præter Gortynios, nulli reddiderunt. Valerius Antias ad quatuor millia captivorum, quia belli minas timuerunt, ex tota insula reddita scripsit : eamque causam Fabio, quum rem nullam aliam gessisset, navalis triumphus inpetrandi ab senatu fuisse. A Creta Ephesum Fabius rediit : inde tribus navibus in Thraciæ oram missis, ab Æno et Maronea præsidia Antiochi deduci jussit, ut in libertate eæ civitates essent.

EPITOME LIBRI XXXVIII.

M. FULVIUS consul in Epiro Ambracienses obsessos in deditionem accepit, Cephalleniam subegit, Ætolis perdomitis pacem dedit. Cn. Manlius consul, collega ejus, Gallogræcos Tolistochoios, et Tectosagos, et Trocmos, qui Brenno duce in Asiam transierant, quum soli citra Taurum montem non parerent, vicit. Eorum origo, et quemadmodum ea loca, quæ tenent, occupaverint, refertur. Exemplum quoque virtutis et pudicitiae in femina traditur: nam quum Ortiagontis, regis Gallogræcorum, uxor captiva esset, centurionem custodem, qui ei vim intulerat, occidit. Lustrum a censoribus conditum est: censa sunt civium capita ducenta quinquaginta octo millia et trecenta viginti octo. Cum Ariarathe, rege Cappadociae, amicitia juncta est. Cn. Manlius, contradicentibus decem legatis, ex quorum consilio fœdus cum Antiocho conscripserat, de Gallogræcis, acta pro se causa in senatu, triumphavit. Scipio Africanus, die ei dicta, ut quidam aiunt, a Q. Petillio tribuno plebis, ut quidam, a Nævio, quod præda ex Antiocho capta ærarium fraudasset, postquam is dies venit, evocatus in Rostra, Hac die, inquit, Quirites, Karthaginem vici: et, prosequente populo, Capitolium adscendit. Inde, ne amplius tribuniciiis injuriis vexaretur, in voluntarium exsiliium Liternum concessit: incertum ibi, an Romæ, defunctus: nam ejus monumentum utrobique fuit. L.

Scipio Asiaticus, frater Africani, eodem peculatus crimine accusatus damnatusque, quum in vincula et carcerem duceretur, Ti. Sempronius Gracchus, tribunus plebis, qui antea Scipionibus inimicus fuerat, intercessit; et ob id beneficium Africani filiam duxit. Quum quæstores in bona ejus publice possidenda missi essent, non modo in iis ullum vestigium pecuniæ regiæ adparuit, sed nequaquam tantum redactum, quantæ summæ erat damnatus. Conlatam a cognatis et amicis innumerabilem pecuniam accipere noluit: quæ necessaria ei erant ad cultum, redemta.

T. LIVII PATAVINI

LIBER XXXVIII.

DUM in Asia bellum geritur, ne in Ætolis quidem quietæ res fuerant, principio a gente Athamanum orto. Athamania ea tempestate, pulso Amynandro, sub præfectis Philippi regio tenebatur præsidio: qui superbo atque inmodico imperio desiderium Amynandri fecerant. Exsulanti tum Amynandro in Ætolia literis suorum, indicantium statum Athamaniæ, spes recuperandi regni facta est: remissique nuncii ab eo ad principes Argitheam, (id enim caput Athamaniæ erat) si popularium animos satis perspectos haberet, inpetrato ab Ætolis auxilio, in Athamaniam se venturum cum delectis Ætolorum, quod consilium esset gentis, et Nicandro prætore: quos, ubi ad omnia paratos esse vidit, certiores subinde facit, quo die cum exercitu Athamaniam ingressurus esset. Quatuor primo fuisse conjurati adversus Macedonum præsidium: hi senos sibi adiutores ad rem gerendam adsumserunt: deinde, paucitate parum freti, quæ celandæ rei, quam agendæ, aptior erat, parem priori numerum adjecerunt. Ita duo et quinquaginta facti, quadriariam se diviserunt: pars una Heracleam, altera Tetraphyliam petit, ubi custodia regiæ pecuniæ esse solita erat, tertia Theudoriam, quarta Argitheam.

U.C. 563.

A.C. 189.

Res Æto-

liæ et A-

thamaniæ.

U. C. 563. Ita inter omnes convenit, ut primo quieti, velut ad
 A. C. 189. privatam rem agendam venissent, in foro obversa-
 rentur : die certa multitudinem omnem convocarent
 ad præsidia Macedonum arcibus expellenda. Ubi
 ea dies advenit, et Amynder cum mille Ætolis in
 finibus erat ; ex composito quatuor simul locis præ-
 sidia Macedonum expulsa, literæque in alias urbes
 passim dimissæ, ut vindicarent sese ab inpotenti do-
 minatione Philippi, et restituerent in patrium ac le-
 gitimum regnum. Undique Macedones expelluntur.
 Athamania Theium oppidum, literis a Zenone præfecto præsidii
 expulsi interceptis, et arce ab regiis occupata, paucos dies
 Macedones. obsidentibus restitit : deinde id quoque traditum
 Amyndro est, et omnis Athamania in potestate
 erat, præter Athenæum castellum, finibus Macedo-
 niæ subjectum.

Philippus
 eam recu-
 perare frus-
 tra conatur.

II. Philippus, audita defectione Athamaniæ, cum
 sex millibus armatorum profectus, ingenti celeritate
 Gomphos pervenit : ibi relicta majore parte exerci-
 tus, (neque enim ad tanta itinera subfecissent) cum
 duobus millibus Athenæum, quod unum a præsidio
 suo retentum fuerat, pervenit : inde, proximis ten-
 tatis, quum facile animadvertisset, cetera hostilia
 esse, Gomphos regressus, omnibus copiis simul in
 Athamaniam rediit. Zenonem inde, cum mille pe-
 ditibus præmissum, Ethiopiam occupare jubet, op-
 portune Argitheæ imminentem : quem ubi teneri a
 suis locum vidit, ipse circa templum Jovis Acræi
 posuit castra : ibi unum diem fœda tempestate re-
 tentus, postero die ducere ad Argitheam intendit.
 Euntibus extemplo adparuere Athamanes, in tumu-
 los imminentes viæ discurrentes : ad quorum con-
 spectum constitere prima signa, totoque agmine

pavor et trepidatio erat : et pro se quisque, quid-
 nam futurum esset, cogitare, si in valles subjectas
 rupibus agmen foret demissum. Hæc tumultuatio
 regem, cupientem, si se sequerentur, raptim evadere
 angustias, revocare primos, et eadem, qua venerat,
 via referre coëgit signa. Athamanes primo ex in-
 tervallo quieti sequebantur : postquam Ætoli se
 conjunxerunt, hos, ut ab tergo agmini instarent,
 reliquerunt ; ipsi a lateribus se circumfuderunt :
 quidam, per notos calles breviora via prægressi,
 transitus insedere : tantumque tumultus Macedoni-
 bus est injectum, ut fugæ magis effusæ, quam iti-
 neris ordinati modo, multis armis virisque relictis,
 flumen trajecerint : hic finis sequendi fuit. Inde
 tuto Macedones Gomphos, et a Gomphis in Mace-
 doniam redierunt. Athamanes Ætolique Etho-
 piam, ad Zenonem ac mille Macedonas obprimen-
 dos, undique concurrerunt. Macedones, parum lo-
 co freti, ab Ethiopia in altiore deruptioremque
 undique tumulum concessere : quo pluribus locis
 aditu invento, expulere eos Athamanes ; dispersos-
 que, et per invias atque ignotas rupes iter fugæ
 non expedientes, partim ceperunt, partim interfe-
 cerunt : multi pavore in derupta præcipitati, per-
 pauci cum Zenone ad regem evaserunt. Postero
 die per inducias sepeliendi cæsos potestas facta est.

III. Amynder, recuperato regno, legatos et
 Romam ad senatum, et ad Scipiones in Asiam,
 Ephesi post magnum cum Antiocho prælium mo-
 rantes, misit. Pacem petebat, excusabatque sese,
 quod per Ætolos recuperasset paternum regnum.
 Philippum incusabat. Ætoli ex Athamania in Am-
 philochos profecti sunt, et majoris partis voluntate

Ætoli Am-
 philochiam
 et alia oc-
 cupant.

U. C. 563. in jus ditionemque totam redegerunt gentem. Am-
 A. C. 189. philochia recepta, (nam fuerat quondam Ætolo-
 rum) eadem spe in Aperantiam transcenderunt: ea
 quoque magna ex parte sine certamine in deditio-
 nem venit. Dolopes numquam Ætolorum fuerant;
 Philippi erant: hi primum ad arma concurrerunt:
 ceterum, postquam Amphilochos cum Ætolis esse,
 fugamque ex Athamania Philippi, et cædem præsi-
 dii ejus acceperere, et ipsi a Philippo ad Ætolos de-
 ficiunt. Quibus circumjectis gentibus jam undique
 se a Macedonibus tutos credentibus esse, Ætolis
 fama adfertur, Antiochum in Asia victum ab Ro-
 manis: nec ita multo post legati ab Roma rediere
 sine spe pacis, Fulviumque consulem nunciantes
 jam cum exercitu trajecisse. His territi, prius ab
 Rhodo et Athenis legationibus excitis, ut per auc-
 toritatem civitatum earum suæ preces nuper repu-
 diatæ faciliorem aditum ad senatum haberent, prin-
 cipes gentis ad tentandum ultimam spem Romam
 miserunt: nihil, ne bellum haberent, prius, quam
 pene in conspectu hostis erat, præmeditati. Jam
 M. Fulvius, Apolloniam exercitu trajecto, cum Epi-
 rotarum principibus consultabat, unde bellum inci-
 peret. Epirotis Ambraciam placebat adgredi, quæ
 tum contribuerat se Ætolis: *sive ad tuendam eam
 venirent Ætoli, apertos circa campos ad dimicandum
 esse: sive detractarent certamen, obpugnationem fore
 haud difficilem: nam et copiam in propinquo materiæ
 ad aggeres excitandos et cetera opera esse: et Are-
 thontem, navigabilem amnem, opportunum ad compor-
 tanda, quæ usui sint, præter ipsa mœnia fluere; et
 ætatem aptam rei gerendæ adesse: his persuaserunt,
 ut per Epirum duceret.*

Fulvius
 in Epiro.

IV. Consuli, ad Ambraciam advenienti, magni operis obpugnatio visa est. Ambracia tumulo aspero subjecta est, Perranthem incolæ vocant : urbs, qua murus vergit in campos et flumen, occidentem ; arx, quæ inposita est tumulo, orientem spectat : amnis Aretho, ex Athamania fluens, cadit in sinum maris, ab nomine propinquæ urbis Ambracium appellatum : præterquam quod hinc amnis munit, hinc tumuli, muro quoque firmo septa erat, patente in circuitu paullo amplius tria millia passuum. Fulvius bina a campo castra, modico inter se distantia intervallo, unum castellum loco edito contra arcem objecit : ea omnia vallo ac fossa ita jungere parat, ne exitus inclusis ab urbe, neve aditus foris ad auxilia intromittenda esset. Ad famam obpugnationis Ambraciæ Stratum jam edicto Nicandri prætoris convenerant Ætoli. Inde primo copiis omnibus ad prohibendam obsidionem venire in animo fuerat : deinde, postquam urbem jam magna ex parte operibus septam viderunt, Epirotarum trans flumen loco plano castra posita esse, dividere copias placuit : cum mille expeditis Eupolemus Ambraciam profectus, per nondum commissa inter se munimenta urbem intravit. Nicandro cum cetera manu primo Epirotarum castra nocte adgredi consilium fuerat, haud facili ab Romanis auxilio, quia flumen intererat : deinde, periculosum inceptum ratus, ne qua sentirent Romani, et regressus inde in tutum non esset, deterritus ab hoc consilio, ad depulandam Acarnaniam iter convertit.

V. Consul, jam munimentis, quibus sepienda urbs erat, jam operibus, quæ admoveere muris parabat, perfectis, quinque simul locis mœnia est adgressus :

U. C. 563.
A. C. 189.
Obpug-
natio.

tria paribus intervallis faciliore aditu a campo adversus Pyrrheum, quod vocant, admovit; unum e regione Æsculapii; unum adversus arcem. Arietibus muros quatiebat, asserebus falcatis detergebat pinnas. Oppidanos primo et ad speciem et ad ictus mœnium, cum terribili sonitu editos, pavor ac trepidatio cepit: deinde, ut præter spem stare muros viderunt, conlectis rursus animis, in arietes tollentibus libramenta plumbi aut saxorum stipitesve robustos incutiebat; falces, ancoris ferreis injectis in interiorem partem muri trahentes assereim, præfringebant: ad hoc eruptionibus, et nocturnis in custodias operum, et diurnis in stationes, ultro terrorem inferebant. In hoc statu res ad Ambraciam quum essent, jam Ætoli a populatione Acarnaniæ Stratum redierant: inde Nicander prætor, spem nactus solvendæ incepto forti obsidionis, Nicodamum quemdam cum Ætolis quingentis Ambraciam intromittit: noctem certam tempusque etiam noctis constituit, quo et illi ab urbe opera hostium, quæ adversus Pyrrheum erant, adgrederentur, et ipse ad castra Romana terrorem faceret; posse ratus, ancipiti tumultu et nocte augente pavorem, memorabilem rem geri. Et Nicodamus intempesta nocte, quum alias custodias fefellisset, per alias inpetu constanti erupisset, superato brachio in urbem penetrat; animique aliquantum ad omnia audenda et spei obsessis adjecit; et, simul constituta nox venit, ex composito repente opera est adgressus. Id inceptum conatu, quam effectu, gravius fuit, quia nulla ab exteriori parte vis admota est; seu metu deterrito prætore Ætolorum, seu quia potius visum est, Amphilochois opem ferre nuper receptis; quos

Perseus Philippi filius, missus ad Dolopiam Amphilo-
chosque recipiendos, summa vi obpugnabat. U. C. 563.
A. C. 189.

VI. Tribus locis, sicut ante dictum est, ad Pyrrheum opera Romana erant: quæ omnia simul, sed nec adparatu, nec vi simili, Ætoli adgressi sunt: alii cum ardentibus facibus, alii stuppam picemque et malleolos ferentes, tota conlucente flammis acie, advenere: multos primo inpetu custodes obpresserunt: deinde, postquam clamor tumultusque in castra est perlatus, datumque a consule signum, arma capiunt, et omnibus portis ad opem ferendam effunduntur. Uno in loco ferro ignique gesta res est: a duobus irritò incepto, quum tentassent magis, quam inissent, certamen, Ætoli abscesserunt. Atrox pugna in unum inclinaverat locum: ibi diversis partibus duo duces Eupolemus et Nicodamus pugnantes hortabantur, et prope certa fovebant spe, jam Nicandrum ex composito adfore, et terga hostium invasurum. Hæc res aliquamdiu animos pugnantium sustinuit; ceterum, postquam nullum ex composito signum a suis accipiebant, et crescere numerum hostium cernebant, destituti segnius instare: postremo, re omissa, jam vix tuto receptu, fugientes in urbem compelluntur, parte operum incensa, et pluribus aliquanto, quam ipsi ceciderant, interfectis: quod si ex composito acta res fuisset, haud dubium erat, expugnari una utique parte opera cum magna cæde hostium potuisse. Ambracienses, quique intus erant Ætoli, non ab ejus solum noctis incepto recessere, sed in reliquum quoque tempus, velut proditi a suis, segniores ad pericula erant: jam nemo eruptionibus, ut ante, in stationes

U. C. 563. hostium, sed, dispositi per muros et turres, ex tuto
A. C. 189. pugnabant.

VII. Perseus, ubi adesse Ætolos audivit, omissa obsidione urbis, quam obpugnabat, depopulatus tantum agros, Amphilochiam excessit, atque in Macedoniam rediit. Et Ætolos inde avocavit populatio maritimæ oræ. Pleuratus Illyriorum rex, cum sexaginta lembis Corinthium sinum invectus, adjunctis Achæorum, quæ Patris erant, navibus, maritima Ætolix vastabat : adversus quos mille Ætoli missi, quacumque se classis circumegerat per litorum amfractus, brevioribus semitis obcurrerant. Et Romani ad Ambraciam, pluribus locis quatiendo arietibus muros, aliquantum urbis nudaverant : nec tamen penetrare in urbem poterant. Nam et pari celeritate novus pro diruto murus objiciebatur, et armati, ruinis superstantes, instar munimenti erant.

Cuniculo
Rom. Am-
braciam
tentant.

Itaque, quum aperta vi parum procederet consuli res, cuniculum occultum, vineis ante contexto loco, agere instituit : et aliquamdiu, quum dies noctesque in opere essent, non solum sub terra fodientes, sed egerentes etiam humum, fefellere hostem. Cumulus repente terræ eminens index operis oppidanis fuit : pavidique, ne jam subrutis muris, facta in urbem via esset, fossam intra murum e regione ejus operis, quod vineis contextum erat, ducere instituunt : cujus ubi ad tantam altitudinem, quantæ esse solum infimum cuniculi poterat, pervenerunt, silentio facto, pluribus locis aure admota, sonitum fodientium captabant. Quem ubi acceperunt, aperiunt rectam in cuniculum viam : nec fuit magni operis : momento enim ad inane, suspensio furculis

ab hostibus muro, pervenerunt: ibi commissis ope- U. C. 563.
ribus, quum e fossa in cuniculum pateret iter, pri- A. C. 189.
mo ipsis ferramentis, quibus in opere usi erant, dein Repellun-
celeriter armati etiam subeuntes occultam sub terram tur.
ediderunt pugnam: segnior deinde ea facta est; in-
tersepientibus cuniculum, ubi vellent, nunc ciliciis
prætentis, nunc foribus raptim objectis. Nova etiam
haud magni operis adversus eos, qui in cuniculo
erant, excogitata res est: dolium a fundo pertusum,
qua fistula modica inseri posset, et fistulam ferream
operculumque dolii ferreum, et ipsum pluribus locis
perforatum, fecerunt: hoc tenui pluma completum
dolium ore in cuniculum verso posuerunt. Per
operculi foramina prælongæ hastæ, quas sarissas
vocant, ad submovendos hostes eminebant: scin-
tillam levem ignis inditam plumæ, folle fabrilis ad
caput fistulæ inposito, flando accenderunt: inde
non solum magna vis fumi, sed acrior etiam fœdo
quodam nidore ex adusta pluma, quum totum cuni-
culum complexset, vix durare quisquam intus pot-
erat.

VIII. Quum in hoc statu res ad Ambraciam esset,
legati ab Ætolis Phæneas et Damoteles, cum liberis
mandatis, decreto gentis, ad consulem venerunt: nam
prætor eorum, quum alia parte Ambraciam obpug-
nari cerneret, alia infestam oram navibus hostium
esse, alia Amphilochos Dolopiamque a Macedonibus
vastari, nec Ætolos simul ad tria diversa bella ob-
cursantes subficere, convocato concilio, Ætolos prin-
cipes, quid agendum esset, consuluit. Omnium eo
sententiæ decurrerunt, ut pax, si posset, æquis; si
minus, tolerandis conditionibus peteretur. Antiochi fi- Ætoli pa-
ducia bellum susceptum. Antiocho terra marique su- cem pe-
tunt.

U. C. 563. *perato, et prope extra orbem terræ ultra juga Tauri*
 A. C. 189. *exacto, quam spem esse sustinendi belli? Phæneas et*
Damoteles, quod e re Ætolorum, ut in tali casu, fide-
que sua esse censerent, agerent. Quod enim sibi consi-
lium, aut cujus rei electionem a fortuna relictam?
 Cum his mandatis legati missi orare consulem, ut
parceret urbi, miseretur gentis quondam sociæ, nolle
dicere injuriis, miseris certe coactæ insanire. Non
plus mali meritos Ætolos Antiochi bello, quam boni
ante, quum adversus Philippum bellatum sit, fecisse:
nec tum large gratiam relatum sibi, nec nunc inmodice
pænam injungi debere. Ad ea consul respondit:
Magis sape, quam vere umquam, Ætolos pacem pe-
tere: imitarentur Antiochum in petenda pace, quem in
bellum traxissent. Non paucis urbibus eum, de quarum
libertate certatum sit, sed omni Asia cis Taurum mon-
tem, opimo regno, excessisse. Ætolos, nisi inermes,
de pace agentes non auditurum se: arma illis prius
equosque omnes tradendos esse, deinde mille talentum
argenti populo Romano dandum: cujus summæ dimi-
dium præsens numeraretur, si pacem habere vellent.
Ad ea adjecturum etiam in fœdus esse, ut eosdem, quos
populus Romanus, amicos atque hostes habeant.

IX. Adversus quæ legati, et quia gravia erant, et
 quia suorum animos indomitos ac mutabiles nove-
 rant, nullo reddito responso, domum regressi sunt,
 ut etiam atque etiam, quid agendum esset, re inte-
 gra, prætorem et principes consulerent. Clamore
 et jurgio excepti, *quam diu rem traherent, qualem-*
cunque pacem referre jussi? quum redirent Ambra-
 ciam, Acarnanum insidiis prope viam positis, qui-
 buscum bellum erat, circumventi Thyrium custo-
 diendi deducuntur. Hæc mora injecta est paci.

Quum jam Atheniensium Rhodiorumque legati, qui U. C. 563.
 ad deprecandum pro his venerant, apud consulem A. C. 189.
 essent; Amynder quoque, Athamanum rex, fide
 accepta, venerat in castra Romana; magis pro Am-
 bracia urbe, ubi majorem partem temporis exsula-
 verat, quam pro Ætolis, sollicitus. Per hos certior
 factus consul de casu legatorum, adduci eos a Thyrio
 jussit: quorum post adventum agi cœptum est de
 pace. Amynder, quod sui maxime operis erat,
 inpigre agebat, ut Ambracienses compelleret ad de-
 ditionem: id quum per colloquia principum, succe-
 dens murum, parum proficeret: postremo, consulis
 permissu ingressus urbem, partim consilio, partim
 precibus, evicit, ut permitterent se Romanis. Et
 Ætolos C. Valerius Lævini filius, qui cum ea gente
 primum amicitiam pepigerat, consulis frater, matre
 genitus eadem, egregie adjuvit. Ambracienses, prius
 pacti, ut Ætolorum auxiliares sine fraude emitte-
 rent, aperuerunt portas: dein Ætoli, ut *quingenta*
Euboica darent talenta; ex quibus ducenta præsentia,
trecenta per annos sex pensionibus æquis: captivos per-
fugasque redderent Romanis: urbem ne quam formulæ
sui juris facerent, quæ post id tempus, quo T. Quinctius
trajecisset in Græciam, aut vi capta ab Romanis esset,
aut voluntate in amicitiam venisset: Cephallenia in-
sula ut extra jus fœderis esset. Hæc quamquam spe
 ipsorum aliquanto leviora erant, petentibus Ætolis,
 ut ad concilium referrent, permissum est. Parva
 disceptatio de urbibus tenuit: quæ quum sui juris
 aliquando fuissent, avelli velut a corpore suo ægre
 patiebantur: ad unum tamen omnes accipi pacem
 jusserunt. Ambracienses coronam auream consuli
 centum et quinquaginta pondo dederunt: signa ænea

Ambraci-
 enses se de-
 dunt.

Leges pacis
 Ætolis a
 cos. dictæ.

U. C. 563. marmoreaque et tabulæ pictæ, quibus ornatio Am-
 A. C. 189. bracia, (quia regia ibi Pyrrhi fuerat) quam ceteræ
 regionis ejus urbes erant, sublata omnia avectaque:
 nihil præterea tactum violatumve.

X. Profectus ab Ambracia consul in mediterranea
 Ætoliæ, ad Argos Amphilochium (viginti duo mil-
 lia ab Ambracia abest) castra posuit: eo tandem le-
 gati Ætoli, mirante consule, quod morarentur, ve-
 nerunt. Inde, postquam adprobasse pacem conci-
 lium Ætolorum accepit, jussis proficisci Romam ad
 senatum, permissoque, ut et Rhodii, et Athenienses
 deprecatores irent, dato, qui simul cum iis proficis-
 ceretur, C. Valerio fratre, ipse in Cephaleniam tra-
 jecit. Præoccupatas aures animosque principum
 Romæ criminibus Philippi invenerunt; qui, per le-
 gatos, per literas, Dolopas, Amphilochosque, et A-
 thamaniam creptas sibi quærens, præsidiaque sua,
 postremo etiam filium Persea ex Amphilochis pul-
 sum, averterat senatum ab audiendis precibus eo-
 rum. Rhodii tamen et Athenienses cum silentio
 auditi sunt. Atheniensis legatus Leon, Icesiae fi-
 lius, eloquentia etiam dicitur movisse: qui vulgata
 similitudine, mari tranquillo, quod ventis concitare-
 tur, æquiparando multitudinem Ætolorum, usus,
*quum in fide Romanæ societatis mansissent, insita gen-
 tis tranquillitate quiesse eos aiebat: postquam flare
 ab Asia Thoas et Dicaarchus, ab Europa Menestas
 et Democritus capissent; tum illam tempestatem co-
 ortam, quæ ad Antiochum eos, sicuti in scopulum, in-
 tulisset.*

Pax Æto-
 lis data
 Romæ.

XI. Diu jactati Ætoli, tandem ut conditiones pa-
 cis convenirent, effecerunt. Fuerunt autem hæ: Im-
 perium majestatemque populi Romani gens Ætolorum

*conservato sine dolo malo. Ne quem exercitum, qui U. C. 563.
adversus socios amicosque eorum ducetur, per fines suos A. C. 189.
transire sinito; neve ulla ope juvato. Hostes eosdem
habeto, quos populus Romanus, armaque in eos ferto,
bellumque pariter gerito: perfugas, fugitivos, captivos-
que reddito Romanis sociisque; præterquam si qui capti,
quum domos redissent, iterum capti sunt; aut si qui eo
tempore ex iis capti sunt, qui tum hostes erant Roma-
nis, quum intra præsidia Romana Ætoli essent. Alio-
rum qui comparebunt, intra dies centum Coreyræorum
magistratibus sine dolo malo tradantur: qui non com-
parebunt, quando quisque eorum primum inventus fue-
rit, reddantur: obsides quadraginta arbitrato consulis
Romani dato, ne minores duodecim annorum, neu ma-
iores quadraginta. Obses ne esto prætor, præfectus
equitum, scriba publicus: neu quis, qui ante obses fue-
rit apud Romanos. Cephallenia extra pacis leges esto.
De pecuniæ summa, quam penderent, pensionibus-
que ejus, nihil ex eo, quod cum consule convenerat,
mutatum. Pro argento si aurum dare mallent, da-
rent, convenit; dum pro argenteis decem aureus
unus valeret. Quæ urbes, qui agri, qui homines Æto-
lorum juris aliquando fuerunt, qui eorum T. Quinctio,
Cn. Domitio consulibus, postve eos consules, aut armis
subacti, aut voluntate, in ditionem populi Romani ve-
nerunt, ne quem eorum Ætoli recepisse velint. Cœnia-
dæ cum urbe agrisque Acarnanum sunt. His legibus
fœdus ictum cum Ætolis est.*

XII. Eadem non æstate solum, sed etiam iisdem
prope diebus, quibus hæc a M. Fulvio consule in
Ætolia gesta sunt, consul alter Cn. Manlius in Gal- ^{Bellum}
logræcia bellum gessit, quod nunc ordiri pergami. ^{cum Gallo-}
Vere primo Ephesum consul venit, acceptisque co- ^{græcis.}

U. C. 563. piis a L. Scipione, et exercitu lustrato, concionem
 A. C. 189. apud milites habuit : qua, conlaudata virtute eorum,
 quod cum Antiocho uno proelio debellassent, adhortatus eos ad novum cum Gallis suscipiendum bellum, qui et auxiliis Antiochum juvissent, et adeo indomita haberent ingenia, ut nequidquam Antiochus emotus ultra juga Tauri montis esset, nisi frangerentur opes Gallorum, de se quoque pauca, nec falsa, nec inmodica, adjecit. Læti milites cum frequenti adsensu consulem audiverunt, partem virium Antiochi fuisse Gallos credentes; rege superato, nullum momentum in solis per se Gallorum copiis fore. Eumenem haud in tempore abesse (Romæ tunc erat) credere consul, gnarum locorum hominumque, et cujus interesset frangi Gallorum opes. Attalum igitur fratrem ejus arcessit a Pergamo, hortatusque ad capessendum secum bellum, pollicentem suam suorumque operam, domum ad comparandum dimittit. Paucos post dies profecto ab Epheso consuli ad Magnesiam obcurrit Attalus cum mille pedibus, equitibus ducentis, Athenæo fratre jusso cum ceteris copiis subsequi, commendata iis custodia Pergami, quos fratri regnoque fidos credebat. Consul, conlaudato juvene, cum omnibus copiis ad Mæandrum progressus, castra posuit, quia vado superari amnis non poterat, et contrahendæ naves erant ad exercitum trajiciendum. Transgressi Mæandrum ad Hieran Comen pervenerunt.

Iter consulis.

XIII. Fanum ibi augustum Apollinis et oraculum: sortes versibus haud inconditis dare vates dicuntur. Hinc alteris castris ad Harpasum flumen ventum est: quo legati ab Alabandis venerunt, ut castellum, quod ab ipsis nuper descisset, aut aucto-

ritate, aut armis, cogeret jura antiqua pati. Eodem U. C. 562.
A. C. 189. et Athenæus, Eumenis et Attali frater, cum Cretensi Leuso et Corrago Macedone venit: mille pedites mixtarum gentium et trecentos equites secum adduxerunt. Consul, tribuno militum misso cum modica manu, castellum vi captum Alabandensibus reddit: ipse, nihil via digressus, ad Antiochiam super Mæandrum amnem posuit castra. Hujus amnis fontes Celænis oriuntur. Celænæ urbs caput quondam Phrygiæ fuit: migratum inde haud procul veteribus Celænis, novæque urbi Apameæ nomen inditum ab Apamea, sorore Seleuci regis. Et Marsyas amnis, haud procul a Mæandri fontibus oriens, in Mæandrum cadit. Famaque ita tenet, Celænis Marsyam cum Apolline tiliarum cantu certasse. Mæander, ex arce summa Celænarum ortus, media urbe decurrens, per Caras primum, deinde Ionas, in sinum maris editur, qui inter Prienen et Miletum est. Ad Antiochiam in castra consulis Seleucus, Antiochi filius, ex fœdere icto cum Scipione, ad frumentum exercitui dandum venit. Parva disceptatio de Attali auxiliaribus orta est: quod, Romano tantum militi, pactum Antiochum, ut daretur frumentum, Seleucus dicebat. Discussa ea quoque est constantia consulis, qui dimisso tribuno edixit, ne Romani milites acciperent, priusquam Attali auxilia accepissent. Inde ad Gordiutichos, quod vocant, processum est: ex eo loco ad Tabas tertiis castris perventum: in finibus Pisidarum posita est urbs, in ea parte, quæ vergit ad Pamphylium mare. Integris viribus regionis ejus, feroces ad bellandum habebat viros. Tum quoque equites, in agmen Romanum eruptione facta, haud modice primo impetu tur-

U. C. 563. bavere: deinde, ut adparuit, nec numero se, nec
 A. C. 189. virtute pares esse, in urbem compulsi, veniam erroris petebant, dedere urbem parati: quinque et viginti talenta argenti, et decem millia medimnûm tritici imperata: ita in deditionem accepti.

XIV. Tertio inde die ad Chaum amnem perventum: inde profecti Erizam urbem primo inpetu ceperunt. Ad Thabusion castellum, imminens flumini Indo, ventum est; cui fecerat nomen Indus, ab elephanto dejectus. Haud procul a Cibra aberant: nec legatio ulla a Moagete, tyranno civitatis ejus, homine ad omnia infido atque inportuno, veniebat. Ad tentandam ejus animum C. Helvium, cum quatuor millibus peditum et quingentis equitibus, consul præmittit. Huic agmini, jam fines ingredienti, legati obcurrerunt, nunciantes, paratum esse tyrannum imperata facere: orabant, ut pacatus fines iniret, cohiberetque a populatione agri militem: et coronam auream quindecim talentûm adferebant. Helvius, integros a populatione agros servaturum pollicitus, ire ad consulem legatos jussit: quibus eadem referentibus, consul, *Neque Romani, inquit, bonæ voluntatis ullum signum erga nos tyranni habemus: et ipsum talem esse inter omnes constat, ut de pœna ejus magis, quam de amicitia, nobis cogitandum sit.* Perturbati hac voce legati nihil aliud petere, quam ut coronam acciperet; veniendique ad eum potestatem tyranno, et copiam loquendi ac pargandi se, faceret. Permissu consulis postero die in castra tyrannus venit; vestitus comitatusque vix ad privati modice locupletis habitum: et oratio fuit submissa et infracta, extenuantis opes suas, urbiumque suæ ditionis egestatem querentis. Erant autem sub eo,

præter Cibyam, et Syleum, et Alimne quæ adpella- U. C. 563.
 tur: ex his, ut se suosque spoliaret, quinque et vi- A. C. 189.
 ginti talenta se confecturum, prope ut diffidens,
 pollicebatur. *Enimvero, inquit consul, ferri jam lu-
 dificatio ista non potest. Parum est, non erubuisse ab-
 sentem, quum per legatos frustrareris nos: præsens
 quoque in eadem inpudentia persistis. Quinque et vi-
 ginti talenta tyrannidem tuam exhaurirent? Quingenta
 ergo talenta nisi triduo numeras, populationem in agris,
 obsidionem in urbe expecta. Hac denunciatione con-
 territus, perstare tamen in pertinaci simulatione in-
 opiæ: et paullatim inliberali adjectione, nunc per
 cavillationem, nunc precibus et simulatis lacrymis,
 ad centum talenta est perductus: adjecta decem
 millia medimnûm frumenti. Hæc omnia intra sex
 dies exacta.*

XV. A Cibyra per agros Sindensium exercitus
 ductus, transgressusque Caularem amnem, posuit
 castra. Postero die est præter Caralitin paludem
 agmen ductum: ad Mandropolim manserunt: inde
 progredientibus ad Lagon, proximam urbem, metu
 incolæ fugerunt. Vacuum hominibus, et refertum
 rerum omnium copia, oppidum diripuerunt: inde
 ab Lysis fluminis fonte, postero die ad Cobulatum
 amnem progressi. Termessenses eo tempore Ision-
 densium arcem, urbe capta, obpugnabant: inclusi,
 quum alia spes auxilii nulla esset, legatos ad consu-
 lem, orantes opem, miserunt: *cum conjugibus ac libe-
 ris in arce inclusos se mortem in dies, aut ferro aut
 fame patiendam, expectare. Volenti consuli caussa
 in Pamphyliam divertendi oblata est: adveniens ob-
 sidione Isiondenses exemit. Termesso pacem dedit,
 quinquaginta talentis argenti acceptis: item Aspen-*

U. C. 563. diis ceterisque Pamphyliae populis. Ex Pamphylia
 ▲. C. 189. rediens ad fluvium Taurum primo die, postero ad
 Xylinen (quam vocant) Comen posuit castra. Pro-
 fectus inde continentibus itineribus ad Cormasa ur-
 bem pervenit. Darsa proxima urbs erat: eam, metu
 incolarum desertam, plenam omnium rerum copia
 invenit. Progredienti præter paludes legati ab Ly-
 sinoë, dedentes civitatem, venerunt. Inde in agrum
 Sagalassenum, uberem fertilemque omni genere fru-
 gum, ventum est: Colunt Pisidæ, longe optimi bello
 regionis ejus: quum ea res animos facit, tum agri
 fœcunditas, et multitudo hominum, et situs inter
 paucas munitæ urbis. Consul, quia nulla legatio
 ad finem præsto fuerat, prædatum in agros misit:
 tum demum fracta pertinacia est, ut ferri agique res
 suas viderunt. Legatis missis, pacti quinquaginta
 talentis, et viginti millibus medimnûm tritici, viginti
 hordei, pacem inpetraverunt. Progressus inde ad
 Obrinæ fontes, ad vicum, quem Aporidos Comen
 vocant, posuit castra. Eo Seleucus ab Apamea pos-
 tero die venit. Ægros inde et inutilia impedimenta
 quum Apameam dimisisset, ducibus itinerum ab Se-
 leuco acceptis, profectus eo die in Metropolitanum
 campum, postero die Dinias Phrygiæ processit. Inde
 Synnada venit, metu omnibus circa oppidis desertis:
 quorum jam præda grave agmen trabens, vix quin-
 que millium die toto itinere perfecto, ad Beudos,
 quod vetus adpellant, pervenit: ad Anabura inde, et
 altero die ad Alandri fontes, tertio ad Abbassum po-
 suit castra: ibi plures dies stativa habuit, quia per-
 ventum erat ad Tolistoboiorum fines.

Gallogræ- XVI. Galli, magna hominum vis, seu inopia agri,
 corum ori- seu prædæ spe, nullam gentem, per quam ituri essent,
 go.

parem armis rati, Brenno duce in Dardanos perve- U. C. 563.
nerunt: ibi seditio orta, et ad viginti millia homi- A. C. 189.
num, cum Leonorio ac Lutario regulis, secessione
facta a Brenno, in Thraciam iter averterunt: ubi
cum resistantibus pugnando, pacem petentibus sti-
pendium inponendo, Byzantium quum pervenissent,
aliquamdiu oram Propontidis vectigalem habendo,
regionis ejus urbes obtinuerunt. Cupido inde eos
in Asiam transeundi, audientes ex propinquo, quanta
ubertas terræ ejus esset, cepit: et, Lysimachia fraude
capta, Chersonesoque omni armis possessa, ad Hel-
lespontum descenderunt. Ibi vero exiguo divisam
freto cernentibus Asiam multo magis animi ad trans-
eundum accensi; nunciosque ad Antipatrum, præ-
fectum ejus oræ, de transitu mittebant: quæ res
quum lentius spe ipsorum traheretur, alia rursus
nova inter regulos orta seditio est. Leonorius re-
tro, unde venerat, cum majore parte hominum re-
petit Byzantium: Lutarius Macedonibus, per spe-
ciem legationis ab Antipatro ad speculandum missis,
duas tectas naves et tres lembos adimit: his, alios
atque alios dies noctesque transvehendo, intra pau-
cos dies omnes copias trajecit. Haud ita multo
post Leonorius, adjuvante Nicomede Bithyniæ rege,
a Byzantio transmisit. Coëunt deinde in unum
rursus Galli, et auxilia Nicomedi dant, adver-
sus Zyboetam, partem tenentem Bithyniæ, gerenti
bellum. Atque eorum maxime opera devictus Zy-
boeta est, Bithyniaque omnis in ditionem Nicome-
dis concessit. Profecti ex Bithynia in Asiam pro-
cesserunt: non plus ex viginti millibus hominum,
quam decem armata erant: tamen tantum terroris
omnibus, quæ cis Taurum incolunt, gentibus injece-
rant, ut, quas adissent, quasque non adissent, pari-

U. C. 563. ter ultimæ propinquis, imperio parerent. Postremo,
 A. C. 189. quum tres essent gentes, Tolistoboiï, Trocmi, Tec-
 tosagi, in tres partes, qua cuique populorum suo-
 rum vectigalis Asia esset, diviserunt. Trocmis Hel-
 lesponti ora data; Tolistoboiï Æolida atque Ioniam,
 Tectosagi mediterranea Asiæ sortiti sunt: et stipen-

Sedem ca-
piunt cir-
ca Halyn. dium tota cis Taurum Asia exigebant. Sedem au-
 tem ipsi sibi circa Halyn flumen ceperunt: tantus-
 que terror eorum nominis erat, multitudine etiam
 magna sobole aucta, ut Syriæ quoque ad postremum
 reges stipendium dare non abnuerent. Primus Asiam
 incolentium abnuït Attalus, pater regis Eumenis:
 audacique incepto, præter omnium opinionem, ad-
 fuit fortuna, et signis conlatis superior fuit: non
 tamen ita infregit animos eorum, ut absisterent im-
 perio. Eadem opes usque ad bellum Antiochi cum
 Romanis manserunt: tum quoque, pulso Antiocho,
 magnam spem habuerunt, quia procul mari incole-
 rent, Romanum exercitum ad se non perventurum.

Manlius
exercitum
hortatur.

XVII. Cum hoc hoste, tam terribili omnibus re-
 gionis ejus, quia bellum gerendum erat, pro concione
 milites maxime in hunc modum adlocutus est con-
 sul: *Non me præterit, milites, omnium, quæ Asiam
 colunt, gentium Gallos fama belli præstare. Inter
 mitissimum genus hominum ferox natio, pervagata bello
 prope orbem terrarum, sedem cepit: procera corpora,
 promissæ et rutilatæ comæ, vasta scuta, prælongi gla-
 dii: ad hoc centus inuentium prælium, et ululatus, et
 tripudia, et quatientium scuta in patrium quemdam
 modum horrendus armorum crepitus: omnia de indus-
 tria composita ad terrorem. Sed hæc, quibus insolita
 atque insueta sunt, Græci, et Phryges, et Cares timeant:
 Romanis, Gallici tumultus adsuetis, etiam vanitates
 notæ sunt. Semel primo congressu ad Alliam olim fu-*

derunt majores nostros: ex eo tempore per ducentos U. C. 566.
jam annos pecorum in modum consternatos cædunt fu- A. C. 189.
gantque; et plures prope de Gallis triumphi, quam de
toto orbe terrarum, acti sunt. Jam usu hoc cognitum
est, si primum inpetum, quem fervido ingenio et cæca
ira effundunt, sustinueris, fluunt sudore et lassitudine
membra, labant arma: mollia corpora, molles, ubi ira
consedit, animos sol, pulvis, sitis, ut ferrum non ad-
moveas, prosternunt. Non legionibus legiones eorum
solum experti sumus, sed vir unus cum viro congregien-
do, T. Manlius, M. Valerius, quantum Gallicam ra-
biem vinceret Romana virtus, docuerunt. Jam M. Man-
lius unus agmine scandentes in Capitolium Gallos de-
trusit. Et illis majoribus nostris cum haud dubiis Gal-
lis in terra sua genitis res erat. Hi jam degeneres
sunt; mixti, et Gallogræci vere, quod adpellantur: sic-
ut in frugibus pecudibusque, non tantum semina ad
servandam indolem valent, quantum terræ proprietat
cælique, sub quo aluntur, mutat. Macedones, qui
Alexandriam in Ægypto, qui Seleuciam ac Babylo-
niam, quique alias sparsas per orbem terrarum colonias
habent, in Syros, Parthos, Ægyptios degenerarunt.
Massilia, inter Gallos sita, traxit aliquantum ab ad-
colis animorum. Tarentinis quid ex Spartana, dura
illa et horrida, disciplina mansit? Generosius in sua
quidquid sede gignitur; insitum alienæ terræ, in id,
quo alitur, natura vertente se, degenerat. Phrygas
igitur Gallicis oneratos armis, sicut in acie Antiochi
cecidistis, victos victores cædetis. Magis id vereor, ne
parum inde gloriæ, quam ne nimium belli sit. Attalus
eos rex sæpe fudit fugavitque. Nolite existimare, bel-
luas tantum recens captas feritatem illam silvestrem
primo servare, deinde, quum diu manibus humanis

U. C. 563. *alantur, mitescere; in hominum feritate mulcenda non*
 A. C. 189. *eamdem naturam esse. Eosdemne hos creditis esse, qui*
patres eorum avique fuerunt? extorres inopia agrorum
profecti domo per asperrimam Illyrici oram; Pæoniam
inde et Thraciam, pugnando cum ferocissimis gentibus,
emensi, has terras ceperunt. Duratos eos tot malis
exasperatosque accepit terra, quæ copia rerum omnium
saginare: uberrimo agro, mitissimo cælo, clementibus
adcolarum ingeniis, omnis illa, cum qua venerant, man-
suefacta est feritas. Vobis, mehercule, Martis viris,
cavenda ac fugienda quamprimum amænitas est Asiæ:
tantum hæ peregrinæ voluptates ad extinguendum vi-
gorem animorum possunt; tantum contagio disciplinæ
morisque adcolarum valet. Hoc tamen feliciter evenit,
quod, sicut vim adversus vos nequaquam, ita famam
apud Græcos parem illi antiquæ obtinent, cum qua ve-
nerunt; bellique gloriam victores eamdem inter socios
habebitis, quam si servantes antiquum specimen animo-
rum Gallos vicissetis.

Galatiam
 ingrediun-
 tur Roma-
 ni.

XVIII. Concione dimissa, missisque ad Eposog-
 natum legatis, qui unus ex regulis et in Eumenis
 amicitia manserat, et negaverat Antiocho adversus
 Romanos auxilia, castra movit: primo die ad Alan-
 drum flumen, postero ad vicum, quem vocant Tys-
 con, ventum. Eo legati Oroandensium quum venis-
 sent, amicitiam-petentes, ducenta talenta iis sunt
 imperata; precantibusque, ut domum renunciarent,
 potestas facta. Ducere inde exercitum consul ad
 Plitendum: deinde ad Alyattos castra posita. Eo
 missi ad Eposognatum redierunt, et legati cum illis
 reguli orantes, ne Tectosagis bellum inferret: ipsum
 in eam gentem iturum Eposognatum, persuasurumque,
 ut imperata faciant. Data venia regulo, duci inde

exercitus per Axylon (quam vocant) terram cœptus. U. C. 563.
Ab re nomen habet: non ligni modo quidquam, sed A. C. 189.
ne spinas quidem, aut ullum aliud alimentum fert
ignis. Fimo bubulo pro lignis utuntur. Ad Cubal-
lum, Gallogræciæ castellum, castra habentibus Ro-
manis adparuere cum magno tumultu hostium equi-
tes: nec turbarunt tantum stationes Romanas, re-
pente invecti; sed quosdam etiam occiderunt: qui
tumultus quum in castra perlatus esset, effusus re-
pente omnibus portis equitatus Romanus fudit fuga-
vitque Gallos, et aliquot fugientes occidit. Inde
consul, ut qui jam ad hostes perventum cerneret,
explorato deinde et cum cura coacto agmine proce-
debat: et continentibus itineribus quum ad Sanga-
rium flumen pervenisset, pontem, quia vado nus-
quam transitus erat, facere instituit. Sangarius, ex
Adoreo monte per Phrygiam fluens, miscetur ad
Bithyniam Tymbreti fluvio: inde major jam gemi-
natis aquis per Bithyniam fertur, et in Propontidem
sese effundit; non tamen tam magnitudine memo-
rabilis, quam quod piscium adcolis ingentem vim
præbet. Transgressis ponte perfecto flumen, præ-
ter ripam euntibus Galli Matris Magnæ a Pessinunte
obcurrere cum insignibus suis, vaticinantes fanatico
carmine, Deam Romanis viam belli et victoriam
dare, imperiumque ejus regionis. Accipere se omen
quum dixisset consul, castra eo ipso loco posuit:
postero die ad Gordium pervenit. Id haud magnum
quidem oppidum est, sed plus, quam mediterraneum,
celebre et frequens emporium: tria maria pari ferme
distantia intervallo habet, Hellespontum, ad Sino-
pen, et alterius oræ litora, qua Cilices maritimi co-
lunt: multarum magnarumque præterea gentium

U. C. 563. fines contingit, quarum commercium in eum maxime
 A. C. 189. locum mutui usus contraxere: id tum desertum fuga
 incolarum oppidum, refertum idem copia rerum om-
 nium, invenerunt. Ibi stativa habentibus legati ab
 Eposognato venerunt, nunciantes, *profectum eum ad
 regulos Gallorum nihil æqui inpetrasse: ex campestri-
 bus vicis agrisque frequentes demigrare, et cum conju-
 gibus ac liberis, quæ ferre atque agere possint, præ se
 agentes portantesque Olympum montem petere, ut inde
 armis locorumque situ sese tueantur.*

Galli in
 montes
 confugi-
 unt.

XIX. Certiora postea Oroandensium legati adtu-
 lerunt: *Tolistoboiorum civitatem Olympum montem ce-
 pisse; diversos Tectosagos alium montem, qui Magaba
 dicatur, petisse. Trocmos, conjugibus ac liberis apud
 Tectosagos depositis, armatorum agmine Tolistoboiis
 statuisse auxilium ferre.* Erant autem tunc trium
 populorum reguli Ortiagon, et Combolomarus, et
 Gaulotus. Iis hæc maxime belli ratio sumendi fue-
 rat, quod, quum montes editissimos ejus regionis te-
 nerent, convectis omnibus, quæ ad usum quamvis
 longi temporis subficerent, tædio se fatigaturos hos-
 tem censebant. *Nam neque ausuros per tam ardua
 atque iniqua loca subire eos: et, si conarentur, vel par-
 va manu prohiberi ac deturbari posse: nec quietos, in
 radicibus gelidorum montium sedentes, frigus aut in-
 opiam laturos.* Et quum ipsa altitudo locorum eos
 tutaretur, fossam quoque et alia munimenta vertici-
 bus iis, quos insederant, circumjecere. Minima ad-
 paratus missilium telorum cura fuit, quod saxa ad-
 fatim præbituram asperitatem ipsam locorum crede-
 bant.

XX. Consul, quia non cominus pugnam, sed
 procul locis obpugnandis, futuram præceperat ani-

mo, ingentem vim pilorum, velitarium hastarum, sa- U. C. 563.
 gittarum, glandisque, et modicorum, qui funda mitti A. C. 189.
 possent, lapidum paraverat: instructusque missilium
 adparatu ad Olympum montem ducit, et a quinque Consul ad
 ferme millibus locat castra. Postero die cum qua- Olympum
 dringentis equitibus et Attalo progressum eum, ad montem
 naturam montis situmque Gallicorum castrorum vi- quem
 sendum, equites hostium, duplex numerus, effusi ceperant
 castris in fugam averterunt: occisi quoque pauci Tolistoboi.
 fugientium, vulnerati plures. Tertio die cum omni-
 bus ad loca exploranda profectus, quia nemo hostium
 extra munimenta processit, tuto circumvectus mon-
 tem, animadvertit, meridiana regione terrenos et
 placide adclivos ad quemdam finem colles esse, ad
 septentrionem arduas et rectas prope rupes; atque,
 omnibus ferme aliis inviis, itinera tria esse; unum
 medio monte, qua terrena erant: duo difficilia ab
 hiberno solis ortu, et ab æstivo occasu. Hæc con-
 templatus, eo die sub ipsis radicibus posuit castra:
 postero die, sacrificio facto, quum primis hostiis
 litasset, trifariam exercitum divisum ducere ad hos-
 tem pergit: ipse cum maxima parte copiarum, qua
 æquissimum aditum præbebat mons, adscendit. L.
 Manlium fratrem ab hiberno ortu, quoad loca pa-
 tiantur, et tuto possit, subire jubet: si qua pericu-
 losa et prærupta obcurrant, non pugnare cum ini-
 quitate locorum, neque inexsuperabilibus vim ad-
 ferre; sed obliquo monte ad se declinare, et suo ag-
 mini conjungi. C. Helvium cum tertia parte circum-
 ire sensim per infima montis, deinde ab æstivo oc-
 casu erigere agmen: et Attali auxilia trifariam æquo
 numero divisit; secum esse ipsum juvenem jussit;
 equitatum cum elephantis in proxima tumultis pla-

U. C. 563. nitie reliquit. Edictum præfectis, ut intenti, quid
 A. C. 189. ubique geratur, animadvertant; opemque ferre, quo
 postulent res, properent.

Prælium
 commit-
 titur.

Missilibus
 Galli tur-
 bantur.

XXI. Galli, duobus lateribus satis fidentes invia
 esse, ab ea parte, quæ in meridiem vergeret, ut ar-
 mis clauderent viam, quatuor ferme millia armato-
 rum ad tumulum, imminuentem viæ minus mille pas-
 suum a castris, occupandum mittunt; eo se rati vel-
 ut castello iter inpedituros. Quod ubi Romani vi-
 derunt, expediunt sese ad pugnam: ante signa mo-
 dico intervallo velites eunt, et ab Attalo Cretenses
 sagittarii, et funditores, et Tralli, et Thraces: signa
 peditum, ut per arduum, leni gradu ducuntur, ita
 præ se habentium scuta, ut missilia tantum vitarent,
 pede conlato non viderentur pugnaturi. Missilibus ex
 intervallo loci prælium commissum est, primo par,
 Gallos loco adjuvante, Romanos varietate et copia
 telorum. Procedente certamine, nihil jam æqui
 erat: scuta longa, ceterum ad amplitudinem corpo-
 rum parum lata, et ea ipsa plana, male tegebant
 Gallos. Nec jam tela alia habebant, præter gladios:
 quorum, quum manum hostis non consereret, nullus
 usus erat. Saxis, nec modicis, ut quæ non præpa-
 rassent, sed quod cuique temere trepidanti ad ma-
 num venisset, ut insueti, nec arte nec viribus adju-
 vantes ictum, utebantur: sagittis, glande, jaculis
 incauti ab omni parte configebantur; nec, quid
 agerent, ira et pavore obcæcatis animis, cernebant;
 et erant deprehensi genere pugnae, in quod minime
 apti sunt. Nam quemadmodum cominus, ubi in
 vicem pati et inferre vulnera licet, accendit ira ani-
 mos eorum; ita, ubi ex occulto et procul levibus
 telis vulnerantur, nec, quo ruant cæco inpetu, ha-

bent, velut feræ transfixæ in suos temere incurrunt. U. C. 563.
 Detegebat vulnera eorum, quod nudi pugnant, et A. C. 189.
 sunt fusa et candida corpora, ut quæ numquam, nisi
 in pugna, nudentur : ita et plus sanguinis e multa
 carne fundebatur, et fœdiores patebant plagæ, et
 candor corporum magis sanguine atro maculabatur.
 Sed non tam patentibus plagis moventur : interdum
 insecta cute, ubi latior, quam altior, plaga est, et-
 iam gloriosius se pugnare putant. Iidem, quum
 aculeus sagittæ aut glandis, abditæ introrsus, tenui
 vulnere in speciem urit, et scrutantes, quæ vellant,
 telum non sequitur ; tum, in rabiem et pudorem
 tam parvæ perimentis pestis versi, prosternunt cor-
 pora humi, sic ut passim procumberent. Alii, ru-
 entes in hostem, undique configebantur : et, quum
 cominus venerant, gladiis a velitibus trucidabantur.
 Hic miles tripedalem parmam habet, et in dextra
 hastas, quibus eminus utitur : gladio Hispaniensi
 est cinctus : quod si pede conlato pugnandum est,
 translatis in lævam hastis, stringit gladium. Pauci
 supererant jam Gallorum : qui, postquam ab levi
 armatura superatos se viderunt, et instare legionum
 signa, effusa fuga castra repetunt, pavoris et tumul-
 tus jam plena : ut ubi feminæ, puerique, et alia in-
 bellis turba permixta esset. Romanos victores de-
 serti fuga hostium acceperunt tumuli.

*Effusa fuga
castra re-
petunt.*

XXII. Sub idem tempus L. Manlius et C. Hel-
 vius, quum, quoad viam colles obliqui dederunt,
 escendissent, postquam ad invia ventum est, flexere
 iter in partem montis, quæ una habebat iter ; et
 sequi consulis agmen, modico uterque intervallo,
 velut ex composito, cœperunt : quod primo optimum
 factu fuisset, in id necessitate ipsa compulsi. Sub-

U. C. 563. sidia enim in talibus iniquitatibus locorum maximo
 A. C. 189. sæpe usui fuerunt: ut, primis forte deturbatis, secundi et tegant pulsos, et integri pugnam excipiant. Consul, postquam ad tumulos, ab levi armatura captos, prima signa legionum pervenerunt, respirare et conquiescere paullisper militem jubet; simul strata per tumulos corpora Gallorum ostentat: Et, *quum levis armatura tale prælium ediderit, quid ab legionibus, quid ab justis armis, quid ab animis fortissimorum militum expectari? Castra illis capienda esse, in quæ compulsus ab levi armatura hostis trepidet.* Præcedere tamen jubet levem armaturam: quæ, quum staret agmen, conligendis per tumulos telis, ut missilia subficerent, haud segne id ipsum tempus consumserat. Jam castris adpropinquabant: et Galli, ne parum se munimenta sua tegerent, armati pro vallo constiterant: obruti deinde omni genere telorum, quum, quo plures ac densiores erant, eo minus vani quidquam intercideret teli, intra vallum momento temporis compelluntur, stationibus tantum firmis ad ipsos aditus portarum relictis. In multitudinem, compulsam in castra, vis ingens missilium telorum coniciebatur: et, vulnerari multos, clamor, permixtus mulierum atque puerorum ploratus, significabat. In eos, qui portas stationibus suis clausuerant, legionum antesignani pila conjecerunt: hi vero non vulnerabantur, sed, transverberatis scutis, plerique inter se conserti hærebant: nec diutius inpetum Romanorum sustinuerunt.

Castra
 Gallorum
 capiuntur.

XXIII. Patentibus jam portis, priusquam inrumperent victores, fuga e castris Gallorum in omnes partes facta est: ruunt cæci per vias, per invia: nulla præcipitia saxa, nullæ rupes obstant: nihil præ-

ter hostem metuunt. Itaque plerique præcípites per U. C. 563.
vastam altitudinem prolapsi aut debilitati exaniman- A. C. 189.
tur : consul, castris captis, direptione prædaque abs-
tinet militem : sequi pro se quemque, et instare, et
perculsis pavorem addere jubet. Supervenit et alte-
rum cum L. Manlio agmen ; nec eos castra intrare
sinit : protinus ad persequendos hostes mittit : et
ipse paullo post, tradita captivorum custodia tribu-
nis militum, sequitur ; debellatum ratus, si in illo
pavore quam plurimi cæsi forent, aut capti. Egresso
consule, C. Helvius cum tertio agmine advenit : nec
continere suos a direptione castrorum valuit : præ-
daque eorum, iniquissima sorte, qui pugnae non in-
terfuerant, facta est. Equites diu, ignari et pugnae
et victoriae suorum, steterunt : deinde et ipsi, quan-
tum equis subire poterant, sparsos fuga Gallos circa
radices montis consecrati cecidere, aut cepere. Nu-
merus interfectorum haud facile iniri potuit, quia
late inter omnes amfractus montium fugaque et cædes
fuit : et magna pars rupibus inviis in profundæ alti-
tudinis convalles delapsa est ; pars in silvis vepribus-
que occisa. Claudius, qui bis pugnatum in Olympo
monte scribit, ad quadraginta millia hominum cæsa,
auctor est : Valerius Antias, qui magis inmodicus in
numero augendo esse solet, non plus decem millia.
Numerus captivorum haud dubie millia quadraginta
explevit, quia omnis generis ætatisque turbam secum
traxerant, demigrantium magis, quam in bellum
euntium, modo. Consul, armis hostium in uno con-
crematis cumulo, ceteram prædam conferre omnes
jussit : et aut vendidit, quod ejus in publicum redi-
gendum erat : aut cum cura, ut quam æquissima es-
set, per milites divisit. Laudati quoque pro con-

U. C. 563. cione omnes sunt, donatique pro merito quisque;
 A. C. 189. ante omnes Attalus, summo ceterorum adsensu: nam singularis ejus juvenis quum virtus et industria in omnibus laboribus periculisque, tum modestia etiam fuerat.

In Tecto-
 sagos pro-
 ficiscitur
 eos.

Gallicæ
 captivæ
 facinus.

XXIV. Supererat bellum integrum cum Tecto-
 sagis. Ad eos profectus consul, tertiis castris Ancy-
 ram, nobilem in illis locis urbem, pervenit, unde
 hostes paullo plus decem millia aberant. Ubi quum
 stativa essent, facinus memorabile a captiva factum
 est. Ortiagontis reguli uxor forma eximia custodie-
 batur inter plures captivos, cui custodiæ centurio
 præerat, et libidinis et avaritiæ militaris. Is primo
 ejus animum tentavit: quem quum abhorrentem a
 voluntario videret stupro, corpori, quod servum for-
 tuna erat, vim fecit. Deinde, ad leniendam indigni-
 tatem injuriæ, spem redditus ad suos mulieri facit; et
 ne eam quidem, ut amans, gratuitam: certo auri
 pondere pactus, ne quem conscium suorum haberet,
 ipsi permittit, ut, quem vellet, unum ex captivis nun-
 cium ad suos mitteret. Locum prope flumen con-
 stituit; quo duo, ne plus, necessarii captivæ cum
 auro venirent nocte insequenti ad eam accipiendam.
 Forte ipsius mulieris servus inter captivos ejusdem
 custodiæ erat: hunc nuncium primis tenebris extra
 stationes centurio educit. Nocte insequenti et duo
 necessarii mulieris ad constitutum locum, et centurio
 cum captiva venit: ubi quum aurum ostenderent,
 quod summam talenti Attici (tanti enim pepigerat)
 expleret; mulier lingua sua, *stringerent ferrum, et*
centurionem pensantem aurum occiderent, imperavit.
 Jugulati præcisum caput ipsa involutum veste ferens,
 ad virum Ortiagontem, qui ab Olympo domum refu-

gerat, pervenit: quem priusquam complecteretur, U. C. 562.
caput centurionis ante pedes ejus abjecit: miranti- A. C. 189.
que, cujusnam id caput hominis, aut quod id facinus
haudquaquam muliebres esset, et injuriam corporis,
et ultionem violatæ per vim pudicitiae confessa viro
est: aliaque (ut traditur) sanctitate et gravitate vitæ
hujus matronalis facinoris decus ad ultimum con-
servavit.

XXV. Ad Ancyram in stativa Tectosagum ora- Tectosagum legati.
tores ad consulem venerunt, petentes, ne ante ab
Ancyra castra moveret, quam conlocutus cum suis
regibus esset: nullas conditiones pacis iis non bello
fore potiores. Tempus in posterum diem constitui-
tur, locusque qui maxime medius inter castra Gallo-
rum et Ancyram est visus. Quo quum consul ad
tempus cum præsidio quingentorum equitum venisset,
nec ullo Gallorum ibi viso, regressus in castra esset,
oratores iidem redeunt, excusantes, religione objecta
venire reges non posse: principes gentis, per quos
æque res transigi posset, venturos. Consul se quo-
que Attalum missurum dixit. Ad hoc colloquium
utrimque ventum est: trecentos equites Attalus præ-
sidii causa quum adduxisset, jactæ sunt pacis con-
ditiones. Finis rei quia absentibus ducibus inponi
non poterat, convenit, uti consul regesque eo loco
postero die congregarentur. Frustratio Gallorum eo Galli insie-
spectabat, primum ut tererent tempus, donec res dian-
suas, quibus periclitari volebant, cum conjugibus ac t-
liberis trans Halyn flumen trajicerent: deinde quod
ipsi consuli, parum cauto adversus colloquii fraudem,
insidiabantur. Mille ad eam rem ex omni numero
audaciæ expertæ delegerunt equites. Et successisset
fraudi, ni pro jure gentium, cujus violandi consilium

U. C. 563. initum erat, stetisset fortuna. Pabulatores lignato-
A. C. 189. resque Romani in eam partem, in qua conloquium
futurum erat, ducti sunt; tutius id futurum tribunis
ratis, quia consulis præsidium et ipsum pro statione
habitura erant, hosti obpositum: suam tamen alte-
ram stationem propius castra sexcentorum equitum
posuerunt. Consul, adfirmante Attalo, venturos re-
ges, et transigi rem posse, profectus e castris, quum
eodem, quo antea, præsidio equitum quinque millia
fere processisset, nec multum a constituto loco abes-
set, repente concitatis equis cum inpetu hostili videt
Gallos venientes: constituit agmen, et expedire tela
animosque equitibus jussis primo constanter initium
pugnæ accepit, nec cessit: dein, quum prægravaret
multitudo, cedere sensim, nihil confusis turmarum
ordinibus, cœpit: postremo, quum jam plus in mora
periculi, quam in ordinibus conservandis præsidii es-
set, omnes passim in fugam effusi sunt. Tum vero
instare dissipatis Galli, et cædere; magnaue pars
obpressa foret ni statio pabulatorum, sexcenti equi-
tes, obcurrissent. Ii, procul clamore pavido suorum
exaudito, quum tela equosque expedissent, integri
profligatam pugnam acceperunt. Itaque versa ex-
templo fortuna est, versus in victores a victis terror:
et primo inpetu fusi Galli sunt, et ex agris concurre-
bant pabulatores, et undique obviis hostis Gallis
erat: ut ne fugam quidem facilem aut tutam habe-
rent, quia recentibus equis Romani fessos sequeban-
tur. Pauci ergo effugerunt: captus est nemo: ma-
ior multo pars per fidem violati conloquii pœnas
morte luerunt. Romani, ardentibus ira animis, pos-
tero die omnibus copiis ad hostem perveniunt.

XXVI. Biduum naturâ montis per se ipsum ex-

ploranda, ne quid ignoti esset, absumsit consul : ter-
 tio die, quum auspicio operam dedisset, deinde inmo-
 lasset, in quatuor partes divisas copias educit : duas
 ut medio monte duceret, duas ab lateribus ut adver-
 sus cornua Gallorum erigeret. Hostium quod robo-
 ris erat, Tectosagi et Trocmi mediam tenebant aciem,
 millia hominum quinquaginta : equitatum (quia equo-
 rum nullus inter inæquales rupes usus erat) ad pedes
 deductum, decem millia hominum, ab dextro locave-
 runt cornu. Ariarathis Cappadoces et Morzi auxi-
 liares in lævo quatuor ferme millium numerum ex-
 plebant. Consul, sicut in Olympo monte, prima in
 acie locata levi armatura, telorum omnis generis ut
 æque magna vis ad manum esset, curavit. Ubi ad-
 propinquarent, omnia eadem utrimque, quæ fuerant
 in priore prælio, erant præter animos, et victoribus
 ab re secunda auctos, et hostibus fractos : quia, etsi
 non ipsi victi erant, suæ gentis hominum cladem pro
 sua ducebant : itaque a paribus initiis cœpta res
 eundem exitum habuit. Velut nubes levium telorum
 conjecta obruit aciem Gallorum : nec aut procurrere
 quisquam ab ordinibus suis, ne nudarent undique cor-
 pus ad ictus, audebant : et stantes, quo densiores
 erant, hoc plura, velut destinatum petentibus, vul-
 nera accipiebant. Consul, jam per se turbatis si le-
 gionum signa ostendisset, versuros extemplo in fu-
 gam omnes ratus, receptis inter ordines velitibus et
 alia turba auxiliorum, aciem promovit.

XXVII. Galli, et memoria Tolistoboiorum cladis
 terri, et inhærentia corporibus gerentes tela, fessi-
 que et stando et vulneribus, ne primum quidem in-
 petum et clamorem Romanorum tulerunt. Fuga ad
 castra inclinavit : sed pauci intra munimenta sese

U. C. 563.
 A. C. 189.

Prælium.

Vincunt
 Romani.

U. C. 563. recepere : pars major, dextra lævaque prælati, qua
A. C. 189. quemque inpetus tulit, fugerunt : victores, usque ad
castra secuti, ceciderunt terga : deinde in castris cupiditate prædæ hæserunt, nec sequebatur quisquam. In cornibus Galli diutius steterunt, quia serius ad eos perventum est : ceterum ne primum quidem conjectum telorum tulerunt. Consul, qui ingressos in castra ab direptione abstrahere non poterat, eos, qui in cornibus fuerant, protinus ad sequendos hostes misit : per aliquantum spatium secuti, non plus tamen octo millia hominum in fuga (nam pugna nulla fuit) ceciderunt : reliqui flumen Halyn trajecerunt. Romanorum magna pars ea nocte in hostium castris mansit ; ceteros in sua castra consul reduxit. Postero die captivos prædamque recensuit : quæ tanta fuit, quantam avidissima rapiendi gens, quum cis montem Taurum omnia armis per multos tenuisset annos, coacervare potuit. Galli, ex dissipata passim fuga in unum locum congregati, magna pars saucii aut inermes, nudati omnibus rebus, oratores de pace ad consulem miserunt. Eos Manlius Ephesum venire iussit : ipse, (jam enim medium autumnus erat) locis gelidis propinquitate Tauri montis excedere properans, victorem exercitum in hiberna maritimæ oræ reduxit.

XXVIII. Dum hæc in Asia geruntur, in ceteris provinciis tranquillæ res fuerunt. Censores Romæ T. Quinctius Flamininus et M. Claudius Marcellus senatum perlegerunt : princeps in senatu tertium lectus P. Scipio Africanus : quatuor soli præteriti sunt, nemo curuli usus honore : et in equitatu recensendo mitis admodum censura fuit. Substructionem super Æquimælium in Capitolio, et viam silice sternendam

a porta Capena ad Martis locaverunt. Campani, U. C. 568.
 ubi censerentur, senatum consuluerunt: decretum, A. C. 189.
 uti Romæ censerentur. Aquæ ingentes eo anno
 fuerunt. Tiberis duodecies campum Martium pla-
 naque urbis inundavit. Ab Cn. Manlio consule
 bello in Asia cum Gallis perfecto, alter consul M.
 Fulvius, perdomitis Ætolis, quum trajecisset in Ce-
 phalleniam, circa civitates insulæ misit pereuncta-
 tum, utrum se dedere Romanis, an belli fortunam
 experiri, mallent? Metus ad omnes valuit, ne deditio-
 nem recusarent: obsides inde imperatos pro viribus
 inopis populi, vicanos Nesiotæ, Cranii, Palenses et
 Samæi dederunt. Insperata pax Cephalleniae adful-
 serat; quum repente una civitas, incertum quam ob
 causam, Samæi desciverunt. Quia opportuno loco
 urbs posita esset, timuisse se aiebant, ne demigrare
 cogerentur ab Romanis: ceterum ipsine sibi eum
 finxerint metum, et timore vano quietem exuerint,
 an jactata sermonibus res apud Romanos perlata ad
 eos sit, nihil comperti est: nisi quod, datis jam ob-
 sidibus, repente portas clauserunt; et ne suorum
 quidem precibus (miserat enim sub muros consul ad
 tentandam misericordiam parentum populariumque)
 desistere ab incepto voluerunt. Obpugnari deinde,
 postquam nihil pacati respondebatur, cœpta urbs
 est: adparatum omnem tormentorum machinarum-
 que transvectum ab Ambraciæ obpugnatione habebat:
 et opera, quæ facienda erant, impigre milites
 perfecerunt: duobus igitur locis admoti arietes quat-
 tiebant muros.

Fulvius Ce-
 phalleniam
 recipit.

Samæi
 deficiunt.

Obpugnan-
 tur.

XXIX. Nec ab Samæis quidquam, quo aut opera,
 aut hostis arceri posset, prætermisum est: duabus
 tamen maxime resistebant rebus: una, interiorem

U. C. 563. semper juxta validum pro diruto novum obstruentes
 A. C. 189. murum; altera, eruptionibus subitis, nunc in opera
 hostium, nunc in stationes: et plerumque iis præliis
 superiores erant. Una ad coercendos inventa haud
 magna memoratu res est. Centum funditores ab
 Ægio et Patris et Dymis adciti. A pueris ii, more
 quodam gentis, saxis globosis, quibus ferme arenæ
 inmixtis strata litora sunt, funda mare apertum in-
 cessantes, exercebantur: itaque longius certiusque
 et validiore ictu, quam Baliaris funditor, eo telo usi
 sunt: et est non simplicis habenæ, ut Baliarica alia-
 rumque gentium funda: sed triplex scutale, crebris
 suturis duratum, ne fluxa habena volutetur in jactu
 glans, sed, librata quum sederit, velut nervo missa
 excutiat: coronas modici circuli magno ex inter-
 vallo loci adsuæti trajicere, non capita solum hos-
 tium vulnerabant, sed quem locum destinassent oris.
 Eæ fundæ Samæos cohibuerunt, ne tam crebro, neve
 tam audacter erumperent: adeo ut precarentur ex
 muris Achæos, ut parumper abscederent; et se, cum
 Romanis stationibus pugnantes, quiete spectarent.
 Quatuor menses obsidionem Same sustinuit: quum
 ex paucis quotidie aliqui eorum caderent, aut vulne-
 rarentur, et, qui superarent, fessi et corporibus et
 animis essent; Romani nocte per arcem, quam Cya-
 tidem vocant, (nam urbs, in mare devexa, in occi-
 dentem vergit) muro superato, in forum pervene-
 runt. Samæi, postquam captam urbis partem ab
 hostibus senserunt, cum conjugibus ac liberis in
 majorem refugerunt arcem: inde postero die dediti,
 direpta urbe, sub corona omnes venierunt.

Cos. in Pe-
 loponne-
 sum traji-
 cit.

XXX. Consul, compositis rebus Cephallenæ,
 præsidio Samæ inposito, in Peloponnesum, jam diu

arcessentibus Ægiensibus maxime ac Lacedæmoniis, U. C. 563.
 trajecit. Ægium, a principio Achaici concilii, sem- A. C. 189.
 per conventus gentis indicti sunt; seu dignitati ur-
 bis id, seu loci opportunitati datum est: hunc mo-
 rem Philopœmen eo primum anno labefactare cona-
 tus, legem parabat ferre, ut in omnibus civitatibus,
 quæ Achaici concilii essent, in vicem conventus age-
 rentur: et sub adventum consulis, Damiurgis civita-
 tium, qui summus est magistratus, Ægium evocan-
 tibus, Philopœmen (prætor tum erat) Argos con-
 ventum edixit: quo quum adpareret omnes fere con-
 venturos, consul quoque, quamquam Ægiensium fa-
 vebat caussæ, Argos venit; ubi quum disceptatio
 fuisset, et rem inclinatam cerneret, incepto destitit.
 Lacedæmonii deinde eum in sua certamina averte-
 runt. Sollicitam eam civitatem exsules maxime ha-
 bebant: quorum magna pars in maritimis Laconicæ
 oræ castellis, quæ omnis ademta erat, habitabant:
 id ægre patientes Lacedæmonii, ut aliqua liberum
 ad mare haberent aditum, si quando Romam aliove
 quo mitterent legatos, simulque ut emporium et re-
 ceptaculum peregrinis mercibus ad necessarios usus
 esset, nocte adorti vicum maritimum, nomine Lan,
 inproviso occupavere. Vicani, quique ibi exsules
 habitabant, primo inopinata re territi sunt: deinde,
 sub lucem congregati, levi certamine expulerunt La-
 cedæmonios: terror tamen omnem maritimam oram
 pervasit: legatosque communiter, et castella omnia
 vicique, et exsules, quibus ibi domicilia erant, ad
 Achæos miserunt.

XXXI. Philopœmen prætor, jam inde ab initio Decretum
 exsulum caussæ et amicus, et auctor semper Achæis Achæorum
 minuendi opes et auctoritatem Lacedæmoniorum, in Lacedæ-
 monios.

U. C. 563. concilium querentibus dedit: decretumque, eo referente, factum est, *Quum in fidem Achæorum tutelamque T. Quinctius et Romani Laconicæ oræ castella et vicos tradidissent, et, quum abstinere his ex fœdere Lacedæmonii deberent, Las vicus obpugnatus esset, cædesque ibi facta; qui ejus rei auctores adfinesque essent, nisi dederentur Achæis, violatum videri fœdus. Ad exposcendos eos legati extemplo Lacedæmonem missi sunt. Id imperium adeo superbum et indignum Lacedæmoniis visum est, ut, si antiqua civitatis fortuna esset, haud dubie arma extemplo capturi fuerint: maxime autem consternavit eos metus, si semel primis imperiis obediendo jugum acceperant, ne, id quod jam diu moliretur, Philopœmen exsulis Lacedæmonem traderet. Furentes igitur ira, triginta hominibus ex factione, cum qua consiliorum aliqua societas Philopœmeni atque exsulis erat, interfectis, decreverunt, renunciandam societatem Achæis, legatosque extemplo Cephalleniam mittendos, qui consuli M. Fulvio, quique Romanis Lacedæmonem dederent; orarentque eum, ut veniret in Peloponnesum ad urbem Lacedæmonem in fidem ditionemque populi Romani accipiendam.*

Achæi in
Lacedæ-
monios
bellum
decernunt.

XXXII. Id ubi legati ad Achæos retulerunt, omnium civitatum, quæ ejus concilii erant, consensu bellum Lacedæmoniis indictum est: ne extemplo gereretur, hiems impediit. Incursionibus tamen parvis, latrocinii magis quam belli modo, non terra tantum, sed etiam navibus a mari fines eorum vastati. Hic tumultus consulem in Peloponnesum adduxit; jussuque ejus Elin concilio indicto, Lacedæmonii ad disceptandum aditi. Magna ibi non disceptatio modo, sed etiam altercatio fuit: cui consul,

quum alia, satis ambitiose partem utramque fovendo, U. C. 563.
 incerta respondisset, una denunciatione, ut bello ab- A. C. 189.

stinerent, donec Romam legatos ad senatum misissent, finem inposuit. Utrimque legatio missa Romam est: exsules quoque Lacedæmoniorum suam caussam legationemque Achæis injunxerunt. Dio- Legati ab utrisque Romam mittuntur.

phanes et Lycortas, Megalopolitani ambo, principes legationis Achæorum fuerunt: qui, dissidentes in republica, tum quoque minime inter se convenientes orationes habuerunt. Diophanes senatui disceptationem omnium rerum permittebat: eos optime controversias inter Achæos ac Lacedæmonios finituros esse. Lycortas ex præceptis Philopœmenis postulabat, ut Achæis ex fœdere ac legibus suis, quæ decressent, agere liceret: libertatemque sibi inlibatam, cujus ipsi auctores essent, præstarent. Magnæ auctoritatis apud Romanos tum gens Achæorum erat: novari tamen nihil de Lacedæmoniis placebat: ceterum responsum ita perplexum fuit, ut et Achæi sibi de Lacedæmone permissum acciperent; et Lacedæmonii non omnia concessa iis interpretarentur: hac potestate inmodice Achæi ac superbe usi sunt.

XXXIII. Philopœmeni continuatur magistratus; qui veris initio, exercitu indicto, castra in finibus Lacedæmoniorum posuit: legatos deinde misit ad deposcendos auctores defectionis, et civitatem in pace futuram, si id fecissent, pollicens, et illos nihil indicta caussa passuros. Silentium præ metu ceterorum fuit: quos nominatim depoposcerat, ipsi se ituros professi sunt; fide accepta ab legatis, vim abfuturam, donec caussam dixissent: ierunt alii etiam inlustres viri, et advocati privatis, et quia pertinere caussam eorum ad rempublicam censebant,

U. C. 563. Numquam alias exsules Lacedæmoniorum Achæi
 A. C. 189. secum adduxerant in fines, quia nihil æque aliena-
 turum animos civitatis videbatur: tunc exercitus
 totius prope antesignani exsules erant. Ii venienti-

Lacedæmo-
 nii princi-
 pes violan-
 tur ab ex-
 sulibus.

bus Lacedæmoniis ad portam castrorum agmine
 facto obcurrerunt: et primo lacessere jurgiis: de-
 inde altercatione orta, quum accenderentur iræ, fe-
 rocissimi exsulum inpetum in Lacedæmonios fece-
 runt. Quum illi Deos et fidem legatorum testaren-
 tur, et legati et prætor submoveret turbas, et prote-
 geret Lacedæmonios, vinculaque jam quosdam inji-
 cientes arceret, crescebat tumultu concitato turba.
 Et Achæi ad spectaculum primo concurrebant: de-
 inde vociferantibus exsulibus, quæ passi forent, et
 orantibus opem, adfirmantibusque simul, *numquam*
talem occasionem habituros, si eam prætermisissent:
fædus, quod in Capitolio, quod Olympiæ, quod in arce
Athenis sacratum fuisset, irritum per illos esse: prius-
quam alio de integro fædere obligarentur, noxios puni-
endos esse; accensa his vocibus multitudo ad vocem
 unius, qui, ut ferirent, inclamavit, saxa conjecit:
 atque ita septemdecim, quibus vincula per tumultum
 injecta erant, interfecti sunt: sexaginta tres postero
 die comprehensi, a quibus prætor vim arcuerat, non
 quia salvos vellet, sed quia perire caussa indicta no-
 lebat, objecti multitudini iratæ, quum aversis auri-
 bus pauca locuti essent, damnati omnes, et traditi
 sunt ad supplicium.

Leges pacis
 dictæ Lacedæ-
 moniis.

XXXIV. Hoc metu injecto, Lacedæmoniis im-
 peratum primum, ut muros diruerent: deinde, ut
 omnes externi auxiliares, qui mercede apud tyran-
 nos militassent, terra Laconica excederent: tum,
 uti, quæ servitia tyranni liberassent, (ea magna mul-

titudo erat) ante diem certam abirent; qui ibi man- U. C. 563.
 sissent, eosprehendendi, vendendi, abducendi A- A. C. 189.
 chæis jus esset. Lycurgi leges moresque abroga-
 rent. Achæorum adsuescerent legibus institutisque:
 ita unius eos corporis fore, et de omnibus rebus fa-
 cilis consensuros. Nihil obedientius fecerunt, quam
 ut muros diruerent: nec ægrius passi sunt, quam ex-
 siles reduci. Decretum Tegeæ in concilio communi
 Achæorum de restituendis iis factum est: et, men-
 tione inlata, externos auxiliares dimissos, et Lacedæ-
 moniis adscriptos (ita enim vocabant, qui a ty-
 rannis liberati erant) urbe excessisse, in agros di-
 lapsos; priusquam dimitteretur exercitus, ire præto-
 rem cum expeditis, et comprehendere id genus ho-
 minum, et vendere jure prædæ placuit. Multi com-
 prehensi venierunt: porticus ex ea pecunia Megalo-
 poli permissu Achæorum refecta est, quam Lacedæ-
 monii diruerant. Et ager Belbinates, quem injuria
 tyranni Lacedæmoniorum possederant, restitutus ei-
 dem civitati, ex decreto vetere Achæorum, quod fac-
 tum erat, Philippo Amyntæ filio regnante. Per hæc
 velut enervata civitas Lacedæmoniorum diu Achæis
 obnoxia fuit: nulla tamen res tanto erat damno, Disciplina
 quam disciplina Lycurgi, cui per septingentos annos Lycurgi
 adsueverant, sublata. sublata.

XXXV. A concilio, ubi apud consulem inter A-
 chæos Lacedæmoniosque disceptatum est, M. Ful-
 vius, quia jam in exitu annus erat, comitiorum
 caussa profectus Romam, creavit consules M. Vale-
 rium Messallam et C. Livium Salinatorem, quum
 M. Æmilium Lepidum inimicum, eo quoque anno
 petentem, dejecisset. Prætores inde creati Q. Mar-
 cius Philippus, M. Claudius Marcellus, C. Stertinus,

U. C. 563. C. Atinius, P. Claudius Pulcher, L. Manlius Acidinus.
A. C. 189.

Comitiis perfectis, consulem M. Fulvium in provinciam ad exercitum redire placuit; eique et collegæ Cn. Manlio imperium in annum prorogatum est. Eo anno in ædem Herculis signum Dei ipsius ex decemvirorum responso, et sejuges in Capitolio aurati a P. Cornelio positi: consulem dedisse inscriptum est. Et duodecim clipea aurata ab ædilibus curulibus, P. Claudio Pulchro et Ser. Sulpicio Galba, sunt posita ex pecunia, qua frumentarios ob annonam compressam damnarunt: et ædilis plebis Q. Fulvius Flaccus duo signa aurata, uno reo damnato, (nam separatim accusaverant) posuit: collega

U. C. 564. ejus A. Cæcilius neminem condemnavit. Ludi Ro-
A. C. 188.

mani ter, plebei quinquies toti instaurati. M. Valerius Messalla inde et C. Livius Salinator consulatū idibus Martiis quum inissent, de republica, deque provinciis et exercitibus senatum consuluerunt. De Ætolia et Asia nihil mutatum est. Consulibus, alteri Pisæ cum Liguribus, alteri Gallia provincia decreta est: comparare inter se, aut sortiri jussi, et novos exercitus, binas legiones, scribere, et ut sociis Latini nominis quina dena millia peditum imperarent, et mille et ducentos equites. Messallæ Ligures, Salinatori obtigit Gallia. Prætores inde sortiti sunt. M. Claudio urbana, P. Claudio peregrina jurisdictio evenit. Q. Marcius Siciliam, C. Stertinius Sardiniam, L. Manlius Hispaniam citeriorem, C. Atinius ulteriorem est sortitus.

XXXVI. De exercitibus ita placuit: e Gallia legiones, quæ sub C. Lælio fuerant, ad M. Tuccium proprætorem in Bruttios traduci: et, qui in Sicilia esset, dimitti exercitum; et classem, quæ ibi esset,

Romam reducere M. Sempronium proprætorem. U. C. 564.
 Hispaniis legiones singulæ, quæ tum in iis provin- A. C. 188.
 ciis erant, decretæ: et ut terna millia peditum, du-
 cenos equites ambo prætores in supplementum so-
 ciis imperarent, secumque transportarent. Prius-
 quam in provincias novi magistratus proficisceren-
 tur, supplicatio in triduum pro collegio decemviro-
 rum imperata fuit in omnibus compitis, quod luce
 inter horam tertiam ferme et quartam tenebræ ob-
 ortæ fuerant: et novemdiale sacrificium indictum
 est, quod in Aventino lapidibus pluisset. Campani,
 quum eos ex senatusconsulto, quod factum erat pri-
 ore anno, censores Romæ censeri coëgissent, (nam
 antea incertum fuerat, ubi censerentur) petierunt,
 ut sibi cives Romanas ducere uxores liceret; et, si
 qui prius duxissent, ut habere eas, et ante eam diem
 nati, uti justi sibi liberi hæredesque essent: utraque
 res inpetrata. De Formianis Fundanisque municipi-
 bus et Arpinatibus C. Valerius Tappus tribunus
 plebis promulgavit, uti iis suffragii latio (nam ante
 sine suffragio habuerant civitatem) esset. Huic ro-
 gationi quatuor tribuni plebis, quia non ex auctori-
 tate senatus ferretur, quum intercederent, edocti,
 populi esse, non senatus jus suffragium, quibus velit,
 inpartiri, destiterunt incepto. Rogatio perlata est,
 ut in Æmilia tribu Formiani et Fundani, in Cor-
 nelia Arpinates ferrent: atque in his tribubus tum
 primum ex Valerio plebiscito censi sunt. M. Clau-
 dius Marcellus censor, sorte superato T. Quinctio,
 lustrum condidit: censa sunt civium capita ducenta
 quinquaginta octo millia trecenta decem et octo.
 Lustrum perfecto, consules in provincias profecti
 sunt.

U. C. 564.

A. C. 188.

Legationes
Asiæ ad
Manlium.

XXXVII. Hieme ea, qua hæc Romæ gesta sunt, ad Cn. Manlium, consulem primum, deinde pro consule, hibernantem in Asia, legationes undique ex omnibus civitatibus gentibusque, quæ cis Taurum montem incolunt, conveniebant: et ut clarior nobiliorque victoria Romanis de rege Antiocho fuit, quam de Gallis; ita lætior sociis erat de Gallis, quam de Antiocho. Tolerabilior regia servitus fuerat, quam feritas inmanium barbarorum, incertusque in dies terror, quo velut tempestas eos populantes inferret: itaque, ut quibus libertas, Antiocho pulso, pax, Gallis domitis, data esset, non gratulatum modo venerant, sed coronas etiam aureas, pro suis quæque facultatibus, adtulerant. Et ab Antiocho legati, et ab ipsis Gallis, ut pacis leges dicerentur, et ab Ariarathe rege Cappadocum venerunt, ad veniam petendam, luendamque pecunia noxam, quod auxiliis Antiochum juvisset. Huic sexcenta talenta argenti sunt imperata. Gallis responsum, quum Eumenes rex venisset, tum daturum iis leges: civitatum legationes cum benignis responsis, lætiores etiam quam venerant, dimissæ. Antiochi legati pecuniam in Pamphyliam, frumentumque ex pacto cum L. Scipione fœdere jussi advehere; eo se cum exercitu venturum. Principio deinde veris, lustrato exercitu, profectus, die octavo Apameam venit: ibi triduum stativis habitis, tertiis rursus ab Apamea castris in Pamphyliam, quo pecuniam frumentumque regiones convehere jusserat, pervenit: mille et quingenta talenta argenti accepta Apameam deportantur: frumentum exercitui dividitur. Inde ad Pergam ducit: quæ una in iis locis regio tenebatur præsidio. Adpropinquanti præfectus præsidii obvius

fuit, triginta dierum tempus petens, ut regem Antiochum de urbe tradenda consuleret: dato tempore, ad eam diem præsidio decessum est. A Perga, L. Manlio fratre cum quatuor millibus militum Oranda, ad reliquum pecuniæ ex eo quod pepigerant exigendum, misso, ipse, quia Eumenem regem et decem legatos ab Roma Ephesum venisse audierat, jussis sequi Antiochi legatis, Apameam exercitum reduxit.

XXXVIII. Ibi ex decem legatorum sententia fœdus in hæc verba fere cum Antiocho conscriptum est. *Amicitia regi Antiocho cum populo Romano his legibus et conditionibus esto. Ne quem exercitum, qui cum populo Romano sociisve bellum gesturus erit, rex per fines regni sui, eorumve, qui sub ditione ejus erunt, transire sinito: neu commeatu, neu qua alia ope juvato. Idem Romani sociique Antiocho, et iis, qui sub imperio ejus erunt, præstent. Belli gerendi jus Antiocho ne esto cum iis, qui insulas colunt, neve in Europam transeundi. Excedito urbibus, agris, vicis, castellis cis Taurum montem usque ad Tanaim amnem, et a valle Tauri usque ad juga, qua in Lycaoniam vergit. Ne qua arma efferto, ex iis oppidis, agris, castellisque, quibus excedat: si qua extulit, quæ quoque oportebit, recte restituito. Ne militem, neu quem alium ex regno Eumenis recipito. Si qui earum urbium cives, quæ regno abscedunt, cum rege Antiocho intraque fines ejus regni sunt, Apameam omnes ante diem certam redeant. Qui ex regno Antiochi apud Romanos sociosque sunt, iis jus abeundi manendique esto. Servos, seu fugitivos, seu bello captos, seu qui liber captus aut transfuga erit, reddito Romanis sociisque. Elefantos tradito omnes, neque alios parato. Tradito et naves longas armamen-*

Fœderis
cum Antio-
cho leges.

U. C. 564. *taque earum : neve plures, quam decem naves actua-*
 A. C. 188. *rias, (nulla quarum plus quam triginta remis agatur)*
habeto : neve monerem ex belli caussa, quod ipse inla-
turus erit. Neve navigato citra Calycadnum, neve
Sarpedonem, promontoria : extra quam, si qua navis
pecuniam, stipendium, aut legatos, aut obsides porta-
bit. Milites mercede conducendi ex iis gentibus, quæ
sub ditione populi Romani sunt, Antiocho regi jus ne
esto : ne voluntarios quidem recipiendi. Rhodiorum
sociorumve quæ ædes ædificiaque intra fines regni An-
tiochi sunt, quo jure ante bellum fuerunt, eo Rhodio-
rum sociorumve sunt. Si quæ pecuniæ debentur, ea-
rum exactio esto. Si quid ablatum est, id conquirendi,
cognoscendi, repetendique jus item esto. Si quas urbes,
quas tradi oportet, ii tenent, quibus Antiochus dedit,
et ex iis præsidia deducito ; utique recte tradantur, cu-
rato. Argenti probi duodecim millia Attica talenta
dato intra duodecim annos pensionibus æquis, (talentum
ne minus pondo octoginta Romanis ponderibus pendat)
et tritici quingenta quadraginta millia modium. Eu-
meni regi talenta trecenta quinquaginta intra quinquen-
nium dato : et pro frumento, quod æstimatione fiat,
talenta centum viginti septem. Obsides Romanis viginti
dato, et triennio mutato ; ne minores octonum denum
annorum, neu majores quinum quadragenum. Si qui
sociorum populi Romani ultro bellum inferent Antiocho,
vim vi arcendi jus esto ; dum ne quam urbem aut belli
jure teneat, aut in amicitiam accipiat. Controversias
inter se jure ac judicio disceptanto, aut, si utrisque
placebit, bello. De Hannibale Pœno, et Ætolo
Thoante, et Mnasimacho Acarnane, et Chalciden-
sibus Eubulida et Philone, dedendis, in hoc quo-
que foedere adscriptum est : et ut, si quid postea

addi, demi, mutarive placuisset, ut id salvo fœdere fieret. U. C. 564.
A. C. 188.

XXXIX. Consul juravit in hoc fœdus : ab rege qui exigerent jusjurandum, profecti Q. Minucius Thermus et L. Manlius, qui tum forte ab Oroandis rediit : et Q. Fabio Labeoni, qui classi præerat, scripsit, ut Patara extemplo proficisceretur ; quæque ibi naves regiæ essent, concideret cremaretque. Profectus ab Epheso, quinquaginta tectas naves aut concidit, aut incendit. Telmissum eadem expeditione, territis subito adventu classis oppidanis, recepit. Ex Lycia protinus, jussis ab Epheso sequi, qui ibi relictæ erant, per insulas in Græciam trajecit. Athenis paucos moratus dies, dum Pyræum ab Epheso naves venirent, totam inde classem in Italiam reduxit. Cn. Manlius quum inter cetera, quæ accipienda ab Antiocho erant, elephantos quoque accepisset, donoque Eumeni omnes dedisset ; deinde caussas civitatum, multis inter novas res turbatis, cognovit. Et Ariarathes rex, parte dimidia pecuniæ imperatæ, Eumenis beneficio, cui desponderat per eos dies filiam, remissa, in amicitiam est acceptus. Civitatum autem cognitæ caussis, decem legati aliam aliarum fecerunt conditionem. Quæ stipendiariæ regi Antiocho fuerant, et cum populo Romano senserant, iis immunitatem dederunt : quæ partium Antiochi fuerant, aut stipendiariæ Attali regis, eas omnes vectigal pendere Eumeni jusserunt : nominatim præterea Colophoniis, qui in Notio habitant, et Cymæis, et Mylasenis immunitatem concesserunt. Clazomeniis, super immunitatem, et Drymusam insulam dono dederunt : et Milesiis, quem sacrum adpellant, agrum restituerunt : et Iliensibus Rhœteum

*Res regum
et urbium
compositæ.*

U. C. 564. et Gergithum addiderunt, non tam ob recentia ulla
 A. C. 188. merita, quam originum memoria : eadem et Dar-
 danum liberandi caussa fuit. Chios quoque, et
 Smyrnæos, et Erythræos, pro singulari fide, quam
 eo bello præstiterunt, et agro donarunt, et in omni
 præcipuo honore habuerunt. Phocæensibus et ager,
 quem ante bellum habuerant, redditus ; et, ut legi-
 bus antiquis uterentur, permissum. Rhodiis adfir-
 mata, quæ data priore decreto erant ; Lycia et Ca-
 ria datæ usque ad Mæandrum amnem, præter Tel-
 missum. Regi Eumeni Chersonesum in Europa et
 Lysimachiam, castella, vicos, agros, quibus finibus
 tenuerat Antiochus, adjecerunt : in Asia Phrygiam
 utramque, (alteram ad Hellespontum, majorem al-
 teram vocant) et Mysiam, quam Prusias rex ademe-
 rat, ei restituerunt : et Lycaoniam, et Milyada, et
 Lydiam, et nominatim urbes Tralles, atque Ephe-
 sum, et Telmissum. De Pamphylia disceptatum in-
 ter Eumenem et Antiochi legatos quum esset ; quia
 pars ejus citra, pars ultra Taurum est, integra res
 ad senatum rejicitur.

Gallis leges
 dictæ.

XL. His foederibus decretisque datis, Manlius,
 cum decem legatis omnique exercitu ad Hellespon-
 tum profectus, evocatis eo regulis Gallorum, leges,
 quibus pacem cum Eumene servarent, dixit ; de-
 nunciavitque, ut morem vagandi cum armis finirent,

Manlius in
 Europam
 trajicit.

agrorumque suorum terminis se continerent. Con-
 tractis deinde ex omni ora navibus, et Eumenis et-
 iam classe per Athenæum fratrem regis ab Elæa ad-
 ducta, copias omnes in Europam trajecit : inde, per
 Chersonesum modicis itineribus grave præda omnis
 generis agmen trahens, Lysimachiæ stativa habuit ;
 ut quam maxime recentibus et integris jumentis

Thraciam, per quam iter vulgo horrebant, ingrede-^{U. C. 564.}
 retur. Quo profectus est ab Lysimachia die, ad^{A. C. 189.}
 amnem, Melana quem vocant, inde postero die
 Cypsela pervenit: a Cypselis via decem millium
 fere silvestris, angusta, confragosa excipiebat: prop-
 ter cujus difficultatem itineris in duas partes divisus
 exercitus: et præcedere una jussa, altera magno
 intervallo cogere agmen, media impedimenta inter-
 posuit: plaustra cum pecunia publica erant, pre-
 tiosaque alia præda. Itaque, quum per saltum iret,
 Thracum decem haud amplius millia ex quatuor po-
 pulis, Astii, et Cæni, et Maduateni, et Coreli, ad
 ipsas angustias viam circumsederunt. Opinio erat,
 non sine Philippi regis Macedonum fraude id fac-
 tum: eum scisse, non alia, quam per Thraciam, re-
 dituros Romanos, et quantam pecuniam secum por-
 tarent. In primo agmine imperator erat, sollicitus
 propter iniquitatem locorum. Thraces nihil se mo-^{Thraces}
 verunt, donec armati transirent: postquam primos^{eum in-}
 superasse angustias viderunt, postremos nondum^{vadunt.}
 adpropinquantes, impedimenta et sarcinas invadunt:
 cæsisque custodibus, partim ea, quæ in plaustis
 erant, diripere, partim sub oneribus jumenta abs-
 trahere. Unde postquam clamor primum ad eos,
 qui, jam ingressi saltum, sequebantur, deinde etiam
 ad primum agmen est perlatus, utrimque in me-
 dium concurritur, et inordinatum simul pluribus lo-
 cis prælium conseritur. Thrakas præda ipsa inpe-
 ditos oneribus, et plerosque (ut ad rapiendum ma-
 nus vacuas haberent) inermes, ad cædem præbet;
 Romanos iniquitas locorum, barbaris per calles no-
 tos obscursantibus, et latentibus interdum per cavas
 valles, prodebat: ipsa etiam onera plaustraque, ut

U. C. 564. fors tulit, his aut illis incommode objecta, pugnantibus impedimento sunt : alibi prædo, alibi prædæ vindex cadit. Prout locus iniquus æquusve his aut illis, prout animus pugnantium est, prout numerus, (alii enim pluribus, quam ipsi erant, alii paucioribus, obcurrerant) varia pugnae fortuna est : multi utrimque cadunt. Jam nox adpetebat, quum prælio excedunt Thraces, non fuga vulnerum aut mortis, sed quia satis prædæ habebant.

XLI. Romanorum primum agmen extra saltum circa templum Bendidium castra loco aperto posuit : pars altera ad custodiam impedimentorum medio in saltu, duplici circumdata vallo, mansit. Postero die, prius explorato saltu, quam moverent, primis se conjungunt. In eo prælio, quum et impedimentorum pars et calorum, et milites aliquot, quum passim toto prope saltu pugnaretur, cecidissent, plurimum Q. Minucii Thermi morte damni est acceptum, fortis ac strenui viri. Eo die ad Hebrum flumen perventum est : inde Æniorum fines præter Apollinis, Zerynthium quem vocant incolæ, templum superant. Aliæ angustiae circa Tempyra excipiunt, (hoc loco nomen est) nec minus confrago-sæ, quam priores : sed, quia nihil silvestre circa est, ne latebras quidem ad insidiandum præbent. Huc ad eandem spem prædæ Thrausi (gens et ipsa Thracum) convenere : sed, quia nudæ valles, procul ut conspicerentur angustias obsidentes, efficiebant, minus terroris tumultusque fuit apud Romanos : quippe etsi iniquo loco, prælio tamen justo, acie aperta, conlatis signis dimicandum erat. Conferti subeuntes cum clamore, inpetu facto, primum expulere loco hostes ; deinde avertere : fuga inde

Alterum
prælium.

cædesque, suis ipsos inpedientibus angustiis, fieri U. C. 564.
 cœpta est. Romani victores ad vicum Maronita- A. C. 188.
 rum (Saren adpellant) posuerunt castra: postero
 die patenti itinere Priaticus campus eos excepit;
 triduumque ibi, frumentum accipientes, manserunt,
 partim ex agris Maronitarum, conferentibus ipsis,
 partim ex navibus suis, quæ cum omnis generis
 commeatu sequebantur. Ab stativis diei via Apol-
 loniam fuit: hinc per Abderitarum agrum Neapo-
 lim perventum est. Hoc omne per Græcorum co-
 lonias pacatum iter fuit: reliquum inde per medios
 Thracas, dies noctesque, etsi non infestum, suspec-
 tum tamen, donec in Macedoniam pervenerunt.
 Mitiores Thracas idem exercitus, quum a Scipione
 eadem via duceretur, habuerat, nullam ob aliam
 causam, quam quod prædæ minus, quod peteretur,
 fuerat. Quamquam tum quoque Claudius auctor
 est, ad quindecim millia Thracum, præcedenti ad
 exploranda loca agmen Mutini Numidæ obcurrisse:
 quadringentos equites fuisse Numidas, paucos ele-
 phantos. Mutinis filium per medios hostes cum
 centum quinquaginta delectis equitibus perrupisse:
 eundem mox, quum jam Mutines, in medio ele-
 phantis conlocatis, in cornua equitibus dispositis,
 manum cum hoste conseruisset, terrorem ab tergo
 præbuisse: atque inde turbatos equestri velut pro-
 cella hostes ad peditum agmen non accessisse. Cn.
 Maullius per Macedoniam in Thessaliam exercitum
 traduxit: inde per Epirum Apolloniam quum per-
 venisset, nondum adeo hiberno contempto mari, ut
 trajicere auderet, Apolloniæ hibernavit.

XLII. Exitu prope anni M. Valerius consul ex
 Liguribus ad magistratus subrogandos Romam ve-

U. C. 564. nit, nulla memorabili in provincia re gesta, ut ea
 A. C. 188. probabilis moræ caussa esset, quod solito serius ad
 comitia venisset. Comitia consulibus rogandis fu-
 erunt ante diem duodecimum Kalendas Martias :
 creati M. Æmilius Lepidus, C. Flaminius. Postero
 die prætores facti Ap. Claudius Pulcher, Ser. Sul-
 picius Galba, Q. Terentius Culleo, L. Terentius
 Massiliota, Q. Fulvius Flaccus, M. Furius Crassi-
 pes. Comitibus perfectis, quas provincias prætori-
 bus esse placeret, retulit ad senatum consul : de-
 creverunt duas Romæ, juris dicundi caussa ; duas
 extra Italiam, Siciliam et Sardiniam ; duas in Ita-
 lia, Tarentum et Galliam : et extemplo, priusquam
 inirent magistratum, sortiri jussi. Ser. Sulpicius
 urbanam, Q. Terentius peregrinam est sortitus : L.
 Terentius Siciliam, Q. Fulvius Sardiniam, Ap. Clau-
 dius Tarentum, M. Furius Galliam. Eo anno L.
 Minucius Myrtilus et L. Manlius, quod legatos
 Karthaginienses pulsasse dicebantur, jussu M. Clau-
 dii prætoris urbis per feciales traditi sunt legatis, et
 Karthaginem aucti. In Liguribus magni belli, et
 gliscentis in dies magis, fama erat : itaque consuli-
 bus novis, quo die de provinciis et de republica re-
 tulerunt, senatus utrisque Ligures provinciam de-
 crevit. Huic senatusconsulto Lepidus consul inter-
 cedebat, indignum esse prædicans, consules ambos in
 valles Ligurum includi. *M. Fulvium et Cn. Manlium
 biennium jam, alterum in Europa, alterum in Asia,
 velut pro Philippo atque Antiocho substitutos, regnare.
 Si exercitus in his terris esse placeat, consules iis po-
 tius, quam privatos, præesse oportere. Vagari eos
 cum belli terrore per nationes, quibus bellum indictum
 non sit, pacem pretio venditantes. Si eas provincias*

exercitibus obtinere opus esset ; sicut M. Acilio L. U. C. 565. Scipio consul, L. Scipioni M. Fulvius et Cn. Manlius A. C. 187. successissent consules ; ita Fulvio Manlioque C. Livium et M. Valerium consules debuisse succedere. Nunc certe, perfecto Ætolico bello, recepta ab Antiocho Asia, devictis Gallis, aut consules ad exercitus consulares mitti, aut reportari legiones inde, reddique tandem reipublicæ debere. Senatus, his auditis, in sententia perseveravit, ut consulibus ambobus Ligures provincia esset : Manlium Fulviumque decedere de provinciis, et exercitus inde deducere, ac redire Romanam, placuit.

XLIII. Inimicitia inter M. Fulvium et M. Æmilium consulem erant : et super cetera Æmilius, serius biennio se consulem factum M. Fulvii opera, ducebat : itaque ad invidiam ei faciendam legatos Ambracienses in senatum, subornatos criminibus, introduxit. Qui sibi, *quum in pace essent, imperata-que a prioribus consulibus fecissent, et eadem præstare obedienter M. Fulvio parati essent, bellum inlatum* Fulvium Ambracienses accusant. *questi, agros primum depopulatos, terrorem direptionis et cædis urbi injectum, ut eo metu claudere cogerentur portas : obsessos deinde et obpugnatos se, et omnia exempla belli edita in se, cædibus, incendiis, ruinis, direptione urbis : conjuges, liberos in servitium abstractos : bona ademta, et, quod se ante omnia moveat, templa tota urbe spoliata ornamentis : simulacra Deum, Deos immo ipsos, convulsos ex sedibus suis, ablatos esse ; parietes postesque nudatos, quos adorent, ad quos precentur et supplicent, Ambraciensibus superesse. Hæc querentes, interrogando criminoſe ex composito, consul ad plura, velut non sua sponte dicenda, eliciebat. Motis Patribus, alter consul*

U. C. 565. C. Flaminius M. Fulvii causam excepit : qui, *ve-*
 A. C. 187. *terem et obsoletam viam ingressos Ambracienses, dixit.*
 Defendit Sic M. Marcellum a Syracusanis, sic Q. Fulvium a
 Flaminius. Campanis accusatos : quin eadem opera T. Quinctium
 a Philippo rege, M. Acilium et L. Scipionem ab An-
 tiocho, Cn. Manlium a Gallis, ipsum M. Fulvium ab
 Ætolis et Cephallenia populis accusari paterentur.
Ambraciam obpugnatam et captam, et signa inde or-
namentaue ablata, et cetera facta, quæ captis urbi-
bus soleant, negaturum aut me pro M. Fulvio, aut
ipsum M. Fulvium censetis, Patres conscripti ? qui ob
has res gestas triumphum a vobis postulaturus sit ;
Ambraciam captam, signaque, quæ ablata criminan-
tur, et cetera spolia ejus urbis ante currum laturus,
et fixurus in postibus suis. Nihil est, quod se ab Æto-
lis separent : eadem Ambraciensium et Ætolorum caus-
sa est. Itaque collega meus vel in alia causa inimi-
citias exerceat, vel, si in hac utique maruit, retineat
Ambracienses suos in adventum M. Fulvii. Ego nec
de Ambraciensibus, nec de Ætolis decerni quidquam,
absente M. Fulvio, patiar.

XLIV. Quum Æmilius callidam malitiam ini-
 mici, velut omnibus notam, insimularet, et tempus
 cum morando extracturum diceret, ne consule ini-
 mico Romam veniret ; certamine consulum biduum
 absumentum est : nec præsentem Flaminio decerni
 quidquam videbatur posse. Captata occasio est,
 quum æger forte Flaminius abesset ; et, referente
 Æmilio, senatusconsultum factum est, *Ut Ambra-*
ciensibus omnes suæ res redderentur : in libertate es-
sent, ac legibus suis uterentur : portoria, quæ vellent,
terra marique caperent, dum eorum immunes Romani
ac socii Latini nominis essent. Signa aliaque orna-

S. C. in
 gratiam
 Ambraci-
 ensium.

menta, quæ quererentur ex ædibus sacris sublata esse, U. C. 565. de iis, quum M. Fulvius Romam revertisset, placere A. C. 187. ad collegium pontificum referri, et, quod ii censuissent, fieri. Neque his contentus consul fuit, sed postea per infrequentiam adjecit senatusconsultum, *Ambraciam non videri vi captam esse.* Supplicatio inde, ex decemvirorum decreto, pro valetudine populi fuit per triduum, quia gravis pestilentia urbem atque agros vastabat. Latinæ inde fuerunt. Quibus religionibus liberati consules, et delectu perfecto, (novis enim uterque maluit uti militibus) in provinciam profecti sunt: veteresque omnes dimiserunt. Post consulum profectionem Cn. Manlius proconsul Romam venit, cui quum ab Ser. Sulpicio prætore senatus ad ædem Bellonæ datus esset, et ipse, commemoratis rebus ab se gestis, postulasset, ut ob eas Diis immortalibus honos haberetur, sibi que triumphanti urbem invehi liceret; contraxerunt pars major decem legatorum, qui cum eo fuerant, et ante alios L. Furius Purpureo, et L. Æmilius Paullus.

Manlius
petit tri-
umphum.

XLV. *Legatos sese Cn. Manlio datos pacis cum Antiocho faciendæ causæ, fœderisque et legum, quæ cum L. Scipione inchoatæ fuissent, perficiendarum. Cn. Manlium summa ope tetendisse, ut eam pacem turbaret, et Antiochum, si sui potestatem fecisset, insidiis exciperet: sed illum, cognita fraude consulis, quum sæpe colloquiis petitis captatus esset, non congressum modo, sed conspectum etiam ejus vitasse. Cupientem transire Taurum ægre omnium legatorum precibus, ne carminibus Sibyllæ prædictam superantibus terminos fatales cladem experiri vellet, retentum: admovisse tamen exercitum, et prope ipsis jugis ad divortia aqua-*

Legati ip-
sius contra-
dicunt.

U. C. 565. *rum castra posuisse. Quum nullam ibi causam belli*
 A. C. 187. *inveniret, quiescentibus regiis, circumegisse exercitum*
ad Gallogræcos: cui nationi non ex senatus auctori-
tate, non populi jussu, bellum inlatum: quod quem
umquam de sua sententia facere ausum? Antiochi,
Philippi, Hannibalis et Pænorum recentissima bella
esse: de omnibus his consultum senatum, populum jus-
sisse: sæpe legatos ante missos, res repetitus, postremo,
qui bellum indicerent, missos. Quid eorum, Cn. Man-
li, factum est, ut istud publicum populi Romani bel-
lum, et non tuum privatum latrocinium ducamus? At
eo ipso contentus fuisti; recto itinere duxisti exercitum
ad eos, quos tibi hostes desumseras: an et per omnes
amfractus viarum, quum ad bivia consisteres, ut, quo
flexisset agmen Attalus Eumenis frater, eo consul mer-
cenarius cum exercitu Romano sequereris, Pisidiæ, Ly-
caoniæque, et Phrygiæ recessus omnes atque angulos
peragrasti, stipem a tyrannis castellanisque deviis con-
ligens? Quid enim tibi cum Oroandis? quid cum aliis
æque innoxiiis populis? Bellum autem ipsum, ejus
nomine triumphum petis, quo modo gessisti? Loco
æquo, tempore tuo pugnasti? Tu vero recte, ut Diis
immortalibus honos habeatur, postulas: primum, quod
pro temeritate imperatoris, nullo jure gentium bellum
inferentis, pœnas luere exercitum noluerunt: deinde,
quod belluas, non hostes, nobis objecerunt.

XLVI. *Nolite nomen tantum existimare mixtum*
esse Gallogræcorum: multo ante et corpora et animi
mixti ac viliati sunt. An, si illi Galli essent, cum
quibus millies vario eventu in Italia pugnatum est,
quantum in imperatore nostro fuit. nuncius illuc re-
disset? Bis cum iis pugnatum est, bis loco iniquo sub-
iit, in valle inferiore pedibus pene hostium aciem sub-

jecit : ut non tela ex superiore loco mitterent, sed cor- U. C. 565.
 pora sua nuda injicerent, obruere nos potuerunt. Quid A. C. 187.
 igitur incidit? Magna fortuna populi Romani est,
 magnum et terribile nomen. Recentis ruina Hanniba-
 lis, Philippi, Antiochi, prope adtoniti erant, tantæ cor-
 porum moles. Fundis sagittisque in fugam consternati
 sunt : gladius in acie cruentatus non est Gallico bello :
 velut avium examina, ad crepitum primum missilium
 avolare. At, Hercule, nos iidem, (admonente for-
 tuna, quid, si hostem habuissemus, casurum fuisset)
 quum redeuntes in latrunculos Thracas incidissemus,
 cæsi, fugati, exuti impedimentis sumus. Q. Minucius
 Thermus, in quo haud paullo plus damni factum est,
 quam si Cn. Manlius, cujus temeritate ea clades in-
 ciderat, perisset, cum multis viris fortibus cecidit : ex-
 ercitus, spolia regis Antiochi referens, trifariam dissi-
 patus, alibi primum, alibi postremum agmen, alibi in-
 pedimenta, inter vepres in latebris ferarum noctem
 unam delituit. Pro his triumphus petitur? Si nihil
 in Thracia cladis ignominiaque foret acceptum, de
 quibus hostibus triumphum peteres? de iis, ut opinor,
 quos tibi hostes senatus aut populus Romanus dedisset.
 Sic huic L. Scipioni, sic illi M. Acilio de rege Anti-
 ocho, sic paullo ante T. Quinctio de rege Philippo, sic
 P. Africano de Hannibale, et Panis, et Syphace, tri-
 umphus datus : et minima illa, quum jam senatus cen-
 suisset bellum, quæsitæ tamen sunt, quibus nuncian-
 dum esset : ipsis utique regibus nunciaretur ; an satis
 esset, ad præsidium aliquod nunciari? Iultis ergo hæc
 omnia pollui et confundi? tolli fecialia jura? nullos
 esse feciales? fiat (pace Deum dixerim) jactura reli-
 gionis : oblivio Deorum capiat pectora vestra. Num
 senatum quoque de bello consuli non placet? non ad

U. C. 565. *populum ferri, velint, jubeantne cum Gallis bellum geri?* A. C. 167. *Modo certe consules Græciam atque Asiam volebant: tamen perseverantibus vobis, Ligures provinciam decernere, dicto audientes fuerunt. Merito ergo a vobis, prospere bello gesto, triumphum petent, quibus auctoribus gesserunt.*

Manlius se defendit.

XLVII. Talis oratio Furii et Æmilii fuit. Manlium in hunc maxime modum respondisse accepimus. Tribuni plebis antea solebant triumphum postulantibus adversari, Patres conscripti. Quibus ego gratiam habeo, quod seu mihi, seu magnitudini rerum gestarum, hoc dederunt, ut non solum silentio comprobarent honorem meum, sed referre etiam, si opus esset, viderentur parati esse. Ex decem legatis, si Diis placeret, quod consilium dispensandæ cohonestandæque victoriæ imperatoribus majores dederunt nostri, adversarios habeo. L. Furius, L. Æmilius currum triumphalem me conscendere prohibent, coronam insignem capiti detrahunt; quos ego, si tribuni me triumphare prohiberent, testes citaturus fui rerum a me gestarum. Nulius equidem invideo honori, Patres conscripti. Vos tribunos plebei nuper, viros fortes ac strenuos, impediētes Q. Fabii Labeonis triumphum, auctoritate vestra deterruistis: triumphavit, quem non bellum injustum gessisse, sed hostem omnino non vidisse, inimici jactabant. Ego, qui cum centum millibus ferocissimorum hostium signis conlatis toties pugnavi, qui plus quadraginta millia hominum cepi aut occidi, qui bina castra eorum expugnavi, qui citra juga Tauri omnia pacatiora, quam terra Italia est, reliqui, non triumpho modo fraudor; sed causam apud vos, Patres conscripti, accusantibus meis ipse legatis, dico. Duplex eorum, ut animadvertistis, Patres conscripti, accusatio

fuit : nam, nec gerendum mihi fuisse bellum cum Gal-
 lis, et gestum temere atque imprudenter, dixerunt : non
 erant Galli hostes, sed tu eos pacatos imperata faci-
 entes violasti. Non sum postulaturus a vobis, Patres
 conscripti, ut, quæ communiter de inmanitate gentis
 Gallorum, de infestissimo odio in nomen Romanum sci-
 tis, ea de illis quoque, qui Asiam incolunt, existimetis
 Gallis. Remota universæ gentis infamia atque invi-
 dia, per se ipsos æstimate. Utinam rex Eumenes, uti-
 nam Asiæ civitates omnes adessent, et illos potius que-
 rentes, quam me accusantem, audiretis ! Mittite, age-
 dum, legatos circa omnes Asiæ urbes, et quærite, utra
 graviori servitute, Antiocho ultra Tauri juga emoto,
 an Gallis subactis, liberati sint ? quoties agri eorum
 vastati sint, quoties prædæ abactæ, referant : quum
 vir redimendi captivos copia esset, et mactatas huma-
 nas hostias immolatosque liberos suos audirent. Stipen-
 dium, scitote, pependisse socios vestros Gallis : et nunc,
 liberatos per vos regio imperio, fuisse pensuros, si a me
 foret cessatum.

XLVIII. Quo longius Antiochus emotus esset, hoc
 inpotentius in Asia Galli dominarentur : et, quidquid
 est terrarum citra Tauri juga, Gallorum imperio, non
 vestro, adjecissetis. At enim sunt quidem ista vera :
 etiam Delphos, quondam commune humani generis
 oraculum, umbilicum orbis terrarum, Galli spoliave-
 runt : nec ideo populus Romanus his bellum indixit,
 aut intulit. Equidem aliquid interesse rebar inter id
 tempus, quo nondum in jure ac ditione vestra Græcia
 atque Asia erat, ad curandum animadvertendumque,
 quid in his terris fieret ; et hoc, quo finem imperii
 Romani Taurum montem statuistis, quo libertatem in-
 munitatemve civitatibus datis, quo aliis fines adjicitis,

U. C. 565.

A. C. 187.

U. C. 565. *alias agro multatis, aliis vectigal inponitis : regna au-*
 A. C. 187. *getis, minuitis, donatis, adimitis : curæ vestræ cense-*
tis esse, ut pacem terra marique habeant. An, nisi
præsidia deduxisset Antiochus, quæ quieta in suis ar-
cibus erant, non putaretis liberatam Asiam ? si Gal-
lorum exercitus effusi vagarentur, rata dona vestra,
quæ dedistis, regi Eumeni, rata libertas civitatibus es-
set ? Sed quid ego hæc ita argumentor ; tamquam non
acceperim, sed fecerim hostes Gallos ? Te, L. Scipio,
adpello, cujus ego mihi, succedens in vicem imperiū tui,
virtutem felicitatemque pariter non frustra ab Diis in-
mortalibus precatus sum ; te, P. Scipio, qui legati jus,
collegæ majestatem, et apud fratrem consulem, et apud
exercitum habuisti ; sciatisne, in exercitu Antiochi Gallo-
rum legiones fuisse ? videritis in acie eos, in cornu utroque
(id enim roboris esse videbatur) locatos ? pugnaveritis,
ut cum hostibus justis ? cecideritis ? spolia eorum re-
tuleritis ? Atqui cum Antiocho, non cum Gallis, bel-
lum et senatus decreverat, et populus jusserat : sed si-
mul, ut opinor, cum his decreverant jusserantque, qui
intra ejus præsidia fuissent : ex quibus, præter Anti-
ochum, cum quo pacem pepigerat Scipio, et cum quo
nominatim fœdus ut fieret, mandaveratis, omnes hostes
erant, qui pro Antiocho arma adversus nos tulerunt.
In qua caussa quum Galli ante omnes fuissent, et re-
guli quidam, et tyranni ; ego tamen et cum aliis, pro
dignitate imperiū vestri coactis luere peccata sua, pa-
cem pepigi : et Gallorum animos, si possent mitigari
a feritate insita, tentavi : et, postquam indomitos at-
que implacabiles cernebam, tum demum vi atque armis
coercendos ratus sum. Nunc, quoniam suscepti belli
purgatum est crimen, gesti reddenda est ratio : in quo
confiderem equidem causæ meæ, etiamsi non apud Ro-

manum, sed apud Karthaginiensem senatum agerem ; U. C. 565.
 ubi in crucem tolli imperatores dicuntur, si prospero A. C. 187.
 eventu, pravo consilio rem gesserunt. Sed ego in ea
 civitate, quæ ideo omnibus rebus incipiendis gerendis-
 que Deos adhibet, quia nullius calumniæ subjicit ea,
 quæ Diî comprobaverunt, et in sollemnibus verbis habet,
 quum supplicationem aut triumphum decernit ? Quod
 bene ac feliciter rempublicam administrarit ; si nol-
 lem, si grave, ac superbum existimarem virtute glori-
 ari ; pro felicitate mea exercitusque mei, quod tantam
 nationem sine ulla militum jactura devicimus, postu-
 larem, ut Diis immortalibus honos haberetur, et ipse
 triumphans in Capitolium adscenderem, unde, votis
 rite nuncupatis, profectus sum : negaretis hoc mihi cum
 Diis immortalibus ?

XLIX. Iniquo enim loco dimicavi. Dic igitur,
 quo æquiore potuerim dimicare ? Quum montem hos-
 tes cepissent, loco munito se tenerent, nempe eundum
 ad hostes erat, si vincere vellem. Quid ? si urbem eo
 loco haberent, et mænibus se tenerent ? nempe obpug-
 nandi erant. Quid ? ad Thermopylas æquone loco
 M. Acilius cum rege Antiocho pugnavit ? Quid ? Phi-
 lippum non eodem modo super Aoum amnem juga te-
 nentem montium T. Quinctius dejecit ? Equidem ad-
 huc, qualem aut sibi fingant, aut vobis videri velint
 hostem fuisse, non invenio. Si degenerem et emolli-
 tum amœnitate Asiæ, quid periculi vel iniquo loco sub-
 euntibus fuit ? si timendum et feritate animorum, et
 robore corporum, huicne tantæ victoriæ triumphum ne-
 gatis ? Cæca invidia est, Patres conscripti, nec quid-
 quam aliud scit, quam detractare virtutes, corrumpere
 honores ac præmia earum : mihi, quæso, ita ignoscatis,
 Patres conscripti, si longiorem orationem non cupiditas

U. C. 565. *gloriandi de me, sed necessaria criminum defensio fecit.*

A. C. 187. *An etiam per Thraciam saltus patentes, qui angusti erant, et plana ex arduis, et culta ex silvestribus facere potui, et præstare, necubi notis sibi latebris delitescerent latrones Thraces, ne quid sarcinarum raperetur, ne quod jumentum ex tanto agmine abstraheretur, ne quis vulneraretur, ne ex vulnere vir fortis ac strenuus Q. Minucius moreretur? In hoc casu, quo infeliciter incidit, ut talem civem amitteremus, hærent. Quod saltu iniquo, loco alieno, quum adortus hostis nos esset, duæ simul acies primi et novissimi agminis hærentem ad impedimenta nostra exercitum barbarorum circumven-
runt; quod multa millia ipso die, plura multo post dies paucos ceciderunt et ceperunt; hoc, si ipsi tacue-
rint, vos scituros, quum testis orationis meæ totus exer-
citus sit, non credunt? Si gladium in Asia non strinx-
issem, si hostem non vidissem; tamen proconsul trium-
phum in Thracia duobus præliis merueram. Sed jam
dictum satis est: quin pro eo, quod pluribus verbis vos,
quam volui, fatigavi, veniam a vobis petitam impetra-
tamque velim, Patres conscripti.*

Trium-
phus
Manlio
decretus.

L. Plus crimina eo die, quam defensio, valuissent, ni altercationem in serum perduxissent: dimittitur senatus in ea opinione, ut negaturus triumphum fu-
isse videretur. Postero die et cognati amique Cn.
Manlii summis opibus adnisi sunt, et auctoritas se-
niorum valuit, negantium, exemplum proditum me-
moriæ esse, ut imperator, qui, perduellibus devictis,
confecta provincia, exercitum reportasset, sine curru
et laurea, privatus inhonoratusque, urbem iniret:
hic pudor malignitatem vicit, triumphumque frequen-
tes decreverunt. Obpressit deinde mentionem me-
moriæque omnem contentionis hujus majus et cum

maiore et clariore viro certamen ortum. P. Scipioni U. C. 565.
 Africano (ut Valerius Antias auctor est) duo Q. Pe- A. C. 187.
 tillii diem dixerunt: id, prout cujusque ingenium Scipio A-
 erat, interpretabantur. Alii non tribunos plebis; africanus
 sed universam civitatem, quæ id pati posset, incusa- accusatur.
 bant. *Duas maximas orbis terrarum urbes ingratas
 uno prope tempore in principes inventas: Romam in-
 gratiorem; si quidem victa Karthago victum Hanniba-
 lem in exilium expulisset; Roma victrix victorem A-
 fricanum expellat. Alii, Neminem unum civem tantum
 eminere debere, ut legibus interrogari non possit: nihil
 tam æquandæ libertatis esse, quam potentissimum quem-
 que posse dicere caussam. Quid autem tuto cuiquam,
 nedum summam rempublicam, permitti, si ratio non sit
 reddenda? qui jus æquum pati non possit, in eum vim
 haud injustam esse. Hæc agitata sermonibus, donec
 dies dicendæ caussæ venit: nec alius antea quisquam,
 nec ille ipse Scipio consul censorve majore omnis
 generis hominum frequentia, quam reus illo die, in
 forum est deductus. Jussus dicere caussam, sine
 ulla criminum mentione orationem adeo magnificam
 de rebus ab se gestis est exorsus, ut satis constaret,
 neminem umquam neque melius, neque verius lauda-
 tum esse. Dicebantur enim ab eodem animo inge-
 nioque, a quo gesta erant: et aurium fastidium abe-
 rat, quia pro periculo, non in gloriam, referebantur.*

LI. Tribuni plebis vetera luxuriæ crimina Syra- Tribuno-
 cusanorum hibernorum, et Locris Pleminianum tu- rum crimi-
 multum, quum ad fidem præsentium criminum retu- nationes.
 lissent; suspicionibus magis, quam argumentis, pec-
 cuniæ captæ reum accusarunt. *Filium captum sine
 pretio redditum, omnibusque aliis rebus Scipionem, tam-
 quam in ejus unius manu pax Romana bellumque esset,*

U. C. 565. *ab Antiocho cultum. Dictatorem eum consuli, non legatum, in provincia fuisse; nec ad aliam rem eo profectum, quam ut, id quod Hispaniæ, Galliæ, Siciliae, Africæ jampridem persuasum esset, hoc Græciæ Asiæque et omnibus ad orientem versis regibus gentibusque adpareret; unum hominem caput columenque imperii Romani esse: sub umbra Scipionis civitatem dominam orbis terrarum latere: nutum ejus pro decretis Patrum, pro populi jussis esse: infamia intactum invidia, qua possunt, urgent. Orationibus in noctem perductis, producta dies est: ubi ea venit, tribuni in Rostris prima luce consederunt. Citatus reus magno agmine amicorum clientiumque per mediani concionem ad Rostra subiit: silentioque facto, Hoc, inquit, die, tribuni plebis, vosque Quirites, cum Hannibale et Karthaginiensibus signis conlatis, in Africa bene ac feliciter pugnavi. Itaque, quum hodie litibus et jurgiis superse-deri æquum sit, ego hinc extemplo in Capitolium ad Jovem optimum maximum Junonemque et Minervam ceterosque Deos, qui Capitolio atque arci præsident, salutandos ibo: hisque gratias agam, quod mihi et hoc ipso die, et sæpe alias, egregie reipublicæ gerendæ mentem facultatemque dederunt. Vestrûm quoque quibus commodum est, ite mecum, Quirites, et orate Deos, ut mei similes principes habeatis: ita, si ab annis septemdecim ad senectutem semper vos ætatem meam honoribus vestris anteistis, ego vestros honores rebus gerendis præcessi. Ab Rostris in Capitolium adscendit: simul se universa concio avertit, et secuta Scipionem est: adeo, ut postremo scribæ viatoresque tribunos relinquerent, nec cum iis, præter servilem comitatum et præconem, qui reum ex Rostris citabat, quisquam esset. Scipio non in Capitolio modo, sed per totam*

Scipionis
ad popu-
lum ora-
tio.

Concio
eum in
Capitol.
sequitur.

urbem omnia templa Deum cum populo Romano circumiit. Celebratio is prope dies favore hominum et æstimatione veræ magnitudinis ejus fuit, quam quo triumphans de Syphace rege et Karthaginensibus urbem est invectus.

U. C. 565.
A. C. 187.

LII. Hic speciosus ultimus dies P. Scipioni inluxit: post quem quum invidiam et certamina cum tribunis prospiceret, die longiore prodita, in Literninum concessit; certo consilio, ne ad causam dicendam adesset. Major animus et natura erat, ac majori fortunæ adsuetus, quam ut reus esse sciret, et submittere se in humilitatem causam dicentium. Ubi dies venit, citarique absens est coëptus, L. Scipio morbum causæ esse, cur abesset, excusabat: quam excusationem quum tribuni, qui diem dixerant, non acciperent, et ab eadem superbia non venire ad causam dicendam arguerent, qua judicium et tribunos plebis et concionem reliquisset; et, quibus jus de se dicendæ sententiæ et libertatem ademisset, his comitatus, velut captos trahens, triumphum de populo Romano egisset, secessionemque eo die in Capitolium a tribunis plebis fecisset: *Habetis ergo temeritatis illius mercedem: quo duce et auctore nos reliquistis, ab eo ipsi relictis estis: et tantum animorum in dies nobis decrescit, ut, ad quem ante annos septemdecim, exercitum et classem habentem, tribunos plebis ædilemque mittere in Siciliam ausi sumus, qui prehenderent eum, et Romam reducerent, ad eum privatum ex villa sua extrahendum, ad causam dicendam, mittere non audeamus?* Tribuni plebis, adpellati ab L. Scipione, ita decreverunt, *Si morbi causa excusaretur, sibi placere, accipi eam causam, diemque a collegis prodici.* Tribunus plebis eo tempore Ti. Sempronius Gracchus

Scipio in
Liternum
concedit.

U. C. 565. erat, cui inimicitiae cum P. Scipione intercedebant :

A. C. 187. is, quum vetuisset nomen suum decreto collegarum adscribi, tristio remque omnes sententiam expectarent, ita decrevit : *Quum L. Scipio excuset morbum esse causae fratri, satis id sibi videri. Se P. Scipionem, priusquam Romam redisset, accusari non passurum : tum quoque, si se adpellet, auxilio ei futurum, ne causam dicat. Ad id fastigium rebus gestis, honoribus populi Romani, P. Scipionem Deorum hominumque consensu pervenisse, ut sub Rostris reum stare, et præbere aures adolescentium conviciis, populo Romano magis deforme, quam ipsi, sit.*

Gracchi
decretum
in gratiam
Scipionis.

LIII. Adjecit decreto indignationem : *Sub pedibus vestris stabit, tribunum, domitor ille Africae, Scipio ? ideo quatuor nobilissimos duces Pænorum in Hispania, quatuor exercitus fudit fugavitque : ideo Syphacem cepit, Hannibalem devicit, Karthaginem vectigalem nobis fecit, Antiochum (recepit enim fratrem consortem hujus glorie L. Scipio) ultra Tauri juga emovit, ut duobus Petilliis subcumberet, vos de P. Africano palmam peteritis ? Nullisne meritis suis, nullis vestris honoribus unquam in arcem tutam et velut sanctam clari viri pervenient : ubi, si non venerabilis, inviolata saltem senectus eorum considat ? Movit et decretum, et adjecta oratio non ceteros modo, sed ipsos etiam accusatores : et, deliberaturos se, quid sui juris et officii esset, dixerunt. Senatus deinde, concilio plebis dimisso, haberi est cœptus : ibi gratiae ingentes ab universo ordine, præcipue a consularibus senioribusque, Ti. Graccho actæ sunt, quod rempublicam privatis simultatibus potio rem habuisset : et Petillii vexati sunt probris, quod splendere aliena invidia voluissent, et spolia ex Africani triumpho peterent. Silentium deinde de*

Africano fuit : vitam Literni egit sine desiderio urbis. U. C. 565.
 Morientem rure eo ipso loco sepeliri se jussisse fe- A. C. 167.
 runt, monumentumque ibi ædificari, ne funus sibi in Africani
 ingrata patria fieret. Vir memorabilis : bellicis ta- mors et
 men, quam pacis, artibus memorabilior prima pars laudes.
 vitæ, quam postrema, fuit : quia in juvenia bella
 adsidue gesta ; cum senecta res quoque defloruere,
 nec præbita est materia ingenio. Quid ad primum
 consulatum secundus, etiamsi censuram adjicias ?
 quid Asiatica legatio, et valetudine adversa inutilis,
 et filii casu deformata, et post reditum necessitate
 aut subeundi judicii, aut simul cum patria deserendi ?
 Punici tamen belli perpetrati, quo nullum neque ma-
 jus neque periculosius Romani gessere, unus præci-
 puam gloriam tulit.

LIV. Morte Africani crevere inimicorum animi :
 quorum princeps fuit M. Porcius Cato, qui vivo quo-
 que eo adlatrare ejus magnitudinem solitus erat : hoc
 auctore existimantur Petillii et, vivo Africano, rem
 ingressi, et, mortuo, rogationem promulgasse. Fuit
 autem rogatio talis : *Velitis, jubeatis, quærat, quæ*
pecunia capta, ablata, coacta ab rege Antiocho est, qui Rogatio de
que sub ejus imperio fuerunt ; quod ejus in publicum pecunia
relatum non est, uti de ea re Ser. Sulpicius prætor ur- Antiochi.
banus ad senatum referat ? quem eam rem velit senatus
quærere de iis, qui prætores nunc sunt ? Huic rogationi
 primo Q. et L. Mummii intercedebant : senatum quæ-
 rere de pecunia non relata in publicum, ita ut antea
 semper factum esset, æquum censebant. Petillii no-
 bilitatem et regnum in senatu Scipionum accusabant.
 L. Furius Purpureo consularis, qui in decem legatis
 in Asia fuerat, latius rogandum censebat : non quæ
 ab Antiocho modo pecuniæ captæ forent, sed quæ

U. C. 565. ab aliis regibus gentibusque, Cn. Manlium inimicum
 A. C. 187. incessens. Et L. Scipio, quem magis pro se, quam
 adversus legem, dicturum adparebat, dissuasor pro-
 cessit: is post mortem P. Africani fratris, viri om-
 nium fortissimi clarissimique, eam exortam rogatio-
 nem est conquestus. *Porum enim fuisse, non laudari
 pro Rostris P. Africanum post mortem, nisi etiam accu-
 saretur. Et Karthaginienses exilio Hannibalis con-
 tentos esse: populum Romanum ne morte quidem P.
 Scipionis exsatiari, nisi et ipsius fama sepulti laceretur,
 et frater insuper, accessio invidiæ, mactetur.* M. Cato
 suasit rogationem, (exstat oratio ejus de pecunia re-
 gis Antiochi) et Mummius tribunos auctoritate de-
 terruit, ne adversarentur rogationi. Remittentibus
 ergo his intercessionem, omnes tribus, uti rogassent,
 jusserunt.

LV. Ser. Sulpicio deinde referente, quem roga-
 tione Petillia quærere vellent, Q. Terentium Culleo-
 nem Patres jusserunt. Ad hunc prætorem, adeo ami-
 cum Corneliæ familiæ, ut, qui Romæ mortuum ela-
 tumque P. Scipionem (est enim ea quoque fama) tra-
 dunt, pileatum, sicut in triumpho ierat, in funere
 quoque ante lectum isse, memoriæ prodiderint, et ad
 portam Capenam mulsum prosecutis funus dedisse,
 quod ab eo inter alios captivos in Africa ex hostibus
 receptus esset: aut adeo inimicum eundem, ut prop-
 ter insignem simultatem ab ea factione, quæ adversa
 Scipionibus erat, delectus sit potissimum ad quæstio-
 nem exercendam; ceterum ad hunc nimis æquum
 aut iniquum prætorem reus extemplo factus L. Sci-
 pio; simul et delata et recepta nomina legatorum
 ejus, A. et L. Hostiliorum Catonum, et C. Furii Acu-
 leonis quæstoris: et, ut omnia contacta societate

peculatus viderentur, scribæ quoque duo et accensus. U. C. 565.
A. C. 187.
 L. Hostilius, et scribæ, et accensus, priusquam de
 Scipione iudicium fieret, absoluti sunt: Scipio, et
 A. Hostilius legatus, et C. Furius damnati: *Quo* Damnatur
L. Scipio.
*commodior pax Antiocho daretur, Scipionem sex millia
 pondo auri, quadringenta octoginta argenti plus acce-
 pisse, quam in ærarium retulerit: A. Hostilium octo-
 ginta pondo auri, argenti quadringenta tria: Furium
 quæstorem auri pondo centum triginta, argenti ducenta.*
 Has ego summas auri et argenti relatas apud Antia-
 tem inveni: in L. Scipione malim equidem librarii
 mendum, quam mendacium scriptoris, esse in summâ
 auri atque argenti. Similius enim veri est, argenti,
 quam auri, majus pondus fuisse; et potius quadra-
 gies, quam ducenties quadragies, litem æstimatam:
 eo magis, quod, tantæ summæ rationem etiam ab
 ipso P. Scipione requisitam esse in senatu, tradunt:
 librumque rationis ejus, quum Lucium fratrem ad-
 ferre jussisset, inspectante senatu suis ipsum mani-
 bus concerpsisse: indignantem, quod, quum bis mil-
 lies in ærarium intulisset, quadragies ratio ab se
 posceretur. Ab eadem fiducia animi, quum quæ-
 stores pecuniam ex ærario contra legem promere non
 auderent, poposcisse claves, et se aperturum ærarium
 dixisse, qui, ut clauderetur, effecisset.

LVI. Multa alia, in Scipionis exitu maxime vitæ,
 dieque dicta, morte, funere, sepulcro, in diversum
 trahunt: ut, cui famæ, quibus scriptis adsentiar, non
 habeam. Non de accusatore convenit; alii M. Næ-
 vium, alii Petillios diem dixisse scribunt: non de
 tempore, quo dicta dies sit: non de anno, quo mor-
 tuus sit: non ubi mortuus, aut elatus sit. Alii Ro-
 mæ, alii Literni et mortuum, et sepultum: utrobi-

U. C. 565. que monumenta ostenduntur et statuæ. Nam et Li-
 A. C. 187. terni monumentum, monumentoque statua superin-
 posita fuit, quam tempestate disjectam nuper vidi-
 mus ipsi. Et Romæ extra portam Capenam in Sci-
 pionum monumento tres statuæ sunt: quarum duæ
 P. et L. Scipionum dicuntur esse, tertia poëtæ Q.
 Ennii. Nec inter scriptores rerum discrepat solum,
 sed orationes quoque, si modo ipsorum sunt, quæ
 feruntur, P. Scipionis et Ti. Gracchi abhorrent inter
 se. Index orationis P. Scipionis nomen M. Nævii
 tribuni plebis habet: ipsa oratio sine nomine est ac-
 cusatoris: nebulonem modo, modo nugatorem ad-
 pellat. Ne Gracchi quidem oratio aut Petilliorum,
 accusatorum Africani, aut diei dictæ Africano ullam
 mentionem habet. Alia tota serenda fabula est
 Gracchi orationi conveniens: et illi auctores se-
 quendi sunt, qui, quum L. Scipio et accusatus, et
 damnatus sit pecuniæ captæ ab rege, legatum in
 Etruria fuisse Africanum tradunt: quo post famam
 de fratris casu adlatam, relicta legatione, cucurrisse
 eum Romam; et, quum a porta recta ad forum se
 contulisset, quod in vincula duci fratrem dictum erat,
 repulisse a corpore ejus viatorem: et tribunis reti-
 nentibus, magis pie, quam civiliter, vim fecisse.
 Hinc enim ipse Gracchus queritur, dissolutam esse
 a privato tribuniciam potestatem: et ad postremum,
 quum auxilium L. Scipioni pollicetur, adjicit, tolera-
 bilioris exempli esse, a tribuno plebis potius, quam
 a privato, victam videri et tribuniciam potestatem,
 et rempublicam esse. Sed ita hanc unam inpoten-
 tem ejus injuriam invidia onerat, ut, increpando
 quod degenerarit tantum a se ipse, cumulas ei ve-
 teres laudes moderationis et temperantiæ pro repre-

hensione præsentī reddat. Castigatum enim quon- U. C. 565.
dam ab eo populum, ait, quod eum perpetuum con- A. C. 187.
sulem et dictatorem vellet facere: prohibuisse sta-
tuas sibi in comitio, in Rostris, in curia, in Capi-
tolio, in cella Jovis poni: prohibuisse, ne decerne-
retur, ut imago sua triumphali ornatu e templo Jo-
vis optimi maximi exiret.

LVII. Hæc, vel in laudatione posita, ingentem
magnitudinem animi moderandis ad civilem habi-
tum honoribus significarent, quæ exprobrando ini-
micus fatetur. Huic Graccho minorem ex duabus
filiis (nam major P. Cornelio Nasicæ haud dubie a
patre conlocata erat) nuptam fuisse convenit. Illud
parum constat, utrum post mortem patris et desponsa
sit, et nupserit: an veræ illæ opiniones sint, Grac-
chum, quum L. Scipio in vincula duceretur, nec
quisquam collegarum auxilio esset, jurasse, *Sibi ini-
micitias cum Scipionibus, quæ fuissent, manere; nec se
gratiæ quærendæ causa quidquam facere: sed, in quem
carcerem reges et imperatores hostium ducentem vi-
disset P. Africanum, in eum se fratrem ejus duci non
passurum.* Senatum, eo die forte cœnantem in Ca-
pitolio, consurrexisse, et petisse, ut inter epulas
Graccho filiam Africanus desponderet: quibus ita
inter publicum sollemne sponsalibus rite factis, quum
se domum recepisset, Scipionem Æmiliæ uxori dix-
isse, filiam se minorem despondisse: quum illa, mu-
liebriter indignabunda, nihil de communi filia se-
cum consultatum, adjecisset, non, si Ti. Graccho
daret, expertem consilii debuisse matrem esse; læ-
tum Scipionem tam concordi judicio, ipsi despon-
sam respondisse. Hæc de tanto viro, quamquam et

U. C. 565. opinionibus, et monumentis literarum variarent, pro-
 A. C. 187. ponenda erant.

L. Scipio
 in carce-
 rem duci
 jubetur.
 Defendi-
 tur a Na-
 sica.

LVIII. Judiciis a Q. Terentio prætore perfectis, Hostilius et Furius damnati, prædes eodem die quæstoribus urbanis dederunt. Scipio, quum contenderet, omnem, quam accepisset, pecuniam in ærario esse, nec se quidquam publici habere, in vincula duci est cœptus. P. Scipio Nasica tribunos adpellavit; orationemque habuit plenam veris decoribus, non communiter modo Corneliæ gentis, sed propriæ familiæ suæ. *Parentes suos et P. Africani ac L. Scipionis, qui in carcerem duceretur, fuisse Cn. et P. Scipiones, clarissimos viros. Eos, quum per aliquot annos in terra Hispania, adversus multos Pœnorum Hispanorumque et duces et exercitus, nominis Romani famam auxissent, non bello solum, sed quod Romanæ temperantiæ fideique specimen illis gentibus dedissent, ad extremum ambo pro republica morte obcubuisse: quum illorum tueri gloriam posteris satis esset, P. Africanum tantum paternas superavisse laudes, ut fidem fecerit, non sanguine humano, sed stirpe divina satum se esse. L. Scipionem, de quo agatur, (ut, quæ in Hispania, quæ in Africa, quum legatus fratris esset, gessisset, prætereantur) consulem et ab senatu dignum visum, cui extra sortem Asia provincia et bellum cum Antiocho rege decerneretur; et a fratre, cui post duos consulatus censuramque et triumphum legatus in Asiam iret. Ibi, ne magnitudo et splendor legati laudibus consulis obficeret, forte ita incidisse, ut, quo die ad Magnesiam signis conlatis L. Scipio Antiochum devicisset, æger P. Scipio Elææ dierum aliquot via abesset. Non fuisse minorem eum exercitum, quam Hannibalis, cum quo in*

Africa esset pugnatum. Hannibalem eundem fuisse U. C. 565.
A. C. 187.
inter multos alios regios duces, qui imperator Punici belli fuerit. Et bellum quidem ita gestum esse, ut ne fortunam quidem quisquam criminari possit. In pace crimen quæri: eam dici venisse. Hic decem legatos simul argui, quorum ex consilio data pax esset: quin exstitisse ex decem legatis, qui Cn. Manlium accusarent: tamen non modo ad criminis fidem, sed ne ad moram quidem triumphi eam accusationem valuisse.

LIX. *At, Hercule, in Scipione ipsas leges pacis, ut nimium adcommodatas Antiocho, suspectas esse: integrum enim ei regnum relictum: omnia possidere eum victum, quæ ante bellum ejus fuerint: auri et argenti quum vim magnam habuisset, nihil in publicum relatum, omne in privatum versum. An non præter omnium oculos tantum auri argentique in triumpho L. Scipionis, quantum non decem aliis triumphis, si omne in unum conferatur, sit latum? Nam quid de finibus regni dicam? Asiam omnem et proxima Europæ tenuisse Antiochum? Ea quanta regio orbis terrarum sit, a Tauro monte in Ægæum usque prominens mare, quot non urbes modo, sed gentes amplectatur, omnes scire. Hanc regionem, dierum plus triginta in longitudinem, decem inter duo maria in latitudinem patentem, usque ad Tauri montis juga Antiocho ademtam, expulso in ultimum angulum orbis terrarum. Quid, si gratuita pax esset, plus adimi ei potuisse? Philippo victo Macedoniam, Nabidi Lacedæmonem relictam: nec Quinctio crimen quæsitum: non enim habuisse eum Africanum fratrem; cujus quum gloria prodesse L. Scipioni debuisset, invidiam nocuisse. Tantum auri argentique judicatum esse in domum L. Scipionis inlatum, quantum, venditis omnibus bonis, redigi non posset. Id ubi*

U. C. 565. ergo esse regium aurum? ubi tot hæreditates acceptas?

A. C. 187. *In domo, quam sumtus non exhauserint, exstare debuisse novæ fortunæ cumulum. At enim, quod ex bonis redigi non possit, ex corpore et tergo per vexationem et contumelias L. Scipionis petitueros inimicos: ut in carcerem inter fures nocturnos et latrones vir clarissimus includatur, et in robore et tenebris exspiret: deinde nudus ante carcerem projiciatur. Non id Corneliæ magis familiæ, quam urbi Romanæ, fore erubescendum.*

LX. Adversus ea Terentius prætor rogationem Petilliam, et senatusconsultum, et iudicium de L. Scipione factum recitavit: se, ni referatur pecunia in publicum, quæ judicata sit, nihil habere, quod faciat, nisi ut prehendi damnatum, et in vincula duci jubeat. Tribuni quum in consilium secessissent, paullo post C. Fannius ex sua collegarumque aliorum, præter Gracchum, sententia pronunciavit, prætori non intercedere tribunos, quo minus sua potestate

Gracchus
mitti eum
jubet.

utatur. Ti. Gracchus ita decrevit: Quo minus ex bonis L. Scipionis, quod judicatum sit, redigatur, se non intercedere prætori. L. Scipionem (qui regem opulentissimum orbis terrarum devicerit, imperium populi Romani propagaverit in ultimos terrarum fines, regem Eumenem, Rhodios, alias tot urbes Asiæ devinxerit populi Romani beneficiis, plurimos duces hostium in triumpho ductos carcere incluserit) non passurum inter hostes populi Romani L. Scipionem in carcere et in vinculis esse, mittique eum se jubere. Tanto adsensu auditum est decretum, adeo dimissum L. Scipionem læti homines viderunt, ut vix in eadem civitate videretur factum iudicium. In bona deinde L. Scipionis possessum publice quæstores prætor misit: neque in iis non modo vestigium ul-

lum comparuit pecuniæ regiæ, sed nequaquam tantum redactum est, quantæ summæ damnatus fuerat. U. C. 563.
A. C. 187.

Conlata pecunia a cognatis amicisque et clientibus est L. Scipioni; ut, si acciperet eam, locupletior aliquanto esset, quam ante calamitatem fuerat. Nihil accepit: quæ necessaria ad cultum erant, redempta ei a proximis cognatis sunt. Verteratque Scipionum invidia in prætorem, et consilium ejus, et accusatores.

EPITOME LIBRI XXXIX.

M. *ÆMILIUS* consul, *Liguribus* subactis, viam a *Placentia* usque *Ariminum* perductam *Flaminia* junxit. *Initia* luxuriæ, introducta ab exercitu *Asiatico*, referuntur. *Ligures*, quicumque citra *Apenninum* erant, subacti sunt. *Bacchanalia*, sacrum *Græcum*, et quidem nocturnum, scelerum omnium seminarium, quum ad ingentis turbæ conjurationem pervenisset, a consule investigatum, et multorum pœna sublatum est. A censoribus *L. Valerio Flacco* et *M. Porcio Catone*, et belli et pacis artibus maximo, motus est senatu *L. Quinctius Flamininus*, *T. Quinctii* frater, eo quod, quum *Galliam* provinciam consul obtinuerat, rogatus in convivio a *Philippo Pæno*, quem amabat, scorto nobili, Gallum quemdam sua manu occiderat: sive, ut quidam tradiderunt, unum ex damnatis securi percusserat, rogatus a meretrice *Placentina*, cujus amore deperibat. Exstat in eum *M. Catonis* oratio. *Scipio Literni* decessit. Et, tamquam jungente fortuna circa idem tempus duo funera maximorum virorum, *Hannibal*, a *Prusia Bithyniæ* rege, ad quem, victo *Antiocho*, confugerat, quum dederetur Romanis, qui ad exposcendum illum *T. Quinctium Flamininum* miserant, veneno sibi mortem conscivit. *Philopœmen* quoque, dux *Achæorum*, vir maximus, a *Messeniiis* interemtus veneno, quum ab iis bello captus esset. *Coloniæ Potentia*, et *Pisaurum*, et *Mutina*, et *Parma* deductæ sunt. Præterea res adversus

Celtiberos prospere gestas, et initia caussasque belli Macedonici continet; cujus origo inde fluxit, quod Philippus ægre ferebat, regnum suum inminui a Romanis, et quod cogeretur, a Thracibus aliisque locis præsidia deducere.

T. LIVII PATAVINI

LIBER XXXIX.

U. C. 563. **D**UM hæc (si modo hoc anno acta sunt) Romæ
A. C. 167. aguntur, consules ambo in Liguribus gere-
Ligures
hostes per- bant bellum. Is hostis velut natus ad continendam
petui pop. inter magnorum intervalla bellorum Romanis mili-
Rom. tarem disciplinam erat; nec alia provincia militem
magis ad virtutem acuebat: nam Asia, et amœnitate
urbium, et copia terrestrium maritimarumque re-
rum, et mollitia hostium regiisque opibus, ditiores,
quam fortiores, exercitus faciebat: præcipue sub
imperio Cn. Manlii solute ac negligenter habiti sunt:
itaque asperius paullo iter in Thracia, et exercita-
tior hostis magna clade eos castigavit. In Liguri-
bus omnia erant, quæ militem excitarent: loca mon-
tana et aspera, quæ et ipsis capere labor erat, et ex
præoccupatis dejicere hostem: itinera ardua, an-
gusta, infesta insidiis: hostis levis, et velox, et re-
pentinus, qui nullum usquam tempus, nullum locum
quietum aut securum esse sineret: obpugnatio ne-
cessaria munitorum castellorum, laboriosa simul pe-
riculosaque: inops regio, quæ parsimonia adstringe-
ret milites, prædæ haud multum præberet. Itaque
non lixa sequebatur, non jumentorum longus ordo
agmen extendebat: nihil, præter arma et viros om-
nem spem in armis habentes, erat. Nec deerat um-

quam cum iis vel materia belli, vel caussa; quia U. C. 565.
 propter domesticam inopiam vicinos agros incursa- A. C. 187.
 bant: nec tamen in discrimen summæ rerum pugna-
 batur.

II. C. Flaminius consul, cum Friniatibus Liguri- Adversus
 bus in agro eorum pluribus præliis secundis factis, eos consu-
 in deditionem gentem accepit, et arma ademit: ea lum res
 quia non sincera fide tradebant, quum castigarentur, gestæ.
 relictis vicis, in montem Auginum confugerunt:
 confestim secutus est consul. Ceteri effusi rursus,
 et pars maxima inermes, per invia et rupes deruptas
 præcipitantes fugerunt, qua sequi hostis non posset:
 ita trans Apenninum abierunt: qui castris se tenu-
 erant, circumsessi expugnati sunt. Inde trans Apen-
 ninum ductæ legiones: ibi montis, quem ceperant,
 altitudine paullisper se tutati, mox in deditionem
 concesserunt: tum conquisita cum intentiore cura
 arma, et omnia adempta. Translatum deinde ad
 Apuanos Ligures bellum; qui in agrum Pisanum
 Bononiensemque ita incursaverant, ut coli non pos-
 set. His quoque perdomitis, consul pacem dedit
 finitimis: et, quia, a bello quieta ut esset provincia,
 effecerat, ne in otio militem haberet, viam a Bono-
 nia perduxit Arretium. M. Æmilius alter consul
 agros Ligurum vicosque, qui in campis aut vallibus
 erant, ipsis montes duos Balistam Suismontiumque
 tenentibus, deussit depopulatusque est: deinde eos,
 qui in montibus erant, adortus, primo levibus præ-
 liis fatigavit; postremo coactos in aciem descendere
 justo prælio devicit: in quo et ædem Dianæ vovit.
 Subactis cis Apenninum omnibus, tum transmonta-
 nos adortus (in his et Friniates Ligures erant, quos
 non adierat C. Flaminius) omnes Æmilius subegit,

U. C. 585. armaque ademit, et de montibus in campos multitudinem deduxit. Pacatis Liguribus, in agrum Gallicum exercitum duxit; viamque ab Placentia, ut Flaminiae committeret, Ariminum perduxit. Prælio ultimo, quo cum Liguribus signis conlatis confligit, ædem Junoni Reginæ vovit. Hæc in Liguribus eo anno gesta.

Cenomanis arma ademta et reddita.

III. In Gallia M. Furius prætor insontibus Cenomanis, in pace speciem belli quærens, ademerat arma. Id Cenomani conquesti Romæ apud senatum, rejectique ad consulem Æmiliū; cui, ut cognosceret statueretque, senatus permiserat: magno certamine cum prætore habito, tenuerunt caussam: arma reddere Cenomanis, decedere provincia prætor iussus. Legatis deinde sociorum Latini nominis, qui toto undique ex Latio frequentes convenerant, senatus datus est: his querentibus, magnam multitudinem civium suorum Romam commigrasse, et ibi censos esse, Q. Terentio Culleoni prætori negotium datum est, ut eos conquireret, et, quem C. Claudio, M. Livio censoribus, postve eos censores, ipsum parentemve ejus apud se censum esse, probassent socii, ut redire eo cogeret, ubi censi essent. Hac conquestione duodecim millia Latinorum domos redierunt, jam tum multitudine alienigenarum urbem onerante.

Fulvius petit triumphum.

IV. Priusquam consules redirent Romam, M. Fulvius proconsul ex Ætolia rediit: isque, ad ædem Apollinis in senatu quum de rebus in Ætolia Cephaleniaque ab se gestis disseruisset, petiit a Patribus, ut æquum censerent, ob rempublicam bene ac feliciter gestam, et Diis immortalibus honorem haberi jubere, et sibi triumphum decernere. M. Aburius tri-

bunus plebis, si quid de ea re ante M. Æmilii con- U. C. 565.
sulis adventum decerneretur, intercessurum se osten- A. C. 187.
dit: eum contradicere velle, proficiscentemque in pro-
vinciam ita sibi mandasse, ut ea disceptatio integra in
adventum suum servaretur. Fulvium temporis jactu-
ram facere: senatum etiam præsentem consule, quod vel-
let, decreturum. M. Fulvius: Si aut simultas M. Æ-
milii secum ignota hominibus esset, aut quam is eas ini-
micitias inpotenti ac prope regia ira exerceret; tamen
non fuisse ferendum, absentem consulem et Deorum in-
mortalium honori obstare, et meritum debitumque tri-
umphum morari: imperatorem, rebus egregie gestis,
victoremque exercitum cum præda ac captivis ante por-
tas stare, donec consuli, ob hoc ipsum moranti, redire
Romam libitum esset. Verum enimvero, quum sint
nobilissimæ sibi cum consule inimiciæ, quid ab eo
quemquam posse æqui exspectare, qui per infrequen-
tiam furtim senatusconsultum factum ad ærarium de-
tulerit, Ambraciam non videri vi captam; quæ ag-
gere ac vineis obpugnata sit; ubi, incensis operibus,
alia de integro facta sint; ubi circa muros supra sub-
terque terram per dies quindecim pugnatum; ubi a
prima luce, quum jam transcendisset muros miles, us-
que ad noctem diu anceps prælium tenuerit; ubi plus
tria millia hostium sint cæsa. Jam de Deorum inmor-
talium templis, spoliatis in capta urbe, qualem calum-
niam ad pontifices adtulerit? Nisi Syracusarum cete-
rarumque captarum civitatum ornamentis urbem exor-
nari fas fuerit, in Ambraciam unam captam non valu-
erit bellijus. Se et Patres conscriptos orare, et ab tri-
bunis petere, ne se superbissimo inimico ludibrio esse
sinant.

V. Undique omnes, alii deprecari tribunum, alii

U. C. 565. castigare. Ti. Gracchi collegæ plurimum oratio mo-

A. C. 187. vit: *Ne suas quidem simultates pro magistratu exercere boni exempli esse: alienarum vero simultatum tribunum plebis cognitorem fieri, turpe et indignum collegii ejus potestate et sacratis legibus esse. Suo quemque judicio et homines odisse aut diligere, et res probare aut inprobare debere; non pendere ex alterius vultu ac nutu, nec alieni momentis animi circumagi, adstipularique irato consuli tribunum plebei: et, quid privatim M. Æmilius mandaverit, meminisse; tribunatum sibi a populo Romano mandatum oblivisci; et mandatum pro auxilio ac libertate privatorum, non pro consulari regno. Ne hoc quidem cernere eum, fore, ut memoriæ ac posteritati mandetur, ejusdem collegii alterum e duobus tribunis plebis suas inimicitias remisisse reipublicæ, alterum alienas et mandatas exercuisse. His victus castigationibus tribunus, quum templo excessisset, referente Ser. Sulpicio prætore, triumphus M. Fulvio est decretus. Is quum gratias Patribus conscriptis egisset, adjecit; *Ludos magnos se Jovi optimo maximo eo die, quo Ambraciam cepisset, vovisse: in eam rem sibi centum pondo auri a civitatibus conlatum. Petere, ut ex ea pecunia, quam in triumpho latam in ærario positurus esset, id aurum secerni juberent. Senatus pontificum collegium consuli jussit, num omne id aurum in ludos consumi necessum esset? Quum pontifices negassent, ad religionem pertinere, quanta inpensa in ludos fieret; senatus Fulvio, quantum inpenderet, permisit, dum ne summam octoginta millium excederet. Triumphare mense Januario statuerat: sed quum audisset, consulem M. Æmilium, literis Aburii tribuni plebis acceptis de remissa intercessione, ipsum ad inpediendum triumphum Romam venientem,**

Triumphus decernitur Fulvio.

ægrum in via substitisse, ne plus in triumpho certa-
 minum, quam in bello, haberet, prætulit triumphi
 diem: triumphavit ante diem decimum Kalendas Ja-
 nuarias de Ætolis, et de Cephallenia. Aureæ coro-
 næ, centum duodecim pondo, ante currum latæ sunt:
 argenti pondo millia octoginta tria: auri pondo du-
 centa quadraginta tria: tetradrachmum Atticum
 centum octodecim millia: Philippei nummi duode-
 cim millia quadringenti viginti duo: signa ænea du-
 centa octoginta quinque: signa marmorea ducenta
 triginta: arma, tela, cetera spolia hostium, magnus
 numerus: ad hoc catapultæ, ballistæ, tormenta om-
 nis generis: duces, aut Ætoli et Cephallenes, aut
 regii ab Antiocho ibi relictis, ad septem et viginti.
 Multos eo die, priusquam in urbem inveheretur, in
 circo Flaminio tribunos, præfectos, equites, centu-
 riones, Romanos sociosque, donis militaribus dona-
 vit: militibus ex præda vicenos quinos denarios di-
 visit, duplex centurioni, triplex equiti.

VI. Jam consularium comitiorum adpetebat tem-
 pus; quibus quia M. Æmilius, cujus sortis ea cura
 erat, obcurrere non potuit, C. Flaminius Romam ve-
 nit: ab eo creati consules Sp. Postumius Albinus,
 Q. Marcius Philippus. Prætores inde facti T. Mæ-
 nius, P. Cornelius Sulla, C. Calpurnius Piso, M. Li-
 cinius Lucullus, C. Aurelius Scaurus, L. Quinctius
 Crispinus. Extremo anni, magistratibus jam creatis,
 ante diem tertium Nonas Martias Cn. Manlius Vulso
 de Gallis, qui Asiam incolunt, triumphavit: serius
 ei triumphandi caussa fuit, ne, Q. Terentio Culleone
 prætore, caussam lege Petillia diceret, et incendio
 alieni judicii, quo L. Scipio damnatus erat, confla-
 graret; eo infensioribus in se, quam in illum, judi-

U. C. 565.
 A. C. 187.

Manlii tri-
 umphus
 de Gallis.

U. C. 565. cibus, quod disciplinam militarem, severe ab eo con-
 A. C. 187. servatam, successor ipse omni genere licentiæ con-
 ruperat. Neque ea sola infamiæ erant, quæ in pro-
 vincia procul ab oculis facta narrabantur: sed ea
 etiam magis, quæ in militibus ejus quotidie conspi-
 ciebantur. Luxuriæ enim peregrinæ origo ab exer-
 citu Asiatico invecta in urbem est: ii primum lectos
 æratos, vestem stragulam pretiosam, plagulas, et alia
 textilia, et, quæ tum magnificæ supellectilis habe-
 bantur, monopodia et abacos Romam advexerunt:
 tunc psaltriæ sambucistriæque, et convivalia ludio-
 num oblectamenta addita epulis: epulæ quoque ipsæ
 et cura et sumtu majore adparari cœptæ: tum co-
 quus, vilissimum antiquis mancipium et æstimatione
 et usu, in pretio esse; et, quod ministerium fuerat,
 ars haberi cœpta: vix tamen illa, quæ tum conspi-
 ciebantur, semina erant futuræ luxuriæ.

Luxus
 inde Ro-
 mam in-
 vectus.

VII. In triumpho tulit Cn. Manlius coronas au-
 reas, ducentas duodecim pondo: argenti pondo du-
 centa viginti millia: auri pondo duo millia centum
 tres: tetradrachmum Atticum centum viginti septem
 millia: cistophorum ducenta quinquaginta: Philip-
 peorum aureorum nummorum sedecim millia trecen-
 tos viginti: et arma spoliaque multa Gallica, carpen-
 tis transvecta. Duces hostium duo et quinquaginta
 ducti ante currum: militibus quadragenos binos de-
 narios divisit, duplex centurioni; et stipendium du-
 plex in pedites dedit, triplex in equites. Multi om-
 nium ordinum, donati militaribus donis, currum se-
 cuti sunt: carminaque a militibus ea in imperatorem
 dicta, ut facile adpareret, in ducem indulgentem am-
 bitiosumque ea dici; triumphum esse militari magis
 favore, quam populari, celebrem. Sed ad populi

quoque gratiam conciliandam amici Manlii valuerunt: quibus adnitentibus senatusconsultum factum est, *Ut ex pecunia, quæ in triumpho translata esset, stipendium, conlatum a populo in publicum, quod ejus solutum antea non esset, solveretur.* Vicanos quinos et semisses in millia æris quæstores urbani cum fide et cura solverunt. Per idem tempus tribuni militum duo ex duabus Hispaniis cum literis C. Atinii et L. Manlii, qui eas provincias obtinebant, venerunt. Ex iis literis cognitum est, Celtiberos Lusitanosque in armis esse, et sociorum agros populari: de ea re consultationem integram senatus ad novos magistratus rejecit. Ludis Romanis eo anno, quos P. Cornelius Cethegus, A. Postumius Albinus faciebant, malus in circo instabilis in signum Pollentiæ procidit, atque id dejecit: ea religione moti Patres, et diem unum adjiciendum ludorum celebritati censuerunt, et signa duo pro uno reponenda, et novum auratum faciendum. Et plebei ludii ab ædilibus C. Sempronio Blæso et M. Furio Lusco diem unum instaurati sunt.

VIII. Insequens annus Sp. Postumium Albinum et Q. Marcium Philippum consules ab exercitu bel-
 lorumque et provinciarum cura ad intestinæ conjurationis vindictam avertit. Prætores provincias sortiti sunt, T. Mænius urbanam, M. Licinius Lucullus inter cives et peregrinos, C. Aurelius Scaurus Sardiniam, P. Cornelius Sulla Siciliam, L. Quinctius Crispinus Hispaniam citeriorem, C. Calpurnius Piso Hispaniam ulteriorem. Consulibus ambobus quæstio de clandestinis conjurationibus decreta est. Græcus ignobilis in Etruriam primum venit, nulla cum arte earum, quas multas ad animorum corporumque cul-

U. C. 565.

A. C. 187.

U. C. 566.

A. C. 186.

Bacchanalia.

U. C. 366. tum nobis eruditissima omnium gens invexit, sacri-
 A. C. 186. ficulus et vates: nec is, qui aperta religione, propa-
 lam et quæstum et disciplinam profitendo, animos
 horrore inbueret, sed occultorum et nocturnorum
 antistes sacrorum. Initia erant, quæ primo paucis
 tradita sunt: deinde vulgari cœpta sunt per viros
 mulieresque: additæ voluptates religioni vini et epu-
 larum, quo plurium animi inlicerentur. Quum vi-
 num animos, et nox et mixti feminis mares, ætatis
 teneræ majoribus, discrimen omne pudoris extinx-
 issent; corruptelæ primum omnis generis fieri cœptæ,
 quum ad id quisque, quo natura pronioris libidinis
 esset, paratam voluptatem haberet. Nec unum ge-
 nus noxæ, stupra promiscua ingenuorum femina-
 rumque, erant: sed falsi testes, falsa signa testimo-
 niaque et indicia ex eadem officina exhibant. Venena
 indidem intestinæque cædes: ita ut ne corpora qui-
 dem interdum ad sepulturam exstarent. Multa do-
 lo, pleraque per vim audebantur: occulebat vim,
 quod præ ululatibus, tympanorumque et cymbalorum
 strepitu, nulla vox quiritantium inter stupra et cædes
 exaudiri poterat.

IX. Hujus mali labes ex Etruria Romam, velut
 contagione morbi, penetravit: primo urbis magni-
 tudo capacior patientiorque talium malorum ea cela-
 vit: tandem indicium hoc maxime modo ad Postu-
 mium consulem pervenit. P. Æbutius, cujus pater
 publico equo stipendia fecerat, pupillus relictus, mor-
 tuis deinde tutoribus, sub tutela Duroniæ matris et
 vitrici T. Sempronii Rutili educatus fuerat. Et ma-
 ter dedita viro erat; et vitricus, quia tutelam ita
 gesserat, ut rationem reddere non posset, aut tolli
 pupillum, aut obnoxium sibi vinculo aliquo fieri cu-

Innotes-
 cunt P.
 Æbutii
 opera.

piebat : via una corruptelæ Bacchanalia erant. Ma- U. C. 566.
 ter adolescentulum adpellat, *Se pro ægro eo vovisse*, A. C. 186.
ubi primum convaluisset, Bacchis eum se initiaturam :
damnatum voti, Deum benignitate, exsolvere id velle.
Decem dierum castimonia opus esse : decimo die cœ-
natum, deinde pure lautum in sacrarium deducturam.
 Scortum nobile libertina Hispala Fecenia, non digna
 quæstu, cui ancillula adsuerat, etiam postquam ma-
 numissa erat, eodem se genere tuebatur. Huic con-
 suetudo juxta vicinitatem cum Æbutio fuit, minime
 adolescentis aut rei aut famæ damnosa : ultro enim
 amatus adpetitusque erat : et, maligne omnia præ-
 bentibus suis, meretriculæ munificentia sustinebatur.
 Quin eo processerat consuetudine capta, ut post pa-
 troni mortem, quia in nullius manu erat, tutore a
 tribunis et prætore petito, quum testamentum face-
 ret, unum Æbutium institueret hæredem.

X. Hæc amoris pignora quum essent, nec quid-
 quam secretum alter ab altero haberent, per jocum
 adolescens vetat eam mirari, si per aliquot noctes se-
 cubuisset. *Religionis se caussa, ut voto pro valetudi-*
ne sua facto liberetur, Bacchis initiari velle. Id ubi
 mulier audivit, perturbata, *Dii meliora ! inquit :*
mori et sibi et illi satius esse, quam id faceret ; et in
caput eorum detestari minas periculaque, qui id sua-
sissent. Admiratus quum verba, tum perturbationem
 tantam adolescens, *Parcere execrationibus jubet : ma-*
trem id sibi, adsentiente vitrico, imperasse. Vitricus
 ergo, inquit, *tuus (matrem enim insimulare forsitan*
fas non sit) pudicitiam, famam, spem, vitamque tuam
perditum ire hoc facto properat. Eo magis mirabun-
 do, quærentique quid rei esset, pacem veniamque
 precata Deorum Dearumque, si, coacta caritate ejus,

U. C. 566. *silenda enunciasset, ancillam se, ait, dominæ comitem*
 A. C. 186. *id sacrarium intrasse, liberam numquam eo accessisse. Scire corruptelarum omnis generis eam officinam esse: et jam biennio constare neminem initiatum ibi majorem annis viginti. Ut quisque introductus sit, velut victimam tradi sacerdotibus: eos deducere in locum, qui circumsonet ululatus, cantuque symphoniarum, et cymbalorum et tympanorum pulsu, ne vox quiritantis, quum per vim stuprum inferatur, exaudiri possit. Orare deinde atque obsecrare, ut eam rem quocumque discuteret modo: nec se eo præcipitaret, ubi omnia infanda patienda primum, deinde facienda essent: neque ante dimisit eum, quam fidem dedit adolescens, ab his sacris se temperaturum.*

XI. Postquam domum venit, et mater mentionem intulit, quid eo die, quid deinceps ceteris, quæ ad sacra pertinerent, faciendum esset; negat, eorum se quidquam facturum, nec initiari sibi in animo esse. Aderat sermoni vitricus: confestim mulier exclamat, *Hispalæ concubitu carere eum decem noctes non posse, illius excetræ delinimentis et venenis inbutum, nec parentis, nec vitrici, nec Deorum verecundiam habere*: jurgantes hinc mater, hinc vitricus, cum quatuor eum servis domo exegerunt. Adolescens inde ad Æbutiam se amitam contulit: caussamque ei, cur esset a matre ejectus, narravit: deinde ex auctoritate ejus postero die ad consulem Postunium, arbitris remotis, rem detulit. Consul post diem tertium ad se jussum redire dimisit: ipse Sulpiciam, gravem feminam, socrum suam, percunctatus est, *ecquam anum Æbutiam ex Aventino nosset? quum eam nosse, probam, et antiqui moris feminam, respondisset; opus esse sibi ea conventa dixit: mitteret nun-*

cium ad eam, ut veniret. Æbutia adcita ad Sulpiciam U. C. 566.
venit: et consul paullo post, velut forte intervenis- A. C. 186.
set, sermonem de Æbutio fratris ejus filio infert.
Lacrimæ mulieri obortæ, et miserari casum adoles-
centis cœpit, qui spoliatus fortunis, a quibus minime
oporteret, apud se tunc esset, ejectus a matre, quod
probus adolescens (Dii propitii essent) obscœnis, ut
fama esset, sacris initiari nollet.

XII. Satis de Æbutio exploratum ratus consul, ^{Hispala Fe-}
non vanum auctorem esse, dimissa Æbutia, socrum ^{cenia voca-}
rogat, ut Hispalam, indidem ex Aventino liberti- ^{tur a con-}sule.
nam, non ignotam vicinæ, arcesseret ad sese: eam,
quoque esse, quæ percunctari vellet. Ad cujus nun-
cium perturbata Hispala, quod ad tam nobilem et
gravem feminam ignara caussæ arcesseretur: post-
quam lictores in vestibulo turbamque consularem
et consulem ipsum conspexit, prope exanimata est.
In interiorem partem ædium abductam socru adhibita
consul, *si vera dicere inducere in animum posset, ne-*
gat, perturbari debere: fidem vel a Sulpicia, tali femi-
na, vel ab se acciperet: expromeret sibi, quæ in luco
Similæ Bacchanalibus in sacro nocturno solerent fieri.
Hoc ubi audivit, tantus pavor tremorque omnium
membrorum mulierem cepit, ut diu hiscere non pos-
set: tandem confirmata, *puellam admodum se ancil-*
lam initiatam cum domina, ait: aliquot annis, ex quo
manumissa sit, nihil, quid ibi fiat, scire: jam id ipsum
consul laudare, quum initiatam se non inficiaretur:
sed et cetera eadem fide expromeret: neganti ultra
quidquam scire non eandem, dicere, si coarguatur ab
alio, ac per se fatenti, veniam aut gratiam fore: eum
sibi omnia exposuisse, qui ab illa audisset.

XIII. Mulier, haud dubie, id quod erat, Æbutium

U.C. 566. indicem arcani rata esse, ad pedes Sulpiciæ procidit,
 A.C. 186. et eam primo orare cœpit, *Ne mulieris libertinæ cum amatore sermonem in rem non seriam modo, sed capitalem etiam, verti vellet: se terrendi ejus caussa, non quo sciret quidquam, ea locutam esse. Hic Postumius accensus ira, tum quoque, ait, eam cum Æbutio se amatore cavillari credere, non in domo gravissimæ feminae et cum consule loqui: et Sulpicia adtollere paventem; simul illam adhortari, simul iram generi lenire. Tandem confirmata, multum incusata perfidia Æbutii, qui optimi in eo ipso meriti talem gratiam retulisset, magnum sibi metum Deorum, quorum occulta initia enunciaret, majorem multo, dixit, hominum esse, qui se indicem manibus suis discerpturi essent: itaque hoc se Sulpiciam, hoc consulem orare, ut se extra Italiam aliquo amandarent, ubi reliquum vitæ degere tuto posset. Bono animo esse jubere eam consul, et, sibi curæ fore, dicere, ut Romæ tuto habitaret.*

Indicium
 Hispalæ.

Tum Hispala originem sacrorum expromit. *Primo sacrarium id feminarum fuisse, nec quemquam virum eo admitti solitum. Tres in anno statos dies habuisse, quibus interdum Bacchis initiarentur. Sacerdotes in vicem matronas creari solitas. Pacullam Anniam Campanam sacerdotem omnia, tamquam Deum monitu, immutasse: nam et viros eam primam suos filios initiasse, Minium et Herennium Cerrinios: et nocturnum sacrum ex diurno, et pro tribus in anno diebus quinos singulis mensibus dies initiorum fecisse. Ex quo in promiscuo sacra sint, et permixti viri feminis, et noctis licentia accesserit, nihil ibi facinoris, nihil flagitii prætermisum; plura virorum inter sese, quam feminarum, esse stupra. Si qui minus patientes dedecoris sint, et pigriores ad facinus, pro victimis inmolari: nihil nefas*

*ducere, hanc summam inter eos religionem esse. Viros, U. C. 560.
velut mente capta, cum jactatione fanatica corporis A. C. 186.
vaticinari; matronas Baccharum habitu crinibus spar-
sis cum ardentibus facibus decurrere ad Tiberim, demis-
sasque in aquam faces (quia vivum sulphur cum calce
insit) integra flamma efferre. Raptos a Diis homines
dici, quos machinæ inligatos ex conspectu in abditos spe-
cus abripiant: eos esse, qui aut conjurare, aut sociari
facinoribus, aut stuprum pati noluerint. Multitudinem
ingentem, alterum jam prope populum esse: in his no-
biles quosdam viros feminasque. Biennio proximo in-
stitutum esse, ne quis major viginti annis initiaretur:
captari ætates et erroris et stupri patientes.*

XIV. Peracto indicio, advoluta rursus genibus preces easdem, ut se ablegaret, repetivit. Consul rogat socrum, ut aliquam partem ædium vacuum faceret, quo Hispala inmigraret: coenaculum super ædes datum est, scalis ferentibus in publicum obseratis, aditu in ædes verso. Res omnes Feceniæ extemplo translatae, et familia arcessita: et Æbutius migrare ad consulis clientem jussus. Ita quum indices ambo in potestate essent, rem ad senatum Postumius defert, omnibus ordine expositis, quæ delata primo, quæ deinde ab se inquisita forent. Patres pavor ingens cepit, quum publico nomine, ne quid eæ conjurationes cœtusque nocturni fraudis occultæ aut periculi inportarent, tum privatim suorum quisque vicem, ne quis adfinis ei noxæ esset. Censuit autem senatus, gratias consuli agendas, quod eam rem et cum singulari cura, et sine ullo tumultu investigasset.

Quæstionem deinde de Bacchanalibus sacrisque noc- Quæstio de
turnis extra ordinem consulibus mandant: indicibus, Bacchana-
libus coss.
Æbutio ac Feceniæ, ne fraudi ea res sit, curare, et mandatur.

U. C. 566. alios indices præmiis invitare jubent: sacerdotes

A. C. 186. eorum sacrorum, seu viri seu feminæ essent, non Romæ modo, sed per omnia fora et conciliabula conquiri, ut in consulum potestate essent: edici præterea in urbe Roma, et per totam Italiam edicta mitti, *Ne quis, qui Bacchis initiatus esset, coisse aut convenisse causa sacrorum velit, neu quid talis rei divinæ fecisse: ante omnia, ut quæstio de his habeatur, qui coierint, conjuraverintve, quo stuprum flagitiumve inferretur. Hæc senatus decrevit. Consules ædilibus curulibus imperarunt, ut sacerdotes ejus sacri omnes conquirerent, comprehensosque libero conclavi ad quæstionem servarent; ædiles plebis videre, ne qua sacra in aperto fierent. Triumviris capitalibus mandatum est, ut vigilias disponderent per urbem, servarentque, ne qui nocturni cœtus fierent; utque ab incendiis caveretur, adjutores triumviris quinqueviri uti cis Tiberim suæ quisque regionis ædificiis præessent.*

Oratio Postumii de Bacchanalibus.

XV. Ad hæc officia dimissis magistratibus, consules in Rostra escenderunt; et, concione advocata, quum sollemne carmen precationis, quod præfari, priusquam populum adloquantur, magistratus solent, peregrisset consul, ita cœpit: *Nulli umquam concioni, Quirites, non solum apta, sed etiam necessaria, hæc sollemnis Deorum comprecatio fuit; quæ vos admone- ret, hos esse Deos, quos colere, venerari, precarique majores vestri instituissent: non illos, qui pravis et externis religionibus captas mentes, velut furialibus stimulis, ad omne scelus et ad omnem libidinem agerent. Equidem, nec quid taceam, nec quatenus proloquar, invenio: si aliquid ignorabitis, ne locum negligentiam; si omnia nudavero, ne nimium terroris obfundam vobis, vereor: quidquid dixero, minus, quam pro atro-*

citae et magnitudine rei, dictum scitote esse: ut ad U. C. 566.
cavendum satis sit, dabitur opera a nobis. Bacchana- A. C. 186.
lia tota jam pridem Italia, et nunc per urbem etiam
multis locis esse, non fama modo accepisse vos, sed cre-
pitibus etiam ululatibusque nocturnis, qui personant
tota urbe, certum habeo; ceterum, quæ ea res sit, ig-
norare: alios Deorum aliquem cultum, alios concessum
ludum et lasciviam esse credere, et, quaecumque sit,
ad paucos pertinere. Quod ad multitudinem eorum
adtinet, si dixerò, multa millia hominum esse, illico ne-
cesse est, exterreamini; nisi adjunxero, qui qualesque
sint. Primum igitur mulierum magna pars est, et is
fons mali hujusce fuit: deinde simillimi feminis mares,
stuprati et constupratores, fanatici vigiles; vino, stre-
pitibus, clamoribusque nocturnis adtoniti. Nullas ad-
huc vires conjuratio, ceterum incrementum ingens virium
habet, quod in dies plures fiunt. Majores vestri, ne vos
quidem, nisi quum aut, vexillo in arce posito, comitio-
rum causa exercitus eductus esset, aut plebi concilium
tribuni edixissent, aut aliquis ex magistratibus ad con-
cionem vocasset, forte temere coire voluerunt: et, ubi-
cumque multitudo esset, ibi et legitimum rectorem
multitudinis censebant debere esse. Quales primum
nocturnos cætus, deinde promiscuos mulierum ac viro-
rum, esse creditis? Si, quibus ætatibus initientur mares,
sciatis, non misereat vos eorum solum, sed etiam pudeat.
Hoc sacramento initiatos juvenes milites faciendos cen-
setis, Quirites? iis ex obscæno sacrario eductis arma
committenda? hi, cooperti stupris suis alienisque, pro
pudicitia conjugum ac liberorum vestrorum ferro de-
cernent?

XVI. Mirus tamen esset, si flagitiis tantum effemi-

VOL. IV.

I

U. C. 566. *nati forent, (ipsorum id magna ex parte dedecus erat)*

A. C. 186. *a facinoribus manus, mentem a fraudibus abstinuissent.*

Numquam tantum malum in republica fuit, nec ad plures, nec ad plura pertinens: quidquid his annis libidine, quidquid fraude, quidquid scelere peccatum est, ex illo uno sacrario scitote ortum esse. Necdum omnia, in quæ conjuraverunt, edita facinora habent: adhuc privatis noxiis, quia nondum ad rempublicam obprimendam satis virium est, conjuratio sese inopia tenet: crescit et serpit quotidie malum: jam majus est, quam ut capere id privata fortuna possit; ad summam rempublicam spectat. Nisi præcavetis, Quirites, jam huic diurnæ, legitime ab consule vocatæ, par nocturna concio esse poterit: nunc illi vos singuli universos concionantes timent: jam, ubi vos dilapsi domos et in rura vestra eritis, illi cõierint, consultabunt de sua salute simul ac vestra pernicië; tum singulis vobis universi timendi erunt. Optare igitur unusquisque vestrũ debet, ut bona mens suis omnibus fuerit. Si quem libido, si furor in illum gurgitem abripuit, illorum eum, cum quibus in omne flagitium et facinus conjuravit, non suum judicet esse. Ne quis etiam errore labatur, vestrũ quoque non sum securus: nihil enim in speciem fallacius est, quam prava religio. Ubi Deorum numen prætenditur sceleribus, subit animum timor, ne fraudibus humanis vindicandis divini juris aliquid inmixtum violemus. Hac vos religione innumerabilia decreta pontificum, senatusconsulta, aruspicum denique responsa liberant. Quoties hoc patrum avorumque ætate negotium est magistratibus datum, ut sacra externa fieri vetarent, sacrificulos vatesque foro, circo, urbe prohiberent, vaticinos libros conquirerent comburerentque, om-

nem disciplinam sacrificandi, præterquam more Romano, ^{U. C. 566.}
 abolerent? Judicabant enim prudentissimi viri omnis ^{A. C. 186.}
 divini humanique juris, nihil æque dissolvendæ religio-
 nis esse, quam ubi non patrio, sed externo ritu sacrificaretur. Hæc vobis prædicenda ratus sum, ne qua superstitio agitare animos vestros, quum demolientes nos Bacchanalia discutientesque nefarios cætus cerneretis. Omnia, Diis propitiis volentibusque, ea faciemus: qui, quia suum numen sceleribus libidinibusque contaminari indigne ferebant, ex occultis ea tenebris in lucem extraxerunt: nec patefieri, ut impunita essent, sed ut vindicarentur et obprimerentur, voluerunt. Senatus quæstionem extra ordinem de ea re mihi collegæque meo mandavit: nos, quæ ipsis nobis agenda sunt, inpigre exsequemur. Vigiliarum nocturnarum curam per urbem minoribus magistratibus mandavimus. Vos quoque, æquum est, quæ vestra munia sunt, quo quisque loco positus erit, quod imperabitur, inpigre præstare, et dare operam, ne quid fraude noxiorum periculi aut tumultus oriatur.

XVII. Recitari deinde senatusconsulta jusserunt, indicique præmium proposuerunt, si quis quem ad se deduxisset, nomenve absentis detulisset. Qui nominatus profugisset, diem certam se finituros; ad quam nisi citatus respondisset, absens damnaretur: si quis eorum, qui tum extra terram Italiam essent, nominaretur, ei laxiorem diem daturos, si venire ad causam dicendam vellet. Edixerunt deinde, ne quis quid fugæ causa vendidisset, neve emisisset: ne quis reciperet, celaret, ope ulla juvaret fugientes. Concione dimissa, terror magnus urbe tota fuit: nec mœnibus se tantum urbis aut finibus Romanis continuit; sed passim per totam Italiam, literis hospitem de senatusconsulto, et concione, et edicto consulum acceptis,

U. C. 566. trepidari cœptum est. Multi ea nocte, quæ diem
 A. C. 186. insecuta est, quo in concione res palam facta est,
 custodiis circa portas positis, fugientes a triumviris
 comprehensi et reducti sunt: multorum nomina de-
 lata: quidam ex iis viri feminæque mortem sibi con-
 sciverunt. Conjurasse supra septem millia virorum
 ac mulierum dicebantur: capita autem conjurationis
 constabat esse, M. et C. Atinios de plebe Romana,
 et Faliscum L. Opiternium, et Minium Cerrinium
 Campanum: ab his omnia facinora et flagitia orta:
 eos maximos sacerdotes conditoresque ejus sacri
 esse. Data opera est, ut primo quoque tempore com-
 prehenderentur. Adducti ad consules, fassique de
 se, nullam moram judicio fecerunt.

Capita
 conjura-
 tionis.

Conjura-
 torum
 poenæ.

XVIII. Ceterum tanta fuga ex urbe facta erat,
 ut, quia multis actiones et res peribant, cogerentur
 prætores T. Mænius et M. Licinius per senatum res
 in diem trigesimum differre, donec quæstiones a con-
 sulibus perficerentur. Eadem solitudo, quia Romæ
 non respondebant, nec inveniebantur, quorum nomi-
 na delata erant, coëgit consules circa fora proficisci,
 ibique quærere et judicia exercere. Qui tantum ini-
 tiati erant, et ex carmine sacro, præeunte verba sa-
 cerdote, preces fecerant, in quibus nefanda con-
 juratio in omne facinus ac libidinem continebatur,
 nec earum rerum ullam, in quas jurejurando obligati
 erant, in se aut alios admiserant, eos in vinculis re-
 linquebant: qui stupris aut cædibus violati erant,
 qui falsis testimoniis, signis adulterinis, subjectione
 testamentorum, fraudibus aliis contaminati, eos ca-
 pitali poena adficiebant. Plures necati, quam in vin-
 cula coniecti sunt: magna vis in utraque caussa vi-
 rorum mulierumque fuit. Mulieres damnatas cog-

natis, aut in quorum manu essent, tradebant, ut ipsi U. C. 566.
 in privato animadverterent in eas : si nemo erat ido- A. C. 186.
 neus supplicii exactor, in publico animadvertebatur.
 Datum deinde consulibus negotium est, ut omnia
 Bacchanalia Romæ primum, deinde per totam Ita-
 liam, diruerent ; extra quam si qua ibi vetusta ara
 aut signum consecratum esset : in reliquum deinde
 senatusconsulto cautum est, *Ne qua Bacchanalia*
Romæ neve in Italia essent : si quis tale sacrum sollem-
ne et necessarium duceret, nec sine religione et piaculo
se id omittere posse, apud prætorem urbanum profiteretur,
prætor senatum consuleret : si ei permissum esset,
quum in senatu centum non minus essent, ita id sacrum
faceret, dum ne plus quinque sacrificio interessent, neu
qua pecunia communis, neu quis magister sacrorum, aut
sacerdos esset.

XIX. Aliud deinde huic conjunctum, referente Q.
 Marcio consule, senatusconsultum factum est, *Ut de*
iis, quos pro indicibus consules habuissent, integra res
ad senatum referretur, quum Sp. Postumius, quæstioni-
bus perfectis, Romam redisset. Minium Cerrinium
 Campanum Ardeam in vincula mittendum censue-
 runt, magistratibusque Ardeatium prædicendum, ut
 intentiore eum custodia adservarent ; non solum ne
 effugeret, sed ne mortis consciscendæ locum haberet.
 Sp. Postumius aliquanto post Romam venit : eo re-
 ferente, de P. Æbutii et Hispalæ Feceniæ præmio,
 quod eorum opera indicata Bacchanalia essent, se-
 natusconsultum factum est, *Ut singulis his centena*
millia æris quæstores urbani ex ærario darent. Utique
 consul cum tribunis plebis ageret, ut ad plebem primo
 quoque tempore ferrent, ut P. Æbutio emerita stipendia
 essent, ne invitus militaret, neve censor ei equum publi-

U. C. 566. cum adsignaret. Utique Feceniæ Hispalæ datio, de-
 A. C. 186. minutio, gentis enuptio, tutoris optio item esset, quasi
 ei vir testamento dedisset. Utique ei ingenuo nubere
 liceret: neu quid ei, qui eam duxisset, ob id fraudi
 ignominiaere esset. Utique consules prætoresque, qui
 nunc essent, quive postea futuri essent, curarent, ne
 quid ei mulieri injuriæ fieret, utique tuto esset: id se-
 natum velle, et æquum censere, ut ita fieret. Ea om-
 nia lata ad plebem, factaque sunt ex senatusconsulto;
 et de ceterorum indicum impunitate præmiisque con-
 sulibus permissum est.

XX. Et jam Q. Marcius, quæstionibus suæ regio-
 nis perfectis, in Ligures provinciam proficisci para-
 bat; tribus millibus peditum Romanorum, centum
 quinquaginta equitibus, et quinque millibus Latini
 nominis peditum, ducentis equitibus in supplemen-
 tum acceptis. Eadem provincia, idem numerus pe-
 ditum equitumque et collegæ decretus erat. Exer-
 citus acceperunt, quos priore anno C. Flaminius et
 M. Æmilius consules habuerunt: duas præterea le-
 giones novas ex senatusconsulto scribere jussi sunt:
 et viginti millia peditum sociis et nomini Latino im-
 perarunt, et equites mille trecentos, et tria millia
 peditum Romanorum, ducentos equites: totum hunc
 exercitum, præter legiones, in supplementum Hispa-
 niensis exercitus duci placebat: itaque consules dum
 ipsi quæstionibus inpediebantur, T. Mænium delectui
 habendo præfecerunt. Perfectis quæstionibus, prior
 Q. Marcius in Ligures Apuanos est profectus. Dum
 penitus in abditos saltus, quæ latebræ receptacula-
 que semper illis fuerant, persequitur; in præoccu-
 patis angustiis, loco iniquo est circumventus: qua-
 tuor millia militum amissa; et legionis secundæ

Q. Mar-
 cius a Li-
 guribus
 circum-
 ventus.

signa tria, undecim vexilla sociûm Latini nominis U. C. 566.
 in potestatem hostium venerunt, et arma multa, quæ, A. C. 186.
 quia inpedimento fugientibus per silvestres semitas
 erant, passim jactabantur: prius sequendi Ligures
 finem, quam fugæ Romani, fecerunt. Consul, ubi
 primum ex hostium agro evasit, ne, quantum demi-
 nutæ copiæ forent, adpareret, in locis pacatis exer-
 citum dimisit. Non tamen obliterare famam rei
 male gestæ potuit: nam saltus, unde eum Ligures
 fugaverant, Marcius est adpellatus.

XXI. Sub hunc nuncium ex Ligustinis vulgatum Res in
 literæ, ex Hispania mixtam gaudio tristitiam adfe- Hispania
 rentes, recitatæ sunt. C. Atinius, qui biennio ante gestæ.
 prætor in eam provinciam profectus erat, cum Lusi-
 tanis in agro Astensi signis conlatis pugnavit: ad
 sex millia hostium sunt cæsa: ceteri fusi, fugati,
 castrisque exuti. Ad oppidum deinde Astam ob-
 pugnandum legiones ducit: id quoque haud multo
 majore certamine cepit, quam castra: sed, dum in-
 cautius subit muros, ictus ex vulnere post dies pau-
 cos moritur. Literis de morte proprætoris recitatis,
 senatus censuit mittendum, qui ad Lunæ portum C.
 Calpurnium prætorem consequeretur; nunciaretque,
 senatum æquum censere, ne sine imperio provincia
 esset, maturare enim proficisci. Quarto die, qui mis-
 sus erat, Lunam venit: paucis ante diebus Calpur-
 nius profectus erat. Et in citeriore Hispania L.
 Manlius Acidinus, qui eodem tempore, quo C. Ati-
 nius, in provinciam ierat, cum Celtiberis acie con-
 fluxit: incerta victoria discessum est, nisi quod Cel-
 tiberi castra inde nocte proxima moverunt: Roma-
 nis et suos sepeliendi, et spolia legendi ex hostibus
 potestas facta est. Paucos post dies, majore coacto

U. C. 566. exercitu, Celtiberi ad Calagurrim oppidum ultro la-
 A. C. 186. cessiverunt prælio Romanos. Nihil traditur, quæ
 caussa numero aucto infirmiores eos fecerit : superati
 prælio sunt : ad duodecim millia hominum cæsa,
 plus duo capta ; et castris Romanus potitus : et, nisi
 successor adventu suo inhibuisset inpetum victoris,
 subacti Celtiberi forent. Novi prætores ambo ex-
 ercitus in hiberna deduxerunt.

XXII. Per eos dies, quibus hæc ex Hispania nun-
 ciata sunt, ludi Taurii per biduum facti religionis
 caussa : (per dies) decem adparatos deinde ludos M.
 Fulvius, quos voverat Ætolico bello, fecit. Multi
 artifices ex Græcia venerunt honoris ejus caussa.
 Athletarum quoque certamen tum primo Romanis
 spectaculo fuit, et venatio data leonum et panthera-
 rum ; et prope hujus seculi copia ac varietate ludi-
 crum celebratum est. Novemdiale deinde sacrum
 tenuit, quod in Piceno per triduum lapidibus pluerat,
 ignesque cœlestes multifariam orti adussisse complu-
 rium levi adflatu vestimenta maxime dicebantur. Ad-
 dita et unum diem supplicatio est ex decreto ponti-
 ficum, quod ædes Opis in Capitolio de cœlo tacta
 erat : hostiis majoribus consules procurarunt, urbem-
 que lustraverunt. Sub idem tempus et ex Umbria
 nunciatum est, seminarem duodecim ferme annos
 natum inventum : id prodigium abominantes, arceri
 Romano agro necarique quamprimum jusserunt. Eo-
 dem anno Galli Transalpini, transgressi in Venetiam
 sine populatione aut bello, haud procul inde, ubi
 nunc Aquileia est, locum oppido condendo cepe-
 runt. Legatis Romanis, de ea re trans Alpes missis,
 responsum est, *Neque profectos ex auctoritate gentis*
eos, nec, quid in Italia facerent, se scire. L. Scipio

Galli in
 Venetiam
 trans-
 gressi.

ludos eo tempore, quos bello Antiochi vovisse sese dicebat, ex conlata ad id pecunia ab regibus civitatibusque per dies decem fecit. Legatum eum post damnationem et bona vendita missum in Asiam, ad dirimenda inter Antiochum et Eumenem reges certamina, Valerius Antias est auctor: tum conlatas ei pecunias, congregatosque per Asiam artifices: et, quorum ludorum post bellum, in quo votos diceret, mentionem non fecisset, de iis post legationem demum in senatu actum.

XXIII. Quum jam in exitu annus esset, Q. Marcius absens magistratu abiturus erat. Sp. Postumius, quæstionibus cum summa fide curaque perfectis, comitia habuit: creati sunt consules Ap. Claudius Pulcher, M. Sempronius Tuditanus. Postero die prætores facti P. Cornelius Cethegus, A. Postumius Albinus, C. Afranius Stellio, C. Atilius Serranus, L. Postumius Tempsanus, M. Claudius Marcellinus. Extremo anni, quia Sp. Postumius consul renunciaverat, peragrantem se propter quæstiones utrumque litus Italiæ desertas colonias, Sipontum supero, Buxentum infero mari, invenisse; triumviri ad colonos eo scribendos ex senatusconsulto ab T. Mænio prætore urbano creati sunt, L. Scribonius Libo, M. Tuccius, Cn. Bæbius Tamphilus. Cum Perseo rege et Macedonibus bellum, quod imminebat, non unde plerique opinantur, nec ab ipso Perseo causas cepit: inchoata initia a Philippo sunt; et is ipse, si diutius vixisset, id bellum gessisset. Una eum res, quum victo leges inponerentur, maxime angebat; quod, qui Macedonum ab se defecerant in bello, in eos jus sæviendi ademptum ei ab senatu erat: quum, quia rem integram Quinctius in conditionibus pacis

Causæ
belli cum
Perseo

U. C. 567. distulerat, non desperasset inpetrari posse. Antiocho
 A. C. 185. rege deinde bello superato ad Thermopylas, divisis
 partibus, quum per eosdem dies consul Acilius He-
 raceam, Philippus Lamiam obpugnasset; capta He-
 racea, quia jussus abscedere a mœnibus Lamiæ erat,
 Romanisque oppidum deditum est, ægre eam rem
 tulerat: permulsit iram ejus consul, quod, ad Nau-
 pactum ipse festinans, quo se ex fuga Ætoli contu-
 lerant, Philippo permisit, ut Athamaniæ et Amynan-
 dro bellum inferret; et urbes, quas Thessalis Ætoli
 ademerant, regno adjiceret. Haud magno certamine
 et Amynandrum Athamania expulerat, et urbes ali-
 quot receperat. Demetriadem quoque, urbem vali-
 dam et ad omnia opportunam, et Magnetum gentem
 suæ ditionis fecit: inde et in Thracia quasdam urbes,
 novæ atque insuetæ libertatis vitio, seditionibus prin-
 cipum turbatas, partibus, quæ domestico certamine
 vincerentur, adjungendo sese, cepit.

Vires con-
 ligit Phi-
 lippus.

XXIV. His sedata in præsentia regis ira in Ro-
 manos est: numquam tamen remisit animum a con-
 ligendis in pace viribus, quibus, quandoque data for-
 tuna esset, ad bellum uteretur. Vectigalia regni non
 fructibus tantum agrorum portoriisque maritimis
 auxit; sed metalla etiam et vetera intermissa reco-
 luit, et nova multis locis instituit. Ut vero antiquam
 multitudinem hominum, quæ belli cladibus amissa
 erat, restitueret; non sobolem tantum stirpis para-
 bat, cogendis omnibus procreare atque educare libe-
 ros, sed Thracum etiam magnam multitudinem in
 Macedoniam traduxerat, quietusque aliquamdiu a
 bellis, omni cura in augendas regni opes intentus
 fuerat. Rediere deinde causæ, quæ de integro iram
 moverent in Romanos. Thessalorum et Perrhæbo-

rum querelæ de urbibus suis ab eo possessis, et lega- U. C. 567.
torum Eumenis regis de Thraciis oppidis per vim A. C. 185.
occupatis, traductaque in Macedoniam multitudine, Thessa-
ita auditæ erant, ut eas non negligi satis adpareret. lorum et
Maxime moverat senatum, quod jam Æni et Maro- aliorum
neæ adfectari possessionem audierant; minus Thes- querelæ
salos curabant. Athamanes quoque venerunt legati, de Phi-
non partis amissæ, non finium jacturam querentes, lippo.
sed totam Athamaniam sub jus iudiciumque regis
venisse. Et Maronitarum exsules (erant pulsī, quia
libertatis causam defendissent ab regio præsidio) ii
non Maroneam modo, sed etiam Ænum in potestate
nunciabant Philippi esse. Venerant et a Philippo
legati ad purganda ea: qui nihil, nisi permissu Ro-
manorum imperatorum, factum adfirmabant. *Civi-*
tates Thessalorum, et Perrhæborum, et Magnetum,
et cum Amyndandro Athamanum gentem, in eadem
caussa, qua Ætolos, fuisse. Antiocho rege pulso, oc-
cupatum obpugnandis Ætolicis urbibus consulem ad
recipiendas eas civitates Philippum misisse: armis sub-
actos parere. Senatus, ne quid absente rege statu- Legati Ro-
eret, legatos ad eas controversias disceptandas misit, ma missi
Q. Cæcilium Metellum, M. Bæbium Tamphilum, Ti. discepta-
Sempronium: quorum sub adventum ad Thessalica tores.
Tempe omnibus iis civitatibus, quibus cum rege dis-
ceptatio erat, concilium indictum est.

XXV. Ibi quum Romani legati disceptatorum lo-
co, Thessali Perrhæbique et Athamanes haud dubii
accusatores, Philippus ad audienda crimina tamquam
reus, consedissent; pro ingenio quisque eorum, qui
principes legationum erant, et gratia cum Philippo
aut odio, acerbius leniusve egerunt. In controver-
siam autem veniebant, Philippopolis, Tricca, Phalo-

U. C. 567. ria, et Eurymenæ, et cetera circa eas oppida ; utrum
 A. C. 185. Thessalorum juris, quum vi ademptæ possessæque ab
 Ætolis forent, (nam Philippum Ætolis ademisse eas
 constabat) an Ætolica antiquitus ea oppida fuissent :
ita enim Acilium regi concessisse, si Ætolorum fuissent,
et si voluntate, non si vi atque armis coacti, cum Æto-
lis essent. Ejusdem formulæ disceptatio de Perrhæ-
 borum Magnetumque oppidis fuit : omnium enim
 jura possidendo per occasiones Ætoli miscuerant.
 Ad hæc, quæ disceptationis erant, querelæ Thessa-
 lorum adjectæ, quod ea oppida, si jam redderentur
 sibi, spoliata ac deserta redditurus esset : nam, præter
 belli casibus amissos, quingentos principes juventutis in
 Macedoniam abduxisse, et opera eorum in servilibus
 abuti ministeriis : et, quæ reddiderit coactus Thessalis,
 inutilia ut redderet, curasse. Thebas Phthias unum
 maritimum emporium fuisse, quondam Thessalis quæ-
 stuosum et frugiferum. Ibi navibus onerariis compa-
 ratis, regem, quæ præter Thebas Demetriadem cursum
 dirigerent, negotiationem maritimam omnem eo aver-
 tisse. Jam ne a legatis quidem, qui jure gentium
 sancti sint, violandis abstinere : insidias positas eunti-
 bus ad T. Quinctium. Itaque ergo in tantum metum
 omnes Thessalos conjectos, ut non in civitatibus suis,
 non in communibus gentis conciliis, quisquam hiscere
 audeat : procul enim abesse libertatis auctores Roma-
 nos : lateri adhærere gravem dominum, prohibentem
 uti beneficiis populi Romani. Quid autem, si vox li-
 bera non sit, liberum esse ? Nunc se fiducia et præsidio
 legatorum ingemiscere magis, quam loqui : nisi provi-
 deant aliquid Romani, quo et Græcis Macedoniam ad-
 colentibus metus, et audacia Philippi minuatur, ne-
 quidquam et illum victum, et se liberatos esse. Ut

equum tenacem, non parentem frenis asperioribus castigandum esse. Hæc acerbe postremi: quum priores leniter permulsissent iram ejus, petentes, Ut ignosceret pro libertate loquentibus; et ut, deposita domini acerbitate, adsuesceret socium atque amicum sese præstare; et imitaretur populum Romanum, qui caritate, quam metu, adjungere sibi socios mallet. Thessalis auditis, Perrhæbi Gonnocondylum, quod Philippus Olympiadem adpellaverat, Perrhæbiæ fuisse, et ut sibi restitueretur, agebant: et de Mallœa et Ericinio eadem postulatio erat. Athamanes libertatem repetebant, et castella Athenæum et Pœtneum.

XXVI. Philippus, ut accusatoris potius, quam rei, speciem haberet, et ipse a querelis orsus, *Meneleidem in Dolopia, quæ regni sui fuisset, Thessalos vi atque armis expugnasse, questus est: item Petram in Pieria ab iisdem Thessalis Perrhæbisque captam. Xynias quidem, haud dubie Ætolicum oppidum, sibi eos contribuisse; et Paracheloida, quæ sub Athamania esset, nullo jure Thessalorum formulæ factam. Nam quæ sibi crimina objiciantur, de insidiis legatorum, et maritimis portibus frequentatis aut desertis; alterum deridiculum esse, se reddere rationem, quos portus mercatores aut nautici petant; alterum mores suos respuere. Tot annos esse, per quos numquam cessaverint legati, nunc ad imperatores Romanos, nunc Romam ad senatum crimina de se deferre, quem unquam verbo violatum esse? Semel ad Quinctium euntibus insidias dici factas: sed, quid iis acciderit, non adjici. Quærentium, quod falso objiciant, quum veri nihil habeant, ea crimina esse. Insolenter et inmodice abuti Thessalos indulgentia populi Romani, velut ex diutina siti nimis avidè meram haurientes libertatem. Itaque, servorum*

U. C. 567.
A. C. 185.

U. C. 567. modo præter spem repente manumissorum, licentiam
 A. C. 185. vocis et linguæ experiri, et jactare sese insectatione et
 convitiis dominorum. Elatus deinde ira adjecit, Non-
 dum omnium dierum solem occidisse. Id minaciter
 dictum, non Thessali modo in sese, sed etiam Ro-
 mani acceperunt: et quum fremitus post eam vocem
 ortus, et tandem sedatus esset, Perrhæborum inde
 Athamanumque legatis respondit, *Eamdem, de quibus*
illi agant, civitatum caussam esse: consulem Acilium
et Romanos sibi dedisse eas, quum hostium essent. Si
suum munus, qui dedissent, adimere velint, scire se, ce-
dendum esse: sed meliori ac fideliori amico, in gratiam
levium et inutilium sociorum, injuriam eos esse factu-
ros. Nec enim ullius rei minus diuturnam esse gratiam,
quam libertatis: præsertim apud eos, qui male utendo
eam corrupturi sint. Causa cognita, pronunciave-
runt legati, Placere, deduci præsidia Macedonum ex
iis urbibus, et antiquis Macedonia terminis regnum
finiri. De injuriis, quas ultro citroque inlatus queran-
tur, quo modo inter eas gentes et Macedonas discepte-
tur, formulam juris exsequendi constituendam esse.

Legato-
rum ju-
dicium.

Querelæ
legatorum
Eumenis
de Thra-
ciæ urbi-
bus.

XXVII. Inde, graviter obfeso rege, Thessalo-
 nicen ad cognoscendum de Thraciæ urbibus proficis-
 cuntur: ibi legati Eumenis: *Si liberas esse Ænum*
et Maroneam velint Romani, nihil sui pudoris esse ul-
tra dicere, quam ut admoneant, re, non verbo, eos libe-
ros relinquant, nec suum munus intercipi ab alio pati-
antur. Sin autem minor cura sit civitatum in Thracia
positarum, multo verius esse, quæ sub Antiocho fuerint,
præmia belli Eumenem, quam Philippum, habere; vel
pro patris Attali meritis bello, quod adversus Philip-
pum ipsum gesserit populus Romanus: vel suis, quod
Antiochi bello terra marique laboribus periculisque om-

nibus interfuerit. *Habere eum præterea decem legato-* U. C. 567.
rum in eam rem præjudicium; qui quum Chersonesum A. C. 185.
Lysimachiamque dederint, Maroneam quoque atque
Ænum profecto dedisse, quæ ipsa propinquitate regio-
nis velut adpendices majoris muneris essent. Nam Phi-
lippum quidem quo aut merito in populum Romanum,
aut jure imperii, quum tam procul a finibus Macedoniae
absint, civitatibus his præsidia inposuisse? Vocari Ma-
ronitas juberent: ab iis certiora omnia de statu civi-
tatum earum scituros. Legati Maronitarum vocati, Maronita-
Non uno loco tantum urbis præsidium regium esse, sic- rum que-
ut in aliis civitatibus, dixerunt, sed pluribus simul, et relæ.
plenam Macedonum Maroneam esse: itaque dominari
adsentatores regios: his solis loqui et in senatu et in
concionibus licere: eos omnes honores et capere ipsos,
et dare aliis. Optimum quemque, quibus libertatis,
quibus legum cura sit, aut exulare pulsos patria, aut
inhonoratos et deterioribus obnoxios silere. De jure
etiam finium pauca adjecerunt: Q. Fabium Labeo-
nem, quum in regione ea fuisset, direxisse finem Philip-
po veterem viam regiam, quæ ad Thraciæ Paroreiam
subeat, nusquam ad mare declinantem. Philippum
novam postea deflexisse viam, qua Maronitarum urbes
agrosque amplectatur.

XXVIII. Ad ea Philippus longe aliam, quam ad- Responsio
 versus Thessalos Perrhæbosque nuper, ingressus dis- Philippi.
 serendi viam, *Non cum Maronitis, inquit, mihi aut*
cum Eumene disceptatio est; sed jam vobiscum, Ro-
mani; a quibus nihil æqui me inpetrare jam diu anim-
adverto. Civitates Macedonum, quæ a me inter in-
ducias defecerant, reddi mihi æquum censebam; non
quia magna accessio ea regni futura esset, (sunt enim
et parva oppida, et in finibus extremis posita) sed quia

U. C. 567. multum ad reliquos Macedonas continendos exemplum
 A. C. 185. pertinebat : negatum est mihi. Bello Ætolico Lamiam
 obpugnare jussus a consule M'. Acilio, quum diu fati-
 gatus ibi præliis operibusque essem, transcendentem me
 jam muros a capta prope urbe revocavit consul, et ab-
 ducere copias inde coëgit. Ad hujus solatium injuriæ
 permissum est, ut Thessaliæ Perrhæbiæque et Athama-
 num reciperem quædam castella magis, quam urbes :
 ea quoque ipsa vos mihi, Q. Cæcili, paucos ante dies
 ademistis. Pro non dubio paullo ante, si Diis placet,
 legati Eumenis sumebant, quæ Antiochi fuerunt, Eume-
 nem æquius esse, quam me, habere : id ego aliter longe
 judico esse. Eumenes enim, non nisi vicissent Romani,
 sed nisi bellum gessissent, manere in regno suo non po-
 tuit. Itaque ille vestrum meritum habet, non vos il-
 lius : mei autem regni, tantum aberat, ut ulla pars in
 discrimine fuerit, ut tria millia talentum, et quinquæ-
 ginta tectas naves, et omnes Græciæ civitates, quas
 antea tenuissem, pollicentem ultro Antiochum in mer-
 cedem societatis sim adspersus : hostemque ei me esse
 prius etiam, quam M'. Acilius exercitum in Græciam
 trajiceret, præ me tuli : et cum eo consule belli partem,
 quancumque mihi delegavit, gessi : et insequenti con-
 suli L. Scipioni, quum terra statuisset ducere exercitum
 ad Hellespontum, non iter tantum per regnum nostrum
 dedi, sed vias etiam munivi, pontes feci, commeatus
 præbui : nec per Macedoniam tantum, sed per Thraciam
 etiam, ubi inter cetera pax quoque præstanda a barba-
 ris erat. Pro hoc studio meo erga vos, ne dicam meri-
 to, utrum adjicere vos, Romani, aliquid, et amplificare
 et augere regnum meum munificentia vestra oportebat,
 an, quæ haberem aut meo jure, aut beneficio vestro,
 eripere ? id quod nunc facitis. Macedonum civitates,

quas regni mei fuisse fatemini, non restituuntur. *Eu-* U. C. 567.
menes, tamquam ad Antiochum, ad spoliandum me ve- A. C. 185.
nit, et, si Diis placet, decem legatorum decretum ca-
lumniae inpudentissimae prætendit; quo maxime et refelli
et coargui potest. Disertissime enim planissimeque in
eo scriptum est, Chersonesum et Lysimachiam Eumeni
dari. Ubi tandem Ænus, et Maronea, et Thraciæ ci-
uitates adscriptæ sunt? quod ab illis ne postulare qui-
dem est ausus, id apud vos, tamquam ab illis inpetra-
verit, obtinebit? Quo in numero me apud vos esse ve-
litis, refert. Si tamquam inimicum et hostem insectari
propositum est, pergite, ut cœpistis, facere. Sin aliquis
respectus est mei, ut socii atque amici regis, deprecor,
ne me tanta injuria dignum judicetis.

XXIX. Movit aliquantum oratio regis legatos :
 itaque medio responso rem suspenderunt : *Si decem*
legatorum decreto Eumeni datæ civitates eæ essent, ni-
hil se mutare : si Philippus bello cepisset eas, præmium Legati me-
victoriæ jure belli habiturum : si neutrum eorum foret, dio respon-
placere cognitionem senatui reservari : et, ut omnia in so rem sus-
pendunt.
integro manerent, præsidia, quæ in iis urbibus sint, de-
duci. Hæ caussæ maxime animum Philippi aliena-
verunt ab Romanis : ut non a Perseo filio ejus novis
caussis motum, sed ob has a patre bellum relictum
filio videri possit. Romæ nulla belli Macedonici
suspicio erat. L. Manlius proconsul ex Hispania Manlius ex
redierat : cui postulanti ab senatu in æde Bellonæ Hispania
triumphum rerum gestarum magnitudo inpetrabilem ovans.
faciebat, exemplum obstabat ; quod ita comparatum
more majorum erat, ne quis, qui exercitum non de-
portasset, triumpharet, nisi perdomitam pacatamque
provinciam tradidisset successori : medius tamen ho-
nos Manlio habitus, ut ovans urbem iniret. Tulit

U. C. 567. coronas aureas quinquaginta duas : auri præterea
 A. C. 185. pondo centum triginta duo : argenti sedecim millia
 trecenta : et pronunciavit in senatu, decem millia
 pondo argenti, et octoginta auri Q. Fabium quæstor-
 rem advehere : id quoque se in ærarium inlaturum.
 Magnus motus servilis eo anno in Apulia fuit. Ta-
 rentum provinciam L. Postumius prætor habebat. Is
 de pastorum conjuratione, qui vias latrociniiis pasqua-
 que publica infesta habuerant, quæstionem severe
 exercuit : ad septem millia hominum condemnavit :
 multi inde fugerunt, de multis sumtum est supplici-
 um. Consules, diu retenti ad urbem delectibus, tan-
 dem in provincias profecti sunt.

Res gestæ
 in Hispa-
 nia.

XXX. Eodem anno in Hispania prætores C. Cal-
 purnius et L. Quinctius, quum primo vere ex hiber-
 nis copias eductas in Bæturia junxissent, in Carpe-
 taniam, ubi hostium castra erant, progressi sunt,
 communi animo consilioque parati rem gerere. Haud
 procul Hippone et Toletto urbibus inter pabulatores
 pugna orta est : quibus dum utrinque subvenitur a
 castris, paullatim omnes copię in aciem eductę sunt :
 in eo tumultuario certamine et loca sua et genus pu-
 gnę pro hoste fuere : duo exercitus Romani fusi at-
 que in castra compulsi sunt : non institere percussis
 hostes. Prætores Romani, ne postero die castra
 obpugnarentur, silentio proximę noctis tacito signo
 exercitum abduxerunt. Luce prima Hispani acie
 instructa ad vallum accesserunt, vacuaque præter
 spem castra ingressi, quę derelicta inter nocturnam
 trepidationem erant, diripuerunt : regressique in sua
 castra, paucos dies quietis stativis manserunt. Ro-
 manorum sociorumque, in prælio fugaque, ad quin-
 que millia occisa ; quorum se spoliis hostes arma-

Romani
 victi.

runt: inde ad Tagum flumen profecti sunt. Præ- U C. 567.
tores interim Romani omne id tempus contrahendis A. C. 185.
ex civitatibus sociis Hispanorum auxiliis, reficiendis-
que ab terrore adversæ pugnæ militum animis, con-
sumserunt: ubi satis placuere vires, et jam miles
quoque, ad delendam priorem ignominiam, hostem
poscebat; duodecim millia passuum ab Tago flu-
mine posuerunt castra: inde tertia vigilia sublatis
signis, quadrato agmine principio lucis ad Tagi ripam
pervenerunt. Trans fluvium in colle hostium castra
erant: extemplo, qua duobus locis vada nudabat am-
nis, dextera parte Calpurnius, læva Quinctius exer-
citus traduxerunt; quieto hoste, dum miratur subi-
tum adventum, consultatque, qui tumultum injicere
trepidantibus in ipso transitu amnis potuisset. Inte-
rim Romani, inpedimentis quoque omnibus traduc-
tis contractisque in unum locum, quia jam moveri
videbant hostem, nec spatium erat castra communi-
endi, aciem instruxerunt: in medio locatæ quinta
Calpurnii legio et octava Quinctii: id robur toto
exercitu erat. Campum apertum usque ad hostium
castra habebant, liberum a metu insidiarum.

XXXI. Hispani, postquam in citeriore ripa duo
Romanorum agmina conspexerunt, ut, priusquam se
jungere atque instruere possent, occuparent eos, cas-
tris repente effusi cursu ad pugnam tendunt. Atrox
in principio prælium fuit, et Hispanis recenti vic- iterum
toria ferocibus, et insueta ignominia milite Romano pugnatur.
accenso: acerrime media acies, duæ fortissimæ le-
giones, dimicabant; quas quum aliter moveri loco
non posse hostis cerneret, cuneo institit pugnare:
et usque plures confertioresque, medios urgebant.
Ibi postquam laborare aciem Calpurnius prætor vi-

U. C. 567. dit, T. Quinctilium Varum et L. Juventium Thalnam
 A. C. 185.

legatos ad singulas legiones adhortandas propere mittit. Docere et monere jubet, *in illis spem omnem vincendi et retinendæ Hispaniæ esse. Si illi loco cedant, neminem ejus exercitus non modo Italiam, sed ne Tagi quidem ulteriores ripam, umquam visurum.* Ipse, cum equitibus duarum legionum paullulum circumvectus, in cuneum hostium, qui mediam urgebat aciem, ab latere incurrit. Quinctius cum suis equitibus alterum hostium latus invadit: sed longe acrius Calpurniani equites pugnabant, et prætor ipse ante alios: nam et primus hostem percussit, et ita se immiscuit mediis, ut vix, utrius partis esset, nosci posset: et equites prætoris eximia virtute, et equitum pedites accensi sunt. Pudor movit primos centuriones, qui inter tela hostium prætorem conspexerunt. Itaque urgere signiferos pro se quisque, jubere inferre signa, et confestim militem sequi. Renovatur ab omnibus clamor: inpetus fit velut ex superiore loco. Haud secus ergo, quam torrentis modo, fundunt sternuntque perculosos, nec sustinere alii super alios inferentes sese possunt. Fugientes in castra equites persecuti sunt, et permixti turbæ hostium intra vallum penetraverunt: ubi ab relictis in præsidio castrorum prælium instauratum: coactique sunt Romani equites descendere ex equis. Dimicantibus iis, legio quinta supervenit: deinde, ut quæque potuerant, copiæ adfluebant. Cæduntur passim Hispani per tota castra; nec plus quam quatuor millia hominum effugerunt: inde tria millia fere, qui arma retinuerant, montem propinquum ceperunt: mille semiermes maxime per agros palati sunt. Supra triginta quinque millia hostium fuerant, ex quibus

Victi Hispani.

tam exigua pars pugnae superfuit: signa capta centum triginta tria. Romani sociique paullo plus sexcenti, et provincialium auxiliorum centum quinquaginta ferme ceciderunt: tribuni militum quinque amissi, et pauci equites Romani, cruentae maxime victoriae speciem fecerunt. In castris hostium, quia ipsis spatium sua communiendi non fuerat, manserunt. Pro concione postero die laudati donatique a C. Calpurnio equites phaleris: pronunciavitque, eorum maxime opera hostes fusos, castra capta et expugnata esse. Quinctius alter praetor suos equites catellis ac fibulis donavit: donati et centuriones ex utriusque exercitu permulti: maxime qui mediam aciem tenuerunt.

XXXII. Consules, delectibus aliisque, quae Romae agendae erant, peractis rebus, in Ligures provinciam exercitum duxerunt. Sempronius, a Pisis profectus in Apuanos Ligures, vastando agros, urendoque vicos et castella eorum, aperuit saltum usque ad fluvium Macram et Lunae portum. Hostes montem, antiquam sedem majorum suorum, ceperunt: et inde, superata locorum iniquitate, praelio dejecti sunt. Et Ap. Claudius felicitatem virtutemque collegae in Liguribus Ingaunis aequavit secundis aliquot praeliis: sex praeterea oppida eorum expugnavit; multa millia hominum in iis cepit; belli auctores tres et quadraginta securi percussit. Jam comitiorum adpetebat tempus: prior tamen Claudius, quam Sempronius, cui sors comitia habendi obtigerat, Romam venit; quia P. Claudius frater ejus consulatum petebat. Competitores habebat patricios L. Aemilium, Q. Fabium, Ser. Sulpicium Galbam, veteres candidatos, et ab repulsis eo magis debitum, quia

Res in
Liguria
gestae.

U. C. 567. primo negatus erat, honorem repetentes : etiam,
A. C. 185.

quia plus quam unum ex patriciis creari non licebat, artior petitio quatuor petentibus erat. Plebei quoque gratiosi homines petebant, L. Porcius, Q. Terentius Culleo, Cn. Bæbius Tamphilus : et hi repulsi, in spem inpetrandi tandem aliquando honoris dilati. Claudius unus ex omnibus novus candidatus erat. Opinione hominum haud dubie destinabantur Q. Fabius Labeo et L. Porcius Licinus : sed Claudius consul sine lictoribus cum fratre toto foro volitando, clamitantibus adversariis et majore parte senatus, *meminisse eum debere prius, se consulem populi Romani, quam fratrem P. Claudii, esse : quin ille, sedens pro tribunali, aut arbitrum, aut tacitum spectatorem comitiorum se præberet* ; coerceri tamen ab effuso studio nequii. Magnis contentionibus tribunorum quoque plebei, qui aut contra consulem, aut pro studio ejus pugnabant, comitia aliquoties turbata : donec pervicit Appius, ut, dejecto Fabio, fratrem traheret. Creatus P. Claudius Pulcher præter spem suam et ceterorum : locum suum tenuit L. Porcius Licinus, quia moderatis studiis, non vi Claudiana, inter plebeios certatum est. Prætorum inde comitia sunt habita. C. Decimius Flavius, P. Sempronius Longus, P. Cornelius Cethegus, Q. Nævius Matho, C. Sempronius Blæsus, A. Terentius Varro, prætores facti. Hæc eo anno, quo Ap. Claudius, M. Sempronius consules fuerunt, domi militiæque gesta.

U. C. 568. XXXIII. Principio insequentis anni P. Claudius,

A. C. 184. L. Porcius consules, quum Q. Cæcilius, M. Bæbius, et Ti. Sempronius, qui ad disceptandum inter Philippum et Eumenem reges Thessalorumque civitates missi erant, legationem renunciassent, regum quoque

eorum civitatumque legatos in senatum introduxe-
 runt. Eadem utrimque iterata, quæ dicta apud le-
 gatos in Græcia erant. Aliam deinde legationem
 novam Patres, cujus princeps Ap. Claudius fuit, in
 Macedoniam et in Græciam decreverunt ad visen-
 dum, redditiæne civitates Thessalis et Perrhæbis es-
 sent. Iisdem mandatum, ut ab Æno et Maronea
 præsidia deducerentur, maritimaque omnis Thraciæ
 ora a Philippo et Macedonibus liberaretur. Pelo-
 ponnese quoque adire jussi, unde prior legatio
 discesserat incertiore statu rerum, quam si non ve-
 nissent: nam super cetera etiam sine responso di-
 missi, nec datum petentibus erat Achæorum concilium.
 De qua re querente graviter Q. Cæcilio, si-
 mul Lacedæmoniis deplorantibus, mœnia diruta,
 abductam plebem in Achaïam et venundatam,
 ademptas, quibus ad eam diem civitas stetisset, Ly-
 curgi leges, Achæi maxime concilii negati crimen
 excusabant, recitando legem, quæ, nisi belli pacisve
 caussa, et quum legati ab senatu cum literis aut
 scriptis mandatis venirent, vetaret indici concilium.
 Ea ne postea excusatio esset, ostendit senatus, curæ
 iis esse debere, ut Romanis legatis semper adeundi
 concilium gentis potestas fieret; quemadmodum et
 illis, quoties vellent, senatus daretur.

XXXIV. Dimissis iis legationibus, Philippus, a
 suis certior factus, cedendum civitatibus, deducen-
 daque præsidia esse, infensus omnibus, in Maronitas
 iram effundit. Onomasto, qui præerat maritimæ
 oræ, mandat, ut partis adversæ principes interficeret.
 Ille per Casandrum quemdam, unum ex re-
 giis jam diu habitantem Maroneæ, nocte Thracibus
 intromissis, velut in bello capta urbe, cædem fecit.

U. C. 568.

A. C. 184.

Legati mis-
si in Græ-
ciam.Maronitæ a
Philippo
crudeliter
trucidati.

U.C. 568. Id apud Romanos legatos querentes tam crudeliter
 A.C. 184. adversus innoxios Maronitas, tam superbe adversus
 populum Romanum factum, ut, quibus libertatem
 restituendam senatus censuisset, ii pro hostibus tru-
 cidarentur, abnuebat, *quidquam eorum ad se, aut*
quemquam suorum pertinere. Seditione inter ipsos di-
micatum, quum alii ad se, alii ad Eumenem civitatem
traherent : id facile scituros esse : percunctarentur ip-
sos Maronitas : haud dubius, percussis omnibus ter-
 rore tam recentis cædis, neminem hiscere adversus
 se ausurum. Negare Appius, *Rem evidentem pro du-*
bia quærendam : si ab se culpam remove vellet, Ono-
mastum et Casandrum, per quos acta res diceretur,
mitteret Romam, ut eos senatus percunctari posset.
 Primo adeo perturbavit ea vox regem, ut non color,
 non vultus ei constaret : deinde, conlecto tandem
 animo, *Casandrum, qui Maroneæ fuisset, si utique vel-*
lent, se missurum dixit. Ad Onomastum quidem quid
eam rem pertinere, qui non modo Maroneæ, sed ne in
regione quidem propinqua fuisset ? Et parcebat magis
 Onomasto, honoratori amico, et eundem indicem
 haud paullo plus timebat ; quia et ipse sermonem
 cum eo contulerat, et multorum talium ministrum
 et conscium habebat. Casander quoque, missis, qui
 per Epirum ad mare prosequerentur eum, ne qua
 indicium emanaret, veneno creditur sublatus.

XXXV. Et legati a Philippi conloquio ita di-
 gressi sunt, ut præ se ferrent, nihil eorum sibi pla-
 cere : et Philippus, minime, quin rebellandum esset,
 dubius, quia tamen in maturæ ad id vires erant, ad
 moram interponendam Demetrium, minorem filium,
 mittere Romam, simul ad purganda crimina, simul
 ad deprecandam iram senatus, statuit : satis cre-

Philippus
 Demetrium
 F. Romam
 mittit.

dens, ipsum etiam juvenem, quod Romæ obses spe- U. C. 568.
 cimen regiæ indolis dedisset, aliquid momenti factu- A. C. 184.
 rum. Interim per speciem auxilii Byzantiis ferendi,
 re ipsa ad terrorem regulis Thracum injiciendum,
 profectus, percussis iis uno prælio, et Amadoco duce
 capto, in Macedoniam rediit, missis ad adcolas Istri
 fluminis barbaros, ut in Italiam inrumperent, solli-
 citandos. Et in Peloponneso adventus Romanorum
 legatorum, qui ex Macedonia in Achaïam ire jussi
 erant, expectabatur: adversus quos ut præparata
 consilia haberent, Lycortas prætor concilium in- Concilium
 dixit. Ibi de Lacedæmoniis actum. *Ex hostibus eos* Achæorum
accusatores factos: et periculum esse, ne victi magis ti-
mendi forent, quam bellantes fuissent: quippe in bello
sociis Romanis Achæos usos: nunc eosdem Romanos
æquiores Lacedæmoniis, quam Achæis, esse: ubi Areus
etiam et Alcibiades, ambo exsules, suo beneficio resti-
tuti, legationem Romam adversus gentem Achæorum
ita de ipsis meritam suscepissent, adeoque infesta ora-
tione usi essent, ut patria pulsi, non restituti in eam,
viderentur. Clamor undique ortus, referret nomina-
tim de iis: et, quum omnia ira, non consilio, gere-
rentur, capitis damnati sunt. Paucos post dies Ro-
mani legati venerunt: his Clitore in Arcadia datum
est concilium.

XXXVI. Priusquam agerent quidquam, terror
 Achæis injectus erat et cogitatio, quam non ex æquo
 disceptatio futura esset; quod Areum et Alcibia-
 dem, capitis ab se in concilio proximo damnatos,
 cum legatis videbant, nec hiscere quisquam audebat.

Appius ea, quæ apud senatum questi erant Lacedæ- Romanus
 monii, displicere senatui ostendit: *cædem primum* legatus
ad conflictum factam eorum, qui a Philopæmene ad increpat
Achæos.

U. C. 568. *causam dicendam evocati venissent: deinde, quum in*
 A. C. 184. *homines ita sævitum esset, ne in ulla parte crudelitas*
eorum cessaret, muros dirutos urbis nobilissimæ esse,
leges vetustissimas abrogatas, inclitamque per gentes
Lycurgi disciplinam sublatam. Hæc quum Appius
dixisset, Lycortas, et quia prætor, et quia Philopæ-
menis, auctoris omnium, quæ Lacedæmone acta

Respondet *fuerant, factionis erat, ita respondit: Difficilior no-*
 Lycortas. *bis, Ap. Claudii, apud vos oratio est, quam Romæ nu-*
per apud senatum fuit. Tunc enim Lacedæmoniis ac-
cusantibus respondendum erat: nunc a vobis ipsis ac-
cusati sumus, apud quos causa dicenda est: quam ini-
quitatem conditionis subimus ista spe, iudicis animo te
auditurum esse, posita contentione, qua paullo ante
egisti. Ego certe, quum ea, quæ et hic antea apud
Q. Cæcilium, et postea Romæ questi sunt Lacedæmonii,
a te paullo ante relata sint, non tibi, sed illis, me apud
te respondere credam. Cædem objicitis eorum, qui a
Philopæmene prætore evocati ad causam dicendam in-
terfecti sunt. Hoc ego crimen non modo a vobis, Ro-
mani, sed ne apud vos quidem nobis objiciendum fuisse
arbitror. Quid ita? quia in vestro fœdere erat, ut
maritimis urbibus abstinerent Lacedæmonii. Quo tem-
pore armis captis urbes, a quibus abstinere jussi erant,
nocturno inpetu occupaverunt, si T. Quinctius, si exer-
citus Romanus, sicut antea, in Peloponneso fuisset, eo
nimirum capti et obpressi confugissent. Quum vos
procul essetis, quo alio, nisi ad nos socios vestros, quos
antea Gythio opem ferentes, quos Lacedæmonem vobis-
cum simili de causa obpugnantes viderant, confuge-
rent? Pro vobis igitur justum piumque bellum suscepi-
mus. Quod quum alii laudent, reprehendere ne Lace-
dæmonii quidem possint, Dii quoque ipsi comprobave-

rint, qui nobis victoriam dederunt; quonam modo ea, U. C. 568.
 quæ belli jure acta sunt, in disceptationem veniunt? A. C. 184.
 quorum tamen maxima pars nihil pertinet ad nos.
 Nostrum est, quod evocavimus eos ad causam dicen-
 dam, qui ad arma multitudinem exciverant, qui ex-
 pugnaverant maritima oppida, qui diripuerant, qui
 eadem principum fecerant. Quod vero illi, venientes
 in castra, interfecti sunt, vestrum est, *Areu et Alci-*
biade, qui nunc nos, si *Diis* placet, accusatis, non nos-
 trum. *Exsules Lacedæmoniorum* (quo in numero hi
 quoque duo fuerunt) et tunc nobiscum erant, et, quod
 domicilium sibi delegerant maritima oppida, se petitos
 credentes, in eos, quorum opera patria extorres ne in
 tuto quidem exsilio posse consenescere se indignabantur,
 inpetum fecerunt. *Lacedæmonii* igitur *Lacedæmonios*,
 non *Achæi*, interfecerunt: nec, jure an injuria cæsi
 sint, argumentari refert.

XXXVII. At enim illa certe vestra sunt, *Achæi*,
 quod leges disciplinamque vetustissimam *Lycurgi* sus-
 tulistis, quod muros diruistis. Quæ utraque ab iisdem
 objici qui possunt? quum muri *Lacedæmonii*s non ab
Lycurgo, sed paucos ante annos ad dissolvendam *Ly-*
curgi disciplinam exstructi sint. Tyranni enim nuper
 eos, arcem et munimentum sibi, non civitati, parave-
 runt. Et, si existat hodie ab inferis *Lycurgus*, gau-
 deat ruinis eorum, et nunc se patriam et *Spartam* an-
 tiquam agnoscere dicat. Non *Philopœmenem* expec-
 tare, nec *Achæos*, sed vos ipsi, *Lacedæmonii*, vestris
 manibus amoliri et diruere omnia tyrannidis vestigia
 debuistis. *Vestræ* enim illæ deformes veluti cicatrices
 servitutis erant: et, quum sine muris per octingentos
 prope annos liberi, aliquando etiam principes *Græciæ*
 fuissetis, muris, velut compedibus, circumdatis vincti per

U. C. 568.
A. C. 184.

centum annos servistis. Quod ad leges ademptas adtinet, ego antiquas Lacedæmoniis leges tyrannos ademisse arbitror; nos non suas ademisse, quas non habebant, sed nostras leges dedisse; nec male consuluisse civitati, quum concilii nostri eam fecerimus, et nobis miscuerimus, ut corpus unum et concilium totius Peloponnesi esset. Tunc, ut opinor, si aliis ipsi legibus viveremus, alias istis injunxissemus, queri, se iniquo jure esse, et indignari possent. Scio ego, Ap. Claudii, hanc orationem, qua sum adhuc usus, neque sociorum apud socios, neque liberæ gentis esse: sed vere servorum disceptantium apud dominos. Nam, si non vana illa vox præconis fuit, qua liberos esse omnium primos Achæos jussistis, si fœdus ratum est, si societas et amicitia ex æquo observatur, cur ego, quid, Capua capta, feceritis Romani, non quæro; vos rationem reposcitis, quid Achæi Lacedæmoniis bello victis fecerimus? Interfecti aliqui sunt; finge, a nobis. Quid? vos senatores Campanos securi non percussistis? Muros diruimus: vos non muros tantum, sed urbem et agros ademistis. Specie, inquis, æquum est fœdus: re apud Achæos precaria libertas, apud Romanos etiam imperium est. Sentio, Appi, et, si non oportet, non indignor; sed, oro vos, quantumlibet intersit inter Romanos et Achæos, modo ne in æquo hostes vestri nostrique apud vos sint, ac nos socii; immo ne meliore jure sint. Nam, ut in æquo essent, nos fecimus, quum leges iis nostras dedimus; quum, ut Achæi concilii essent, effecimus. Parum est victis, quod victoribus satis est: plus postulant hostes, quam socii habent. Quæ jurejurando, quæ monumentis literarum in lapide insculptis in æternam memoriam sancta atque sacrata sunt, ea cum perjurio nostro tollere parant. Veremur quidem

vos, *Romani, et, si ita vultis, etiam timemus : sed plus* U. C. 568.
et veremur et timemus Deos immortales. Cum ad- A. C. 184.
sensu maximæ partis est auditus, et locutum omnes
pro majestate magistratus censebant : ut facile ad-
pareret, molliter agendo dignitatem suam tenere
Romanos non posse. Tum Appius, *suadere se mag-*
nopere Achæis, dixit, ut, dum liceret voluntate sua fa-
cere, gratiam inirent, ne mox inviti et coacti facerent.
Hæc vox audita quidem cum omnium gemitu est,
sed metum injecit imperata recusandi : id modo pe-
tierunt, *ut Romani, quæ viderentur, de Lacedæmoniis*
mutarent, nec Achæos religione obstringerent irrita ea,
quæ jurejurando sanxissent, faciendi : damnatio tan-
tum Arei et Alcibiadis, quæ nuper facta erat, sub-
lata est.

XXXVIII. Romæ principio ejus anni, quum de
provinciis consulum et prætorum actum esset, con-
sulibus Ligures, quia bellum nusquam alibi erat, de-
creti. Prætores, C. Decimius Flavus urbanam, P.
Cornelius Cethegus inter cives et peregrinos sortiti
sunt ; C. Sempronius Blæsus Siciliam, Q. Nævius
Matho Sardiniam, et ut idem de beneficiis quæreretur,
A. Terentius Varro Hispaniam citeriorem, P. Sem-
pronius Longus Hispaniam ulteriorem. De iis dua-
bus provinciis legati per id fere tempus, L. Juven-
tius Thalna et T. Quinctilius Varus, venerunt : qui,
quantum bellum jam profligatum in Hispania esset,
senatu edocto, postularunt simul, ut pro rebus tam
prosperè gestis Diis immortalibus haberetur honos,
et ut prætoribus exercitum deportare liceret. Sup-
plicatio in biduum decreta est : de legionibus de-
portandis, quum de consulum prætorumque exerci-
tibus ageretur, rem integram referri jusserunt. Pau-

U. C. 568. cos post dies consulibus in Ligures binæ legiones,
 A. C. 184. quas Ap. Claudius et M. Sempronius habuerant, decretæ sunt. De exercitibus Hispaniensibus magna contentio fuit inter novos prætores et amicos absentium, Calpurnii Quinctiique. Utraque causa tribunus plebis, utraque consules habebat : hi, se intercessuros senatusconsulto, si deportandos censerent exercitus, denunciabant ; illi, si hæc intercessio fieret, nullam rem aliam se decerni passuros. Victa postremo absentium gratia est, et senatusconsultum factum, *Ut prætores quatuor millia peditum Romanorum scriberent, quadringentos equites, et quinque millia sociorum peditum Latini nominis, quingentos equites, quos secum in Hispaniam portarent : quum eas legiones quatuor descripsissent, quod plus, quam quina millia peditum, treceni equites, in singulis legionibus esset, dimitterent : eos primum, qui emerita stipendia haberent ; deinde, ut cujusque fortissima opera Calpurnius et Quinctius in prælio usi essent.*

Contentiones de prætura.

XXXIX. Hac sedata contentione, alia subinde C. Decimii prætoris morte exorta est. Cn. Sicinius et L. Pupius, qui ædiles proximo anno fuerant, et C. Valerius flamen Dialis et Q. Fulvius Flaccus (is, quia ædilis curulis designatus erat, sine toga candida, sed maxima ex omnibus contentione) petebant : certamenque ei cum flamine erat : et postquam primo æquare, mox superare etiam est visus, pars tribunorum plebis negare, rationem ejus habendam esse, quod duos simul unus magistratus, præsertim curules, neque capere posset, nec gerere ; pars legibus cum solvi æquum censere, ut, quem vellet, prætorem creandi populo potestas fieret. L. Porcius consul primo in ea sententia esse, ne no-

men ejus acciperet : deinde, ut ex auctoritate senatus idem faceret, convocatis Patribus, *referre se ad eos*, dixit, *quod nec jure ullo, nec exemplo tolerabili liberae civitati ædilis curulis designatus præturam peteret, sibi, nisi quid aliud iis videretur, in animo esse, e lege comitia habere*. Patres censuerunt, uti L. Porcius consul cum Q. Fulvio ageret, ne impedimento esset, quo minus comitia prætoris in locum C. Decimii subrogandi e lege haberentur. Agenti consuli ex senatusconsulto respondit Flaccus, *nihil, quod se indignum esset, facturum*. Medio responso spem ad voluntatem interpretantibus fecerat, cessurum Patrum auctoritati esse. Comitiiis acrius etiam, quam ante, petebat, criminando, extorqueri sibi a consule et senatu populi Romani beneficium, et invidiam geminati honoris fieri ; tamquam non adpareret, ubi designatus prætor esset, extemplo ædilitate se abdicaturum. Consul, quum et pertinaciam petentis crescere, et favorem populi magis magisque in eum inclinari cerneret, dimissis comitiis, senatum vocavit : censuerunt frequentes, *quoniam Flaccum auctoritas Patrum nihil movisset, ad populum cum Flacco agendum*. Concione advocata, quum egisset consul ; ne tum quidem de sententia motus, gratias populo Romano egit, *quod tanto studio, quotiescumque declarandæ voluntatis potestas facta esset, prætorem se voluisset facere*. Ea sibi studia civium suorum destituere non in animo esse. Hæc vero tam obstinata vox tantum ei favorem accendit, ut haud dubius prætor esset, si consul accipere nomen vellet. Ingens certamen tribunis, et inter se ipsos, et cum consule, fuit : donec senatus a consule est habitus, decretumque : *quoniam, prætoris subrogandi comitia*

U. C. 568.
A. C. 184.

Sublata S.
C. comitia.

U. C. 568. *ne legibus fierent, pertinacia Q. Flacci et prava studia*

A. C. 184. *hominum impedirent, senatum censere, satis pratorum esse : P. Cornelius utramque in urbe jurisdictionem haberet, Apollinique ludos faceret.*

Contentio-
nes de cen-
sura.

XL. His comitiis prudentia et virtute senatus sublatis, alia majoris certaminis, quo et majore de re, et inter plures potentioresque viros, sunt exorta. Censuram summa contentione petebant L. Valerius Flaccus, P. et L. Scipiones, Cn. Manlius Vulso, L. Furius Purpureo, patricii : plebei autem, M. Porcius Cato, M. Fulvius Nobilior, Ti. et M. Sempromnii, Longus et Tuditanus : sed omnes patricos plebeiosque nobilissimarum familiarum M. Porcius longe anteibat. In hoc viro tanta vis animi ingenique fuit, ut, quocumque loco natus esset, fortunam sibi ipse facturus fuisse videretur. Nulla ars, neque privatæ, neque publicæ rei gerendæ, ei defuit. Urbanas rusticasque res pariter callebat. Ad summos honores alios scientia juris, alios eloquentia, alios gloria militaris provexit : huic versatile ingenium sic pariter ad omnia fuit, ut natum ad id unum diceret, quodcumque ageret. In bello manu fortissimus, multisque insignibus clarus pugnans : idem, postquam ad magnos honores pervenit, summus imperator : idem in pace, si jus consuleres, peritissimus ; si causa oranda esset, eloquentissimus : nec is tantum, cujus lingua vivo eo vigerit, monumentum eloquentiæ nullum exstet : vivit immo vigetque eloquentia ejus, sacrata scriptis omnis generis. Orationes et pro se multæ, et pro aliis, et in alios : nam non solum accusando, sed etiam causam dicendo, fatigavit inimicos. Simultates nimio plures et exercuerunt eum, et ipse exercuit eas : nec facile dix-

L. Porcii
atonis
udes.

eris, utrum magis presserit eum nobilitas, an ille ^{U. C. 568.} agitaverit nobilitatem. Asperi procul dubio animi, ^{A. C. 184.} et linguæ acerbæ, et inmodice liberæ fuit : sed invicti a cupiditatibus animi, et rigidæ innocentia; contemtor gratiæ, divitiarum. In parsimonia, in patientia laboris, periculi, ferrei prope corporis animique ; quem ne senectus quidem, quæ solvit omnia, fregerit. Qui sextum et octogesimum annum agens causam dixerit, ipse pro se oraverit, scripseritque : nonagesimo anno Ser. Galbam ad populi adduxerit iudicium.

XLI. Hunc, sicut omni vita, tum petentem premebat nobilitas : cœherentque (præter L. Flaccum, qui collega in consulatu fuerat) candidati omnes ad dejiciendum honore eum ; non solum ut ipsi potius adipiscerentur, nec quia indignabantur novum hominem censorem videre ; sed etiam quod tristem censuram, periculosamque multorum famæ, et ab læso a plerisque, et lædendi cupido, exspectabant. Etenim tum quoque minitabundus petebat, *refragari sibi, qui liberam et fortem censuram timerent*, criminando : et simul L. Valerio subfragabatur. *Illo uno collega castigare se nova flagitia, et priscos mores revocare posse.* His accensi homines, adversa nobilitate, non M. Porcium modo censorem fecerunt, sed etiam collegam ei L. Valerium Flaccum adjecerunt. Secundum comitia censorum consules prætoresque in provincias profecti sunt, præter Q. Nævium, quem quatuor non minus menses, priusquam in Sardiniam iret, quæstiones veneficii, quarum magnam partem extra urbem per municipia conciliabulaque habuit, quia ita aptius visum erat, tenuerunt. Si Antiati Valerio credere libet, ad duo hominum mil.

U. C. 568. lia damnavit. Et L. Postumius prætor, cui Taren-
 A. C. 184. tum provincia evenerat, magnas pastorum conjura-
 tiones vindicavit, et reliquias Bacchanalium quæ-
 stionis cum omni exsecutus est cura: multos, qui aut
 citati non adfuerant, aut vades deseruerant, in ea
 regione Italiæ latentes, partim noxios judicavit,
 partim comprehensos Romam ad senatum misit: in
 carcerem omnes a P. Cornelio conjecti sunt.

XLII. In Hispania ulteriore, fractis proximo
 bello Lusitanis, quietæ res fuerunt. In citeriore
 A. Terentius in Suessetanis oppidum Corbionem vi-
 neis et operibus expugnavit, captivos vendidit:
 quieta deinde hiberna et citerior provincia habuit.
 Veteres prætores, C. Calpurnius Piso et L. Quinc-
 tius, Romam redierunt: utrique magno Patrum
 consensu triumphus est decretus. Prior C. Calpur-
 nius de Lusitanis et Celtiberis triumphavit: coro-
 nas aureas tulit octoginta tres, et duodecim millia
 pondo argenti. Paucos post dies L. Quinctius Cris-
 pinus ex iisdem Lusitanis Celtiberisque triumphavit:
 tantumdem auri atque argenti in eo triumpho
 translatum. Censores, M. Porcius et L. Valerius,
 metu mixta expectatione, senatum legerunt; sep-
 tem moverunt senatu: ex quibus unum insignem et
 nobilitate et honoribus, L. Quinctium Flamininum
 consularem. Patrum memoria institutum fertur, ut
 censores motis senatu adscriberent notas. Catonis
 et aliæ quidem acerbæ orationes exstant in eos,
 quos aut senatorio loco movit, aut quibus equos
 ademit: longe gravissima in L. Quinctium oratio
 est, qua si accusator ante notam, non censor post
 notam, usus esset, retinere Quinctium in senatu ne
 frater quidem T. Quinctius, si tum censor esset, po-

L. Quinc-
 tiussenatu
 motus.

tuisset. Inter cetera objecit ei, Philippum Pœnum, U. C. 568.
A. C. 184. carum ac nobile scortum, ab Roma in Galliam provinciam spe ingentium donorum perductum: eum puerum, per lasciviam quum cavillaretur, exprobrare consuli persæpe solitum, quod sub ipsum spectaculum gladiatorium abductus ab Roma esset, ut obsequium amatori venditaret. Forte epulantibus iis, quum jam vino incaluissent, nunciatum in convivio esse, nobilem Boium cum liberis transfugam venisse; convenire consulem velle, ut ab eo fidem præsens acciperet. Introductum in tabernaculum per interpretem adloqui consulem cœpisse. Inter cujus sermonem Quinctius scorto, *Vis tu, inquit, quoniam gladiatorium spectaculum reliquisti, jam hunc Gallum morientem videre?* Et quum is vixdum serio adnuisset, ad nutum scorti consulem stricto gladio, qui super caput pendebat, loquenti Gallo caput primum percussisse, deinde fugienti, fidemque populi Romani, atque eorum, qui aderant, inploranti, latus transfodisse.

XLIII. Valerius Antias, ut qui nec Catonis orationem legisset, et fabulæ tantum sine auctore editæ credidisset, aliud argumentum, simile tamen et libidine et crudelitate, peragit. Placentiæ famosam mulierem, cujus amore deperiret, in convivium arcessitam scribit: ibi jactantem sese scorto inter cetera retulisse, quam acriter quæstiones exercuisset, et quam multos capitis damnatos in vinculis haberet, quos securi percussurus esset. Tum illam infra eum adcubantem negasse, umquam vidisse quemquam securi ferientem, et pervelle id videre. Hic indulgentem amatorem, unum ex illis miseris, adtrahi iustum, securi percussisse. Facinus, sive eo modo,

U. C. 568. quo censor objecit, sive, ut Valerius tradit, com-
 A. C. 184. missum est, sævum atque atrox : inter pocula atque
 epulas, ubi libare Diis dapes, ubi bene precari mos
 esset, ad spectaculum scorti procacis, in sinu consulis
 recubantis, mactatam humanam victimam esse, et
 cruore mensam respersam. In extrema oratione
 Catonis conditio Quintio fertur, ut, si id factum
 negaret, ceteraque, quæ objecisset, sponsione de-
 fenderet sese : sin fateretur, ignominiane sua quem-
 quam doliturum censeret, quum ipse, vino et Ve-
 nere amens, sanguine hominis in convivio lusisset ?

Severitas
 in censu.

XLIV. In equitatu recognoscendo L. Scipioni
 Asiageni ademptus equus : in censibus quoque acci-
 piendis tristis et aspera in omnes ordines censura
 fuit. Ornamenta et vestem muliebrem et vehicula,
 quæ pluris, quam quindecim millium æris, essent, in
 censum referre viatores jussit : item mancipia mino-
 ra annis viginti, quæ post proximum lustrum decem
 millibus æris, aut eo pluris, venissent, uti ea quoque
 decies tanto pluris, quam quanti essent, æstimaren-
 tur ; et his rebus omnibus terni in millia æris ad-
 tribuerentur : aquam publicam omnem, in privatum
 ædificium aut agrum fluentem, ademerunt ; et, quæ
 in loca publica inædificata inmolitave privati habe-
 bant, intra dies triginta demoliti sunt. Opera de-
 inde facienda ex decreta in eam rem pecunia, lacus
 sternendos lapide, detergendasque, qua opus esset,
 cloacas ; in Aventino et in aliis partibus, quæ non-
 dum erant, faciendas locaverunt. Et separatim
 Flaccus molem ad Neptunias aquas, ut iter populo
 esset, et viam per Formianum montem. Cato atria
 duo, Mænium et Titium in lautumiis, et quatuor ta-
 bernas, in publicum emit ; basilicamque ibi fecit,

quæ Porcia adpellata est. Et vectigalia summis U. C. 568.
 pretiis, ultro tributa infimis locaverunt : quas loca- A. C. 184.
 tiones quum senatus, precibus et lacrimis publica-
 norum victus, induci et de integro locari jussisset ;
 censores, edicto submotis ab hasta, qui ludificati
 priorem locationem erant, omnia eadem paullum in-
 minutis pretiis locaverunt. Nobilis censura fuit,
 simultatiumque plena ; quæ M. Porcium (cui acer-
 bitas ea adsignabatur) per omnem vitam exercue-
 runt. Eodem anno coloniæ duæ, Potentia in Pice-
 num, Pisaurum in Gallicum agrum, deductæ sunt.
 Sena jugera in singulos data : dividerunt agrum, co-
 loniasque deduxerunt iidem tresviri, Q. Fabius La-
 beo, et M. et Q. Fulvii, Flaccus et Nobilior. Con-
 sules ejus anni nec domi nec militiæ memorabile
 quidquam egerunt.

XLV. In insequentem annum crearunt consules U. C. 569.
 M. Claudium Marcellum, Q. Fabium Labeonem. A. C. 183.
 M. Claudius, Q. Fabius Idibus Martiis, quo die con-
 sulatum inierunt, de provinciis suis prætorumque re-
 tulerunt. Prætores creati erant C. Valerius flamen
 Dialis, qui et priore anno petierat, et Sp. Postumius
 Albinus, et P. Cornelius Sisenna, L. Pupius, L. Ju-
 lius, Cn. Sicinius. Consulibus Ligures cum iisdem
 exercitibus, quos P. Claudius et L. Porcius habue-
 rant, provincia decreta est. Hispaniæ extra sortem
 prioris anni prætoribus cum suis exercitibus serva-
 tæ. Prætores ita sortiri jussi, uti flamini Diali uti-
 que altera juris dicendi Romæ provincia esset : pe-
 regrinam est sortitus. Sisennæ Cornelio urbana,
 Sp. Postumio Sicilia, L. Pupio Apulia, L. Julio
 Gallia, Cn. Sicinio Sardinia evenit. L. Julius ma-
 turare est jussus. Galli Transalpini, per saltus ig-

U. C. 569. notæ antea viæ (ut ante dictum est) in Italiam
 A. C. 183. transgressi, oppidum in agro, qui nunc est Aquilei-
 leinsis, ædificabant. Id eos ut prohiberet, quod
 ejus sine bello posset, prætori mandatum est: si ar-
 mis prohibendi essent, consules certiores faceret:
 ex his placere alterum adversus Gallos ducere le-
 giones. Extremo prioris anni comitia habita erant
 in demortui Cn. Cornelii locum auguris subficiendi.
 Creatus Sp. Postumius Albinus.

XLVI. Hujus principio anni P. Licinius Crassus
 pontifex maximus mortuus est: in cujus locum M.
 Sempronius Tuditanus pontifex est cooptatus: pon-
 tifex maximus est creatus C. Servilius Geminus. P.
 Licinii funeris caussa visceratio data, et gladiatores
 centum viginti pugnauerunt, et ludi funebres per
 triduum facti, post ludos epulum: in quo, quum
 toto foro strata triclinia essent, tempestas, cum
 magnis procellis coorta, coëgit plerosque taberna-
 cula statuere in foro. Eadem paullo post, quum
 undique disserenasset, sublata: defunctosque vulgo
 ferebant, quod inter fatalia vates cecinissent, ne-
 cesse esse tabernacula in foro statui. Hac religione
 levatis altera injecta, quod sanguine per biduum
 pluisset in area Vulcani: et per decemviros suppli-
 catio indicta erat ejus prodigii expiandi caussa.
 Priusquam consules in provincias proficiscerentur,
 legationes transmarinas in senatum introduxerunt:
 nec umquam ante tantum regionis ejus hominum
 Romæ fuerat. Nam ex quo fama per gentes, quæ
 Macedoniam adcolunt, vulgata est, crimina queri-
 moniasque de Philippo non negligerent ab Romanis
 audiri, multis operæ pretium fuisse queri; pro se
 quæque civitates gentesque, singuli etiam privatim,

Querelæ de
 Philippo.

(gravis enim adcola omnibus erat) Romam, aut ad U. C. 569.
 spem levandæ injuriæ, aut ad defendendæ solatium, ve- A. C. 183.
 nerunt. Et ab Eumene rege legatio cum fratre ejus
 Athenæo venit ad querendum, simul quod non dedu-
 cerentur ex Thracia præsidia, simul quod in Bithy-
 niam Prusiæ bellum adversus Eumenem gerenti
 auxilia missa forent.

XLVII. Respondendum ad omnia juveni tum Demetrius
 admodum Demetrio erat; quum haud facile esset, patrem
 aut ea, quæ objicerentur, aut quæ adversus ea dicen- defendit.
 da erant, memoria complecti: nec enim multa so-
 lum, sed etiam pleraque oppido quam parva erant:
 de controversia finium, de hominibus raptis pecori-
 busque abactis, de jure aut dicto per libidinem aut
 non dicto, de rebus per vim aut per gratiam judica-
 tis: nihil horum neque Demetrium docere dilucide,
 nec se satis liquido discere ab eo senatus quum cer-
 neret posse; simul et tirocinio, et perturbatione
 juvenis moveretur; quæri jussit ab eo, ecquem de
 his rebus commentarium a patre accepisset? Quum
 respondisset, *accepisse se*; nihil prius nec potius vi-
 sum est, quam regis ipsius de singulis responsa ac-
 cipere. Librum extemplo poposcerunt; deinde, ut
 ipse recitaret, permiserunt. Erant autem de rebus
 singulis in breve coactæ caussæ: ut alia fecisse se
 secundum decreta legatorum doceret; alia non per
 se stetisse, quo minus faceret, sed per eos ipsos, qui
 accusarent. Interposuerat et querelas de iniquitate
 decretorum, et quam non ex æquo disceptatum apud
 Cæcilium foret, indigneque sibi, nec ullo suo merito,
 insultatum ab omnibus esset. Has notas irritati ejus
 animi conlegit senatus: ceterum alia excusanti ju-
 veni, alia recipienti, futura ita, ut maxime vellet se-

U. C. 569. natus, responderi placuit : *Nihil patrem ejus neque*
 A. C. 183. *rectius, nec magis, quod ex voluntate senatus esset, fe-*
 Respon- *cisse, quam quod, utcumque ea gesta essent, per Deme-*
 sum sena- *trium filium satisfieri voluisset Romanis. Multa et*
 tus. *dissimulare, et oblivisci, et pati præterita senatum*
posse, et credere etiam, Demetrio credendum esse. Ob-
sidem enim se animum ejus habere, etsi patri corpus
reddiderit : et scire, quantum salva in patrem pietate
possit, amicum eum populo Romano esse. Honorisque
ejus caussa missuros in Macedoniam legatos, ut, si quid
minus factum sit, quam debuerit, tum quoque sine pia-
culo rerum prætermissarum fiat. Velle etiam sentire
Philippum, integra omnia sibi cum populo Romano
Demetrii filii beneficio esse.

XLVIII. Hæc, quæ augendæ amplitudinis ejus
 caussa facta erant, extemplo in invidiam, mox etiam
 in perniciem adolescenti verterunt. Lacedæmonii
 deinde introducti sunt : multæ et parvæ discepta-
 tiones jactabantur : sed, quæ maxime rem contine-
 rent, erant ; utrum restituerentur, quos Achæi dam-
 naverant, nec ne ; inique, an jure occidissent, quos
 occiderant : vertebatur et utrum manerent in Achai-
 co concilio Lacedæmonii ; an, ut ante fuerat, secre-
 tum ejus unius in Peloponneso civitatis jus esset.
 Restitui, judiciaque facta tolli placuit : Lacedæmo-
 nem manere in Achaico concilio : scribique id de-
 cretum, et consignari a Lacedæmoniis et Achæis.
 Legatus in Macedoniam Q. Marcius est missus :
 jussus idem in Peloponneso sociorum res adspicere :
 nam ibi quoque et ex veteribus discordiis residui
 motus erant, et Messene desciverat a concilio A-
 chaico : cujus belli et caussas et ordinem si expro-
 nare velim, inmemor sim propositi, quo statui non

ultra adtingere externa, nisi qua Romanis cohærent rebus. U.C. 569.
A. C. 183.

XLIX. Eventus memorabilis est, quod, quum bello superiores essent Achæi, Philopœmen prætor eorum capitur, ad præoccupandam Coronen (profectus,) quam hostes petebant, in valle iniqua cum equitibus paucis obpressus. Ipsum potuisse effugere Thracum Cretensiumque auxilio tradunt: sed pudor relinquendi equites, nobilissimos gentis, ab ipso nuper lectos, tenuit: quibus dum locum ad evadendas angustias cogendo ipse agmen præbet, sustinens inpetus hostium: prolapso equo, et suo ipse casu, et onere equi super eum ruentis, haud multum abfuit, quin exanimaretur, septuaginta annos jam natus, et diutino morbo, ex quo tum primum reficiebatur, viribus admodum adtenuatis: jacentem hostes superfusi obpresserunt: cognitumque primum a verecundia memoriaque meritorum, haud secus quam ducem suum, adtollunt reficiuntque, et ex valle devia in viam portant, vix sibimet ipsi præ necopinato gaudio credentes; pars nuncios Messenen præmittunt, debellatum esse, Philopœmenem captum adduci. Primum adeo incredibilis visa res, ut non pro vano modo, sed vix pro sano nuncius audiretur: deinde, ut super alium alius idem omnes adfirmantes veniebant, tandem facta fides; et, priusquam adpropinquare urbi satis scirent, ad spectaculum omnes, simul liberi ac servi, pueri quoque cum feminis, effunduntur: itaque clauserant portam turbæ, dum pro se quisque, nisi ipse oculis suis credidisset, vix pro comperta tantam rem habiturus videretur. Ægre submoventes obvios intrare portam, qui adducebant Philopœmenem, potuerunt, atque turba conferta

U. C. 569. iter reliquum clauserat : et, quum pars maxima ex-
 A. C. 183. clusa a spectaculo esset, theatrum repente, quod viæ
 propinquum erat, compleverunt, et, ut eo in con-
 spectum populi adduceretur, una voce omnes ex-
 poscebant. Magistratus et principes, veriti, ne
 quem motum misericordia præsentis tanti viri face-
 ret, quum alios verecundia pristinæ majestatis con-
 lata præsentī fortunæ, alios recordatio ingentium
 meritorum motura esset, procul in conspectu eum
 statuerunt : deinde raptim ex oculis hominum abs-
 traxerunt, prætore Dinocrate dicente, esse, quæ
 pertinentia ad summam belli percunctari eum ma-
 gistratus vellent. Inde abducto eo in curiam, et se-
 natu vocato, consultari cœptum.

Insubterra-
 neam cel-
 lam demit-
 titur.

L. Jam invesperascebat, et non modo cetera, sed
 ne in proximam quidem noctem ubi satis tuto cus-
 todiretur, expediebant. Obstupuerant ad magnitu-
 dinem pristinæ ejus fortunæ virtutisque : et neque
 ipsi domum recipere custodiendum audebant, nec
 cuiquam uni custodiam ejus satis credebant. Ad-
 monent deinde quidam, esse thesaurum publicum
 sub terra, saxo quadrato septum : eo vinctus de-
 mittitur, et saxum ingens, quo operitur, machina
 superinpositum est : ita loco potius, quam homini
 cuiquam, credendam custodiam rati, lucem inse-
 quentem exspectaverunt. Postero die multitudo
 quidem integra, memor pristinorum ejus in civita-
 tem meritorum, parcendum, ac per eum remedia
 quærenda esse præsentium malorum, censebant : de-
 fectionis auctores, quorum in manu respublica erat,
 in secreto consultantes, omnes ad necem ejus con-
 sentiebant : sed, utrum maturarent, an differrent,
 ambigebatur. Vicit pars avidior poenæ, missusque,

qui venenum ferret. Accepto poculo, nihil aliud locutum ferunt, quam quæsisse, *si incolumis Lycortas* (is alter imperator Achæorum erat) *equitesque evassissent?* Postquam dictum est, *incolumes esse; Bene habet*, inquit; et, poculo inpavide exhausto, haud ita multo post expiravit. Non diuturnum mortis ejus gaudium auctoribus crudelitatis fuit: victa namque Messene bello exposcentibus Achæis noxios dedit, ossaque reddita Philopœmenis sunt: et sepultus ab universo Achaico est concilio, adeo omnibus humanis congestis honoribus, ut ne divinis quidem abstineretur. Ab scriptoribus rerum Græcis Latinisque tantum huic viro tribuitur, ut a quibusdam eorum, velut ad insignem notam hujus anni, memoriæ mandatum sit, tres claros imperatores eo anno decessisse, Philopœmenem, Hannibalem, P. Scipionem: adeo in æquo eum duarum potentissimarum gentium summis imperatoribus posuerunt.

U. C. 569.

A. C. 183.

Veneno
tollitur.Tres nobi-
les impera-
tores mor-
tui.

LI. Ad Prusiam regem legatus T. Quinctius Flamininus venit, quem suspectum Romanis et receptus post fugam Antiochi Hannibal, et bellum adversus Eumenem motum faciebat: ibi, seu quia a Flaminino inter cetera objectum Prusiæ erat, hominem omnium, qui viverent, infestissimum populo Romano apud eum esse, qui patriæ suæ primum, deinde, fractis ejus opibus, Antiocho regi auctor belli adversus populum Romanum fuisset: seu quia ipse Prusias, ut gratificaretur præsentī Flaminino Romanisque, per se necandi aut tradendi ejus in potestatem consilium cepit; a primo conloquio Flaminini milites extemplo ad domum Hannibalis custodiendam missi sunt. Semper talem exitum vitæ suæ Hannibal prospexerat animo, et Romanorum inexc-

U. C. 569. piabile odium in se cernens, et fidei regum nihil sane
 A. C. 163. confisus. Prusiæ vero levitatem etiam expertus erat. Flaminini quoque adventum velut fatalem sibi horruerat. Ad omnia undique infesta, ut iter semper aliquod præparatum fugæ haberet, septem exitus e domo fecerat; et ex iis quosdam occultos, ne custodia sepirentur. Sed grave imperium regum nihil inexploratum, quod investigari volunt, efficit: totius circuitum domus ita custodiis complexi sunt, ut nemo inde elabi posset. Hannibal, postquam est nunciatum, milites regios in vestibulo esse, postico, quod devium maxime atque occultissimi exitus erat, fugere conatus, ut id quoque obcurso militum obseptum sensit, et omnia circa clausa custodiis dispositis esse, venenum (quod multo ante præparatum ad tales habebat casus) poposcit. *Liberemus, inquit, diuturna cura populum Romanum, quando mortem senis exspectare longum censent. Nec magnam, nec memorabilem ex inermi proditoque Flamininus victoriam feret: mores quidem populi Romani quantum mutaverint, vel hic dies argumento erit. Horum patres Pyrrho regi, hosti armato, exercitum in Italia habenti, ut a veneno caveret, prædixerunt: hi legatum consularem, qui auctor esset Prusiæ per scelus occidendi hospitis, miserunt.* Exsecratus deinde in caput regnumque Prusiæ, et hospitales Deos violatæ ab eo fidei testes invocans, poculum exhausit. Hic vitæ exitus fuit Hannibal.

LII. Scipionem et Polybius, et Rutilius hoc anno mortuum scribunt. Ego neque his, neque Valerio adsentior: his, quod, censoribus M. Porcio, L. Valerio, principem senatus ipsum L. Valerium censorem lectum invenio; quum superioribus tribus lus-

tris Africanus fuisset : quo vivo, nisi ut ille senatu ^{U. C. 569.}
 moveretur, quam notam nemo memoriæ prodidit, ^{A. C. 189.}
 alius princeps in locum ejus lectus non esset. An-
 tiam auctorem refellit tribunus plebis M. Nævius,
 adversus quem oratio inscripta P. Africani est. Hic
 Nævius in magistratuum libris est tribunus plebis,
 P. Claudio, L. Porcio consulibus : sed iniit tribuna-
 tum, Ap. Claudio, M. Sempronio consulibus, ante
 diem quartum Idus Decembres : inde tres menses ad
 Idus Martias sunt ; quibus P. Claudius, L. Porcius
 consulatum inierunt. Ita et vixisse in tribunatu
 Nævii videtur, diesque ei dici ab eo potuisse ; de-
 cessisse autem ante L. Valerii et M. Porcii censu-
 ram. Trium clarissimorum suæ cujusque gentis vi-
 rorum non magis tempore congruente comparabilis
 mors videtur esse, quam quod nemo eorum satis
 dignum splendore vitæ exitum habuit. Jam pri-
 mum omnes non in patrio solo mortui, nec sepulti
 sunt : veneno absumti Hannibal et Philopœmen ;
 exsul Hannibal, proditus ab hospite ; captus Philo-
 pœmen in carcere et in vinculis exspiravit. Scipio,
 etsi non exsul, neque damnatus, die tamen dicta, ad
 quam non adfuerat reus, absens citatus, voluntarium
 non sibimet ipse solum, sed etiam funeri suo, exsi-
 lium indixit.

LIII. Dum ea in Peloponneso (a quibus divertit
 oratio) geruntur, reditus in Macedoniam Demetrii
 legatorumque aliter aliorum adfecerat animos : vul-
 gus Macedonum, quos belli ab Romanis imminens
 metus terruerat, Demetrium, ut pacis auctorem,
 cum ingenti favore conspiciebant : simul et spe haud
 dubia regnum ei post mortem patris destinabant.
Nam, etsi minor ætate, quam Perseus, esset, hunc ta-

U. C. 569. *men justa matrefamilia; illum pellice ortum esse:*

A. C. 183. *illum, ut ex vulgato corpore genitum, nullam certi patris notam habere; hunc insignem Philippi similitudinem præ se ferre. Ad hoc, Romanos Demetrium in paterno solio locaturos; Persei nullam apud eos gra-*

Inter Demetrium et Persea discordia.

tiam esse. Hæc vulgo loquebantur: itaque et Persea cura angebat, ne parum pro se una ætas valeret, quum omnibus aliis rebus frater superior esset: et Philippus ipse, vix sui arbitrii fore, quem hæredem regni relinqueret, credens, sibi quoque graviorem esse, quam vellet, minorem filium censebat. Obfendebatur interdum concursu Macedonum ad eum, et alteram jam se vivo regiam esse indignabatur. Et ipse juvenis haud dubie inflatior redierat, subnissus erga se judiciis senatus, concessisque sibi, quæ patri negata essent: et omnis mentio Romanorum, quantam dignitatem ei apud ceteros Macedonas, tantam invidiam, non apud fratrem modo, sed etiam apud patrem, conciliabat: utique postquam alii legati Romani venerunt, et cogeatur decedere Thracia, præsidiaque deducere, et alia, aut ex decreto priorum legatorum, aut ex nova constitutione senatus, facere. Sed omnia mœrens quidem et gemens, (eo magis, quod filium frequentiore prope cum illis, quam secum, cernebat) obedienter tamen adversus Romanos faciebat, ne quam movendi exemplo belli causam præberet. Avertendos etiam animos a suspicione talium consiliorum ratus, mediani in Thraciam exercitum in Odrysas, et Dentheletos, et Bessos duxit. Philippopolin urbem, fuga desertam oppidanorum, qui in proxima montium juga cum familiis receperant sese, cepit: campestrisque barbaros, depopulatus agros eorum, in deditionem

accepit: relicto inde ad Philippopolin præsidio, U. C. 569
 quod haud multo post ab Odrysis expulsum est, op- A. C. 183.
 pidum in Deuriopo condere instituit. Pæoniæ ea
 regio est prope Erigonum fluvium; qui, ex Illyrico
 per Pæoniam fluens, in Axium amnem editur.
 Haud procul Stobis, vetere urbe, novam urbem Per-
 seida, ut is filio majori haberetur honos, adpellari
 jussit.

LIV. Dum hæc in Macedonia geruntur, consules
 in provincias profecti. Marcellus nuncium præ-
 misit ad L. Porcium proconsulem, ut ad novum In Venetia
 Gallorum oppidum legiones admoveret. Adve- Galli se
 nienti consuli Galli sese dediderunt: duodecim mil- dedunt
 lia armatorum erant: plerique arma ex agris rapta consuli.
 habebant. Ea ægre patientibus iis ademta, quæque
 alia aut populantes agros rapuerant, aut secum ad-
 tulerant: de his rebus qui quererentur, legatos Ro-
 mam miserunt. Introducti in senatum a C. Vale-
 rio prætore exposuerunt, se, *superante in Gallia*
multitudine, inopia coactos agri et egestate, ad quæ-
rendam sedem Alpes transgressos: quæ inculta per
solitudines viderent, ibi sine ullius injuria consedis-
se. Oppidum quoque ædificare cœpisse: quod indicium
esset, nec agro, nec urbi ulli vim adlaturos venisse.
Nuper M. Claudium ad se nuncium misisse, bellum se
cum iis, ni dederentur, gesturum. Se, certam, etsi
non speciosam, pacem, quam incerta belli, præop-
tantes, dedidisse se prius in fidem, quam in potestatem,
populi Romani. Post paucos dies, jussos et agro et
urbe decedere, sese tacitos abire, quo terrarum possent,
in animo habuisse: arma deinde sibi, et postremo om-
nia alia, quæ ferrent agerentque, ademta. Orare se
senatum populumque Romanum, ne in se innoxios de-

U. C. 569. *ditos acerbius, quam in hostes, sævirent.* Huic orationi senatus ita responderi jussit: *Neque illos recte fecisse, quum in Italiam venerint, oppidumque in alieno agro, nullius Romani magistratus, qui ei provinciae præset, permissu, ædificare conati sint: neque senatui placere, deditos spoliari. Itaque se cum iis legatos ad consulem missuros; qui, si redeant, unde venerint, omnia iis sua reddi jubeant; quique protinus eant trans Alpes, et denuncient Gallicis populis, multitudinem suam domi contineant. Alpes prope inextuperabilem finem in medio esse: non utique iis melius fore, quam qui eas primi pervias fecissent.* Legati missi L. Furius Purpureo, Q. Minucius, L. Manlius Acidinus. Galli, redditis omnibus, quæ sine cujusquam injuria habebant, Italia excesserunt.

LV. Legatis Romanis Transalpini populi benigne responderunt: seniores eorum nimiam lenitatem populi Romani castigarunt: *Quod eos homines, qui gentis injussu profecti occupare agrum imperii Romani, et in alieno solo ædificare oppidum conati sint, impunitos dimiserint. Debuisset gravem temeritatis mercedem statui: quod vero etiam sua reddiderint, vereri, ne tanta indulgentia plures ad talia audenda inpellantur.* Et exceperunt, et prosecuti cum donis legatos sunt. M. Claudius consul, Gallis ex provincia exactis, Istricum bellum moliri cœpit, literis ad senatum missis, ut sibi in Istriam traducere legiones liceret. Id senatui placuit. Illud agitabant, uti colonia Aquileia deduceretur: nec satis constabat, utrum Latinam, an civium Romanorum, deduci placeret: postremo Latinam potius coloniam deducendam Patres censuerunt. Triumviri creati sunt P. Scipio Nasica, C. Flaminius, L.

Manlius Acidinus. Eodem anno Mutina et Parma U. C. 569.
 coloniæ Romanorum civium sunt deductæ: binâ A. C. 183.
 millia hominum in agro, qui proxime Boiorum,
 ante Tuscorum fuerat, octona jugera Parmæ, quina
 Mutinæ acceperunt. Deduxerunt triumviri M. Æ-
 milius Lepidus, T. Æbutius Carus, L. Quinctius
 Crispinus. Et Saturnia colonia civium Romano-
 rum in agrum Caletranum est deducta: deduxerunt
 triumviri Q. Fabius Labeo, C. Afranius Stellio, Ti.
 Sempronius Gracchus: jugera in singulos data de-
 cem.

LVI. Eodem anno A. Terentius proconsul haud Res in His-
 procul flumine Ibero, in agro Ausetano, et prælia pania ges-
 secunda cum Celtiberis fecit, et oppida, quæ ibi tæ.
 communierant, aliquot expugnavit. Ulterior His-
 pania eo anno in pace fuit, quia et P. Sempronius
 proconsul diutino morbo est implicatus, et, nullo
 lacescente, peropportune quieverunt Lusitani. Nec
 in Liguribus memorabile quidquam a Q. Fabio con-
 sule gestum. M. Marcellus, ex Istria revocatus,
 exercitu dimisso, Romam comitiorum caussa red-
 iit. Creavit consules Cn. Bæbium Tamphilum et
 L. Æmilium Paullum: cum M. Æmilio Lepido hic
 ædilis curulis fuerat: a quo consule quintus annus
 erat, quum is ipse Lepidus post duas repulsas con-
 sul factus esset. Prætores inde facti Q. Fulvius
 Flaccus, M. Valerius Lævinus, P. Manlius iterum,
 M. Ogulnius Gallus, L. Cæcilius Denter, C. Teren-
 tius Istra. Supplicatio extremo anno fuit prodigio-
 rum caussa; quod sanguine per biduum pluisse in
 area Concordiæ satis credebant; nunciatumque erat,
 haud procul Sicilia insulam, quæ non ante fuerat,
 novam editam e mari esse. Hannibalem hoc anno

U. C. 569. Antias Valerius decessisse auctor est, legatis ad eam
A. C. 183. rem ad Prusiam missis, præter T. Quinctium Flamininum, (cujus in ea re celebre est nomen) L. Scipione Asiatico et P. Scipione Nasica.

EPITOME LIBRI XL.

QUUM Philippus liberos eorum, quos occiderat, conquiri obsides jussisset, *Theoxena*, pro liberis suis et sororis admodum pueris verita regis libidinem, prolati in medium gladiis et poculo, in quo erat venenum, suasit iis, ut imminens ludibrium morte effugerent: quod cum persuasisset, ipsa se cum viro e navi in mare præcipitavit. Certamina inter Philippi *Macedoniæ* regis liberos *Persen* et *Demetrium* referuntur: et ut fraude fratris sui *Demetrius* confictis criminibus, inter quæ accusatione parricidii et adfectati regni, primum petitus, ad ultimum, quoniam populi Romani amicus erat, veneno necatus est; regnumque *Macedoniæ* mortuo Philippo ad *Persen* devenit. Item res in *Liguriis* et in *Hispania* contra *Celtiberos* a compluribus feliciter gestas continet. Libri *Numæ Pompilii* in agro *L. Petillii* scribæ sub *Janiculo* a cultoribus agri, in arca lapidea clausi, et *Græci* et *Latini*, inventi sunt; in quibus quum plura, quæ dissolvendarum religionum, prætor, ad quem delati erant, legisset, juravit senatui, contra rempublicam esse, ut legerentur servarenturque: et ex senatusconsulto in *Comitio* exusti sunt. Colonia *Aquileia* deducta est. Philippus, ægritudine animi confectus, quod *Demetrium* filium, falsis *Persei* alterius filii delationibus impulsus, veneno sustulisset, et de pœna *Persei* cogitavit, voluitque *Antigonum* potius amicum suum successorem regni sui relinquere. Sed in hac cogitatione morte raptus est: regnum *Perseus* excepit.

T. LIVII PATAVINI

LIBER XL.

U. C. 570. **P**INCIPIO insequentis anni consules prætores-
A. C. 182. que sortiti provincias sunt: consulibus, nulla,
præter Ligures, quæ decerneretur, erat. Jurisdictio
urbana M. Ogulnio Gallo, inter peregrinos M. Vale-
rio evenit; Hispaniarum Q. Fulvio Flacco citerior,
P. Manlio ulterior, L. Cæcilio Dentri Sicilia, C. Te-
rentio Istræ Sardinia. Consules delectus habere
jussi. Q. Fabius ex Liguribus scripserat, Apuanos
ad rebellionem spectare; periculumque esse, ne in-
petum in agrum Pisanum facerent. Et ex Hispaniis,
citeriorem in armis esse, et cum Celtiberis bellari
sciebant: in ulteriore, quia diu æger prætor esset,
luxuria et otio solutam disciplinam militarem esse.
Ob ea novos exercitus conscribi placuit: quatuor
legiones in Ligures, uti singulæ quina millia et du-
cenos pedites, trecenos haberent equites: sociorum
iisdem Latini nominis quindecim millia peditum ad-
dita, et octingenti equites: hi duo consulares exer-
citus essent. Scribere præterea jussi septem millia
peditum sociorum ac Latini nominis, et quadringen-
tos equites; et mittere ad M. Marcellum in Galliam,
cui ex consulatu prorogatum imperium erat. In
Hispaniam etiam utramque quæ ducerentur, quatuor
millia peditum civium Romanorum et ducenti equi-
tes, et sociorum septem millia peditum cum trecentis

equitibus scribi jussa : et Q. Fabio Labeoni cum ex- U. C. 570.
ercitu, quem habebat in Liguribus, prorogatum in A. C. 182.
annum imperium est.

II. Ver procellosum eo anno fuit : pridie Parilia, medio ferme die, atrox cum vento tempestas coorta multis sacris profanisque locis stragem fecit : signa ænea in Capitolio dejecit ; forem ex æde Lunæ, quæ in Aventino est, raptam tulit, et in posticis partibus Cereris templi adfixit ; signa alia in circo maximo cum columnis, quibus superstabant, evertit ; fastigia aliquot templorum, a culminibus abrupta, fœde dissipavit. Itaque in prodigium versa ea tempestas, procurarique aruspices jusserunt : simul procuratum est, quod tripedem mulum Reate natum nunciatum erat, et a Formiis ædem Apollinis ac Caietæ de cœlo tactam : ob ea prodigia viginti hostiis majoribus sacrificatum est, et diem unum supplicatio fuit. Per eosdem dies ex literis A. Terentii proprætoris cognitum, P. Sempronium in ulteriore provincia, quum plus annum æger fuisset, mortuum esse : eo maturius in Hispaniam prætores jussi proficisci. Lega- Legationes
tiones transmarinæ deinde in senatum introductæ transmari-
sunt. næ.
Prima Eumenis et Pharnacis regum, et Rhodiorum querentium de Sinopensium clade. Philippi quoque legati, et Achæorum, et Lacedæmoniorum, sub idem tempus venerunt : iis, prius Marcio audito, qui ad res Græciæ Macedoniæque visendas missus erat, responsa data sunt. Asiæ regibus ac Rhodiis responsum est, legatos ad eas res visendas missurum senatum.

III. De Philippo auxerat curam Marcius : nam ita fecisse eum, quæ senatui placuissent, fatebatur, ut facile adpareret, non diutius, quam necesse esset,

U. C. 570. facturum: neque obscurum erat rebellaturum, om-
 A. C. 182. niaque, quæ tunc ageret diceretque, eo spectare.
 Jam primum omnem fere multitudinem civium ex
 maritimis civitatibus cum familiis suis in Emathiam,
 quæ nunc dicitur, quondam adpellata Pæonia est,
 traduxit: Thracibusque et aliis barbaris urbes tra-
 didit habitandas, fidiora hæc genera hominum fore
 ratus in Romano bello. Ingentem ea res fremitum
 tota Macedonia fecit; relinquentesque penates suos
 cum conjugibus ac liberis pauci tacitum dolorem
 continebant; execrationesque in agminibus profi-
 ciscentium in regem, vincente odio metum, exaudie-
 bantur. His ferox animus omnes homines, omnia
 loca temporaque suspecta habebat. Postremo ne-
 gare propalam cœpit, satis tutum sibi quidquam esse,
 nisi liberos eorum, quos interfecisset, comprehensos
 in custodia haberet, et tempore alium alio tolleret.

Theoxena
 facinus.

IV. Eam crudelitatem, fœdam per se, fœdiorem
 unius domus clades fecit. Herodicum, principem
 Thessalorum, multis ante annis occiderat; generos
 quoque ejus postea interfecit: in viduitate relictæ
 filiæ, singulos filios parvos habentes. Theoxena et
 Archo nomina mulieribus erant. Theoxena, multis
 petentibus, adspersa nuptias est. Archo Poridi
 cuidam, longe principi gentis Æneatum, nupsit; et,
 apud eum plures enisa partus, parvis admodum re-
 lictis omnibus, decessit. Theoxena, ut in suis ma-
 nibus liberi sororis educarentur, Poridi nupsit: et,
 tamquam omnes ipsa enisa foret, suum sororisque
 filios in eadem habebat cura: postquam regis edic-
 tum de comprehendendis liberis eorum, qui interfecti
 essent, accepit; ludibrio futuros, non regis modo,
 sed custodum etiam libidini, rata, ad rem atrocem

animum adjecit; ausaque est dicere, se sua manu U. C. 570.
 potius omnes interfecturam, quam in potestatem A. C. 182.
 Philippi venirent. Poris, abominatus mentionem
 tam fœdi facinoris, Athenas deportaturum eos ad
 fidos hospites dixit, comitemque ipsum fugæ futurum
 esse. Proficiscuntur ab Thessalonica Æneam ad
 statum sacrificium, quod conditori Æneæ cum mag-
 na ceremonia quotannis faciunt: ibi die per sol-
 lemnes epulas consumto, navem præparatam a Po-
 ride, sopitis omnibus, de tertia vigilia conscendunt,
 tamquam redituri in Thessalonicam: sed trajicere
 in Eubœam erat propositum. Ceterum in adversum
 ventum nequidquam eos tendentes prope terram lux
 obpressit: et regii, qui præerant custodiæ portus,
 lembum armatum ad pertrahendam eam navim mi-
 serunt, cum gravi edicto, ne reverterentur sine ea.
 Quum jam adpropinquabant, Poris quidem ad horta-
 tionem remigum nautarumque intentus erat; inter-
 dum manus ad cœlum tendens Deos, ut ferrent opem,
 orabat: ferox interim femina, ad multo ante præ-
 cogitatum revoluta facinus, venenum diluit, ferrum-
 que promit: et, posito in conspectu poculo, stric-
 tisque gladiis, *Mors, inquit, una vindicta est. Viæ*
ad mortem hæ sunt: qua quemque animus fert, effugite
superbiam regiam. Agite, juvenes mei, primum, qui
majores estis, capite ferrum; aut haurite poculum, si
segnior mors juvat. Et hostes aderant, et auctor
 mortis instabat. Alii alio leto absumpti semianimes
 e nave præcipitantur: ipsa deinde, virum comitem
 mortis complexa, in mare sese dejecit: nave vacua
 dominis regii potiti sunt.

V. Hujus atrocitas facinoris novam velut flam-
 mam regis invidiæ adjecit, ut vulgo ipsum liberos-

U. C. 570. que ejus exsecrarentur : quæ diræ brevi ab omnibus

A. C. 182. Diis exauditæ, ut sæviret ipse in suum sanguinem,

Persei in
fratrem
consilia.

effecerunt. Perseus enim, quum in dies magis cer-
neret favorem dignitatemque Demetrii fratris apud
Macedonum multitudinem crescere, et gratiam apud
Romanos, sibi spem nullam regni superesse, nisi in
scelere, ratus, ad id unum omnes cogitationes inten-
dit. Ceterum quum se ne ad id quidem, quod mulie-
bri cogitabat animo, satis per se validum crederet,
singulos amicorum patris tentare sermonibus per-
plexis institit. Et primo quidam ex his adspernan-
tium tale quidquam speciem præbuerunt, quia plus
in Demetrio spei ponebant : deinde, crescente in
dies Philippi odio in Romanos, cui Perseus indulge-
ret, Demetrius summa ope adversaretur, prospicien-
tes animo exitum incauti a fraude fraterna juvenis,
adjuvandum, quod futurum erat, rati, fovendamque
spem potentioris, Perseo se adjungunt : cetera in
suum quæque tempus agenda differunt : in præsentia
placet, omni ope in Romanos accendi regem, inpel-
lique ad consilia belli, ad quæ jam sua sponte ani-
mum inclinasset. Simul, ut Demetrius in dies sus-
pectior esset, ex composito sermones ad spretionem
Romanorum trahebant : ibi quum alii mores et in-
stituta eorum, alii res gestas, alii speciem ipsius ur-
bis, nondum exornatæ neque publicis neque privatis
locis, alii singulos principum eluderent ; juvenis in-
cautus, et amore nominis Romani, et certamine ad-
versus fratrem, omnia tuendo suspectum se patri et
opportunum criminibus faciebat. Itaque expertem
eum pater omnium de rebus Romanis consiliorum
habebat : totus in Persea versus, cum eo cogitatio-
nes ejus rei dies ac noctes agitabat. Redierant,

Deme-
trius fit
suspec-
tus.

quos forte miserat in Bastarnas ad arcessenda auxilia, U. C. 570.
adduxerantque inde nobiles juvenes, et regii quosdam A. C. 182.

generis: quorum unus sororem suam in matrimonium Philippi filio pollicebatur: erexeratque consociatio gentis ejus animum regis. Tum Perseus, *Quid ista prosunt?* inquit: *nequaquam tantum in externis auxiliis est præsidiū, quantum periculi fraude domestica. Proditorem nolo dicere, certe speculatorem habemus in sinu: cujus, ex quo obses Romæ fuit, corpus nobis reddiderunt Romani, animum ipsi habent. Omnium pene Macedonum in eum ora conversa sunt: nec regem se alium rentur habituros esse, quam quem Romani dedissent.* His per se ægra mens senis stimulabatur: et animo magis, quam vultu, ea crimina accipiebat.

VI. Forte lustrandi exercitus venit tempus, cujus^{Lustratio} sollemne est tale. Caput mediæ canis præcisæ et^{exercitus} prior pars ad dexteram, cum extis posterior ad læcedonas,^{apud Ma-} vam viæ ponitur: inter hanc divisam hostiam copię armatæ traducuntur: præferuntur primo agmini arma insignia omnium ab ultima origine Macedoniæ regum: deinde rex ipse cum liberis sequitur: proxima est regia cohors custodesque corporis; postremum agmen Macedonum cetera multitudo claudit. Latera regis duo filii juvenes cingebant, Perseus jam tricesimum annum agens, Demetrius quinquennio minor; medio juventæ robore ille, hic flore; fortunati patris matura soboles, si meus sana fuisset. Mos erat, lustrationis sacro peracto, exercitum decurrere, et divisas bifariam duas acies concurrere ad simulacrum pugnæ. Regii juvenes duces ei ludicro certamini dati: ceterum non imago fuit pugnæ, sed;

U. C. 570. tamquam de regno dimicaretur, ita concurrerunt,
 A. C. 182. multaue vulneca sudibus facta; nec præter ferrum
 quidquam defuit ad justam belli speciem. Pars ea,
 quæ sub Demetrio erat, longe superior fuit: id ægre
 patiente Perseo, lætari prudentes amici ejus, eam-
 que rem ipsam dicere præbituram causam criminan-
 di juvenis.

VII. Convivium eo die sodalium, qui simul decur-
 rerant, uterque habuit, quum vocatus ad cœnam ab
 Demetrio Perseus negasset. Festo die invitatio be-
 nigna et hilaritas juvenalis utrosque in vinum traxit.
 Commemoratio ibi certaminis ludicri et jocosa dicta
 in adversarios, ita ut ne ipsis quidem ducibus absti-
 neretur, jactabantur. Ad has excipiendas voces spe-
 culator ex convivis Persei missus, quum incautior
 obversaretur, exceptus a juvenibus forte triclinio
 egressis, male mulcatur. Hujus rei ignarus Deme-
 trius, *quin commissatum*, inquit, *ad fratrem imus? et*
iram ejus, si qua ex certamine residet, simplicitate et
hilaritate nostra lenimus? Omnes se ire conclamarunt,
 præter eos, qui speculatoris ab se pulsati præsentem
 ultionem metuebant: quum eos quoque Demetrius
 traheret, ferrum veste abdiderunt, quo se tutari, si
 qua vis fieret, possent. Nihil occulti esse in intes-
 tina discordia potest: utraque domus speculatorum
 et proditorum plena erat. Præcucurrit index ad
 Persea, ferro subcinctos nuncians cum Demetrio
 quatuor adolescentes venire: etsi causa adparebat,
 (nam ab iis pulsatum convivam suum audierat) ta-
 men, infamandæ rei causa, januam obserari jubet:
 et ex parte superiore ædium, versisque in viam fe-
 nestris, commissatores, tamquam ad cædem suam

venientes, aditu januæ arcet. Demetrius, per vinum, U. C. 570.
 quod excluderetur, paullisper vociferatus, in convi- A. C. 182.
 vium redit, totius rei ignarus.

VIII. Postero die Perseus, quam primum conve- Demetrium
 niendi potestas patris fuit, regiam ingressus, pertur- accusat
 bato vultu in conspectu patris tacitus procul consti- Perseus
 tit: cui, cum pater, *Satin' salvæ? et, quænam ea* apud pa-
mæstitia esset? interrogaret eum, *De lucro tibi, in-* trem.
quit, vivere me scito: jam non occultis a fratre petimur
insidiis. Nocte cum armatis domum ad interficiendum
me venit: clausisque foribus, parietum præsidio me a
furore ejus sum tutatus. Quum pavorem mixtum
admiratione patri injecisset, Atqui, si aures præbere
potes, inquit, manifestam rem teneas, faciam. Enim-
vero se, Philippus dicere, auditurum, vocarique ex-
templo Demetrium jussit: et seniores duos amicos,
expertes inter fratres certaminum, infrequentes jam
in regia, Lysimachum et Onomastum arcessit, quos
in consilio haberet. Dum veniunt amici, solus, filio
procul stante, multa secum animo volutans, inambu-
lavit: postquam venisse eos nunciatum est, secessit
in partem interiorem cum duobus amicis, totidem
custodibus corporis: filiis, ut ternos inermes secum
introducerent, permisit. Ibi quum consedisset: Se-
deo, inquit, miserrimus pater, judex inter duos filios, Philippi
accusatorem parricidii, et reum; aut conficti, aut ad- oratio.
missi criminis labem apud meos inventurus. Jam pridem
quidem hanc procellam imminentem timebam, quum
vultus inter vos minime fraternos cernerem, quum voces
quasdam exaudirem: sed interdum spes animum subi-
bat, deflagrare iras vestras, purgari suspensiones posse:
etiam hostes, armis positos, fædus icisse, et privatas
multorum simultates finitas: subituram vobis aliquando

U. C. 570. *germanitatis memoriam, puerilis quondam simplicitatis*

A. C. 182. *consuetudinisque inter vos, meorum denique præceptorum; quæ, vereor, ne vana surdis auribus cecinerim. Quoties ego, audientibus vobis, detestatus exempla discordiarum fraternarum, horrendos eventus eorum retuli, quibus se stirpemque suam, domos, regna, funditus evertissent? Meliora quoque exempla parte altera posui; sociabilem consortionem inter binos Lacedæmoniorum reges, salutarem per multa secula ipsis patriæque. Eandem civitatem, postquam mos sibi cuique rapiendi tyrannidem exortus sit, eversam. Jam hos Eumenem Attalumque fratres, a quam exiguis rebus, prope ut puderet regii nominis, mihi, Antiocho, et cuilibet regum hujus ætatis, nulla re magis, quam fraterna unanimitate, regnum æquasse. Ne Romanis quidem exemplis abstinui, quæ aut visa, aut audita habeam: T. et L. Quinctiorum, qui bellum mecum gesserunt; P. et L. Scipionum, qui Antiochum devicerunt; patris patruique eorum, quorum perpetuam vitæ concordiam mors quoque miscuit. Neque vos illorum scelus, similisque sceleris eventus, detertere a recordi discordia potuit: neque horum bona mens, bona fortuna, ad sanitatem flectere. Vivo et spirante me, hæreditatem meam ambo et spe et cupiditate improba crevistis. Eo usque me vivere vultis, donec, alterius vestrum superstes, haud ambiguum regem alterum mea morte faciam. Nec fratrem, nec patrem potestis pati: nihil cari. nihil sancti est: in omnium vicem regni unius insatiabilis amor successit. Agite, conscelerate aures paternas: decernite criminibus, mox ferro decreturi: dicite palam, quidquid aut veri potestis, aut comminisci libet. Reserate aures sunt, quæ posthac secretis alterius ab altero criminibus claudentur. Hæc, furens ira, quum dixisset, lacrimæ*

omnibus obortæ, et diu mœstum silentium tenuit. U.C. 570.
A. C. 182.

IX. Tum Perseus: *Aperienda nimirum nocte janua fuit, et armati commissatores accipiendi, præbendumque ferro jugulum, quando non creditur, nisi perpetratum, facinus; et eadem petitus insidiis audio, quæ latro atque insidiator. Non nequidquam isti unum Demetrium filium te habere, me subditum et pellice genitum adpellant: nam, si gradum, si caritatem filii apud te haberem, non in me, quarentem deprehensas insidias, sed in eum, qui fecisset, sævires: nec adeo tibi vilis vita esset nostra, ut nec præterito periculo meo movereris, neque futuro, si insidiantibus sit inpune. Itaque, si mori tacitum oportet, taceamus, precati tantum Deos, ut a me captum scelus in me finem habeat, nec per meum latus tu petaris. Sin autem (quod circumventis in solitudine natura ipsa subjicit, ut hominum, quos numquam viderint, fidem tamen implorent) mihi quoque, ferrum in me strictum cernenti, vocem mittere liceat; per te, patriumque nomen, quod utri nostrarum sanctius sit, jam pridem sentis, ita me audias, precor, tamquam si, voce et comploratione nocturna excitus, mihi quiritanti intervenisses, Demetrium cum armatis nocte intempesta in vestibulo meo deprehendisses: quod tum vociferarer in re præsentis pavidus, hoc nunc postero die queror. Frater, non commissantium in vicem jam diu vivimus inter nos: regnare utique vis: huic spei tuæ obstat ætas mea, obstat gentium jus, obstat vetustus Macedoniae mos, obstat vero etiam patris judicium. Hæc transcendere, nisi per meum sanguinem, non potes: omnia moliris et tentas: adhuc seu cura mea, seu fortuna, restitit parricidio tuo. Hesternæ die in lustratione, et decursu, et simulacro ludicro pugnae, funestum prope præ-*

U. C. 570. *lium fecisti: nec me aliud a morte vindicavit, quam*
 A. C. 182. *quod me ac meos vinci passus sum. Ab hostili prælio, tamquam fraterno lusu, pertrahere me ad cœnum voluisti. Credis, me, pater, inter inermes convivas cœnaturum fuisse, ad quem armati comissatum venerunt? credis nihil a gladiis nocte periculum fuisse, quem sudibus, te inspectante, prope occiderunt? Quid hoc noctis, quid inimicus ad iratum, quid cum ferro subcinctis juvenibus venis? Convivam me tibi committere ausus non sum; comissatorem te cum armatis venientem recipiam? Si aperta janua fuisset, funus meum parares hoc tempore, pater, quo querentem audis. Nihil ego, tamquam accusator, criminose nec dubia argumentis conligendo ago. Quid enim? negat se cum multitudine venisse ad januam meam? an ferro subcinctos secum fuisse? Quos nominavero, arcesse: possunt quidem omnia audere, qui hoc ausi sunt; non tamen audebunt negare. Si deprehensos intra limen meum cum ferro ad te deducere, pro manifesto haberes; fatentes pro deprehensis habe.*

X. *Exsecrare nunc cupiditatem regni, et furias fraternas concita: sed, ne sint cæcæ, pater, execrationes tuæ, discerne et dispice insidiatorem et petitem insidiis: noxium huic esse caput. Qui occisurus fratrem fuit, habeat etiam iratos paternos Deos: qui periturus fraterno scelere fuit, perfugium in patris misericordia et justitia habeat. Quo enim alio confugiam, cui non sollemne lustrale exercitus tui, non decursus militum, non domus, non epulæ, non nox, ad quietem data naturæ beneficio mortalibus, tuta est? Si iero ad fratrem invitatus, moriendum est: si recepero intra januam comissatum fratrem, moriendum est: nec eundo, nec manendo insidias evito: quo me conferam? Nihil præter*

Deos, pater, et te colui: non Romanos habeo, ad quos U. C. 570.
confugiam: perisse expetunt, quia tuis injuriis doleo, A. C. 182.
quia ademptas tot urbes, tot gentes, modo Thraciæ mari-
timam oram, indignor: nec me, nec te incolumi, Ma-
cedoniam suam futuram sperant. Si me scelus fratris,
te senectus, absumserit, aut ne ea quidem exspectata
 fuerit, regem regnumque Macedoniæ sua futura sciunt.
Si quid extra Macedoniam tibi Romani reliquissent,
mihi quoque id relictum crederem receptaculum. At in
Macedonibus satis præsidii est. Vidisti hesterno die
inpetum in me militum. Quid illis defuit, nisi ferrum?
Quod illis defuit interdiu, convivæ fratris noctu sum-
serunt. Quid de magna parte principum loquar, qui
in Romanis spem omnem dignitatis et fortunæ posue-
runt, et in eo, qui omnia apud Romanos potest? ne-
que, Hercule, istum mihi tantum fratri majori, sed
prope est, ut tibi quoque ipsi, regi et patri, præferant.
Iste enim est, cujus beneficio pænam tibi senatus remi-
sit, qui nunc te ab armis Romanis protegit, qui tuam
senectutem obligatam et obnoxiam adolescentiæ suæ esse
æquum censet. Pro isto Romani stant, pro isto omnes
urbes tuo imperio liberatæ, pro isto Macedones, qui
pace Romana gaudent: mihi præter te, pater, quid
usquam aut spei, aut præsidii est?

XI. Quo spectare illas literas ad te nunc missas T. Quinctii credis, quibus, et bene te consuluisse rebus tuis, ait, quod Demetrium Romam miseris, et hortatur, ut iterum, et cum pluribus legatis et primoribus Macedonum, remittas eum? T. Quinctius nunc est auctor omnium rerum isti et magister. Eum sibi, te abdicato patre, in locum tuum substituit: illic ante omnia clandestina concocta sunt consilia. Queruntur adjutores consiliis, quum te plures, et principes Macedonum, cum

U. C. 570. isto mittere jubet. Qui hinc integri et sinceri Romam
 A. C. 182. eunt, Philippum regem se habere credentes, inbuti illinc
 et infecti Pomani delinquentis redeunt. Demetrius
 iis unus omnia est: eum jam regem, vivo patre, adpel-
 lant. Hæc si indignor, audiendum est statim, non ab
 aliis solum, sed etiam a te, pater, cupiditatis regni cri-
 men. Ego vero, si in medio ponitur, non agnosco:
 quem enim suo loco moveo, ut ipse in ejus locum succe-
 dam? Unus ante me pater est: et, ut diu sit, Deos
 rogo. Superstes (et ita sim, si merebor, ut ipse me
 esse velit) hæreditatem regni, si pater tradet, accipiam.
 Cupit regnum, et quidem scelerate cupit, qui transcen-
 dere festinat ordinem ætatis, naturæ, moris Macedo-
 num, juris gentium. Obstat frater major, ad quem
 jure, voluntate etiam patris, regnum pertinet. Tolla-
 tur: non primus regnum fraterna cade petiero. Pater
 senex, et filio solus orbatus, de se magis timebit, quam
 ut filii necem ulciscatur. Romani latibuntur, proba-
 bunt, defendent factum. Hæ spes incertæ, pater, sed
 non inanes sunt: ita enim se res habet: periculum vitæ
 propellere a me potes, puniendo eos, qui ad me interfici-
 endum ferrum sumserunt: si facinori eorum successe-
 rit, mortem meam idem tu persequi non poteris.

XII. Postquam dicendi finem Perseus fecit, con-
 jecti eorum, qui aderant, oculi in Demetrium sunt,
 velut confestim responsurus esset: deinde diu fuit
 silentium, quum perfusum fletu adpareret omnibus
 loqui non posse. Tandem vicit dolorem ipsa neces-
 sitas, quum dicere juberent, atque ita orsus est: Om-
 nia, quæ reorum antea fuerant auxilia, pater, præoc-
 cupavit accusator. Simulatis lacrimis in alterius per-
 niciem veras meas lacrimas suspectas tibi fecit: quum
 ipse, ex quo ab Roma redi, per occultu cum suis con-

Defensio
 Demetrii.

loquia dies noctesque insidietur ; ultro mihi non insidia- U. C. 570.
 toris modo, sed latronis manifesti et percussoris, speciem A. C. 182.
 induit. Periculo suo te exterret, ut innoxio fratri per
 eundem te maturet perniciem : perfugium sibi nusquam
 gentium esse ait, ut ego ne apud te quidem quidquam
 spei reliquæ habeam. Circumrentum, solum, inopem,
 invidia gratiæ externæ, quæ obest potius, quam prodest,
 onerat. Jam illud quæm accusatorie, quod noctis hu-
 jus crimen miscuit cum cetera insectatione vitæ meæ ?
 ut et hoc, quod jam, quale sit, scies, suspectum alio
 vitæ nostræ tenore faceret : et illam vanam criminatio-
 nem spei, voluntatis, consiliorum meorum nocturno hoc
 ficto et composito argumento fulciret. Simul et illud
 quæsivit, ut repentina et minime præparata accusatio
 videretur, quippe ex noctis hujus metu et tumultu re-
 pentino exorta. Oportuit autem, Perseu, si proditor
 ego patris regni que eram, si cum Romanis, si cum aliis
 inimicis patris inieram consilia, non expectatam fabu-
 lam noctis hujus esse, sed proditiōis meæ ante me ac-
 cusatum : si illa separata ab hac vana accusatio erat,
 invidiamque tuam adversus me magis, quam crimen
 meum indicatura, hodie quoque eam aut prætermitti,
 aut in aliud tempus differri : ut perspiceretur, utrum
 ego tibi, an tu mihi, novo quidem et singulari genere
 odii, insidias fecisses. Ego tamen, quantum in hac
 subita perturbatione potero, separabo ea, quæ tu confu-
 disti : et noctis hujus insidias, aut tuas, aut meas, de-
 tegam. Occidendi sui consilium me inisse, videri vult :
 ut scilicet, majore fratre sublato, cujus jure gentium,
 more Macedonum, tuo etiam, ut ait, judicio regnum
 est futurum, ego minor in ejus, quem occidissem, succe-
 derem locum. Quid ergo illa sibi vult pars altera ora-
 tionis, qua Romanos a me cultos ait, atque eorum

U. C. 570. fiducia in spem regni me venisse? nam si et in Roma-
 A. C. 182. nis tantum momenti esse credebam, ut, quem vellent,
 inponerent Macedoniae regem, et meae tantum apud eos
 gratiae confidebam, quid opus parricidio fuit? An, ut
 cruentum fraterna caede diadema gererem? ut illis ip-
 sis, apud quos aut vera, aut certe simulata, probitate
 partam gratiam habeo, si quam forte habeo, execra-
 bilis et invisus essem? nisi T. Quinctium credis, cujus
 virtute et consiliis me nunc arguis regi, quum et ipse
 tali pietate vivat cum fratre, mihi fraternae caedis
 fuisse auctorem. Idem non Romanorum solum gra-
 tiam, sed Macedonum judicia, ac pene omnium Deo-
 rum hominumque consensum conlegit, per quae omnia
 se mihi parem in certamine non futurum crediderit:
 idem, tamquam in aliis omnibus rebus inferior essem,
 ad sceleris spem ultimam confugisse me insimulat.
 Vis hanc formulam cognitionis esse, ut, uter timuerit,
 ne alter dignior videretur regno, is consilium obpri-
 mendi fratris cepisse judicetur?

XIII. Exsequamur tamen quocumque modo conficti
 ordinem criminis. Pluribus modis se petatum crimi-
 natus est, et omnes insidiarum vias in unum diem con-
 tulit. Volui interdum eum post lustrationem, quum
 concurrimus, et quidem, si Diis placet, lustrationum
 die occidere: volui, quum ad cenam invitavi, veneno
 scilicet tollere: volui, quum comissatum gladiis ad-
 cincti me secuti sunt, ferro interficere. Tempora qui-
 dem qualia sint ad parricidium electa, vides: lusus,
 convivii, comissionis. Quid? dies qualis? quo lus-
 tratus exercitus, quo inter divisam victimam, praetatis
 omnium, qui umquam fuere, Macedoniae regum armis
 regiis, duo soli tua tegentes latera, pater, praeverecti su-
 mus, et secutum est Macedonum agmen. Hoc ego,

etiam si quid ante admissem piaculo dignum, lustratus et expiatus sacro, tum cum maxime in hostiam itineri nostro circumdatam intuens, parricidium, venena, gladios, in commissationem pręparatos, volutabam in animo: ut quibus aliis deinde sacris contaminatam omni scelere mentem expiarem? Sed cæcus criminandi cupiditate animus, dum omnia suspecta efficere vult, aliud alio confundit: nam, si veneno te inter cœnam tollere volui, quid minus aptum fuit, quam pertinaci certamine et concursu iratum te efficere, ut merito, sicut fecisti, invitatus ad cœnam abnueres? Quum autem iratus negasses, utrum, ut placarem te, danda opera fuit, ut aliam quærerem occasionem, quoniam semel venenum paraveram? an ab illo consilio velut transiliendum ad aliud fuit, ut ferro te, et quidem eo die, per speciem commissationis, occiderem? Quo deinde modo, si te metu mortis credebam cœnam evitasse meam, non ab eodem metu commissationem quoque evitaturum existimabam?

XIV. *Non est res, qua erubescam, pater, si die festo inter æquales largiore vino sum usus: tu quoque, velim, inquiras, qua lætitia, quo lusu apud me celebratum hesternum convivium sit, illo etiam (pravo forsitan) gaudio provehente, quod in juvenali armorum certamine pars nostra non inferior fuerat. Miseria hæc et metus crapulam facile excusserunt; quæ si non intervenissent, insidiatores nos sopiti jaceremus. Si domum tuam expugnaturus, capta domo, dominum interfectorus eram, non temperassem vino in unum diem? non milites abstinuissem meos? Et, ne ego me solus nimia simplicitate tuear, ipse quoque minime malus ac suspicax frater, Nihil aliud scio, inquit, nihil arguo, nisi quod cum ferro commissatum venerunt. Si quæ-*

U. C. 570.

A. C. 182.

U. C. 570. *ram, unde id ipsum scieris? necesse erit te fateri, aut*
 A. C. 182. *speculatorum tuorum plenam domum fuisse meam, aut illos ita aperte sumsisse ferrum, ut omnes viderent: et, ne quid ipse aut prius inquisisse, aut nunc criminoſe argumentari videretur, te quærere ex iis, quos nominasset, jubebat, an ferrum habuissent? ut, tamquam in re dubia, quum id quasisses, quod ipsi fatentur, pro convictis haberentur. Quin tu illud quæri jubes, num tui occidendi caussa ferrum sumserint? num me auctore et sciente? Hoc enim videri vis, non illud, quod fatentur, et palam est, et sui se tuendi caussa sumsisse dicunt. Recte, an perperam fecerint, ipsi sui facti rationem reddent. Meam caussam, quæ nihil eo facto contingitur, ne miscueris: aut explica, utrum aperte, an clam te adgressuri fuerimus. Si aperte, cur non omnes ferrum habuimus? cur nemo præter eos, qui tuum speculatorem pulsarunt? si clam, quis ordo consilii fuit? Convivio soluto, quum commissator ego discessissem, quatuor substitissent, ut sopitum te adgrederentur? quomodo fefellissent, et alieni, et mei, et maxime suspecti, quia paullo ante in rira fuerant? quomodo autem, trucidato te, ipsi evasuri fuerint? quatuor gladiis domus tua capi et expugnari potuit?*

XV. *Quin tu, omiſſa iſta nocturna fabula, ad id, quod doles, quod invidiam urit, reverteris? Cur usquam regni tui mentio fit, Demetri? cur dignior patris fortunæ successor quibusdam videris, quam ego? cur spem meam, quæ, si tu non esses, certa erat, dubiam et sollicitam facis? Hæc sentit Perſeus, etſi non dicit: hæc iſtum inimicum, hæc accusatorem faciunt: hæc domum, hæc regnum tuum criminibus et suspicionibus replent. Ego autem, pater, quemadmodum nec nunc sperare regnum, nec ambigere umquam de eo for-*

sitan debeam, quia minor sum, quia tu me majori ce-
dere vis; sic illud nec debui facere, nec debeo, ut in-
dignus te patre, indignus omnibus videar: id enim vi-
tiis meis, non cedendo, cui jus fasque est, non modestia,
consequar. Romanos objicis mihi, et ea, quæ gloriæ
esse debent, in crimen vertis. Ego, nec obses Romanis
ut traderer, nec ut legatus mitterer Romam, petii: a
te missus ire non recusavi: utroque tempore ita me
gessi, ne tibi pudori, ne regno tuo, ne genti Macedo-
num essem. Itaque mihi cum Romanis amicitia causa
tu fuisti, pater. Quoad tecum illis pax manebit, me-
cum quoque gratia erit: si bellum esse cœperit, qui ob-
ses, qui legatus pro patre non inutilis fui, idem hostis
illis acerrimus ero. Nec hodie, ut prosit mihi gratia
Romanorum, postulo; ne obsit, tantum deprecor: nec
in bello cœpit, nec ad bellum reservatur. Pacis pignus
fui, ad pacem retinendam legatus missus sum: neutra
res mihi nec gloriæ, nec crimini sit. Ego, si quid in-
pie in te, pater, si quid scelerate in fratrem admisi,
nullam deprecor pœnam: si innocens sum, ne invidia
conflagrem, quum crimine non possim, deprecor. Non
hodie me primum frater accusat: sed hodie primum
aperte, nullo meo in se merito. Si mihi pater succen-
seret, te majorem fratrem pro minore deprecari oportebat,
te adolescentiæ, te errori veniam inpetrare: in eo,
ubi præsidium esse oportebat, ibi exitium est. E con-
vivio et comissionibus prope semisomnus raptus sum
ad causam parricidii dicendam: sine advocatis, sine
patronis, ipse pro me dicere cogor. Si pro alio dicen-
dum esset, tempus ad meditandum et componendam
orationem sumsissem, quum quid aliud, quam ingenii
fama, periclitarer? Ignarus, quid arcessitus essem, te
iratum et jubentem dicere causam, fratrem accusan-

U. C. 570.

A. C. 192.

U. C. 570. *tem audiui. Ille diu ante præparata, meditata in me*
 A. C. 182. *oratione est usus : ego id tantum temporis, quo accusatus sum, ad cognoscendum, quid ageretur, habui. Utrum momento illo horæ accusatorem audirem? an defensionem meditarer? Adtonitus repentino atque inopinato malo, vix, quid objiceretur, intelligere potui: nescim satis sciam, quo modo me tuear. Quid mihi spei esset, nisi patrem judicem haberem? apud quem etiamsi caritate a fratre majore vincor, misericordia certe reus vinci non debeo. Ego enim, ut me mihi tibi-que serves, precor: ille, ut me in securitatem suam occidas, postulat. Quid eum, quum regnum ei tradideris, facturum credis in me esse, qui jam nunc sanguine meo sibi indulgeri æquum censet?*

XVI. Dicenti hæc lacrimæ simul spiritum et vocem intercluserunt. Philippus, submotis iis, paulisper conlocutus cum amicis, pronunciavit: *Non verbis se, nec unius horæ disceptatione, causam eorum dijudicaturum, sed inquirendo in utriusque vitam, mores; et dicta factaque in magnis parvisque rebus observando: ut omnibus adpareret, noctis proximæ crimen facile revictum; suspectam nimiam cum Romanis Demetrii gratiam esse. Hæc, vivo Philippo, velut semina jacta sunt Macedonici belli, quod maxime cum Perseo gerendum erat. Consules ambo in Ligures, quæ tum una consularis provincia erat, proficiscuntur: et, quia prospere ibi res gesserunt, supplicatio in unum diem decreta est. Ligurum duo millia fere ad extremum finem provinciæ Galliæ, ubi castra Marcellus habebat, venerunt, uti reciperentur, orantes. Marcellus obperiri eodem loco Liguribus jussis, senatum per literas consuluit. Senatus rescribere M. Ogulnium prætorem Marcello*

Res in Li-
guria ges-
tæ.

jussit: *Verius fuisse, consules, quorum provincia esset, U. C. 570.*
quam se, quid e republica esset, decernere; tum quo- A.C. 182.
que non placere, si per deditionem Ligures recipiet, re-
ceptis arma adimi: atque, eos ad consulem mitti, se-
natum æquum censere. Prætores eodem tempore, P. In Hispania.
 Manlius in ulteriorem Hispaniam, quam et priore
 prætura provinciam obtinuerat; Q. Fulvius Flaccus
 in citeriorem pervenit, exercitumque a Terentio ac-
 cepit: nam ulterior morte P. Sempronii proconsulis
 sine imperio fuerat. Fulvium Flaccum oppidum
 Hispanum, Urbicuam nomine, obpugnantem Celti-
 beri adorti sunt. Dura ibi prælia aliquot facta:
 multi Romani milites et vulnerati, et interfecti
 sunt: victi perseverantia Fulvii, quod nulla vi abs-
 trahi ab obsidione potuit, Celtiberi, fessi præliis
 variis abscesserunt: urbs, amoto auxilio eorum, in-
 tra paucos dies capta et direpta est: prædam militi-
 bus prætor concessit. Fulvius, hoc oppido capto,
 P. Manlius, exercitu tantum in unum coacto, qui
 dissipatus fuerat, nulla alia memorabili gesta re, ex-
 ercitus in hiberna deduxerunt. Hæc ea æstate in
 Hispania gesta. Terentius, qui ex ea provincia de-
 cesserat, ovans urbem iniit: translatum, argenti pon-
 do novem millia trecenta viginti: auri octoginta pon-
 do, et duæ coronæ aureæ pondo sexaginta septem.

XVII. Eodem anno inter populum Karthaginien- Contentio
 sem et regem Masinissam in re præsentis disceptato- Karthagi-
 res Romani de agro fuerunt. Ceperat eum ab Kar- niensium
 thaginiensibus, pater Masinissæ, Gala: Galam Sy- cum Masi-
 phax inde expulerat: postea, in gratiam soceri Has- nissa.
 drubalis, Karthaginensibus dono dederat. Kartha-
 ginienses eo anno Masinissa expulerat. Haud mi-
 nore certamine animorum, quam quum ferro et

U. C. 570. acie dimicarunt, res acta apud Romanos. Karthaginienses, quod primo majorum suorum fuisset, deinde ab Syphace ad se pervenisset, repetebant. Masinissa, paterni regni agrum se et recepisse, et habere jure gentium, aiebat, et caussa, et possessione superiorem esse: nihil aliud se in ea disceptatione metuere, quam ne pudor Romanorum, dum vereantur, ne quid socio atque amico regi adversus communes suos atque illius hostes indulsisse videantur, damno sit. Legati possessionis jus non mutarunt: caussam integram Romam ad senatum rejecerunt. In Liguribus nihil postea gestum: recesserant primum in devios saltus: deinde, dimisso exercitu, passim in vicos castellaque sua dilapsi sunt. Consules quoque dimittere exercitum voluerunt, ac de ea re Patres consuluerunt. Alterum ex his, dimisso exercitu, ad magistratus in annum creandos venire Romam jusserunt: alterum cum legionibus suis Pisis hiemare. Fama erat, Gallos Transalpinos juventutem armare: nec, in quam regionem Italiae effusura se multitudo esset, sciebatur: ita inter se consules compararunt, ut Cn. Bæbius ad comitia iret, quia M. Bæbius frater ejus consulatum petebat.

U. C. 571. XVIII. Comitia consulibus rogandis fuere: creati

A. C. 181. P. Cornelius Cethegus, M. Bæbius Tamphilus. Prætores inde facti, duo Q. Fabii, Maximus et Buteo, Ti. Claudius Nero, Q. Petillius Spurius, M. Pinarius Posca, L. Duronius. His, inito magistratu, provinciæ ita sorte evenerunt. Ligures consulibus; prætoribus, Q. Petillio urbana, Q. Fabio Maximo peregrina, Q. Fabio Buteoni Gallia, Ti. Claudio Neroni Sicilia, M. Pinario Sardinia, L. Duronio Apulia; et Istri adjecti, quod Tarentini Brundisinique nun-

ciabant, maritimos agros infestos transmarinarum U. C. 571.
 navium latrociniis esse : eadem Massilienses de Li- A. C. 181.
 gurum navibus querebantur. Exercitus inde decreti :
 quatuor legiones consulibus, (quina millia ducenos
 Romanos pedites, trecenos haberent equites) et quin-
 decim millia sociûm ac Latini nominis, octingenti
 equites. In Hispaniis prorogatum veteribus præto-
 ribus imperium est cum exercitibus, quos haberent :
 et in supplementum decreta tria millia civium Roma-
 norum, ducenti equites : et sociûm Latini nominis
 sex millia peditum, trecenti equites. Nec rei nava-
 lis cura omissa : duumviros in eam rem consules
 creare jussi, per quos naves viginti deductæ navali-
 bus sociis civibus Romanis, qui servitutem servissent,
 complerentur ; ingenui tantum ut iis præessent. In-
 ter duumviros ita divisa tuenda denis navibus mari-
 tima ora, ut promontorium iis Minervæ, velut cardo,
 in medio esset : alter in dextram partem usque ad
 Massiliam, lævam alter usque ad Barium tueretur.

XIX. Prodigia multa fœda et Romæ eo anno
 visa, et nunciata peregre. In area Vulcani et Con-
 cordiæ sanguinem pluit ; et pontifices hastas motas
 nunciavere, et Lanuvii simulacrum Junonis Sospitæ
 lacrimasse : et pestilentia in agris, forisque, et con-
 ciliabulis, et in urbe tanta erat, ut Libitina tunc vix
 subficeret. His prodigiis cladibusque anxii Patres
 decreverunt, ut et consules, quibus Diis videretur,
 hostiis majoribus sacrificarent, et decemviri libros
 adirent. Eorum decreto supplicatio circa omnia
 pulvinaria Romæ in diem unum indicta est : iisdem
 auctoribus et senatus censuit, et consules edixerunt,
 ut per totam Italiam triduum supplicatio et feriæ
 essent. Pestilentia tanta vis erat, ut, quum propter

U. C. 571. defectionem Corsorum, bellumque ab Iliensibus con-
 A. C. 181. citatum in Sardinia, octo millia peditum ex sociis
 Latini nominis scribi placuisset, et trecentos equites,
 quos M. Pinarius prætor secum in Sardiniam trajice-
 ret, tantum hominum demortuum esse, tantum ubi-
 que ægrorum consules renunciaverint, ut is numerus
 effici militum non potuerit: quod deerat militum,
 sumere a Cn. Bæbio proconsule, qui Pisis hiberna-
 bat, jussus prætor, atque inde in Sardiniam trajicere.
 L. Duronio prætori, cui provincia Apulia evenerat,
 adjecta de Bacchanalibus quæstio est: cujus residua
 quædam velut semina ex prioribus malis jam priore
 anno adparuerant: sed magis inchoatæ apud L.
 Pupium prætorem quæstiones erant, quam ad exitum
 uilum perductæ: id persecare novum prætorem, ne
 serperet iterum latius, Patres jusserunt. Et leges
 de ambitu consules ex auctoritate senatus ad popu-
 lum tulerunt.

Legationes
 variæ.

XX. Legationes deinde in senatum introdux-
 erunt. Regum primas, Eumenis, et Ariarathis Cap-
 padocis, et Pharnacis Pontici: nec ultra quidquam
 eis responsum est, quam missuros, qui de controver-
 siis eorum cognoscerent, statuerentque. Lacedæ-
 moniorum deinde exsulum et Achæorum legati in-
 troduci sunt: et spes data exsulibus est, scripturum
 senatum Achæis, ut restituerentur. Achæi de Mes-
 sene recepta, compositisque ibi rebus, cum adsensu
 Patrum exposuerunt. Et a Philippo rege Macedo-
 num duo legati venerunt, Philocles et Apelles, nul-
 la super re, quæ ab senatu petenda esset: specula-
 tum magis inquisitumque missi de iis, quorum Per-
 seus Demetrium insimulasset sermonum, cum Ro-
 manis, maxime cum T. Quinctio, adversus fratrem

de regno habitorum. Hos, tamquam medios, nec in alterius favorem inclinatos, miserat rex: erant autem et hi Persei fraudis in fratrem ministri et participes. Demetrius, omnium, præterquam fraterni sceleris, quod nuper eruperat, ignarus, primo neque magnam, neque nullam spem habebat, patrem sibi placari posse: minus deinde in dies patris animo fidebat, quum obsideri aures a fratre cerneret. Itaque, circumspiciens dicta factaque sua, ne cuius suspensiones augeret, maxime ab omni mentione et contagione Romanorum abstinebat; ut neque scribi sibi vellet, quia hoc præcipue criminum genere exasperari animum sentiebat.

XXI. Philippus, simul ne otio miles deterior fieret, simul avertendæ suspicionis causa quidquam a se agitari de Romano bello, Stobos Pæoniæ exercitu indicto, in Mædicam ducere pergit. Cupido eum ceperat in verticem Hæmi montis adscendendi, quia vulgatæ opinioni crediderat, Ponticum simul et Hadriaticum mare, et Histrum amnem, et Alpes conspici posse: subjecta oculis ea haud parvi sibi momenti futura ad cogitationem Romani belli. Percunctatus regionis peritos de adscensu Hæmi, quum satis inter omnes constaret, viam exercitui nullam esse, paucis et expeditis perdifficillimum aditum, ut sermone familiari minorem filium permulceret, quem statuerat non ducere secum, primum quaerit ab eo, *Quum tanta difficultas itineris proponatur, utrum perseverandum sit in incepto, an abstinendum?* Si pergat tamen ire, non posse oblivisci se in talibus rebus Antigoni: qui, sæva tempestate jactatus, quum in eadem nave secum suos omnes habuisset, præcepisse liberis diceretur, ut et ipsi meminissent, et ita posteris

U. C. 571.
A. C. 181.

Philippi
iter ad Hæ-
mum mon-
tem.

U. C. 571. *proderent, ne quis cum tota gente simul in rebus dubiis*
 A. C. 181. *periclitari auderet. Memorem ergo se præcepti ejus,*
duos simul filios non commissurum in aleam ejus, qui
proponeretur, casus; et, quoniam majorem filium se-
cum duceret, minorem ad subsidia spei et custodiam
regni remissurum in Macedoniam esse. Non fallebat
 Demetrium, ablegari se, ne adesset consilio, quum
 in conspectu locorum consultaret, qua proxime iti-
 nera ad mare Hadriaticum atque Italiam ducerent,
 quæque belli ratio esset futura: sed non solum pa-
 rendum patri tum, sed etiam adsentendum erat, ne
 invitum parere suspicionem faceret. Ut tamen iter
 ei tutum in Macedoniam esset, Didas, ex prætori-
 bus regiis unus, qui Pæoniæ præerat, jussus est pro-
 sequi eum cum modico præsidio. Hunc quoque
 Perseus, sicut plerosque patris amicorum, ex quo
 haud dubium cuiquam esse cœperat, ad quem, ita
 inclinato regis animo, hæreditas regni pertineret,
 inter conjuratos in fratris perniciem habuit: in præ-
 sentia dat ei mandata, ut per omne obsequium in-
 sinuaret se in quam maxime familiarem usum, ut
 elicere omnia arcana, specularique abditos ejus sen-
 sus posset. Ita digreditur Demetrius cum infestio-
 ribus, quam si solus iret, præsidii.

XXII. Philippus, Mædicam primum, deinde so-
 litudines interjacentes Mædicæ atque Hæmo trans-
 gressus, septimis demum castris ad radices montis
 pervenit: ibi unum moratus diem ad deligendos,
 quos duceret secum, tertio die iter est ingressus.
 Modicus primo labor in imis collibus fuit: quan-
 tum in altitudinem egrediebantur, magis magisque
 silvestria et pleraque invia loca excipiebant. Per-
 venire deinde in tam opacum iter, ut, præ densitate

arborum inmissorumque aliorum in alios ramorum, U. C. 571.
 perspici cœlum vix posset : ut vero jugis adpropin- A. C. 181.
 quabant, quod rarum in aliis locis esset, adeo om-
 nia contexta nebula, ut haud secus quam nocturno
 itinere impedirentur : tertio demum die ad verticem
 perventum. Nihil vulgatæ opinioni, degressi inde,
 detraxerunt : magis, credo, ne vanitas itineris ludi-
 brio esset, quam quod diversa inter se maria, mon-
 tesque, et amnes, ex uno loco conspici potuerint.
 Vexati omnes, et ante alios rex ipse, quo gravior
 ætate erat, difficultate viæ est. Duabus aris ibi
 Jovi et Soli sacratis quum inmolasset, qua triduo
 adscenderat, biduo est degressus, frigora nocturna
 maxime metuens, quæ caniculæ ortu similia bruma-
 libus erant. Multis per eos dies difficultatibus con-
 flictatus, nihilo lætiora in castris invenit : ubi sum-
 ma penuria erat, ut in regione, quam ab omni parte
 solitudines clauderent. Itaque unum tantum mo-
 ratus diem, quietis eorum caussa, quos habuerat se-
 cum, itinere inde simili fugæ in Dentheletos trans-
 currit. Socii erant : sed propter inopiam haud se-
 cus quam hostium fines Macedones populati sunt :
 rapiendo enim passim villas primum, dein quosdam
 vicos etiam evastarunt, non sine magno pudore re-
 gis, quum sociorum voces, nequidquam Deos so-
 ciales nomenque suum inplorantes, audiret. Fru-
 mento inde sublato, in Mædicam regressus urbem,
 quam Petram adpellant, obpugnare est adortus :
 ipse a campestri aditu castra posuit. Perseum fi-
 lium cum modica manu circummisit, ut a superiori-
 bus locis urbem adgrederetur. Oppidani, quum ter-
 ror undique instaret, obsidibus datis, in præsentia

U. C. 571. dediderunt sese: iidem, postquam exercitus recessit,
 A. C. 181. obliti obsidum, relicta urbe, in loca munita et montes
 refugerunt. Philippus, omni genere laboris sine ullo
 effectu fatigatis militibus, et fraude prætoris Didæ
 auctis in filium suspicionibus, in Macedoniam rediit.

XXIII. Missus hic comes, (ut ante dictum est)
 quum simplicitatem juvenis incauti, et suis haud in-
 merito succensentis, adsentando indignandoque et
 ipse vicem ejus, captaret, in omnia ultro suam obfe-
 rens operam, fide data, arcana ejus elicuit. Fugam
 ad Romanos Demetrius meditabatur: cui consilio
 adjutor Deûm beneficio oblatus videbatur Pæoniæ
 prætor, per cujus provinciam spem ceperat elabi
 tuto posse. Hoc consilium extemplo et fratri pro-
 ditur, et, auctore eo, indicatur patri. Literæ pri-
 mum ad obsidentem Petram adlatæ sunt: inde Hero-
 dorus (princeps hic amicorum Demetrii erat) in
 custodiam est conjectus, et Demetrius dissimulanter
 adservari jussus. Hæc super cetera tristem adven-
 tum in Macedoniam regi fecerunt: movebant eum
 et præsentia crimina; exspectandos tamen, quos ad
 exploranda omnia Romam miserat, censebat. His
 anxius curis quum aliquot menses egisset, tandem
 legati, jam ante præmeditatis in Macedonia, quæ ab
 Roma renunciarent, venerunt: qui, super cetera
 scelera, falsas etiam literas, signo adulterino T.
 Quinctii signatas, reddiderunt regi. Deprecatio erat
 in literis, si quid adolescens, cupiditate regni pro-
 lapsus, secum egisset: *nihil eum adversus suorum
 quemquam facturum: neque eum sese esse, qui ullius
 impii consilii auctor futurus videri possit.* Hæ literæ
 fidem Persei criminibus fecerunt. Itaque Herodo-

Demetrius
 fugam ad
 Romanos
 meditatur.

rus, extemplo diu excruciatuſ, ſine indicio rei ullius U. C. 571.
A. C. 181.
in tormentis moritur.

XXIV. Demetrium iterum ad patrem accuſavit Crimina-
tiones Per-
ſei in De-
metrium.
Perſeus : fuga per Pæoniam præparata arguebatur,
et corrupti quidam, ut comites itineris eſſent ; max-
ime falſæ literæ T. Quinctii urgebant : nihil tamen
palam gravius pronunciatum de eo eſt, ut dolo po-
tius interficeretur : nec id cura ipſius, ſed ne pœna
ejuſ conſilia adverſus Romanos nudaret. Ab Theſ-
ſalonice Demetriadem ipſi quum iter eſſet, As-
træum Pæoniæ Demetrium mittit cum eodem co-
mite Dida, Perſeum Amphipolim, ad obſides Thra-
cum accipiendos : digredienti ab ſe Didæ mandata Demetriuſ
necatur.
dediſſe dicitur de filio occidendo. Sacrificium ab
Dida ſeu inſtitutum, ſeu ſimulatum eſt : ad quod
celebrandum invitatuſ Demetriuſ ab Aſtræo Hera-
cleam venit : in ea cœna dicitur venenum datum.
Poculo epoto, extemplo ſenſit : et mox coortis do-
loribuſ, relicto convivio, quum in cubiculum rece-
piſſet ſeſe, crudelitatem patris conquerens, parrici-
dium fratris, ac Didæ ſceluſ incuſans, torquebatur :
intromiſſi deinde Thyriſis quidam Stuberæuſ et Be-
rœæuſ Alexander, injectiſ tapetibuſ in caput fau-
ceſque, ſpirituſ intercluſerunt. Ita innoxiuſ ado-
leſcens, quum in eo ne ſimplici quidem genere mor-
tiſ contenti inimici fuiſſent, interficitur.

XXV. Dum hæc in Macedonia geruntur, L. Reſ in
Liguria
geſtæ.
Æmiliuſ Paulluſ, prorogato ex conſulatu imperio,
principio veriſ in Ligureſ Ingaunoſ exercituſ intro-
duxit. Ubi primum in hoſtium finibuſ caſtra po-
ſuit, legati ad eum, per ſpeciem paciſ petendæ, ſpe-
culatuſ venerunt : negante Paulo, niſi cum deditiſ
paciſci ſe pacem, non tam id recuſabant, quam tem-

U. C. 571. pore opus esse aiebant, ut generi agresti hominum
 A. C. 181. persuaderetur : ad hoc decem dierum induciæ quum
 darentur, petierunt deinde, *ne trans montes proximos
 castris pabulatum lignatumque milites irent : culta ea
 loca suorum finium esse.* Id ubi inpetravere, post
 eos ipsos montes, unde averterant hostem, exercitu
 omni coacto, repente multitudine ingenti castra Ro-
 manorum obpugnare simul omnibus portis adgressi
 sunt. Summa vi totum diem obpugnarunt, ita ut
 ne efferendi quidem signa Romanis spatium, nec ad
 explicandam aciem locus esset. Conferti in portis,
 obstando magis, quam pugnando, castra tutaban-
 tur. Sub occasum solis quum recessissent hostes,
 duos equites ad Cn. Bæbium proconsulem cum li-
 teris Pisas mittit, ut obsesso sibi per inducias quam-
 primum subsidio veniret. Bæbium exercitum M. Pi-
 nario prætori, eunti in Sardiniam, tradiderat : cete-
 rum et senatum literis certiore fecit, obsideri a
 Liguribus L. Æmilium, et M. Claudio Marcello,
 cujus proxima inde provincia erat, scripsit, ut, si vi-
 deretur ei, exercitum ex Gallia traduceret in Li-
 gures, et L. Æmilium liberaret obsidione. Hæc
 sera futura auxilia erant. Ligures postero die ad
 castra redeunt. Æmilium, quum et venturos scisset,
 et educere in aciem potuisset, intra vallum suos te-
 nuit, ut extraheret rem in id tempus, quo Bæbium
 cum exercitu venire a Pisis posset.

Obpug-
nantur a
Liguribus
Æmilii
castra.

Magna
Romæ tre-
pidatio.

XXVI. Romæ magnam trepidationem literæ Bæ-
 bii fecerunt : eo majorem, quod paucos post dies
 Marcellus, tradito exercitu Fabio, Romam quum
 venisset, spem ademit, eum, qui in Gallia esset, ex-
 exercitum in Ligures traduci posse, quia bellum cum
 Istris esset, prohibentibus coloniam Aquileiam de-

duci: eo profectum Fabium, neque inde regredi, ^{U. C. 571.}
 bello inchoato, posse. Una, et ea ipsa tardior, ^{A. C. 181.}
 quam tempus postulabat, subsidii spes erat, si consules maturassent in provinciam ire: id ut facerent, pro se quisque Patrum vociferari. Consules, nisi confecto delectu, negare se ituros, nec suam segnitiam, sed vim morbi, in caussa esse, quo serius perficeretur: non tamen potuerunt sustinere consensum senatus, quin paludati exirent, et militibus, quos conscriptos haberent, diem edicerent, quo Pisas convenirent: permissum, ut, qua irent, protinus subitarios milites scriberent, ducerentque secum. Et prætoribus, Q. Petillio et Q. Fabio, imperatum est, ut Petillius duas legiones civium Romanorum tumultuarias scriberet, et omnes minores quinquaginta annis sacramento rogaret: Fabio, ut sociis Latini nominis quindecim millia peditum, octingentos equites imperaret. Duumviri navales creati C. Matienus et C. Lucretius, navesque iis ornatae sunt; Matienoque, cujus ad Gallicum sinum provincia erat, imperatum est, ut classem primo quoque tempore duceret in Ligurum oram, si quo usui esse L. Æmilio atque ejus exercitui posset.

XXVII. Æmilius, postquam nihil usquam auxilii ^{Æmilius}
 ostendebatur, interceptos credens equites, non ultra ^{castris}
 differendum ratus, quin per se fortunam tentaret, ^{erumpit.}
 priusquam hostes venirent, qui jam segnius socordiusque obpugnabant, ad quatuor portas exercitum instruxit, ut, signo dato, simul ex omnibus partibus eruptionem facerent. Quatuor extraordinariis cohortibus duas adjunxit, præposito M. Valerio legato; erumpere extraordinaria porta jussit: ad dexteram principalem hastatos legionis primæ in-

U. C. 571. struxit ; principes ex eadem legione in subsidiis po-
 A. C. 181. suit : M. Servilius et L. Sulpicius, tribuni militum,
 his præpositi. Tertia legio adversus principalem si-
 nistram portam instructa est : id tantum mutatum ;
 principes primi, et hastati in subsidiis locati : Sex.
 Julius Cæsar et L. Aurelius Cotta, tribuni militum,
 huic legioni præpositi sunt. Q. Fulvius Flaccus le-
 gatus cum dextera ala ad quæstoriam portam posi-
 tus : duæ cohortes et triarii duarum legionum in
 præsidio castrorum manere jussi. Omnes portas
 concionabundus ipse imperator circumiit ; et, qui-
 buscumque irritamentis poterat, iras militum acue-
 bat ; nunc fraudem hostium incusans, qui, pace pe-
 tita, induciis datis, per ipsum induciarum tempus
 contra jus gentium ad castra obpugnanda venissent :
 nunc, quantus pudor esset, edocens, ab Liguribus, la-
 tronibus verius, quam hostibus justis, Romanum ex-
 ercitus obsideri. *Quo ore quisquam vestrum, si hinc
 alieno præsidio, non vestra virtute, evaseritis. obcur-
 ret, non dico eis militibus, qui Hannibalem, qui Philip-
 pum, qui Antiochum, maximos nostræ ætatis reges du-
 cesque, vicerunt ; sed iis, qui hos ipsos Ligures aliquo-
 ties, pecorum modo fugientes, per saltus invios consec-
 tati ceciderunt ? Quod Hispani, quod Galli, quod Ma-
 cedones Pænive non audeant, Ligustinus hostis vallum
 Romanum subit, obsidet ultro, et obpugnat ! quem, scru-
 tantes antea devios saltus, abditum et latentem vix inve-
 niebamus. Ad hæc consentiens reddebatur militum
 clamor, nullam militum culpam esse, quibus nemo ad
 erumpendum signum dedisset. Daret signum : intel-
 lecturum, eosdem, qui antea fuerint, et Romanos et
 Ligures esse.*

XXVIII. Bina cis montes castra Ligurum erant :

ex iis, primis diebus, sole orto, pariter omnes com-^{U. C. 571.}
positi et instructi procedebant : tum, nisi exsatiati^{A. C. 181.}
cibo vinoque, arma non capiebant ; dispersi, inor-
dinati exhibant ; ut quibus pro spe certum esset,
hostes extra vallum signa non elaturos. Adversus
ita incompósitos eos venientes, clamore pariter om-
nium, qui in castris erant, calorum quoque et lixa-
rum, sublato, simul omnibus portis Romani erupe-
runt. Liguribus adeo improvisa res fuit, ut perinde,^{Victi}
ac si insidiis circumventi forent, trepidarent. Exi-^{Ligures.}
guum temporis aliqua forma pugnae fuit : fuga de-
inde effusa, et fugientium passim caedes erat. Equi-
tibus dato signo, ut conscenderent equos, nec effu-
gere quemquam sinerent, in castra omnes trepida
fuga compulsi sunt : deinde ipsis exuti castris. Su-
pra quindecim millia Ligurum eo die occisa, capta
duo millia et quingenti. Triduo post Ligurum In-
gaunorum omne nomen, obsidibus datis, in ditio-
nem venit : gubernatores nautæque conquisiti, qui
prædatores fuissent navibus, atque omnes in custo-
diam coniecti. Et a C. Matieno duumviro naves
ejus generis in Ligustina ora triginta duæ captæ
sunt. Hæc qui nunciarent, literasque ad senatum
ferrent, L. Aurelius Cotta, C. Sulpicius Gallus Ro-
mam missi ; simulque peterent, ut L. Æmilio con-
fecta provincia decedere, et deducere secum milites
liceret, atque dimittere. Utrumque permissum ab
senatu, et supplicatio ad omnia pulvinaria per tri-
duum decreta : jussique prætores, Petillius urbanas
dimittere legiones, Fabius sociis atque nomini La-
tino remittere delectum : et uti prætor urbanus con-
sulibus scriberet, senatum æquum censere, subita-

U. C. 571. rios milites, tumultus caussa conscriptos, primo
A. C. 181. quoque tempore dimitti.

Libri Numæ in-
venti.

XXIX. Colonia Graviscae eo anno deducta est in agrum Etruscum, de Tarquiniensibus quondam captum. Quina jugera agri data: tresviri deduxerunt, C. Calpurnius Piso, P. Claudius Pulcher, C. Terentius Istra. Siccitate et inopia frugum insignis annus fuit. Sex menses numquam pluisse, memoriae proditum est. Eodem anno in agro L. Petillii scribae sub Janiculo, dum cultores agri altius moluntur terram, duae lapideae arcae, octonos ferme pedes longae, quaternos latae, inventae sunt, operculis plumbo devinctis. Literis Latinis Graecisque utraque arca inscripta erat; in altera Numam Pompilium, Pomponis filium, regem Romanorum, sepultum esse; in altera libros Numae Pompilii inesse. Eas arcas quum ex amicorum sententia dominus aperuisset, quae titulum sepulti regis habuerat, inanis inventa, sine ullo vestigio corporis humani, aut ullius rei, per tabem tot annorum omnibus absumentis: in altera duo fascēs, candelis involuti, septenos habuere libros, non integros modo, sed recentissima specie. Septem Latini de jure pontificio erant; septem Graeci de disciplina sapientiae, quae illius aetatis esse potuit. Adjicit Antias Valerius, Pythagoricos fuisse, vulgatae opinioni, qua creditur, Pythagorae auditorem fuisse Numam, mendacio probabili adcommodata fide. Primo ab amicis, qui in re praesenti fuerunt, libri lecti: mox pluribus legentibus quum vulgarentur, Q. Petillius praetor urbanus, studiosus legendi, eos libros a L. Petillio sumisit: et erat familiaris usus, quod scribam

eum quæstor Q. Petillius in decuriam legerat. U. C. 571. A. C. 181. Lec-
tis rerum summis, quum animadvertisset, pleraque
dissolvendarum religionum esse, L. Petillio dixit,
Sese eos libros in ignem conjecturum esse : prius, quam
id faceret, se ei permittere, uti, si quod seu jus, seu
auxilium se habere ad eos libros repetendos existinaret,
experiretur : id integra sua gratia eum facturum.
Scriba tribunos plebis adit ; ab tribunis ad senatum
res est rejecta. Prætor se jusjurandum dare para-
tum esse aiebat, libros eos legi servarique non oport-
tere. Senatus censuit, *Satis habendum, quod prætor* Combu-
jusjurandum polliceretur : libros primo quoque tem- runtur.
pore in comitio cremandos esse : pretium pro libris,
quantum Q. Petillio prætori majorique parti tribuno-
rum plebis videretur, domino esse solvendum : id scriba
non accepit : libri in comitio, igne a victimariis
facto, in conspectu populi cremati sunt.

• XXX. Magnum bellum ea æstate coortum in Bellum in
Hispania citeriore : ad quinque et triginta millia ho- Hispania
minum, quantum numquam ferme antea, Celtiberi citeriore.
comparaverant. Q. Fulvius Flaccus eam obtinebat
provinciam : is, quia armare juventutem Celtiberos
audierat, et ipse, quanta poterat, a sociis auxilia
contraxerat ; sed nequaquam numero militum hos-
tem æquabat. Principio veris exercitum in Carpe-
tanium duxit, et castra locavit ad oppidum Æbu-
ram, modico præsidio in urbe posito. Paucis post
diebus Celtiberi, millia duo ferme inde, sub colle
posuerunt castra : quos ubi adesse prætor Romanus
sensit, M. Fulvium fratrem cum duabus turmis so-
ciorum equitum ad castra hostium speculatum mi-
sit, quam proxime succedere ad vallum jussum, ut
viseret, quanta essent ; pugna abstineret, reciperet-

U. C. 571. que sese, si hostium equitatum exeuntem vidisset.

A. C. 181. Ita, ut præceptum erat, fecit. Per dies aliquot nihil ultra motum, quam ut hæ duæ turmæ ostenderentur: dein subducerentur, ubi equitatus hostium castris procucurrissent. Postremo Celtiberi, omnibus simul peditum equitumque copiis castris egressi, acie directa medio ferme spatio inter bina castra constiterunt. Campus erat planus omnis et aptus pugnae: ibi steterè Hispani hostem expectantes. Romanus intra vallum suos continuit per quadri-duum continuum: et illi eodem loco aciem instructam tenuerunt. Ab Romanis nihil motum: inde quievè in castris Celtiberi, quia pugnae copia non fiebat: equites tantum in stationem egrediebantur, ut parati essent, si quid ab hoste moveretur: pone castra utrique pabulatum et lignatum ibant, neutri alteros inpedientes.

Victi
Celtiberi.

XXXI. Prætor Romanus, ubi satis tot dierum quiete credidit spem factam hosti, nihil se priorem moturum, L. Acilium cum ala sinistra et sex millibus provincialium auxiliorum circumire montem jubet, qui ab tergo hostibus erat; inde, ubi clamorem audisset, decurrere ad castra eorum: nocte profecti sunt, ne possent conspici. Flaccus luce prima C. Scribonium, præfectum socium, ad vallum hostium cum equitibus extraordinariis sinistrae alae mittit: quos ubi et propius accedere, et plures, quam soliti erant, Celtiberi conspexerunt, omnis equitatus effunditur castris: simul et peditibus signum ad exeundum datur. Scribonius, uti præceptum erat, ubi primum fremitum equestrium audivit, avertit equos, et castra repetit: eo effusius sequi hostes: primo equites, mox et peditum acies aderat, haud dubia

spe, castra eo die se obpugnatu- U. C. 571.
 sus, non plus, a vallo aberant. Itaque, ubi Flaccus A. C. 181.
 satis abstractos eos a præsidio castrorum suorum
 ratus est, intra vallum exercitu instructo, tribus
 partibus simul erumpit, clamore non tantum ad ar-
 dorem pugnae excitandum sublato, sed etiam ut, qui
 in montibus erant, exaudirent: nec morati sunt,
 quin decurrerent, sicut imperatum erat, ad castra;
 ubi quinque millium armatorum, non amplius, re-
 lictum erat præsidium: quos quum et paucitas sua,
 et multitudo hostium, et improvisa res terruisset,
 prope sine certamine capiuntur castra: castris, quæ
 pars maxime a pugnantibus conspici poterat, injecit
 Acilius ignem.

XXXII. Postremi Celtiberorum, qui in acie e-
 rant, primi flammam conspexere: deinde per to-
 tam aciem vulgatum est, castra amissa esse, et tum
 cum maxime ardere: unde illis terror, inde Roma-
 nis animus crevit: jam clamor suorum vincentium
 accidebat, jam ardentia hostium castra adparebant.
 Celtiberi parumper incertis animis fluctuati sunt:
 ceterum, postquam receptus pulsus nullus erat, nec
 usquam, nisi in certamine, spes, pertinacius de in-
 tegro capessunt pugnam. Acie media urgebantur
 acriter a quinta legione: adversus lævum cornu, in
 quo sui generis provincialia auxilia instruxisse Ro-
 manos cernebant, cum majore fiducia intulerunt
 signa. Jam prope erat, ut sinistrum cornu pellere-
 tur Romanis, ni septima legio successisset: simul
 ab oppido Æbura, qui in præsidio relictæ erant, in
 medio ardore pugnae advenerunt, et Acilius ab ter-
 go erat. Diu in medio cæsi Celtiberi: qui super-
 erant, in omnes passim partes capessunt fugam.

U. C. 571. Equites, bipartito in eos emissi, magnam cædem
A. C. 181. edidere : ad viginti tria millia hostium eo die cæsa :
capta quatuor millia et septingenti, cum equis plus
quingentis, et signa militaria octoginta octo. Magna
victoria, non tamen incruenta fuit. Romani de
duabus legionibus milites paullo plus ducenti, socium
Latini nominis octingenti triginta, externorum
auxiliarium duo millia ferme et quadringenti
cecidere. Prætor in castra victorem exercitum
reduxit. Acilius manere in castris ab se captis jus-
sus : postero die spolia de hostibus lecta, et pro
concione donati, quorum virtus insignis fuerat.

XXXIII. Sauciis deinde in oppidum Æburam
devectis, per Carpetaniam ad Contrebiā ductæ le-
giones : ea urbs circumsessā, quum a Celtiberis aux-
ilia arcessisset, morantibus iis, non quia ipsi cunc-
tati sunt, sed quia profectos a domo inexplicabiles
continuis imbribus viæ et inflati amnes tenebant,
desperato auxilio suorum, in deditionem venit.
Flaccus quoque, tempestatibus fœdis coactus, exer-
citum omnem in urbem introduxit. Celtiberi, qui a
domo profecti erant, deditionis ignari, quum tan-
dem, superatis, ubi primum remiserunt imbres, am-
nibus, Contrebiā venissent, postquam castra nulla
extra mœnia viderunt, aut in alteram partem trans-
lata rati, aut recessisse hostes, per negligentiam ef-
fusi ad oppidum accesserunt. In eos duabus portis
Romani eruptionem fecerunt, et incompósitos ad-
orti fuderunt. Quæ res ad resistendum eos et ad ca-
pessendam pugnam impediit, quod non uno agmine,
nec ad signa frequentes veniebant, eadem magnæ
parti ad fugam salutis fuit. Sparsi enim toto passim
campo se diffuderunt : nec usquam confertos eos

hostis circumvenit : tamen ad duodecim millia sunt ^{U. C. 571.}
 cæsa : capta plus quinque millia hominum, equi ^{A. C. 181.}
 quadringenti, signa militaria sexaginta duo. Qui
 palati e fuga donum se recipiebant, alterum agmen
 Celtiberorum venientium, deditionem Contrebiæ et
 suam cladem narrando, averterunt : extemplo in vi-
 cos castellaque sua omnes dilapsi. Flaccus, a Con-
 trebia profectus, per Celtiberiam populabundus du-
 cit legiones : multa castella obpugnavit, donec max-
 ima pars Celtiberorum in deditionem venit.

XXXIV. Hæc in citeriore Hispania eo anno
 gesta. Et in ulteriore, Manlius prætor secunda ali-
 quot prælia cum Lusitanis fecit. Aquileia colonia
 Latina eodem anno in agro Gallorum est deducta :
 tria millia peditum quinquagena jugera, centuriones
 centena, centena quadragena equites acceperunt :
 tresviri deduxerunt, P. Cornelius Scipio Nasica, C.
 Flaminius, L. Manlius Acidinus. Ædes duæ eo
 anno dedicatæ sunt : una Veneris Erycinæ ad por-
 tam Collinam : dedicavit L. Porcius L. F. Licinus
 duumvir : (vota erat ab consule L. Porcio, Ligusti-
 no bello :) altera, in foro olitorio, Pietatis : eam
 ædem dedicavit M'. Acilius Glabrio duumvir ; sta-
 tuamque auratam, quæ prima omnium in Italia sta-
 tua aurata est, patri Glabrioni posuit. Is erat, qui
 ipse eam ædem voverat, quo die cum rege Antiocho
 ad Thermopylas depugnasset ; locaveratque idem
 ex senatusconsulto. Per eosdem dies, quibus hæc ^{Triumphus}
 ædes dedicatæ sunt, L. Æmilius Paullus proconsul ^{L. Æmilii}
 ex Liguribus Ingaunis triumphavit. ^{Paulli.} Transtulit co-
 ronas aureas quinque et viginti : nec præterea quid-
 quam auri argentique in eo triumpho latum : captivi
 multi principes Ligurum ante currum ducti æris

U. C. 571. treceños militibus divisit. Auxerunt ejus triumph
 A. C. 181. famam legati Ligurum, pacem perpetuam orantes :
 Pacem *ita in animum induxisse Ligurum gentem, nulla um-*
 petunt *quam arma, nisi imperata a populo Romano, sumere.*
 Ligures. Responsum a Q. Fabio prætore est Liguribus jussu
 senatus, *Orationem eam non novam Liguribus esse :*
mens vero ut nova et orationi conveniens esset, ipsorum
id plurimum referre. Ad consules irent, et, quæ ab iis
imperata essent, facerent : nulli alii, quam consulibus,
senatum crediturum esse, sincera fide in pace Ligures
esse. Pax in Liguribus fuit. In Corsica pugnatum
 est cum Corsis : ad duo millia eorum M. Pinarius
 prætor in acie occidit : qua clade compulsi obsides
 dederunt, et ceræ centum millia pondo. Inde in
 Sardiniam exercitus ductus, et cum Iliensibus, gente
 ne nunc quidem omni parte pacata, secunda prælia
 facta. Karthaginiensibus eodem anno centum ob-
 sides redditi, pacemque cum iis populus Romanus,
 non ab se tantum, sed ab rege etiam Masinissa, præ-
 stitit : qui tum præsidio armato agrum, qui in con-
 troversia erat, obtinebat.

U. C. 572. XXXV. Otiosam provinciam consules habue-
 A. C. 180. runt. M. Bæbius, comitiorum caussa Romam revo-
 catus, consules creavit A. Postumium Albinum Lus-
 cum et C. Calpurnium Pisonem. Prætores exinde
 facti Ti. Sempronius Gracchus, L. Postumius Albi-
 nus, P. Cornelius Mammula, Ti. Minucius Mollicu-
 lus, A. Hostilius Mancinus, C. Mænius : ii omnes
 magistratum Idibus Martiis inierunt. Principio ejus
 anni, quo A. Postumius Albius et C. Calpurnius Piso
 consules fuerunt, ab A. Postumio consule in sena-
 tum introducti, qui ex Hispania citeriore venerant a
 Q. Fulvio Flacco, L. Minucius legatus, et duo tri-

buni militum, T. Mænius et L. Terentius Massilio- U. C. 572.
 ta. Hi, quum duo secunda prælia, deditionem Cel- A. C. 180.
 tiberiæ, confectam provinciam nunciassent, nec sti-
 pendio, quod mitti soleret, nec frumento portato ad
 exercitum in eum annum opus esse, petierunt ab se-
 natu primum, *ut ob res prospere gestas Diis immorta-*
libus honos haberetur : deinde, *ut Q. Fulvio decedenti*
de provincia deportare inde exercitum, cujus forti
opera et ipse et multi ante eum prætores usi essent, li-
ceret : quod fieri, præterquam quod ita deberet, etiam
 prope necessarium esset. Ita enim obstinatos esse mi-
 lites, *ut non ultra retineri posse in provincia viderentur,*
injussuque abituri inde essent, si non dimitterentur : aut
in perniciosam, si quis impense retineret, seditionem ex-
arsuri. Consulibus ambobus provinciam Ligures
 esse senatus jussit. Prætores inde sortiti sunt. A.
 Hostilio urbana, Ti. Minucio peregrina obvenit, P.
 Cornelio Sicilia, C. Mænio Sardinia. Hispanias
 sortiti, L. Postumius ulteriorem, Ti. Sempronius
 citeriorem. Is quia successurus Q. Fulvio Flacco
 erat, ne vetere exercitu provincia spoliaretur, *Quæ-*
ro, inquit, de te, L. Minuci, quum confectam provin-
ciam nuncies, existimesne, Celtiberos perpetuo in fide
mansuros, ita ut sine exercitu ea provincia obtineri
possit ? Si neque de fide barbarorum quidquam reci-
 pere aut adfirmare nobis potes, et habendum illic uti-
 que exercitum censes ; utrum tandem auctor senatui
 sis supplementum in Hispaniam mittendi, ut ii modo,
 quibus emerita stipendia sint, milites dimittantur, vete-
 ribus militibus tirones immisceantur ? an, deductis de
 provincia veteribus legionibus, novas conscribendi et
 mittendi ; quum contemptum tirocinium etiam mitiores
 barbaros excitare ad rebellandum possit ? Dictu, quam

U. C. 572. *re, facilius sit, provinciam ingenio ferocem, rebellatricem, confecisse? Paucae civitates, ut quidem ego audio, quas vicina maxime hiberna premebant, in jus ditionemque venerunt: ultiores in armis sunt. Quæ quum ita sint, ego jam hinc prædico, Patres conscripti, me exercitu eo, qui nunc est, rempublicam administraturum: si deducat secum Flaccus legiones, loca pacata me ad hibernacula lecturum, neque novum militem ferocissimo hosti objecturum.*

XXXVI. Legatus ad ea, quæ interrogatus erat, respondit: *Neque se, neque quemquam alium divinare posse, quid in animo Celtiberi haberent, aut porro habituri essent. Itaque negare non posse, quin rectius sit, etiam ad pacatos barbaros, nondum satis adsuetos imperio, exercitum mitti: novo autem, an vetere exercitu opus sit, ejus esse dicere, qui scire possit, qua fide Celtiberi in pace mansuri sint; simul et qui illud exploratum habeat, quieturos milites, si diutius in provincia retineantur. Si ex eo, quod aut inter se loquantur, aut subclamationibus apud concionantem imperatorem significant, quid sentiant, conjectandum sit; palam vociferatos esse, aut imperatorem in provincia retenturos, aut cum eo in Italiam venturos esse. Disceptationem inter prætorem legatumque consulum relatio interruptit; qui suas ornari provincias, priusquam de prætoris exercitu ageretur, æquum censebant. Novus omnis exercitus consulibus est decretus: binæ legiones Romanæ cum suo equitatu, et socium Latini nominis, quantus semper numerus, quindecim millia peditum et octingenti equites: cum hoc exercitu Apuanis Liguribus ut bellum inferrent, mandatum est. P. Cornelio et M. Bæbio prorogatum imperium, jussique provincias obtinere, donec con-*

sules venissent : tum imperatum, ut, dimisso, quem ^{U. C. 572.} haberent, exercitu, reverterentur Romam. De Ti. ^{A. C. 180.} Sempronii deinde exercitu actum est : novam legionem ei quinque millium et ducentorum peditum cum equitibus quadringentis consules scribere jussi ; et mille præterea peditum civium Romanorum, quinquaginta equites : et sociis e nomine Latino imperare septem millia peditum, trecentos equites : cum hoc exercitu placuit ire in Hispaniam citeriorem Ti. Sempronium. Q. Fulvio permissum, ut, qui milites, ante Sp. Postumium, Q. Marcium consules, cives Romani sociive, in Hispaniam transportati essent, et præterea, supplemento adducto, quot amplius duabus legionibus, quam decem millia, et quadringenti pedites, sexcenti equites essent ; et socium Latini nominis duodecim millia, sexcenti equites, quorum forti opera duobus adversus Celtiberos præliis usus Q. Fulvius esset, eos, si videretur, secum deportaret. Et supplicationes decretæ, quod is prospere rempublicam gessisset : et ceteri prætores in provincias missi. Q. Fabio Buteoni prorogatum in Gallia imperium est. Octo legiones, præter exercitum veterem, qui in Liguribus in spe propinqua missionis erant, eo anno esse placuit : et is ipse exercitus ægre explebatur propter pestilentiam, quæ jam tertium annum urbem Romanam atque Italiam vastabat.

XXXVII. Prætor Ti. Minucius, et haud ita multo post consul C. Calpurnius moritur, multique alii omnium ordinum illustres viri : postremo prodigii loco ea clades haberi cœpta est. C. Servilius pontifex maximus piacula iræ Deum conquirere jussus, decemviri libros inspicere, consul Apollini, Æs-

U. C. 572. culapio, Saluti dona vovere, et dare signa inaurata;
 A. C. 180. quæ vovit deditque. Decemviri supplicationem in
 biduum valetudinis caussa in urbe et per omnia fora
 conciliabulaque edixerunt: majores duodecim an-
 nis, omnes coronati et lauream in manu tenentes,
 supplicaverunt. Fraudis quoque humanæ insinua-
 verat suspicio animis; et veneficii quæstio ex sena-
 tusconsulto, quod in urbe, propiusve urbem decem
 millibus passuum esset commissum, C. Claudio præ-
 tori, qui in locum Ti. Minucii erat subfectus; ultra
 decimum lapidem per fora conciliabulaque C. Mæ-
 nio, priusquam in Sardiniam provinciam trajiceret,
 decreta. Suspecta consulis erat mors maxime: ne-
 catus a Quarta Hostilia uxore dicebatur: ut quidem
 filius ejus Q. Fulvius Flaccus in locum vitrici consul
 est declaratus, aliquanto magis infamis mors Pisonis
 cœpit esse: et testes exsistebant, qui post declara-
 tos consules Albinum et Pisonem, quibus comitiis
 Flaccus tulerat repulsam, et exprobratum ei a matre
 dicerent, quod jam ei tertium negatus consulatus
 petenti esset, et adjecisse, *pararet se ad petendum;*
intra duos menses effecturam, ut consul fieret. Inter
 multa alia testimonia, ad causam pertinentia, hæc
 quoque vox, nimis vero eventu comprobata, valuit,
 cur Hostilia damnaretur. Veris principio hujus,
 dum consules novos delectus Romæ tenet, mors de-
 inde alterius, et creandi comitia consulis in locum
 ejus, omnia tardiora fecerunt: interim P. Cornelius
 et M. Bæbius, qui in consulatu nihil memorabile
 gesserant, in Apuanos Ligures exercitum indux-
 erunt.

XXXVIII. Ligures, qui ante adventum in pro-
 vinciam consulum non expectassent bellum, impro-

viso obpressi, ad duodecim millia hominum dediderunt se. Eos, consulto per literas prius senatu, deducere ex montibus in agros campestres procul ab

U. C. 572.

A. C. 180.

domo, ne reditus spes esset, Cornelius et Bæbius statuerunt, nullum alium ante finem rati fore Ligustini belli. Ager publicus populi Romani erat in Samnitibus, qui Taurasinorum (* fuerat. In eum quum *) traducere Ligures Apuanos vellent, edixerunt, Ligures ab Anido montibus descendere cum liberis conjugibusque : sua omnia secum portarent.

Ligures, sæpe per legatos deprecati, ne penates, sedem, in qua geniti essent, sepulcra majorum, congererentur relinquere, arma, obsides pollicebantur : postquam nihil inpetrabant, neque vires ad bellandum erant, edicto paruerunt. Traducti sunt publico sumtu ad quadraginta millia liberorum capitum cum feminis puerisque : argenti data centum et quinquaginta millia, unde, in novas ædes, compararent, quæ opus essent : agro dividendo dandoque iidem, qui traduxerant, Cornelius et Bæbius præpositi : postulantis tamen ipsis, quinqueviri ab senatu dati, quorum ex consilio agerent. Transacta re, quum veterem exercitum Romam deduxissent, triumphus ab senatu est decretus. Hi omnium primi nullo bello gesto triumpharunt : tantum hostes ducti ante currum ; quia, nec quid ferretur, neque quid duceretur captum, neque quid militibus daretur, quidquam in triumphis eorum fuerat.

Ligures in
Samnium
traducti.

XXXIX. Eodem anno in Hispania Fulvius Flaccus proconsul, quia successor in provinciam tardius veniebat, educto exercitu ex hibernis, ulteriorem Celtiberiæ agrum, unde ad deditionem non venerant, institit vastare : qua re irritavit magis, quam

Res His-
paniæ.

U. C. 572. conterruit, animos barbarorum : et, clam compara-
 A. C. 180. tis copiis, saltum Manlianum, per quem transiturum
 exercitum Romanum satis sciebant, obsederunt. In
 Hispaniam ulteriorem eunti L. Postumio Albino
 collegæ Gracchus mandaverat, ut Q. Fulvium cer-
 tiorem faceret, Tarraconem exercitum adduceret :
*ibi dimitti veteranos, supplementaque distribuere, et or-
 dinare omnem exercitum sese velle.* Dies quoque, et
 ea propinqua, edita Flacco est, qua successor esset
 venturus. Hæc nova adlata res, omissis, quæ agere
 instituerat, Flaccum raptim deducere exercitum ex
 Celtiberia quum coëgisset, barbari, caussæ ignari,
 suam defectionem et clam comparata arma sensisse
 eum, et pertinuisse rati, eo ferocius saltum insede-
 runt. Ubi eum saltum prima luce agmen Roma-
 num intravit, repente ex duabus partibus simul ex-
 orti hostes Romanos invaserunt. Quod ubi vidit
 Flaccus, primos tumultus, in agmine per centu-
 riones stare omnes, suo quemque loco, et arma ex-
 pedire jubendo, sedavit : et, sarcinis jumentisque in
 unum locum coactis, copias omnes partim ipse, par-
 tim per legatos tribunosque militum, ut tempus, ut
 locus postulabat, sine ulla trepidatione instruxit ;
*cum bis deditis rem esse admonens. Scelus et perfidi-
 am illis, non virtutem, nec animum accessisse. Re-
 ditum ignobilem in patriam, clarum ac memorabilem
 eos sibi fecisse : cruentos ex recenti cæde hostium gla-
 dios, et manantia sanguine spolia, Romam ad trium-
 phum delaturos.* Plura dici tempus non patiebatur :
 invehebant se hostes, et in partibus extremis jam
 pugnabatur : deinde acies concurrerunt.

XL. Atrox ubique prælium, sed varia fortuna
 erat : egregie legiones, nec segnius duæ alæ pugna-

Hispani
 Flacco in-
 sidiuntur.

bant; externa auxilia ab simili armatura, meliore U. C. 572.
 aliquantum militum genere, urgebantur, nec locum A. C. 180.
 tueri poterant. Celtiberi, ubi ordinata acie et signis conlatis se non esse pares legionibus senserunt, cuneo inpressionem fecerunt: quo tantum valent genere pugnae, ut, quacumque parte perculere inpetu suo, sustineri nequeant: tunc quoque turbatae legiones sunt, prope interrupta acies. Quam trepidationem ubi Flaccus conspexit, equo advehitur ad legionarios equites: et, *Ecquid auxilii in vobis est? Actum jam de hoc exercitu erit?* quum undique adclamassent, *quin ederet, quid fieri velit; non segniter imperium exsecuturos.* Duplicate turmas, inquit, duarum legionum equites, et permittite equos in cuneum hostium, quo nostros urgent: id cum majore vi equorum facietis, si effrenatos in eos equos inmittitis: quod saepe Romanos equites cum magna laude fecisse sua, memoriae proditum est. Dicto paruerunt, detractisque frenis bis ultro citroque cum magna strage hostium, infractis omnibus hastis, transcurrerunt. Dissipato cuneo, in quo omnis spes fuerat, Celtiberi trepidare, et, prope omissa pugna, locum fugae circumspicere. Et alarii equites, postquam Romanorum equitum tam memorabile facinus videre, et ipsi, virtute eorum accensi, sine ullius imperio in perturbatos jam hostes equos inmittunt. Tunc vero Celtiberi omnes in fugam effunduntur, et imperator Romanus, aversos hostes contemplatus, aedem Fortunae Equestri, Jovique optimo maximo ludos vovit. Cæduntur Celtiberi per totum saltum dissipati fuga: decem et septem millia hostium caesa eo die traduntur: vivi capti plus quatuor millia, ducentis septuaginta septem cum signis militaribus, equis

U. C. 572. prope mille centum. Nullis castris eo die victor ex-
 A. C. 180. ercitus mansit: victoria non sine jactura militum
 fuit: quadringenti septuaginta duo milites Romani,
 socium ac Latini nominis mille decem et novem,
 cum his tria millia militum auxiliariorum perierunt:
 ita victor exercitus, renovata priore gloria, Tarra-
 conem est perductus. Venienti Fulvio Ti. Sempro-
 nius prætor, qui biduo ante venerat, obviam pro-
 cessit; gratulatusque est, quod rempublicam egre-
 gie gessisset: cum summa concordia, quos dimitte-
 rent, quosque retinerent milites, composuerunt.
 Inde Fulvius, exauctoratis militibus in naves inpo-
 sitis, Romam est profectus. Sempronius in Celti-
 beriam legiones duxit.

Res in
 Liguria
 gestæ.

XLI. Consules ambo in Ligures exercitus indux-
 erunt diversis partibus. Postumius prima et tertia
 legione Balistam Suismontiumque montes obsedit:
 et, premendo præidiis angustos saltus eorum, com-
 meatus interclusit, inopiaque omnium rerum eos
 perdomuit. Fulvius, secunda et quarta legione ad-
 ortus a Pisis Apuanos Ligures, qui eorum circa
 Macram fluvium incolebant, in deditionem acceptos,
 ad septem millia hominum in naves inpositos, præ-
 ter oram Etrusci maris Neapolim transmisit: inde
 in Samnium traducti, agerque his inter populares
 datus est. Montanorum Ligurum ab A. Postumio
 vineæ cæsæ, frumenta que deusta: donec cladibus
 omnibus belli coacti in deditionem venerunt, arma-
 que tradiderunt. Navibus inde Postumius ad visen-
 dam oram Ingaunorum Intemeliorumque Ligurum
 processit. Priusquam hi consules venirent ad ex-
 ercitus, qui Pisas indictus erat, præerant A. Postu-
 mius et frater Q. Fulvii M. Fulvius Nobilior. Se-

eundæ legionis Fulvius tribunus militum erat : is mensibus suis dimisit legionem, jurejurando adactis centurionibus, æs in ærarium ad quæstores esse delaturos. Hoc ubi Placentiam (nam eo forte erat profectus) Aulo nunciatum est, cum equitibus expeditis secutus dimissos, quos eorum potuit adsequi, deduxit castigatos Pisas : de ceteris consulem certiore fecit. Eo referente, senatusconsultum factum est, ut M. Fulvius in Hispaniam relegaretur ultra novam Karthaginem. Literæque ei datæ sunt a consule ad P. Manlium in Hispaniam ulteriorem deferendæ. Milites jussi ad signa redire : caussa ignominia, uti semestre stipendium in eum annum esset ei legioni, decretum : qui miles ad exercitum non redisset, eum ipsum bonaque ejus vendere consul jussus.

XLII. Eodem anno L. Duronius, qui prætor anno superiore ex Illyrico cum decem navibus Brundisium redierat, inde, in portu relictis navibus, quum venisset Romam, inter exponendas res, quas ibi gessisset, haud dubie in regem Illyriorum Gentium latrocinii omnis maritimi caussam avertit : *ex regno ejus omnes naves esse, quæ superi maris oram depopulatæ essent : de his rebus se legatos misisse, nec conveniendi regis potestatem factam.* Venerant Romam legati a Gentio, qui, quo tempore Romani conveniendi regis caussa venissent, ægrum forte eum in ultimis partibus fuisse regni dicerent. *Petere Gentium ab senatu, ne crederent confictis criminibus in se, quæ inimici detulissent.* Ad ea Duronius adjecit, multis civibus Romanis et sociis Latini nominis injurias factas in regno ejus ; et cives Romanos dici Corcyræ retineri. Eos omnes Romam adduci placuit : C. Claudium prætorem cognoscere : neque

U. C. 572. ante Gentio regi legatisve ejus responsum reddi.

A. C. 180. Inter multos alios, quos pestilentia ejus anni absumsit, sacerdotes quoque aliquot mortui sunt. L. Valerius Flaccus pontifex mortuus est : in ejus locum subfectus est Q. Fabius Labeo. P. Manlius, qui nuper ex ulteriore Hispania redierat, triumvir epulo : Q. Fulvius M. F. in locum ejus triumvir cooptatus, tum prætextatus erat. De rege sacrifico subficiendo in locum Cn. Cornelii Dolabellæ contentio inter C. Servilium pontificem maximum fuit et L. Cornelium Dolabellam duumvirum navalem ; quem, ut inauguraret, pontifex magistratu sese abdicare jubebat : recusantique id facere ob eam rem multa duumviro dicta a pontifice ; deque ea, quum provocasset, certatum ad populum. Quum plures jam tribus, intro vocatæ, dicto esse audientem pontifici duumvirum, juberent ; multamque remitti, si magistratu se abdicasset ; ultimum de cælo, quod comitia turbaret, intervenit : religio inde fuit pontificibus inaugurandi Dolabellæ. P. Clælium Siculum inaugurarunt, qui secundo loco inauguratus erat. Exitu anni et C. Servilius Geminus pontifex maximus decessit ; idem decemvir sacrorum fuit : pontifex in locum ejus a collegio cooptatus est Q. Fulvius Flaccus : at pontifex maximus M. Æmilius Lepidus, quum multi clari viri petissent : et decemvir sacrorum Q. Marcius Philippus in ejusdem locum est cooptatus. Et augur Sp. Postumius Albinus decessit : in locum ejus P. Scipionem, filium Africani, augures cooptarunt. Cumanis eo anno petentibus permissum, ut publice Latine loquerentur, et præconibus Latine vendendi jus esset.

XLIII. Pisanis agrum pollicentibus, quo Latina

colonia deduceretur, gratiæ ab senatu actæ: trium- U. C. 572.
 viri creati ad eam rem Q. Fabius Buteo, M. et P. A. C. 182.
 Popillii Lænates. A C. Mænio prætore (cui, pro-
 vincia Sardinia quum evenisset, additum erat, ut
 quæreret de veneficiis longius ab urbe decem milli-
 bus passuum) literæ adlatæ, *Se jam tria millia homi-
 num damnasse, et crescere sibi quæstionem indicis:
 aut eam sibi esse deserendam, aut provinciam dimitten-
 dam.* Q. Fulvius Flaccus ex Hispania rediit Romam
 cum magna fama gestarum rerum, qui, quum extra
 urbem triumphii caussa esset, consul est creatus cum
 L. Manlio Acidino; et post paucos dies cum militi-
 bus, quos secum deduxerat, triumphans urbem est
 invectus. Tulit in triumpho coronas aureas centum
 viginti quatuor: præterea auri pondo triginta unum;
 et signati Oscensis nummum centum septuaginta
 tria millia ducentos. Militibus de præda quinquagenos
 denarios dedit, duplex centurionibus, triplex
 equiti, tantumdem sociis Latini nominis, et stipen-
 dium omnibus duplex.

XLIV. Eo anno rogatio primum lata est ab L. Lex an-
 Villio tribuno plebis, quot annos nati quemque ma- naria.
 gistratum peterent caperentque: inde cognomen fa-
 miliæ inditum, ut Annales adpellarentur. Prætores
 quatuor post multos annos lege Bæbia creati, quæ
 alternis quaternos jubebat creari: hi facti, Cn. Cor-
 nelius Scipio, C. Valerius Lævinus, Q. et P. Mucii
 Q. F. Scævolæ. Q. Fulvio et L. Manlio consulibus U. C. 578.
 eadem provincia, quæ superioribus, pari numero co- A. C. 179.
 piæ peditum, equitum, civium, sociorum decretæ.
 In Hispaniis duabus Ti. Sempronio et L. Postumio
 cum iisdem exercitibus, quos haberent, prorogatum
 imperium est: et in supplementum consules scribere

U. C. 573. jussi ad tria millia peditum Romanorum, trecentos
 A. C. 179. equites; quinque millia sociorum Latini nominis, et
 quadringentos equites. P. Mucius Scævola urba-
 nam sortitus provinciam est; et ut idem quæreret
 de beneficiis in urbe, et propius urbem decem millia
 passuum: Cn. Cornelius Scipio peregrinam, Q. Mu-
 cius Scævola Siciliam, C. Valerius Lævinus Sardi-
 niam. Q. Fulvius consul, *prius, quam ullam rem
 publicam ageret, liberare et se et rempublicam religione
 votis solvendis, dixit, velle: vovisse, quo die postremum
 cum Celtiberis pugnasset, ludos Jovi optimo maximo, et
 ædem Equestri Fortunæ sese facturum: in eam rem sibi
 pecuniam conlatam esse ab Hispanis. Ludi decreti, et
 ut duumviri ad ædem locandam crearentur: de pe-
 cunia finitur, Ne major caussa ludorum consumeretur,
 quam quanta Fulvio Nobiliori, post Ætolicum bellum
 ludos facienti, decreta esset: neve quid ad eos ludos ar-
 cesseret, cogeret, acciperet, faceret, adversus id sena-
 tusconsultum, quod L. Æmilio, Cn. Bæbio consulibus
 de ludis factum esset.* Decreverat id senatus propter
 effusos sumtus, factos in ludos Ti. Sempronii ædilis,
 qui graves non modo Italiæ ac sociis Latini nominis,
 sed etiam provinciis externis fuerant.

XLV. Hiems eo anno nive sæva et omni tempes-
 tatum genere fuit; arbores, quæ obnoxia frigoribus
 sunt, deusserat cunctas; et ea tum aliquanto, quam
 alias, longior fuit: itaque Latinas mox subito coorta
 et intolerabilis tempestas in monte turbavit: instau-
 ratæque sunt ex decreto pontificum. Eadem tem-
 pestas et in Capitolio aliquot signa constravit, ful-
 minibusque complura loca deformavit; ædem Jovis
 Tarracinæ, ædem Albam Capuæ, portamque Roma-
 nam: muri pinnae aliquot locis decussæ erant. Hæc

inter prodigia nunciatum et ab Reate, tripedem natum mulum. Ob ea decemviri, jussi adire libros, edidere, quibus Diis et quot hostiis sacrificaretur et ob fulminibus complura loca deformata ad ædem Jovis ut supplicatio diem unum esset. Ludi deinde votivi Q. Fulvii consulis per dies decem magno adparatu facti. Censorum inde comitia habita: creati M. Æmilius Lepidus pontifex maximus et M. Fulvius Nobilior, qui ex Ætolis triumphaverat. Inter hos viros nobiles inimicitiae erant, sæpe multis et in senatu et ad populum atrocibus celebratae certaminibus. Comitiiis confectis, ut traditum antiquitus est, censores in Campo ad aram Martis sellis curulibus consederunt; quo repente principes senatorum cum agmine venerunt civitatis: inter quos Q. Cæcilius Metellus verba fecit.

XLVI. *Non obliti sumus, censores, vos paullo ante ab universo populo Romano moribus nostris præpositos esse: et nos a vobis et admoneri, et regi, non vos a nobis debere: indicandum tamen est, quid omnes bonos in vobis aut offendat, aut certe mutatum malint. Singulos quum intuemur, M. Æmili, M. Fulvi, neminem hodie in civitate habemus, quem, si revocemur in suffragium, velimus vobis prælatum esse: ambo quum simul adspicimus, non possumus non vereri, ne male comparati sitis, nec tantum reipublicæ prosit, quod omnibus nobis egregie placetis, quam, quod alter alteri displicetis, noceat. Inimicitias per annos multos vobis ipsis graves et atroces geritis: quæ periculum est ne ex hac die nobis et reipublicæ, quam vobis, graviores fiant. De quibus caussis hoc timeamus, multa subcurrunt, quæ dicerentur; nisi forte implacabiles vestrae iræ implicaverint animos vestros. Has ut hodie, ut in isto templo,*

Metelli
oratio ad
censores.

U. C. 573. *finiatis similtates, quæsumus vos universi; et, quos*
 A. C. 179. *conjunxit suffragiis suis populus Romanus, hac etiam*
reconciliatione gratiæ conjungi a nobis sinatis. Uno
animo, uno consilio legatis senatum, equites recenseatis,
agatis censum, lustrum condatis: quod in omnibus fere
precationibus nuncupabitis verbis, Ut ea res mihi col-
legæque meo bene et feliciter eveniat, id ita ut vere,
ut ex animo velitis evenire: efficiatisque, ut, quod Deos
precati eritis, id vos velle etiam homines credamus. T.
Tutius et Romulus, in cujus urbis medio foro acie hostes
concurrerant, ibi concordēs regnarunt. Non modo si-
multates, sed bella quoque finiuntur: ex infestis hosti-
bus plerumque socii fideles, interdum etiam cives fiunt.
Albani, diruta Alba, Romam traducti sunt: Latini,
Sabini in civitatem accepti. Vulgatum illud, quia ve-
rum erat, in proverbium venit: Amicitias immortales,
inimicitias mortales debere esse. Fremitus ortus cum
adsensu, deinde universorum voces idem petentium,
confusæ in unum, orationem interpellarunt. Inde
Æmilius questus quum alia, tum his a M. Fulvio se
certo consulatu dejectum. Fulvius contra queri, se
ab eo semper lacesitum, et in probrum suum spon-
sionem factam: tamen ambo significare, si alter
vellet, se in potestate tot principum civitatis futu-
ros. Omnibus instantibus, qui adcrant, dexteras
fidemque dedere, mittere vere ac finire odium. De-
inde, conlaudantibus cunctis, deducti sunt in Capi-
tolum. Et cura super tali re principum, et facilitas
censorum egregie comprobata ab senatu et laudata
est. Censoribus deinde postulantibus, ut pecuniæ
summa sibi, qua in opera publica uterentur, adtri-
bueretur, vectigal annum decretum est.

Censores
in amicitiam red-
eunt.

XLVII. Eodem anno in Hispania L. Postumius

et Ti. Sempronius proprætores comparaverunt ita inter se, ut in Vaccæos per Lusitaniam iret Albinus, in Celtiberiam inde reverteretur; Gracchus, si majus ibi bellum esset, in ultima Celtiberiæ penetraret.

U. C. 572.
A. C. 179.
Res in Hispania gestæ.

Mundam urbem primum vi cepit, nocte ex improviso adgressus: acceptis deinde obsidibus, præsidioque inposito, castella obpugnare, agros urere, donec ad prævalidam aliam urbem (Certimam adpellant Celtiberi) pervenit: ubi quum jam opera admoveret, veniunt legati ex oppido, quorum sermo antiquæ simplicitatis fuit, non dissimulantium bellaturos, si vires essent. Petierunt enim, ut sibi in castra Celtiberorum ire liceret ad auxilia accipienda: si non inpetrassent, tum separatim eos ab illis se consulturos. Permittente Graccho, ierunt, et post paucis diebus alios decem legatos secum adduxerunt. Meridianum tempus erat: nihil prius petierunt a prætore, quam ut bibere sibi juberet dari. Epotis primis poculis, iterum poposcerunt; magno risu circumstantium in tam rudibus et moris omnis ignaris ingeniis. Tum maximus natu ex iis, *Missi sumus, inquit, a gente nostra, qui sciscitaremur, qua tandem re fretus arma nobis inferres?* Ad hanc percunctationem Gracchus, *Exercitu se egregio fidentem venisse,* respondit; *quem si ipsi visere velint, quo certiora ad suos referant, potestatem se eis facturum esse:* tribunisque militum imperat, ut ornari omnes copias perditum equitumque, et decurrere jubeant armatas. Ab hoc spectaculo legati missi deterruerunt suos ab auxilio circumsessæ urbi ferendo. Oppidani, quum ignes nocte turribus nequidquam (quod signum convenerat) sustulissent, destituti ab unica spe auxilii, in deditionem venerunt: sestertiûm quater et vicies

Simplicitas barbarorum.

U. C. 573. ab iis est exactum, quadraginta nobilissimi equites :
 A. C. 179. nec obsidum nomine, (nam militare jussi sunt) et
 tamen re ipsa, ut pignus fidei essent.

Ad Alcen
 victi Cel-
 tiberi.

XLVIII. Inde jam duxit ad Alcen urbem, ubi cas-
 tra Celtiberorum erant, a quibus venerant nuper le-
 gati: eos quum per aliquot dies, armaturam levem
 inmittendo in stationes, lacessisset parvis præliis, in
 dies majora certamina serebat, ut omnes extra mu-
 nitiones eliceret: ubi, quod petebatur, sensit effec-
 tum, auxiliorum præfectis imperat, ut, contracto
 certamine, tamquam multitudine superarentur, re-
 pente tergis datis, ad castra effuse fugerent: ipse
 intra vallum ad omnes portas instruxit copias. Haud
 multum temporis intercessit, quum ex composito re-
 fugientium suorum agmen, post effuse sequentes bar-
 baros conspexit. Instructam ad hoc ipsum intra
 vallum habebat aciem: itaque tantum moratus, ut
 suos refugere in castra libero introitu sineret, cla-
 more sublato, simul omnibus portis erupit. Non
 sustinuerunt inpetum necopinatum hostes: qui ad cas-
 tra obpugnanda venerant, ne sua quidem tueri potu-
 erunt: nam extemplo fusi, fugati, mox intra vallum
 paventes compulsi, postremo exuuntur castris. Eo
 die novem millia hostium cæsa: capti vivi trecenti
 viginti, equi centum duodecim, signa militaria tri-
 ginta septem: de exercitu Romano centum novem
 ceciderunt.

Centum
 tria op-
 pida reci-
 pit Grac-
 chus.

XLIX. Ab hoc prælio Gracchus duxit ad depopulandum Celtiberiam legiones: et, quum ferret passim cuncta atque ageret, populique alii voluntate, alii metu jugum acciperent, centum tria oppida intra paucos dies in deditionem accepit: præda potitus ingenti est. Convertit inde agmen retro, unde ve-

nerat, ad Alcen, atque eam urbem obpugnare instituit. Oppidani primum inpetum hostium sustinuerunt: deinde, quum jam non armis modo, sed etiam operibus obpugnarentur, diffisi præsidio urbis, in arcem universi concesserunt: postremo et inde, præmissis oratoribus, in ditionem se suaque omnia Romanis permiserunt. Magna inde præda facta est: multi captivi nobiles in potestatem venerunt; inter quos et Thurri filii duo et filia. Regulus hic earum gentium erat, longe potentissimus omnium Hispanorum. Audita suorum clade, missis, qui fidem venienti in castra ad Gracchum peterent, venit: et primum quæsit ab eo, *ne sibi liceret ac suis vivere?* quum prætor victurum respondisset; quæsit iterum, *si cum Romanis militare liceret?* id quoque Graccho permittente, *sequar*, inquit, *vos adversus veteres socios meos, quoniam illos ad me propiunt suspicere.* Secutus est inde Romanos, fortique ac fideli opera multis locis rem Romanam adjuvit.

L. Ergavia inde, nobilis et potens civitas, aliorum circa populorum cladibus territa, portas aperuit Romanis. Eam deditionem oppidorum haud cum fide factam, quidam auctores sunt: e qua regione abduxisset legiones, extemplo inde rebellatum, magnoque eum postea prælio ad montem Chaunum cum Celtiberis a prima luce ad sextam horam diei signis conlatis pugnasse; multos utrimque cecidisse: nec aliud magnopere, ne victos crederes, fecisse Romanos, nisi quod postero die lacesierint prælio manentes intra vallum; spolia per totum diem legerint: tertio die prælio majore iterum pugnatum; et tum demum haud dubie victos Celtiberos, castraque eorum capta et direpta esse. Viginti duo millia hos-

U. C. 573. tium eo die esse cæsa, plus trecentos captos : parem
 A. C. 179. fere equorum numerum ; et signa militaria septuaginta duo : inde debellatum, veramque pacem, non fluxa, ut ante, fide, Celtiberos fecisse. Eadem æstate et L. Postumium in Hispania ulteriore bis cum Vaccæis egregie pugnasce scribunt : ad triginta et quinque millia hostium occidisse, et castra obpugnasse. Propius vero est, serius in provinciam pervenisse, quam ut ea æstate potuerit res gerere.

LI. Censores fideli concordia senatum legerunt : princeps electus est ipse censor M. Æmilius Lepidus pontifex maximus : tres ejecti de senatu : retinuit quosdam Lepidus a collega præteritos. Opera ex pecunia adtributa divisaque inter se hæc confecerunt. Lepidus molem ad Tarracinam, ingratum opus, quod prædia habebat ibi, privatamque publicæ rei impensam inposuerat. Theatrum et prosœnium ad Apollinis, ædem Jovis in Capitolio, columnasque circa poliendas albo locavit : et ab his columnis, quæ incommode obposita videbantur, signa amovit : clipeaque de columnis, et signa militaria adfixa omnis generis demisit. M. Fulvius plura et majoris locavit usus : portum et pilas pontis in Tiberim ; quibus pilis fornices post aliquot annos P. Scipio Africanus et L. Mummius censores locaverunt inponendos : basilicam post argentarias novas et forum piscatorium, circumdatis tabernis, quas vendidit in privatum ; et forum, et porticum extra portam Trigemina, et aliam post navalia, et ad fanum Herculis, et post Spei ad Tiberim ædem Apollinis Medici. Habuere et in promiscuo præterea pecuniam : ex ea communiter locarunt aquam adducendam, fornicesque faciendos. Inpedimento operi

fuit M. Licinius Crassus, qui per fundum suum duci U. C. 578. non est passus. Portoria quoque et vectigalia ii- A. C. 179. dem multa instituerunt: complura sacella publica, quæ fuerant occupata a privatis, publica sacraque ut essent, paterentque populo, curarunt. Mutarunt suffragia: regionatimque generibus hominum, causisque, et quæstibus, tribus descripserunt.

LII. Et alter ex censoribus M. Æmilius petiit ab senatu, ut sibi dedicationis templorum Reginæ Junonis et Dianæ, quæ bello Ligustino ante annis octo vovisset, pecunia ad ludos decerneretur. Vingt millia æris decreverunt: dedicavit eas ædes, utramque in circo Flaminio: ludosque scenicos tri-duum post dedicationem templi Junonis, biduum post Dianæ, et singulos dies fecit in circo. Idem dedicavit ædem Larium Permarinûm in Campo: voverat eam annis undecim ante L. Æmilius Regillus, navali proelio adversus præfectos regis Antiochi. Supra valvas templi tabula cum titulo hoc fixa est: *Duello magno regibus dirimendo * caput subigendis patrandæ pacis hæc pugna exeunti L. Æmilio M. Æmilii filio auspicio, imperio, felicitate ductuque ejus inter Ephesum, Samum, Chiumque, inspectante cos. ipso Antiocho, exercitu omni, equitatu, elephantisque, classis regis Antiochi antea sic victa, fusa, contusa, fugataque est, ibique eo die naves longæ cum omnibus sociis captæ LXII. Ea pugna pugnata, rex Antiochus regnumque * *. Ejus rei ergo ædem Laribus Permarinis vovit. Eodem exemplo tabula in æde Jovis in Capitolio supra valvas fixa est.*

LIII. Biduo, quo senatum legerunt censores, Q. Res gestæ Fulvius consul, profectus in Ligures, per invios in Liguria. montes vallesque saltus cum exercitu transgressus,

U. C. 573. signis conlatis cum hoste pugnavit : neque tantum
 A. C. 179. acie vicit ; sed castra quoque eodem die cepit : tria
 millia ducenti hostium, omnisque ea regio Ligurum
 in deditionem venit. Consul deditos in campestris
 agros deduxit, præsidiaque montibus inposuit. Ce-
 leriter et ex provincia literæ Romam venerunt :
 supplicationes ob eas res gestas in triduum decretæ
 sunt. Prætores quadraginta hostiis majoribus per
 supplicationes rem divinam fecerunt. Ab altero
 consule L. Manlio nihil memoria dignum in Liguri-
 bus est gestum. Galli Transalpini, tria millia homi-
 num, in Italiam transgressi, neminem bello laces-
 sentes, agrum a consulibus et senatu petebant, ut
 pacati sub imperio populi Romani essent. Eos se-
 natus excedere Italia jussit, et consulem Q. Fulvium
 quærere, et animadvertere in eos, qui principes et
 auctores transcendendi Alpes fuissent.

Philippus LIV. Eodem anno Philippus rex Macedonum,
 senio et mœrore consumtus post mortem filii, de-
 cessit. Demetriade hibernabat, quum desiderio an-
 xius filii, tum pœnitentia crudelitatis suæ : stimula-
 bat animum et alter filius, haud dubie et sua et alio-
 rum opinione rex, conversique in eum omnium
 oculi, et destituta senectus ; aliis expectantibus
 suam mortem, aliis ne expectantibus quidem. Quo
 magisangebatur, et cum eo Antigonus Echeocratis
 filius, nomen patruī Antigoni ferens, qui tutor Phi-
 lippi fuerat, regiæ vir majestatis, nobili etiam pug-
 na adversus Cleomenem Lacedæmonium clarus. Tu-
 torem eum Græci, ut cognomine a ceteris regibus
 distinguerent, adpellarunt. Hujus fratris filius An-
 tigonus ex honoratis Philippi amicis unus incorrup-
 tus permanserat : eique ea fides, nequaquam ami-

cum Persea, inimicissimum fecerat : is, prospiciens U. C. 573.
 animo, quanto cum periculo suo hæreditas regni A. C. 179.
 ventura esset ad Persea, ut primum labare animum
 regis, et ingemiscere interdum filii desiderio sensit ;
 nunc præbendo aures, nunc lacescendo etiam men-
 tionem rei temere actæ, sæpe querenti querens et
 ipse aderat : et, quum multa adsoleat veritas præ-
 bere vestigia sui, omni ope adjuvabat, quo matu-
 rius omnia emanarent. Suspecti et ministri facino-
 ris, Apelles maxime et Philocles, erant ; qui Ro-
 mam legati fuerant, literasque exitiales Demetrio
 sub nomine Flaminini adtulerant.

LV. Falsas esse, et a scriba vitiatas, signumque
 adulterinum, vulgo in regia fremebant. Ceterum,
 quum suspecta magis, quam manifesta, esset res,
 forte Xychus obvius fit Antigono, comprehensusque
 ab eo in regiam est perductus : relicto eo custodi-
 bus, Antigonus ad Philippum processit. *Multis, in-* Innocentia
quit, sermonibus intellexisse videor, magno te æstima- Demetrii
turum, si scire vera omnia possis de filiis tuis, uter ab agnita.
utro petitus fraude et insidiis esset. Homo unus om-
nium, qui nodum hujus erroris exsolvere possit, in po-
testate tua est Xychus : forte vocatum perductumque
in regiam vocari juberet. Adductus primo ita negare
 inconstanter, ut, parvo metu admoto, paratum in-
 dicem esse adpareret : conspectum tortoris verbe-
 rumque non sustinuit : ordinemque omnem facino-
 ris legatorum ministerii que sui exposuit. Extemplo
 missi, qui legatos comprehenderent, Philoclem, qui
 præsens erat, obpresserunt : Apelles, missus ad
 Chæream quemdam persequendum, indicio Xychi
 audito, in Italiam trajecit. De Philocle nihil certi
 vulgatum est : alii primo audaciter negantem, post-

U. C. 573. quam in conspectum adductus sit Xychus, non ultra
 A. C. 179. tetendisse; alii tormenta etiam inficiantem perpes-
 sum adfirmant. Philippo redintegratus est luctus
 geminatusque; et infelicitatem suam in liberis gra-
 viorem, quod alter perisset, censebat.

LVI. Perseus, certior factus omnia detecta esse,
 potentior quidem erat, quam ut fugam necessariam
 duceret: tantum, ut procul abesset, curabat, inte-
 rim velut ab incendio flagrantis iræ, dum Philippus
 viveret, se defensurus: qui, spe potiundi ad pœnam
 corporis ejus amissa, quod reliquum erat, id studere,
 ne super inpunitatem etiam præmio sceleris frueretur.

Antigonum
 regnum
 relinquere
 cupit Phi-
 lippus.

Antigonum igitur adpellat; cui et palam facti
 parricidii gratia obnoxius erat, neque pudendum aut
 pœnitendum eum regem Macedonibus, propter re-
 centem patrui Antigoni gloriam, fore censebat.
*Quando in eam fortunam veni, inquit, Antigone, ut
 orbitas mihi, quam alii detestantur parentes, optabilis
 esse debeat; regnum, quod a patruo tuo forti, non so-
 lum fideli, tutela ejus custoditum et auctum etiam ac-
 cepti, id tibi tradere in animo est. Te unum habeo,
 quem dignum regno judicem: si neminem haberem, pe-
 rire et exstingui id mallet, quam Perseo scelestæ frau-
 dis præmium esse. Demetrium excitatum ab inferis
 restitutumque credam mihi, si te, qui morti innocentis,
 qui meo infelici errori unus inlacrimesti, in locum ejus
 substitutum relinquam.* Ab hoc sermone omni ge-
 nere honoris producere eum non destitit: quum in
 Thracia Perseus abesset, circumire Macedoniae ur-
 bes, principibusque Antigonum commendare: et, si
 vita longior subpetisset, haud dubium fuit, quin
 eum in possessione regni relicturus fuerit. Ab De-
 metriade profectus, Thessalonicae plurimum tempo-

ris moratus fuerat : inde quum Amphipolin venisset, gravi morbo est implicitus : sed animo tamen ægrum magis fuisse, quam corpore, constat : curisque et vigiliis (quum idemtidem species et umbræ insontis interemti filii agitent) extinctum esse cum diris execrationibus alterius. Tamen admoneri potuisset Antigonus, si haud statim palam facta esset mors regis. Medicus Calligenes, qui curationi præerat, non exspectata morte regis, a primis desperationis notis nuncios prædispositos, ita ut convenerat, misit ad Perseum ; et mortem regis in adventum ejus omnes, qui extra regiam erant, celavit.

U. C. 573.

A. C. 179.

Moritur.

LVII. Obpressit igitur necopinantes ignarosque omnes Perseus, et regnum scelere partum invasit. Peropportuna mors Philippi fuit ad dilationem, et ad vires bello contrahendas : nam post paucis diebus gens Bastarnarum, diu sollicitata, ab suis sedibus magna peditum equitumque manu Istrum trajecit : inde prægressis, qui nunciarent regi, Antigono et Cottoni (nobilis erat Bastarna ; et Antigonus perinvitus cum ipso Cottone legatus ad concitandos Bastarnas missus) haud procul Amphipoli fama, inde certi nuncii occurrerunt, mortuum esse regem : quæ res omnem ordinem consilii turbavit.

Perseus
regnum
invasit.

Compositum autem sic fuerat : transitum per Thraciam tutum et commeatus Bastarnis ut Philippus præstaret : id ut facere posset, regionum principes donis coluerat, fide sua obligata, pacato agmine transituros Bastarnas. Dardanorum gentem delere propositum erat, inque eorum agro sedes fundare Bastarnis. Duplex inde erat commodum futurum, si et Dardani, gens semper infestissima Macedoniæ,

Bastarnæ
concitati a
Philippo in
Dardanos.

U. C. 573. temporibusque iniquis regum imminens, tolleretur ;
 A. C. 179. et Bastarnæ, relictis in Dardania conjugibus liberisque, ad populandam Italiam possent mitti. *Per Scordiscos iter esse ad mare Hadriaticum Italiamque : alia via traduci exercitum non posse : facile Bastarnis Scordiscos iter daturus : nec enim aut lingua aut moribus æquales abhorrere ; et ipsos adjuncturos se, quum ad prædam opulentissimæ gentis ire vidissent. Inde in omnem eventum consilia commodabantur : sive cæsi ab Romanis forent Bastarnæ, Dardanos tamen sublato, prædamque ex reliquiis Bastarnarum, et possessionem liberam Dardaniæ, solatio fore : sive prospere gessissent, Romanis aversis in Bastarnarum bellum, recuperaturum se in Græcia, quæ amississet. Hæc Philippi consilia fuerant.*

LVIII. Ingressi sunt pacato agmine, fide Cotonis et Antigoni : sed haud multo post famam mortis Philippi neque Thraces commercio faciles erant, neque Bastarnæ emto contenti esse poterant, aut in agmine contineri, ne decederent via : inde injuriæ ultro citroque fieri ; quarum in dies incremento bellum exarsit. Postremo Thraces, quum vim ac multitudinem sustinere hostium non possent, relictis campestribus vicis, in montem ingentis altitudinis (Donucam vocant) concesserunt. Quo ubi ire Bastarnæ vellent, quali tempestate Gallos spoliantes Delphos fama est peremtus esse ; talis tum Bastarnas, nequidquam ad juga montium adpropinquantes, obpressit : neque enim imbre tantum effuso, dein creberrima grandine obruti sunt, cum ingenti fragore cœli tonitribusque et fulguribus præstringentibus aciem oculorum ; sed fulmina etiam sic undique micabant, ut peti viderentur corpora ; nec solum

milites, sed etiam principes, icti caderent. Itaque, U. C. 573.
A. C. 179. quum præcipiti fuga per rupes præaltas improvidi sternerentur ruerentque, instabant quidem percussis Thraces : sed ipsi Deos auctores fugæ esse, cælumque in se ruere aiebant. Dissipati procella, quum, tamquam ex naufragio, plerique semiermes in castra, unde profecti erant, redissent ; consultari, quid agerent, cœptum : inde orta dissensio, aliis redeundum, aliis penetrandum in Dardaniam censentibus. Triginta ferme millia hominum (Clondico duce profecti erant) pervenerunt : cetera multitudo retro, qua venerant, transdanubianam regionem repetiit. Perseus, potitus regno, interfici Antigonum jussit : Antigonus
interficitur. et, dum firmaret res, legatos Romam ad amicitiam paternam renovandam, petendumque, ut rex ab senatu adpellaretur, misit. Hæc eo anno in Macedonia gesta.

LIX. Alter consulum Q. Fulvius ex Liguribus triumphavit : quem triumphum magis gratiæ, quam rerum gestarum magnitudini, datum constabat. Armorum hostilium magnam vim transtulit ; nullam pecuniam admodum : divisit tamen in singulos milites tricenos æris, duplex centurionibus, triplex equiti. Nihil in eo triumpho magis insigne fuit, quam quod forte evenit, ut eodem die triumpharet, quo priore anno ex prætura triumphaverat. Secundum triumphum comitia edixit, quibus creati consules sunt M. Junius Brutus, A. Manlius Vulso. Prætorum inde, tribus creatis, comitia tempestas diremit : postero die reliqui tres facti ante diem quartum Idus Martias, M. Titinius Curvus, Ti. Claudius Nero, T. Fonteius Capito. Ludi Romani instaurati ab ædilibus curulibus Cn. Servilio Cæpione, Ap.

U. C. 573. Claudio Centhone, propter prodigia, quæ evenerant.

A. C. 179. Terra movit: in foris publicis, ubi lectisternium erat, Deorum capita, quæ in lectis erant, averterunt se; lanaque cum integumentis, quæ Jovi obposita fuit, decidit: de mensa oleas quoque prægustasse mures, in prodigium versum est. Ad ea expianda nihil ultra, quam ut ludi instaurarentur, actum est.

EPITOME LIBRI XLI.

IGNIS in æde Vestæ extinctus est. Ti. Sempronius Gracchus proconsul Celtiberos victos in deditionem accepit, monumentumque operum suorum, Gracchurim oppidum in Hispania constituit. Et a Postumio Albino proconsule Vaccæi ac Lusitani subacti sunt : uterque triumphavit. Antiochus, Antiochi filius, obses Romanis a patre datus, mortuo fratre Seleuco, qui patri defuncto successerat, in regnum Syriæ ab urbe dimissus. Lustrum a censoribus conditum est : censa sunt civium capita ducenta sexaginta tria millia ducenta nonaginta quatuor. Q. Voconius Saxa tribunus plebis legem tulit, ne quis hæredem mulierem institueret : suasit legem M. Cato : exstat oratio ejus. Præterea res contra Ligures, Istros, Sardos, et Celtiberos, a compluribus ducibus prospere gestas, et initia belli Macedonici continet, quod Perseus, Philippi filius, moliebatur : miserat enim ad Karthaginienses legationem, et ab iis nocte audita erat : sed et alias Græciæ civitates sollicitabat : qui præter religionem, quod quam multa templa magnifica multis locis erexit, Athenis Jovis Olympii, et Antiochiæ Capitolini, vilissimum regem egit.

T. LIVII PATAVINI

LIBER XLI.

* * * *

U. C. 574. a patre in pace habitam armasse, eoque juventuti
A. C. 178. prædandi cupidæ pergratus esse dicebatur.

Istricum
bellum.

Consilium de Istrico bello quum haberet consul, alii gerendum extemplo, antequam contrahere copias hostes possent, alii consulendum prius senatum censebant. Vicit sententia, quæ diem non proferebat. Profectus ab Aquileia consul castra ad lacum Timavi posuit; (inminet mari is lacus) eodem decem navibus C. Furius duumvir navalis venit. Adversus Illyriorum classem creati duumviri navales erant, qui tuendam viginti navibus mari superiore Anconam, velut cardinem haberent: inde L. Cornelius dextra litora usque ad Tarentum, C. Furius læva usque ad Aquileiam tueretur. Eæ naves ad proximum portum in Istriæ fines cum onerariis et magno commeatu missæ: secutusque cum legionibus consul quinque ferme millia a mari posuit castra. In portu emporium brevi perfrequens factum, omniaque hinc in castra subportabantur: et, quo id tutius fieret, stationes ab omnibus castrorum partibus circumdatæ sunt: in Istriamque suum præsidium stativum, repentina cohors Placentina obposita in-

ter mare et castra : et, ut idem aquatoribus ad flu- U. C. 574.
vium esset præsidium, M. Æbutius tribunus mili- A. C. 178.
tum secundæ legionis duos manipulos militum ad-
jicere jussus est. T. et C. Ælii tribuni militum le-
gionem tertiam, quæ pabulatores et lignatores tue-
retur, via, quæ Aquileiam fert, duxerant. Ab ea-
dem regione mille ferme passuum castra erant Gal-
lorum : Catmelus pro regulo erat tribus haud am-
plius millibus armatorum.

II. Istri, ut primum ad lacum Timavi castra sunt Istri tumult-
Romana mota, ipsi post collem occulto loco conse- tum creant
derunt ; et inde obliquis itineribus agmen sequeban- in castris
tur, in omnem occasionem intenti : nec quidquam Romanis.
eos, quæ terra marique agerentur, fallebat. Post-
quam stationes invalidas esse pro castris, eorum tur-
ba inermis frequens inter castra et mare mercan-
tium, sine ullo terrestri aut maritimo munimento,
viderunt ; duo simul præsidia, Placentinæ cohortis,
et manipulorum secundæ legionis, adgrediuntur.
Nebula matutina texerat inceptum : qua dilabente
ad primum teporem solis, perlucens jam aliquid, in-
certa tamen, ut solet, lux, speciem omnium multi-
plicem intuenti reddens, tum quoque frustrata Ro-
manos, multo majorem iis, quam erat, hostium a-
ciem ostendit : qua territi utriusque stationis milites
ingenti tumultu quum in castra confugissent, haud
paullo ibi plus, quam quod secum ipsi adtulerant,
terroris fecerunt. Nam neque dicere, quid fugis-
sent, nec percunctantibus reddere responsum pote-
rant : et clamor in portis (ut ubi nulla esset statio,
quæ sustineret inpetum) audiebatur : et concursatio
in obscuro incidentium aliorum in alios incertum
fecerat, an hostis intra vallum esset. Una vox au-

U.C. 574. diebatur ad mare vocantium. Id forte temere ab
 A. C. 178. uno exclamatum totis passim personabat castris.
 Fugiant ad mare Itaque primo, velut jussi id facere, pauci armati,
 Romani. major pars inermes, ad mare decurrunt: dein plures,
 postremo prope omnes, et ipse consul; quum, frustra
 revocare fugientes conatus, nec imperio, nec
 auctoritate, nec precibus ad extremum, valuisset.
 Unus remansit M. Licinius Strabo, tribunus mili-
 tum tertiæ legionis, cum tribus signis ab legione sua
 relictus. Hunc, in vacua castra inpetu facto, Istri,
 quum alius armatus iis nemo obviam isset, in præ-
 torio instruentem atque adhortantem suos obpresse-
 runt. Prælium atrocius, quam pro paucitate resis-
 tentium, fuit: nec ante finitum est, quam tribunus
 militum, quique circa eum constiterant, interfecti
 sunt. Prætorio dejecto, direptis, quæ ibi fuerunt,
 ad quæstorium forum quintanamque hostes perve-
 nerunt. Ibi, quum omnium rerum paratam exposi-
 tamque copiam, et stratos lectos in quæstorio inve-
 nissent, regulus adcubans epulari cœpit: mox idem
 ceteri omnes, armorum hostiumque obliti, faciunt:
 et, ut quibus insuetus liberalior victus esset, avidius
 vino ciboque corpora onerant.

Istri epu-
 lantur in
 castris
 Rom.

III. Nequaquam eadem est tum rei forma apud
 Romanos: terra, mari trepidatur: nautici taberna-
 cula detendunt, commeatumque in litore expositum
 in naves rapiunt: milites in scaphas et mare territi
 ruunt: nautæ, metu ne compleantur navigia, alii
 turbæ obsistunt, alii ab litore naves in altum expel-
 lunt: inde certamen, mox etiam pugna cum vulne-
 ribus et cæde in vicem militum nautarumque oritur,
 donec jussu consulis procul a terra classis submota
 est. Secernere inde inermes ab armatis cœpit: vix

mille ducenti ex tanta multitudine, qui arma haberent, perpauci equites, qui equos secum eduxissent, inventi sunt : cetera deformis turba, velut lixarum calonumque, præda vere futura, si belli hostes meminissent. Tunc demum nuncius ad tertiam legionem revocandam, et Gallorum præsidium : et simul ex omnibus locis ad castra recipienda demendamque ignominiam rediri cœptum est. Tribuni militum tertiæ legionis pabulum lignaque projicere jubent : centurionibus imperant, ut graviores ætate milites binos in ea jumenta, ex quibus onera dejecta erant, inponant : equites ut singulos e juvenibus pedites secum in equos tollant. *Egregiam gloriam legionis fore, si castra, metu secundanorum amissa, sua virtute recipiant : et recipi facile esse, si in præda occupati barbari subito obprimantur : sicut ceperint, posse capi.* Summa militum alacritate adhortatio audita est. Ferunt citati signa, nec signiferos armati morantur : priores tamen consul copiæque, quæ a mari reducebantur, ad vallum accesserunt. L. Atius, tribunus primus secundæ legionis, non hortabatur modo milites, sed docebat etiam, *Si victores Istri, quibus armis cepissent castra, iisdem capta retinere in animo haberent, primum exutum castris hostem ad mare persecuturos fuisse, deinde stationes certe pro vallo habituros : vino somnoque verisimile esse mersos jacere.*

IV. Sub hæc A. Bæculonium signiferum suum, notæ fortitudinis virum, inferre signum jussit. Ille, si unum se sequerentur, quo celerius fieret, facturum dixit : connisusque, quum trans vallum signum trajecisset, primus omnium portam intravit. Et parte alia T. et C. Ælij, tribuni militum tertiæ le-

U. C. 574.
A. C. 178.
Recuperant
castra Ro-
mani.

U. C. 574. gionis, cum equitatu adveniunt : confestim, et quos
 A. C. 178. binos oneraria in jumenta inposuerant, secuti, et
 consul cum toto agmine. At Istrorum pauci, qui modice vinosi erant, memores fuerunt fugæ : aliis somno mors continuata est : integraque sua omnia Romani, præterquam quod vini cibique absumtum erat, receperunt. Ægri quoque milites, qui in castris relictæ fuerant, postquam intra vallum suos senserunt, armis adreptis, cædem ingentem fecerunt. Ante omnes insignis opera fuit C. Popillii equitis. Sabello cognomen erat : is, pede saucio relictus, longe plurimos hostium occidit. Ad octo millia Istrorum sunt cæsa, captus nemo, quia ira et indignatio inmemores prædæ fecit. Rex tamen Istrorum, temulentus ex convivio, raptim a suis in equum inpositus, fugit. Ex victoribus ducenti triginta septem milites perierunt, plures in matutina fuga, quam in recipiendis castris.

V. Forte ita evenit, ut Cn. et L. Gavillii, novelli Aquileienses, cum commeatu venientes, ignari prope in capta castra ab Istris inciderent. Ii, quum Aquileiam, relictis impedimentis, refugissent, omnia terrore ac tumultu, non Aquileiæ modo, sed Romæ quoque post paucos dies, inpleverunt : quo, non capta tantum castra ab hostibus, nec fuga, quæ vera erant, sed perditas res deletumque exercitum omnem, adlatum est. Itaque, quod in tumultu fieri solet, delectus extra ordinem, non in urbe tantum, sed tota Italia, indicti. Duæ legiones civium Romanorum conscriptæ, et decem millia peditum cum equitibus quingentis sociis nominis Latini imperata. M. Junius consul transire in Galliam, et ab civitatibus provinciæ ejus, quantum quæque posset, militum exigere jussus. Simul decretum, ut T. Claudius

prætor militibus legionis quartæ, et sociûm Latini U. C. 574.
 nominis quinque millibus, equitibus ducentis quin- A. C. 178.
 quaginta, Pisas ut convenirent, ediceret; eamque
 provinciam, dum consul inde abesset, tutaretur: M.
 Titinius prætor legionem primam, parem numerum
 sociorum peditum equitumque, Ariminum convenire
 juberet. Nero paludatus Pisas in provinciam est
 profectus. Titinius, C. Cassio tribuno militum Ari-
 minum, qui præseset legioni, misso, delectum Romæ
 habuit. M. Junius consul, ex Liguribus in provin-
 ciam Galliam transgressus, auxiliis protinus per ci-
 vitates Galliæ militibusque colonis imperatis, Aqi-
 leiam pervenit. Ibi certior factus, exercitum inco-
 lumem esse, scriptis literis Romam, ne tumultua-
 rentur, ipse, remissis auxiliis, quæ Gallis imperave-
 rat, ad collegam est profectus. Romæ magna ex
 necopinato lætitia fuit: delectus omissus est: ex-
 auctorati, qui sacramento dixerant: et exercitus,
 qui Arimini pestilentia adfectus erat, domum di-
 missus. Istri, magnis copiis quum castra haud pro-
 cul consulis castris haberent, postquam alterum
 consulem cum exercitu novo advenisse audierunt,
 passim in civitates dilapsi sunt: consules Aqi-
 leiam in hiberna legiones reduxerunt.

VI. Sedato tandem Istrico tumultu, senatuscon-
 sultum factum est, ut consules inter se compararent,
 uter eorum ad comitia habenda Romam rediret.
 Quum absentem Manlium tribuni plebis, A. Lici-
 nius Nerva et C. Papirius Turdus, in concionibus
 lacerarent, rogationemque promulgarent, ne Man-
 lius post Idus Martias (prorogatæ namque consuli-
 bus jam in annum provinciæ erant) imperium reti-
 neret, uti caussam extemplo dicere, quum abisset

U. C. 574. magistratu, posset; huic rogationi Q. Ælius collega
 A. C. 178. intercessit, magnisque contentionibus obtinuit, ne
 perferretur. Per eos dies Ti. Sempronius Gracchus
 et L. Postumius Albinus ex Hispania Romam quum
 revertissent, senatus iis a M. Titinio prætore datus
 in æde Bellonæ ad disserendas res, quas gessissent,
 postulandosque honores meritos, ut Diis immorta-
 libus haberetur honos. Eodem tempore et in Sar-
 Sardinia magnum tumultum esse, literis T. Æbutii
 Sardinia tumultus. prætoris cognitum est, quas filius ejus ad senatum
 adtulerat. Ilienses, adjunctis Balarorum auxiliis,
 pacatam provinciam invaserant: nec eis invalido
 exercitu, et magna parte pestilentia absumto, resisti
 poterat. Eadem et Sardorum legati nunciabant;
 orantes, ut urbibus saltem (jam enim agros deplora-
 tos esse) opem senatus ferret. Hæc legatio, totum-
 que quod ad Sardiniam pertinebat, ad novos magis-
 tratus rejectum est. Æque miserabilis legatio Ly-
 Lyciorum querelæ. ciorum, qui crudelitatem Rhodiorum, quibus ab L.
 Cornelio Scipione adtributi erant, querebantur:
*Fuisse sub ditione Antiochi; eam regiam servitutem,
 conlatam cum præsentī statu, præclaram libertatem vi-
 sam: non publico tantum se premi imperio, sed singu-
 los justum pati servitium: juxta se conjuges liberosque
 vexari; in corpus, in tergum sæviri; famam, quod in-
 dignum sit, maculari dehonestarique: et palam res
 odiosas fieri, juris etiam usurpandi caussa; ne pro du-
 bio habeant, nihil inter se et argento parata mancipia
 interesse. Motus his senatus, literas Lyciis ad Rho-
 dios dedit: nec Lycios Rhodiis, nec ullos alicuiquam,
 qui nati liberi sint, in servitutem dari placere. Lycios
 ita sub Rhodiorum simul imperio et tutela esse, ut in
 ditione populi Romani civitates sociæ sint.*

VII. Triumphi deinde ex Hispania duo continui U. C. 574.
 acti. Prior Sempronius Gracchus de Celtiberis so- A. C. 178.
 ciisque eorum; postero die L. Postumius de Lusitanis aliisque ejusdem regionis Hispanis triumphavit: quadraginta millia pondo argenti Ti. Gracchus transtulit, viginti millia Albinus. Militibus denarios quinos vicanos, duplex centurioni, triplex equiti ambo dividerunt: sociis tantumdem, quantum Romanis. Per eosdem forte dies M. Junius consul ex Istria comitiorum caussa Romam venit. Eum quum in senatu fatigassent interrogationibus tribuni plebis Papirius et Licinius de his, quæ in Istria essent acta, in concionem quoque produxerunt. Ad quæ quum consul, *se dies non plus undecim in ea provincia fuisse, responderet; quæ se absente acta essent, se quoque, ut illos, fama comperta habere; exsequebantur deinde quærentes, Quid ita non potius A. Manlius Romam venisset, ut rationem redderet populo Romano, cur ex Gallia provincia, quam sortitus esset, in Istriam transisset? quando id bellum senatus decrevisset, quando id bellum populus Romanus jussisset? At, Hercule, privato quidem consilio bellum susceptum esse, sed gestum prudenter fortiterque. Immo, utrum susceptum sit nequius, an inconsultius gestum, dici non posse. Stationes duas necopinantes ab Istris obpressas, castra Romana capta, quod peditum, quod equitum in castris fuerit: ceteros inermes fusosque, ante omnes consulem ipsum, ad mare ac naves fugisse. Privatum rationem redditurum earum rerum esse, quoniam consul noluisse.*

VIII. Comitia deinde habita: consules creati, C. U. C. 575.
 Claudius Pulcher, Ti. Sempronius Gracchus: et po- A. C. 177.
 stero die prætores facti, P. Ælius Tubero iterum,

U. C. 573. C. Quinctius Flaminius, C. Numisius, C. Mum-
 A. C. 177. mius, Cn. Cornelius Scipio, C. Valerius Lævinus.

Tuberoni urbana jurisdictio, Quinctio peregrina evenit, Numisio Sicilia, Mummio Sardinia : sed ea propter belli magnitudinem provincia consularis facta. Gracchus eam sortitur, Istriam Claudius ; Scipio et Lævinus Galliam, in duas divisam provincias, sortiti sunt. Idibus Martiis, quo die Sempronius Claudiusque consulatum inierunt, mentio tantum de provinciis Sardinia Istriaque et utriusque hostibus fuit, qui in his provinciis bellum concivissent. Postero die legati Sardorum ; qui ad novos magistratus dilati erant, L. Minucius Thermus, qui legatus Manlii consulis in Istria fuerat, in senatum venit. Ab his edoctus est senatus, quantum belli eæ provinciæ haberent. Moverunt senatum et legationes sociûm nominis Latini, quæ et censores et priores consules fatigaverunt, tandem in senatum introductæ. Summa querelarum erat, *Cives suos Romæ censos plerosque Romam connigrasse. Quod si permittatur, perpauca lustris futurum, ut deserta oppida, deserti agri, nullum militem dare possent. Fregellas quoque millia quatuor familiarum transisse ab se, Samnites Pelignique querebantur : neque eo minus aut hos aut illos in delectum militum dare. Genera autem fraudis duo mutandæ viritim civitatis inducta erant. Lex sociis ac nominis Latini, qui stirpem ex sese domi relinquerent, dabat, ut cives Romani fierent : ea lege male utendo, alii sociis, alii populo Romano injuriam faciebant. Nam et, ne stirpem domi relinquerent, liberos suos quibusquibus Romanis in eam conditionem, ut manumitterentur, mancipio dabant, libertinique cives es-*

Latinorum
querelæ.

sent : et quibus stirpes deesset, quam relinquerent, U. C. 575.
 ut cives Romani fiebant. Postea, his quoque ima- A. C. 177.
 ginibus juris spretis, promiscue sine lege, sine
 stirpe, in civitatem Romanam per migrationem et
 censum transibant. *Hæc ne postea fierent*, petebant
 legati, et ut redire in civitates juberent socios ; deinde
 ut lege caverent, ne quis quem civitatis mutandæ caussa
 suum faceret, neve alienaret : et, si quis ita civis Ro-
 manus factus esset * *. Hæc inpetrata ab senatu.

IX. Provinciæ deinde, quæ in bello erant, Sardi-
 nia atque Istria decretæ. In Sardiniam duæ legio-
 nes scribi jussæ ; quina millia in singulas et duceni
 pedites, treceni equites ; et duodecim millia peditum
 sociorum ac Latini nominis, et sexcenti equi-
 tes, et decem quinqueres naves, si deducere ex
 navalibus vellet. Tantumdem peditum equitumque
 in Istriam, quantum in Sardiniam, decretum. Et
 legionem unam cum equitibus trecentis, et quinque
 millia peditum sociorum, et ducentos quinquaginta
 mittere equites in Hispaniam consules ad M. Titi-
 nium jussi. Priusquam consules provincias sorti-
 rentur, prodigia nunciata sunt. Lapidem in agro
 Crustumino in lacum Martis de cœlo cecidisse.
 Puerum trunci corporis in agro Romano natum, et
 quadrupedem anguem visum : et Capuæ multa in
 foro ædificia de cœlo tacta : et Puteolis duas naves
 fulminis ictu concrematas esse. Inter hæc quæ
 nunciabantur, lupus etiam Romæ interdiu agitato,
 quum Collina porta intrasset, per Esquilinam mag-
 no consecantium tumultu evasit. Eorum prodigio-
 rum caussa consules majores hostias inmolarunt, et
 diem unum circa omnia pulvinaria supplicatio fuit.
 Sacrificiis rite perfectis, provincias sortiti sunt :

U. C. 575. Claudio Istria, Sempronio Sardinia obvenit. Legem
 A. C. 177. dein de sociis C. Claudius tulit senatusconsulto, et
 Lex de edixit: *qui socii ac nominis Latini, ipsi majoresve eo-*
 Latinis. *rum, M. Claudio, T. Quinctio censoribus, postque ea,*
apud socios nominis Latini censi essent, ut omnes in
suam quisque civitatem ante Kalendas Novembres redi-
rent. Quæstio, qui ita non redissent, L. Mummio
 prætori decreta est: ad legem et edictum consulis
 senatusconsultum adjectum est: *ut, dictator, consul,*
interrex, censor, prætor qui nunc esset, apud eorum
quem manumitteretur, in libertatem vindicaretur, ut
jusjurandum daret, qui eum manumitteret, civitatis
mutandæ caussa manu non mittere: qui id non jura-
 ret, eum manumittendum non censuerunt. Hæc in
 posterum caussa jurisque dictio C. Claudio consuli
 decreta est.

Res in
 Istria ges-
 tæ a Ro-
 manis.

X. Dum hæc Romæ geruntur, M. Junius et A.
 Manlius, qui priore anno consules fuerant, quum
 Aquileiæ hibernassent, principio veris in fines Istro-
 rum exercitum introduxerunt: ubi quum effuse po-
 pularentur, dolor magis et indignatio diripi res suas
 cernentes Istros, quam certa spes, satis sibi virium
 adversus duos exercitus, excivit: concursu ex om-
 nibus populis juventutis facto, repentinus et tumultu-
 rius exercitus acrius primo inpetu, quam perse-
 verantius, pugnavit. Ad quatuor millia eorum in
 acie cæsa: ceteri, omisso bello, in civitates passim
 diffugerunt: inde legatos primum ad pacem peten-
 dam in castra Romana, deinde obsides imperatos,
 miserunt. Hæc quum Romæ cognita literis pro-
 consulum essent, C. Claudius consul, veritus, ne
 forte ea res provinciam exercitumque sibi adimeret,
 non votis nuncupatis, non paludatus, sine lictori-

bus, uno omnium certiore facto collega, nocte pro-^{U. C. 575.}
 fectus, præceps in provinciam abiit: ubi inconsul-^{A. C. 177.}
 tius, quam venerat, se gessit: nam, quum concione
 advocata fugam e castris A. Manlii adversis auribus
 militum (quippe qui primi ipsi fugissent) jactasset,
 ingessissetque probra M. Junio, quod se dedecoris
 socium collegæ fecisset, ad extremum utrumque de-
 cedere provincia jussit. Quod quum milites consulis
 imperio dicto audientes futuros esse dicerent, quum
 is more majorum, secundum vota in Capitolio nuncu-
 pata, cum lictoribus, paludatus profectus ab urbe
 esset; furens ira, vocatum, qui pro quæstore Manlii
 erat, catenas poposcit, vinctos se Junium Manlium-
 que minitans Romam missurum. Ab eo quoque
 spretum consulis imperium est: et circumfusus ex-
 ercitus, favens imperatorum causæ, et consuli in-
 festus, animos ad non parendum addebat. Postremo
 fatigatus consul et contumeliis singulorum, et mul-
 titudinis (nam insuper inridebant) ludibriis, nave
 eadem, qua venerat, Aquileiam rediit. Inde collegæ
 scripsit, ut militum novorum ei parti, quæ scripta
 in Istriam provinciam esset, ediceret, Aquileiam ut
 conveniret; ne quid se Romæ teneret, quo minus,
 votis nuncupatis, paludatus ab urbe exiret. Hæc
 collegæ obsequenter facta, brevisque dies ad conve-
 niendum edicta est. Claudius prope consecutus est
 literas suas. Concione adveniens de Manlio et Ju-
 nio habita, non ultra triduum moratus Romæ, palu-
 datus, cum lictoribus, votisque in Capitolio nuncu-
 patis, in provinciam, æque ac prius, præcipiti cele-
 ritate abit.

XI. Paucis ante diebus Junius Manliusque oppi-^{Nesattium.}
 dam Nesattium, quo se principes Istrorum et regu-^{Claudius}
^{obsidet.}

U. C. 575. lus ipse Æpulo receperat, summa vi obpugnarunt.

A. C. 177. Eo Claudius duabus legionibus novis adductis, vetere exercitu cum suis ducibus dimisso, ipse oppidum circumscedit, et vineis obpugnare intendit: omnemque præterfluentem mœnia, qui et inpedimento obpugnantibus erat, et auationem Istris præbebat, multorum dierum opere exceptum novo alveo avertit. Ea res barbaros miraculo terruit abscisæ aquæ: et ne tum quidem memores pacis, in cædem conjugum ac liberorum versi; etiam, ut spectaculo hostibus tam fœdum facinus esset, palam in muris trucidatos præcipitabant. Inter simul complorationem feminarum puerorumque, simul nefandam cædem, milites, transgressi murum, oppidum intrarunt: cujus capti tumultum ut ex pavido clamore fugientium accepit rex, trajecit ferro pectus, ne vivus caperetur: ceteri capti, aut occisi. Duo deinde oppida, Mutila et Faveria, vi capta et deleta. Præda, ut in gente inopi, spe major fuit, et omnis militibus concessa est. Quinque millia capitum sexcenta triginta duo sub corona venierunt: auctores belli virgis cæsi, et securi percussi. Istria tota trium oppidorum excidio et morte regis pacata est: omnesque undique populi, obsidibus datis, in ditionem venerunt. Sub Istrici finem belli apud Ligures concilia de bello haberi cœpta.

Furor oppidano-
rum.

Istria pacata.

XII. Ti. Claudius proconsul, qui prætor priore anno fuerat, cum præsidio legionis unius Pisis præerat: cujus literis senatus certior factus, eas ipsas literas ad C. Claudium (nam alter consul jam in Sardiniam trajecerat) deferendas censet: et adjicit decretum; *quoniam Istria provincia confecta esset, si ei videretur, exercitum traduceret in Ligures.* Simul ex

literis consulis, quas de rebus in Istria gestis scrip- U. C. 573.
 serat, in biduum supplicatio decreta. Et ab altero A. C. 177.
 consule Ti. Sempronio in Sardinia prospere res
 gestæ. Exercitum in agrum Sardorum Iliensium Res in Sar-
 induxit. Balarorum magna auxilia Iliensibus vene- dinia gestæ.
 rant. Cum utraque gente signis conlatis confligit :
 fusi fugatique hostes, castrisque exuti : duodecim
 millia armatorum cæsa. Postero die arma lecta con-
 jici in acervum jussit consul, sacrumque id Vulcano
 cremavit. Victorem exercitum in hiberna sociarum
 urbium reduxit. Et C. Claudius, literis Ti. Claudii Ligures
 et senatusconsulto accepto, ex Istria legiones in Li- victi a
 gures transduxit. Ad Scultennam flumen in campos Claudio.
 progressi castra habebant hostes. Ibi cum his acie
 dimicatum : quindecim millia cæsa ; plus septingenti
 aut in prælio, aut in castris (nam ea quoque expug-
 nata sunt) capti : et signa militaria unum et quin-
 quaginta capta. Ligures, reliquæ cædis, in montes
 refugerunt passim : populantique campestris agros
 consuli nulla usquam adparuerunt arma. Claudius,
 duarum gentium uno anno victor, duabus, quod raro
 alius, in consulatu pacatis provinciis, Romam re-
 vertit.

XIII. Prodigia eo anno nunciata : in Crustumino
 avem sangualem (quam vocant) sacrum lapidem
 rostro cecidisse. Bovem in Campania locutum. Vac-
 cam æneam Syracusis ab agresti tauro, qui pecore
 aberrasset, initam, ac semine adpersam. In Crus-
 tumino diem unum in ipso loco supplicatio fuit : et
 in Campania bos alenda publice data : Syracusa-
 numque prodigium expiatum, editis ab aruspibus
 Diis, quibus supplicaretur. Pontifex eo anno mor-
 tuus est M. Claudius Marcellus, qui consul censor-

U. C. 575. que fuerat: in ejus locum subfectus est pontifex
 A. C. 177. filius ejus M. Marcellus: et Lunam colonia eodem
 anno duo millia civium Romanorum sunt deducta.
 Triumviri deduxerunt, P. Ælius, L. Egilius, Cn.
 Sicinius: quinquagena et singula jugera et semisses
 agri in singulos dati sunt: de Ligure captus is ager
 erat: Etruscorum ante, quam Ligurum, fuerat. C.
 Claudius consul ad urbem venit: cui, quum in se-
 natu de rebus in Istria Liguribusque prospere gestis
 disseruisset, postulanti triumphus est decretus: tri-
 umphavit in magistratu de duabus simul gentibus.
 Tulit in eo triumpho denariûm trecenta septem mil-
 lia, et victoriatûm octoginta quinque millia septin-
 gentos duos: militibus in singulos quini deni de-
 narii dati: duplex centurioni, triplex equiti. Sociis
 dimidio minus, quam civibus, datum: itaque taciti,
 ut iratos esse sentires, secuti sunt currum.

Ligures
 rebellant.

XIV. Dum is triumphus de Liguribus agebatur,
 Ligures, postquam senserunt, non consularem tan-
 tum exercitum Romam abductum, sed legionem ab
 Ti. Claudio Pisis dimissam, soluti metu, clam exer-
 citu indicto, per transversos limites superatis mon-
 tibus, in campos degressi, agrum Mutinensem po-
 pulati, repentino inpetu coloniam ipsam ceperunt.
 Id ubi Romam adlatum est, senatus C. Claudium
 consulem comitia primo quoque tempore habere jus-
 sit, creatisque in annum magistratibus in provinciam
 redire, et coloniam ex hostibus eripere. Ita, uti
 censuit senatus, comitia habita. Consules creati,
 Cn. Cornelius Scipio Hispallus, Q. Petillius Spuri-
 nus. Prætores inde facti, M. Popillius Lænas, P.
 Licinius Crassus, M. Cornelius Scipio, L. Papirius
 Maso, M. Aburius, L. Aquillius Gallus. C. Claudio

consuli prorogatum in annum imperium, et Gallia ^{U. C. 573.}
 provincia: et, ne Istri quoque idem, quod et Ligures, ^{A. C. 177.}
 facerent, socios nominis Latini in Istriam mitteret,
 quos triumphi caussa de provincia deduxisset. Cn.
 Cornelio et Q. Petillio consulibus, quo die magistra- ^{U. C. 576.}
 tum inierunt, immolantibus Jovi singulis bubus, uti ^{A. C. 176.}
 solet, in ea hostia, qua Q. Petillius sacrificavit, in
 jocinore caput non inventum: id quum ad senatum
 retulisset, bove perlitare jussus. De provinciis deinde
 consultus senatus Pisas et Ligures provincias con-
 sulibus decrevit. Cui Pisæ provincia obvenisset,
 quum magistratuum creandorum tempus esset, ad
 comitia reverti jussit: additum decreto, ut binas le-
 giones novas scriberent, et trecenos equites; et dena
 millia peditum sociis nominique Latino, et sexcenos
 imperarent equites. Ti. Claudio prorogatum est im-
 perium in id tempus, quo in provinciam consul ve-
 nisset.

XV. Dum de his rebus in senatu agitur, Cn. Cor-
 nelius, evocatus a viatore, quum templo egressus
 esset, paullo post rediit confuso vultu, et exposuit
 Patribus conscriptis, bovis sescenaris, quem inmo-
 lavisset, jecur defluxisse: id se victimario nuncianti
 parum credentem, ipsum aquam effundi ex olla, ubi
 exta coquerentur, jussisse: et vidisse ceteram inte-
 gram partem extorum, jecur omne inenarrabiliter
 absumtum. Territis eo prodigio Patribus, et alter
 consul curam adjecit: qui se, quod caput jocinori
 defuisset, tribus bubus perlitasse negavit. Senatus
 majoribus hostiis usque ad litationem sacrificari jus-
 sit. Ceteris Diis perlitatum ferunt: Saluti Petillium
 perlitasse negant. Inde consules prætoresque pro-
 vincias sortiti. Pisæ Cn. Cornelio, Ligures Petillio

U. C. 576. obvenerunt. Prætores, L. Papirius Maso urbanam,
 A. C. 176. M. Aburius inter peregrinos, sortiti sunt. M. Cornelius Scipio Maluginensis Hispaniam ulteriorem, L. Aquillius Gallus Siciliam habuit. Duo deprecati sunt, ne in provincias irent: M. Popillius in Sardiniam. *Gracchum eam provinciam pacare, et T. Æbutium prætorem adiutorem ab senatu datum esse. Interrumpi tenorem rerum, in quibus peragendis continuatio ipsa efficacissima esset, minime convenire. Inter traditionem imperii novitatemque successoris, quæ noscendis prius, quam agendis, rebus inbuenda sit, sæpe bene gerendæ rei occasiones intercideret.* Probata Popillii excusatio est. P. Licinius Crassus sacrificiis se inpediri sollemnibus excusabat, ne in provinciam iret. Citerior Hispania obvenerat. Ceterum aut ire iussus, aut jurare pro concione, sollemni sacrificio se prohiberi: id ubi in P. Licinio ita statutum est, et ab se uti jusjurandum acciperent M. Cornelius postulavit, ne in Hispaniam ulteriorem iret. Prætores ambo in eadem verba jurejurarunt. M. Titinius et T. Fonteius proconsules manere cum eodem imperii jure in Hispania jussi: et ut in supplementum his tria millia civium Romanorum cum equitibus ducentis, quinque millia sociûm Latini nominis et trecenti equites mitterentur.

XVI. Latinæ feriæ fuere ante diem tertium Nonas Maii, in quibus, quia in una hostia magistratus Lanuvinus precatus non erat, *populo Romano Quiritium*, religioni fuit. Id quum ad senatum relatum esset, senatusque ad pontificum collegium rejecisset; pontificibus, quia non recte factæ Latinæ essent, instauratis Latinis, placuit Lanuvinos, quorum opera instauratæ essent, hostias præbere. Accesserat ad

religionem, quod Cn. Cornelius consul, ex monte Al-
 bano rediens, concidit: et, parte membrorum cap-
 tus, ad Aquas Cumanas profectus ingravescente mor-
 bo, Cumis decessit. Sed inde mortuus Romam ad-
 latus, et funere magnifico elatus sepultusque est.
 Pontifex idem fuerat. Consul Q. Petillius, quum
 primum per auspicia posset, collegæ subrogando
 comitia habere iussus, et Latinas edicere: comitia in
 ante diem tertium Nonas Sextiles, Latinas in ante
 diem tertium Idus Sextiles edixit. Plenis religio-
 num animis, prodigia insuper nunciata: Tusculi fa-
 cem in cœlo visam, Gabiis ædem Apollinis et privata
 ædificia complura, Graviscis murum portamque de
 cœlo tacta. Ea patres procurari, uti pontifices cen-
 suissent, jusserunt. Dum consules primum religio-
 nes, deinde alterum alterius mors, et comitia, et La-
 tinarum instaurationes impediunt, interim C. Clau-
 dius exercitum ad Mutinam, quam Ligures priore
 anno ceperant, admovit. Ante triduum, quam ob-
 pugnare cœperat, receptam ex hostibus colonis re-
 stituit. Octo millia ibi Ligurum intra muros cæsa;
 literæque Romam extemplo scriptæ, quibus non mo-
 do rem exponeret, sed etiam gloriaretur, sua virtute
 ac felicitate neminem jam cis Alpes hostem populi
 Romani: agrique aliquantum captum, qui multis
 millibus hominum dividi viritim posset.

XVII. Et Ti. Sempronius eodem tempore in Sar-
 dinia multis secundis præliis Sardos perdomuit: ^{Sardinia}
 quindecim millia hostium sunt cæsa. Omnes Sar-
 dorum populi, qui defecerant, in ditionem redacti:
 stipendiariis veteribus duplex vectigal imperatum,
 exactumque: ceteri frumentum contulerunt. Pacata
 provincia, obsidibusque ex tota insula ducentis tri-

U. C. 576.

A. C. 176.

pacata.

U. C. 576. ginta acceptis, legati Romam, qui ea nunciarent, A. C. 176. missi; quique ab senatu peterent, ut ob eas res, ductu auspicioque Ti. Sempronii prospere gestas, Diis immortalibus honos haberetur, ipsique decedenti de provincia exercitum secum deportare liceret. Senatus, in æde Apollinis legatorum verbis auditis, supplicationem in biduum decrevit, et quadraginta majoribus hostiis consules sacrificare jussit: Ti. Sempronium proconsulem exercitumque eo anno in provincia manere. Comititia deinde consulis unius subrogandi, quæ in ante diem tertium Nonas Sextiles edicta erant, eo ipso die sunt confecta. Q. Petillius consul collegam, qui extemplo magistratum occiperet, creavit C. Valerium Lævinum. Is, jam diu cupidus provinciæ, quum opportuniæ cupiditati ejus literæ adlatæ essent, Ligures rebellasse, Nonis Sextilibus paludatus, literis auditis, tumultus ejus caussa legionem tertiam ad C. Claudium proconsulem in Galliam proficisci jussit; et duumviros navales cum classe Pisas ire, qui Ligurum oram, maritimum quoque terrorem admoventes, circumvectarentur. Eodem et Q. Petillius consul ad conveniendum exercitui diem edixerat. Et C. Claudius proconsul, audita rebellionem Ligurum, præter eas copias, quas secum Parmæ habebat, subitariis conlectis militibus, exercitum ad fines Ligurum admovit.

Res in
Liguria
gestæ.

XVIII. Hostes sub adventum C. Claudii, a quo duce se meminerant nuper ad Scultennam flumen victos fugatosque, locorum magis præsidio adversus infeliciter expertam vim, quam armis, se defensuri, duos montes Letum et Balistam ceperunt, muroque insuper amplexi. Tardius ex agris demigrantes oppressi ad mille et quingentos perierunt. Ceteri

montibus se tenebant, et, ne in metu quidem ferita-
tis ingenitæ obliti, sæviunt in prædam, quæ Mutinæ
parta erat: captivos cum fœda laceratione interfici-
unt; pecora in fanis trucidant verius passim, quam
rite sacrificant. Satiati cæde animantium, quæ ina-
nima erant, parietibus adfligunt, vasa omnis generis
usui magis, quam ornamento in speciem, facta. Q.
Petillius consul, ne absente se debellaretur, literas
ad C. Claudium misit, ut cum exercitu ad se in Gal-
liam veniret: campis Macris se eum expectaturum.
Literis acceptis, Claudius ex Liguribus castra movit,
exercitumque ad campos Macros consuli tradidit.
Eodem paucis post diebus C. Valerius consul alter
venit. Ibi, divisis copiis, priusquam digrederentur,
communiter ambo exercitus lustraverunt: tum sor-
titi, quia non ab eadem utrumque parte adgredi hos-
tem placebat, regiones quas peterent. Valerium
auspicato sortitum constat, quod in templo fuisset:
in Petillio id vitio factum, postea augures responde-
runt; quod extra templum sortem in sitellam in tem-
plum latam foris ipse posuerit. Profecti inde in di-
versas regiones. Petillius adversus Balistæ et Leti
jugum, quod eos montes perpetuo dorso inter se jun-
git, castra habuit. Ibi adhortantem eum pro con-
cione milites, inmemorem ambiguitatis verbi, omi-
natum ferunt, *se eo die Letum capturum esse*. Dua-
bus simul partibus subire in adversos montes cœpit.
Ea pars, in qua ipse erat, inpigre succedebat. Alte-
ram hostes quum propulissent, ut restitueret rem in-
clinatam, consul equo advectus, suos quidem a fuga
revocavit: ipse, dum incautius ante signa obversa-
tur, missili trajectus cecidit. Nec hostes ducem oc-
cisum senserunt; et suorum pauci, qui viderant,

U. C. 576.

A. C. 176.

U. C. 576. haud negligenter, ut qui in eo victoriam verti scirent,
 A. C. 176. corpus occultavere. Alia multitudo peditum equi-
 tumque, deturbatis hostibus, montes sine duce ce-
 pere. Ad quinque millia Ligurum occisa: ex Ro-
 mano exercitu duo et quinquaginta ceciderunt. Su-
 per tam evidentem tristis ominis eventum, etiam ex
 pullario auditum est, vitium in auspicio fuisse; nec
 id consulem ignorasse. C. Valerius, audita

* * * *

periti religionum jurisque publici, quando duo ordi-
 narii consules ejus anni, alter morbo, alter ferro pe-
 riisset, subfectum consulem negabant recte comitia
 habere posse.

* * * *

deduxit.

XIX. Cis Apenninum Garuli, et Lopicini, et
 Hercates; trans Apenninum Brinates fuerant. In-
 ter Audenam amnem P. Mucius cum iis, qui Lunani
 Pisasque depopulati erant, bellum gessit: omnibus-
 que in ditionem redactis arma ademit. Ob eas res,
 in Gallia Liguribusque gestas duorum consulum
 ductu auspicioque, senatus in triduum supplicationes
 decrevit, et quadraginta hostiis sacrificari jussit. Et
 tumultus quidem Gallicus et Ligustinus, qui prin-
 cipio ejus anni exortus fuerat, haud magno conatu
 brevi obpressus erat. Belli Macedonici subibat jam
 cura, miscente Perseo inter Dardanos Bastarnasque
 certamina: et legati, qui missi ad res visendas in
 Macedoniam erant, jam reverterant Romam, renun-
 ciaverantque, bellum in Dardania esse. Simul ve-
 nerant et ab rege Perseo oratores, qui purgarent,

Bellum
 inter Dar-
 danos et
 Bastarnas.

nec ad citos ab eo Bastarnas, nec auctore eo quidquam facere. Senatus nec liberavit ejus culpæ regem, neque arguit: moneri eum tantummodo jussit, ut etiam atque etiam curaret, ut sanctum haberet fœdus, quod ei cum Romanis esse videri posset. Dardani, quum Bastarnas non modo non excedere finibus suis, quod speraverant, sed graviores fieri in dies cernerent, subnisos Thracum adcolarum et Scordiscorum auxiliis, audendum aliquid vel temere rati, omnes undique armati ad oppidum, quod proximum castris Bastarnarum erat, conveniunt. Hiems erat, et id anni tempus elegerant, ut Thraces Scordiscique in fines suos abirent: quod ubi ita factum, et solos jam esse Bastarnas audierunt, bifariam dividunt copias: pars, ut recto itinere ad lacessendum ex aperto iret; pars, devio saltu circumducta, ab tergo adgrederetur. Ceterum, priusquam circumire castra hostium possent, pugnatum est; victique Dardani compelluntur in urbem, quæ fere duodecim millia ab castris Bastarnarum aberat. Victores confestim circumsidunt urbem, haud dubie postero die aut metu dedituris se hostibus, aut vi expugnaturi. Interim Dardanorum altera manus, quæ circumducta erat, ignara cladis suorum, castra Bastarnarum sine præsidio relicta

*

*

*

*

XX. *** more, sella eburnea posita, jus dicebat, disceptabatque controversias minimarum rerum: adeoque nulli fortunæ adhærebat animus, per omnia genera vitæ errans, uti nec sibi, nec aliis, quinam homo esset, satis constaret. Non adloqui amicos,

U. C. 577. vix notis familiariter adridere ; munificentia inæquali
 A. C. 175. sese aliosque ludificari : quibusdam honoratis magnoque æstimantibus se puerilia, ut escæ aut lusus, munera dare ; alios nihil expectantes ditare. Itaque nescire, quid sibi vellet, quibusdam videri : quidam ludere eum simpliciter, quidam haud dubie insanire aiebant. In duabus tamen magnis honestisque rebus vere regius erat animus, in urbium donis, et Deorum cultu. Megalopolitanis in Arcadia murum se circumdaturum urbi est pollicitus, majoremque partem pecuniæ dedit. Tegeæ theatrum magnificum e marmore facere instituit. Cyzici in Prytaneum, (id est penetrale urbis, ubi publice, quibus is honos datus est, vescuntur) vasa aurea mensæ unius posuit. Rhodiis, ut nihil unum insigne, ita omnis generis, ut quæque usus eorum postulaverunt, dona dedit. Magnificentia vero in Deos vel Jovis Olympii templum Athenis, unum in terris inchoatum pro magnitudine Dei, potest testis esse. Sed et Delon aris insignibus statuarumque copia exornavit : et Antiochiæ Jovis Capitolini magnificum templum, non laqueatum auro tantum, sed parietibus totis lamina inauratum, et alia multa in aliis locis pollicitus, quia perbreve tempus regni ejus fuit, non perfecit. Spectaculorum quoque omnis generis magnificentia superiores reges vicit ; reliquorum sui moris, et copia Græcorum artificum. Gladiatorum munus Romanæ consuetudinis primo majore cum terrore hominum, insuetorum ad tale spectaculum, quam voluptate, dedit : deinde sæpius dando, et modo vulneribus tenuis, modo sine missione etiam, et familiare oculis gratumque id spectaculum fecit, et armorum studium plerisque juvenum accendit. Itaque, qui primo ab

Roma magnis præmiis paratos gladiatores arcessere solitus erat, jam suo

* * * *

XXI. *** pio inter peregrinos. M. Atilio præ- U. C. 578.
tori provincia Sardinia obvenerat : sed cum legione A. C. 174.
nova, quam consules conscripserant, quinque milli-
bus peditum, trecentis equitibus, in Corsicam jussus
est transire : dum is ibi bellum gereret, Cornelio
prorogatum imperium, uti obtineret Sardiniam. Cn.
Servilio Cæpioni in Hispaniam ulteriorem, et P.
Furio Philo in citeriorem tria millia peditum Roma-
norum, equites centum quinquaginta, et sociûm La-
tini nominis quinque millia peditum, trecenti equi-
tes : Sicilia L. Claudio sine supplemento decreta.
Duas præterea legiones consules scribere jussi, cum
justo numero peditum equitumque, et decem millia
peditum sociis imperare, et sexcentos equites. De-
lectus consulibus eo difficilior erat, quod pestilentia,
quæ priore anno in boves ingruerat, eo verteret in
hominum morbos : qui inciderant, haud facile sep-
timum diem superabant ; qui superaverant, longin-
quo, maxime quartanæ, implicabantur morbo. Ser-
vitia maxime moriebantur : eorum strages per om-
nes vias insepultorum erat. Ne liberorum quidem
funeribus Libitina subiciebat. Cadavera, intacta a
canibus ac vulturibus, tabes absuniebant : satisque
constabat, nec illo, nec priore anno, in tanta strage
boum hominumque vulturium usquam visum. Sa-
cerdotes publici ea pestilentia mortui sunt, Cn. Ser-
vilius Cæpio pontifex, pater prætoris, et Ti. Sem-
pronius Ti. F. Longus decemvir sacrorum, et P.
Ælius Pætus augur, et Ti. Sempronius Gracchus, et

U. C. 578. C. Mamilius Vitulus curio maximus, et M. Sempronius Tuditanus pontifex : pontifices subfecti sunt, C. Sulpicius Galba * * * in locum Tuditani. Augures subfecti sunt, in Gracchi locum T. Veturius Gracchus Sempronianus, in P. Ælii Q. Ælius Pætus. Decemvir sacrorum C. Sempronius Longus, curio maximus C. Scribonius Curio subficitur. Quum pestilentiaë finis non fieret, senatus decrevit, uti decemviri libros Sibyllinos adirent. Ex decreto eorum diem unum supplicatio fuit : et, Q. Martio Philippo verba præeunte, populus in foro votum concepit : *Si morbus pestilentiaque ex agro Romano emota esset, biduum ferias ac supplicationem se habiturum.* In Veienti agro biceps natus puer, et Si-nuessæ unimanus, et Auximi puella cum dentibus ; et arcus interdiu sereno cœlo super ædem Saturni in foro Romano intentus, et tres simul soles effulserunt : et faces eadem nocte plures per cœlum lapsæ sunt in Lanuvino : Cæritesque anguem in oppido suo jubatum, aureis maculis sparsum, adparuisse adfirmabant : et, in agro Campano bovem locutum esse, satis constabat.

XXII. Legati Nonis Juniis ex Africa redierunt, qui, convento prius Masinissa rege, Karthaginem ierant : ceterum certius aliquanto, quæ Karthagine acta essent, ab rege rescierant, quam ab ipsis Karthaginensibus : compertum tamen adfirmaverunt, legatos ab rege Perseo venisse, iisque noctu senatum in æde Æsculapii datum esse : ab Karthagine legatos in Macedoniam missos, et rex adfirmaverat, et ipsi parum constanter negaverant. In Macedoniam quoque mittendos legatos senatus censuit : tres missi sunt, C. Lælius, M. Valerius Messalla,

Sex. Digitius. Perseus per id tempus, quia quidam U. C. 578.
 Dolopum non parebant, et, de quibus ambigebatur A. C. 174.
 rebus, disceptationem ab rege ad Romanos revoca-
 bant, cum exercitu profectus, sub jus iudiciumque
 suum totam coëgit gentem. Inde, per Cætæos mon- Persei iter
 tes transgressus, religionibus quibusdam animo ob- ad Delphos.
 jectis, oraculum aditurus Delphos adscendit. Quum
 in media repente Græcia adparuisset, magnum non
 finitimis modo urbibus terrorem præbuit, sed in
 Asiam quoque ad regem Eumenem nuncius tumultus
 ejus venit. Triduum, non plus, Delphis moratus,
 per Phthiotidem Achaïam, Thessaliamque, sine
 damno injuriaque agrorum, per quos iter fecit, in
 regnum rediit. Nec earum tantum civitatum, per
 quas iturus erat, satis habuit animos sibi conciliare:
 aut legatos, aut literas dimisit, petens, *ne diutius si-*
multatum, quæ cum patre suo fuissent, meminissent:
nec enim tam atroces fuisse eas, ut non cum ipso po-
tuerint, ac debuerint, finire. Secum quidem omnia
illis integra esse ad instituendam fideliter amicitiam.
 Cum Achæorum maxime gente reconciliandæ gratiæ Achæorum
 viam quærebat. animos sibi
reconciliare
tentat.

XXIII. Hæc una ex omni Græcia gens, et Athe-
 niensium civitas, eo processerat irarum, ut finibus
 interdiceret Macedonibus. Itaque servitiis ex A-
 chaïa fugientibus receptaculum Macedonia erat:
 quia, quum finibus suis interdixissent, intrare regni
 terminos ipsi non audebant. Id quum Perseus
 animadvertisset, comprehensis omnibus, literas * * *:
 ceterum, ne similis fuga servorum postea fieret, co-
 gitandum et illis esse. Recitatis his literis per Xe-
 narchum prætorem, qui privatæ gratiæ aditum apud
 regem quærebat, et plerisque moderate et benignè

U. C. 578. scriptas esse censentibus literas, atque his maxime,
 A. C. 174. qui præter spem recepturi essent amissa mancipia ;
 Callicratis Callicrates ex iis, qui in eo verti salutem gentis cre-
 adversus derent, si cum Romanis inviolatum foedus servare-
 regem o- tur, *Parva, inquit, aut mediocris res, Achæi, quibus-*
 ratio. *dam videtur agi ; ego maxime gravissimam omnium,*
non agique tantum arbitror, sed quodam modo actam
esse. Nam qui regibus Macedonum, Macedonibusque
ipsis, finibus interdixissemus, manereque id decretum,
scilicet, ne legatos, ne nunciosmitteremus regum,
per quos aliquorum ex nobis animi sollicitarentur ; ii
concionantem quodam modo absentem audimus regem,
et, si Diis placet, orationem ejus probamus. Et, quum
feræ bestiae cibum ad fraudem suam positum plerumque
adspernentur et refugiant, nos cæci, specie parvi bene-
ficii, inescamur : et, servulorum minimi pretii reci-
piendorum spe, nostram ipsorum libertatem subruï et
tentari patimur. Quis enim non videt, viam regiæ so-
cietatis quæri, qua Romanum foedus, quo nostra omnia
continentur, violetur ? Nisi hoc dubium alicui est, bel-
landum Romanis cum Perseo esse, et, quod vivo Phi-
lippo expectatum, morte ejus interpellatum est, id post
mortem Philippi futurum. Duos, ut scitis, habuit fi-
lios Philippus, Demetrium et Persea. Genere mater-
no, virtute, ingenio, favore Macedonum, longe præsti-
tit Demetrius. Sed quia in Romanos odii regnum po-
suerat præmium, Demetrium nullo alio crimine, quam
Romanæ amicitiae initæ, occidit : Persea, quem popu-
lus Romanus prius pænæ, quam regni, hæredem futu-
rum sciebat, regem fecit. Itaque quid hic post mor-
tem patris egit aliud, quam bellum paravit ? Bastar-
nas primum ad terrorem omnium in Dardaniam inmi-
sit : qui si sedem eam tenuissent, graviores eos adcolas

Græcia habuisset, quam Asia Gallos habeat. Ea spe depulsus, non tamen belli consilia omisit: immo, si vera volumus dicere, jam inchoavit bellum. Dolopiam armis subegit, nec provinciis de controversis ad disputationem populum Romanum adivit. Inde, transgressus Ætam, ut repente in medio umbilico Græciæ conspiceretur, Delphos adscendit. Hæc usurpatio itineris insoliti quo vobis spectare videtur? Thessaliam deinde peragravit: quod sine ullius eorum, quos oderat, noxia, hoc magis tentationem metuo. Inde literas ad nos cum muneris specie misit, et cogitare jubet, quo modo in reliquum hoc munere non egeamus; hoc est, ut decretum, quo arcentur Peloponneso Macedones, tollamus; rursus legatos regios, et hospitia cum principibus, et mox Macedonum exercitus, ipsum quoque a Delphis (quantum enim interluit fretum?) trajicientem in Peloponnesum videamus, inmisceamur Macedonibus armantibus se adversus Romanos. Ego nihil novi censeo decernendum, servandaque omnia integra, donec ad certum dirigatur, vanusne hic timor noster, an verus fuerit. Si pax inviolata inter Macedonas Romanosque manebit, nobis quoque amicitia et commercium sit: nunc de eo cogitare periculosum et inmatuum videtur.

XXIV. Post hunc Arco, frater Xenarchi prætoris, ita disseruit: *Difficilem orationem Callicrates, et mihi, et omnibus, qui ab eo dissentimus, fecit: agendo enim Romanæ societatis causam ipse, tentarique et obpugnari dicendo, quam nemo neque tentat, neque obpugnat, effecit, ut, qui ab se dissentiret, adversus Romanos dicere videretur. Ac primum omnium, tamquam non hic nobiscum fuisset, sed aut ex curia populi Romani veniret, aut regum arcanis interesset, omnia*

Arco Callicrates respondet.

U. C. 578. scit et nunciat, quæ occulte facta sunt. Divinat etiam,
 A. C. 174. quæ futura fuerant, si Philippus vixisset: quid ita
 Perseus regni hæres sit, quid parent Macedones, quid
 cogitent Romani. Nos autem, qui, nec ob quam caus-
 sam, nec quemadmodum perierit Demetrius, scimus;
 nec quid Philippus, si vixisset, facturum fuerat, ad hæc,
 quæ palam geruntur, consilia nostra adcommode
 oportet. Ac scimus, Persea, regno accepto, ad legatos
 Romanos venisse, ac regem Persea a populo Romano
 adpellatum: audimus, legatos Romanos venisse ad re-
 gem, et eos benigne exceptos. Hæc omnia pacis equi-
 dem signa esse judico, non belli: nec Romanos offendi
 posse, si, ut bellum gerentes eos secuti sumus, nunc quo-
 que pacis auctores sequamur: cur quidem nos inexpi-
 abile omnium soli bellum adversus regnum Macedonum
 geramus, non video. Opportuni propinquitate ipsa
 Macedonia sumus; an infirmissimi omnium, tamquam,
 quos nuper subjecit, Dolopes? immo contra ea, vel vi-
 ribus nostris, Deum benignitate, vel regionis intervallo
 tuti. Sed sumus æque subjecti ac Thessali Ætolique;
 nihilo plus fidei auctoritatisque habemus adversus Ro-
 manos, qui semper socii atque amici fuimus, quam
 Ætoli, qui paullo ante hostes fuerunt. Quod Ætolis,
 quod Thessalis, quod Epirotis, omni denique Græciæ
 cum Macedonibus juris est, idem et nobis sit: cur ex-
 secrabilis ista nobis solis velut desertio juris humani
 est? Fecerit aliquid Philippus, cur adversus eum ar-
 matum et bellum gerentem hoc decerneremus: quid
 Perseus, novus rex, omnis injuriæ insons, suo beneficio
 paternas simultates obliterans, meruit? cur soli omni-
 um hostes ei sumus? Quamquam et illud dicere pote-
 ram, tanta priorum Macedonia regum merita erga nos
 fuisse, ut Philippi unius injurias, si quæ forte fuerunt,

* *utique post mortem. Quum classis Romana Cenchreis staret, consul cum exercitu Elatiæ esset, triduum in concilio fuimus, consultantes, utrum Romanos, an Philippum, sequeremur. Nonnihil metus præsens ab Romanis sententias nostras inclinarit: fuit certe tamen aliquid, quod tam longam deliberationem fecerat: id quod erat vetusta conjunctio cum Macedonibus, vetera et magna in nos regum merita. Valeant et nunc eadem illa, non ut præcipue amici, sed ne præcipue inimici simus. Ne id, quod non agitur, Callicrates, simulaverimus: nemo novæ societatis aut novi fœderis, quo nos temere inligemus, conscribendi est auctor: sed commercium tantum juris præbendi repetendique sit, ne interdictione finium nostrorum et nos quoque regno arceamus, ne servis nostris aliquo fugere liceat. Quid hoc adversus Romana fœdera est? Quid rem parvam et apertam, magnam et suspectam facimus? Quid vanos tumultus ciemus? Quid, ut ipsi locum adsentandi Romanis habeamus, suspectos alios ac invisos efficimus? Si bellum erit, ne Perseus quidem dubitat, quin Romanos secuturi simus: in pace etiam, si non odia finiuntur, intermittantur. Quum iidem huic orationi, qui literis regis adsentierant, adsentirentur, indignatione principum, quod, quam rem ne legatione quidem dignam judicasset Perseus, literis paucorum versuum inpetraret, decretum differtur. Legati deinde postea missi ab rege, quum Megalopoli concilium esset; dataque opera est ab iis, qui offensio-*
nem apud Romanos timebant, ne admitterentur.

U. C. 578.
A. C. 174.

Nihil novi
statuunt
Achæi.

XXV. Per hæc tempora Ætolorum in semet ipsos versus furor mutuis cædibus ad internecionem adducturus videbatur gentem. Fessi deinde et Romanam utraque pars miserunt legatos, et inter se ipsi

Ætolorum
discordiæ.

U. C. 578. de reconcilianda concordia agebant : quæ novo facinore discussa res veteres etiam iras excitavit. Exsulibus Hypatæis, qui factionis Proxeni erant, quum reditus in patriam promissus esset, fidesque data per principem civitatis Eupolemum, octoginta inlustres homines, quibus redeuntibus inter ceteram multitudinem Eupolemus etiam obvius exierat, quum salutatione benigne excepti essent, dextræque datæ, ingredientiæ portam, fidem datam Deosque testes nequidquam invocantes, interfecti sunt. Inde gravius de integro bellum exarsit. C. Valerius Lævinus, et Ap. Claudius Pulcher, et C. Memmius, et M. Popilius, et L. Canuleius missi ab senatu venerant. Apud eos quum Delphis utriusque partis legati magno certamine agerent, Proxenus maxime, quum caussa, tum eloquentia, præstare visus est ; qui paucos post dies ab Orthobula uxore veneno est sublatu : damnataque eo crimine, in exilium abiit. Idem furor et Cretenses lacerabat : adventu deinde Q. Minucii legati, qui cum decem navibus missus ad sedanda eorum certamina erat, in spem pacis venerant : ceterum induciæ et antea sex mensium fuerunt : inde multo gravius bellum exarsit. Lycii quoque per idem tempus ab Rhodiis bello vexabantur. Sed externorum inter se bella, quo quæque modo gesta sunt, persequi non operæ est satis superque oneris sustinenti res a populo Romano gestas scribere.

Cretensium dissidia.

Celtiberorum rebellio.

XXVI. Celtiberi in Hispania, qui bello domiti se Ti. Graccho dediderant, pacati manserant M. Titinio prætore obtinente provinciam : rebellarunt sub adventum Ap. Claudii, orsique bellum sunt ab repentina obpugnatione castrorum Romanorum. Pri-

ma lux ferme erat, quum vigiles in vallo, quique in U. C. 573.
 portarum stationibus erant, quum vidissent procul A. C. 174.
 venientem hostem, ad arma conclamaverunt. Ap.
 Claudius, signo proposito pugnæ, ac paucis adhortatus milites, tribus simul portis eduxit. Obsistentibus ad exitum Celtiberis, primo par utrumque prælium fuit, quia propter angustias non omnes in faucibus pugnare poterant Romani: urgentes deinde alii alios secuti evaserunt extra vallum, ut pandere aciem, et exæquari cornibus hostibus, quibus circumibantur, possent: ita repente eruperunt, ut sustinere inpetum eorum Celtiberi nequirent. Ante horam secundam pulsati sunt: ad quindecim millia cæsa aut capta: signa ademta duo et triginta. Castra etiam eo die expugnata, debellatumque: nam, qui superfuere prælio, in oppida sua dilapsi sunt: quieti deinde paruerunt imperio.

XXVII. Censores eo anno creati Q. Fulvius Flaccus et A. Postumius Albinus legerunt senatum: princeps lectus M. Æmilius Lepidus pontifex maximus. De senatu novem ejecerunt: insignes notæ fuerunt M. Cornelii Maluginensis, qui biennio ante prætor in Hispania fuerat; et L. Cornelii Scipionis prætoris, cujus tum inter cives et peregrinos jurisdictio erat; et Cn. Fulvii, qui frater germanus et, ut Valerius Antias tradit, consors etiam censoris erat. Consules, votis etiam in Capitolio nuncupatis, in provincias profecti sunt. Ex iis M. Æmilio senatus negotium dedit, ut Patavinorum in Venetia seditionem comprimeret, quos certamine factionum ad intestinum bellum exarsisse, et ipsorum legati adtulerant. Legati, qui in Ætoliæ ad similes motus comprimendos ierant, renunciarunt, coërceri ra-

U. C. 578. biem gentis non posse. Patavinis saluti fuit adven-
 A. C. 174. tus consulis : neque aliud, quod ageret in provincia,
 quum habuisset, Romam rediit. Censores vias ster-
 nendas silice in urbe, glareâ extra urbem substruen-
 das marginandasque primi omnium locaverunt, pon-
 tesque multis locis faciendos : et scenam ædilibus
 prætoribusque præbendam : et carceres in circo, et
 ova ad notas curriculis numerandis, et * dam, et
 metas trans * et caveas ferreas pe * intromitte-
 rentur * ferreis in monte Albano consulibus, et cli-
 vum Capitolinum silice sternendum curaverunt, et
 porticum ab æde Saturni in Capitolium ad senacu-
 lum, ac super id curiam. Et extra portam Trige-
 minam emporium lapide straverunt, stipitibusque
 sepperunt : et porticum Æmiliam reficiendam cura-
 runt : gradibusque adscensum ab Tiberi in empo-
 rium fecerunt : et extra eandem portam in Aventi-
 num porticum silice straverunt, et eo publico ab
 æde Veneris fecerunt. Iidem Calatiæ et Auximi
 muros faciendos locaverunt : venditisque ibi publi-
 cis locis, pecuniam, quæ redacta erat, tabernis utri-
 que foro circumdandis consumserunt : et alter ex iis
 Fulvius Flaccus (nam Postumius nihil, nisi senatus
 Romani populive jussu, se locaturum ipsorum pecu-
 nia *) Jovis ædem Pisauri, et Fundis, et Pollentiæ
 etiam aquam adducendam, et Pisauri viam silice
 sternendam, et Sinuessam a ga * aviariæ. In his
 et clo * um circumducend * et forum porticibus
 tabernisque claudendum, et Janos tres faciendos.
 Hæc ab uno censore opera locata, cum magna gra-
 tia colonorum. Moribus quoque regendis diligen-
 et severa censura fuit : multis equi ademti.

XXVIII. Exitu prope anni diem unum supplica-

tio fuit ob res prospere gestas in Hispania ductu ^{U. C. 578.}
auspicioque Ap. Claudii proconsulis : et majoribus ^{A. C. 174.}
hostiis viginti sacrificatum : et alterum diem supplicatio ad Cereris, Liberi, Liberæque fuit, quod ex Sabinis terræ motus ingens cum multis ædificiorum ruinis nunciatus erat. Quum Ap. Claudius ex Hispania Romam redisset, decrevit senatus, ut ovans urbem iniret. Jam consularia comitia adpetebant ; quibus, magna contentione habitis propter multitudinem petentium, creati L. Postumius Albinus et M. Popillius Lænas. Prætores inde facti, N. Fabius Buteo, M. Matienus, C. Cicereius, M. Furius Crassipes iterum, A. Atilius Serranus iterum, C. Cluvius Saxula iterum. Comitiis perfectis, Ap. Claudius Centho, ex Celtiberis ovans quum in urbem iniret, decem millia pondo argenti, quinque millia auri in ærarium tulit. Flamen Dialis inauguratus est Cn. Cornelius. Eodem anno tabula in ædem Matris Matutæ cum indice hoc posita est : *Ti. Sempronii Gracchi consulis imperio auspicioque legio exercitusque populi Romani Sardiniam subegit : in ea provincia hostium cæsa aut capta supra octoginta millia. Republica felicissime gesta, atque liberatis vectigalibus * restitutis, exercitum salvum atque incolumem plenissimum præda domum reportavit : iterum triumphans in urbem Romam rediit. Cujus rei ergo hanc tabulam donum Jovi dedit.* Sardinia insulæ forma erat, atque in ea simulacra pugnarum picta. Munera gladiatorum eo anno aliquot parva alia data ; unum ante cetera insigne fuit T. Flaminini, quod mortis caussa patris sui, cum visceratione epuloque et ludis scenicis, quatrimum dedit : magni tamen muneris ea summa fuit, ut per triduum quatuor et septuaginta homines pugnarint. * * * *

EPITOME LIBRI XLII.

Q. *FULVIUS FLACCUS* censor templum *Junonis* *Laciniae* tegulis marmoreis spoliavit, ut ædem, quam dedicabat, tegeret: tegulæ ex senatusconsulto reportatæ. *Eumenes*, *Asiæ* rex, in senatu de *Perseo*, *Macedoniæ* rege, questus est: cujus injuriæ in populum *Romanum* referuntur: ob quas bello ei indicto, *P. Licinius Crassus* consul, cui id mandatum erat, in *Macedoniam* transiit, levibusque expeditionibus, equestribus præliis, in *Thessalia* cum *Perseo* parum felici eventu pugnavit. Inter *Masinissam* et *Karthaginienses* de agro fuit arbiter ad disceptandum a senatu datus. Legati missi ad civitates socias et reges rogandos, ut in fide permanerent, dubitantibus *Rhodiis*. Lustrum a censoribus conditum est. Censa sunt civium capita ducenta quinquaginta septem millia ducenta triginta unum. Res præterea adversus *Corsos* et *Ligures* prospere gestas continet.

T. LIVII PATAVINI

LIBER XLII.

L. POSTUMIUS ALBINUS, M. Popillius Læ- U. C. 579.
nas quum omnium primum de provinciis exer- A. C. 173.
citibusque ad senatum retulissent, Ligures utrique
decreti sunt: ut novas ambo, quibus eam provin-
ciam obtinerent, legiones, (binæ singulis decretæ)
et sociûm Latini nominis dena millia peditum et
sexcenos equites, et supplementum Hispaniæ tria
millia peditum Romanorum scriberent, et ducentos
equites. Ad hoc mille et quingenti pedites Romani
cum centum equitibus scribi jussi; cum quibus
prætor, cui Sardinia obtigisset, in Corsicam trans-
gressus bellum gereret; interim M. Atilius, vetus
prætor, provinciam obtineret Sardiniam. Prætores
deinde provincias sortiti sunt, A. Atilius Serranus
urbanam, C. Cluvius Saxula inter cives et peregri-
nos, N. Fabius Buteo Hispaniam citeriorem, M.
Matienus ulteriorem, M. Furius Crassipes Siciliam,
C. Cicereius Sardiniam. Priusquam magistratus pro-
ficiscerentur, senatui placuit, L. Postumium consu-
lem ad agrum publicum a privato terminandum in
Campaniam ire; cujus ingentem modum possidere
privatos, paullatim proferendo fines, constabat. Hic,
iratus Prænестinis, quod, cum eo privatus sacrificii
in templo Fortunæ faciundi caussa profectus esset,
nihil in se honorifice, neque publice, neque priva-

U. C. 579. tim, factum a Prænestinis esset, priusquam ab Roma
 A. C. 173. proficisceretur, literas Præneste misit, ut sibi magistratus obviam exiret, locum publice pararet, ubi diverteretur, jumentaue, quum exiret inde, præsto essent. Ante hunc consulem, nemo umquam sociis in ulla re oneri aut sumtui fuit : ideo magistratus mulis tabernaculisque et omni alio instrumento militari ornabantur, ne quid tale imperarent sociis : privata hospitia habebant ; ea benigne comiterque colebant ; domusque eorum Romæ hospitibus patebant, apud quos ipsis diverti mos esset. Legati, qui repente aliquo mitterentur, singula jumenta per oppida, iter qua faciundum erat, imperabant : aliam inpensam socii in magistratus Romanos non faciebant. Injuria consulis, etiamsi justa, non tamen in magistratu exercenda, et silentium, nimis aut modestum, aut timidum, Prænestinorum jus, velut probato exemplo, magistratibus fecit graviorum in dies talis generis imperiorum.

Magistratum
 Rom. pris-
 ca modes-
 tia.

II. Principio hujus anni legati, qui in Ætoliā et Macedoniam missi erant, renunciarunt, *sibi conveniendi regis Persei, quum alii abesse eum, alii ægrum esse, fulso utrumque, fingerent, potestatem non factam. Facile tamen adparuisse sibi, bellum parari, nec ultra ad arma ire dilaturum. Item in Ætolia seditionem gliscere in dies, neque discordiarum principes auctoritate sua coerceri potuisse. Quum bellum Macedonicum in exspectatione esset, priusquam id susciperetur, prodigia expiari, pacemque Deūm peti precationibus, quæ editæ ex fatalibus libris essent, placuit. Lanuvii classis magnæ species in cœlo visæ dicebantur ; et Priverni lana pulla terra enata ; et in Veienti apud Rementem lapidatum ; Pomptinum*

omne velut nubibus locustarum coopertum esse; in Gallico agro, qua induceretur aratrum, sub exsistentibus glebis pisces emersisse. Ob hæc prodigia libri fatales inspecti, editumque ab decemviris est, et quibus Diis, quibusque hostiis sacrificaretur, et ut supplicatio prodigiis expiandis fieret: altera, quæ priore anno valetudinis populi caussa vota esset, ea uti feriæque essent: itaque sacrificatum est, ut decemviri scriptum ediderunt.

U. C. 579.
A. C. 179.

III. Eodem anno ædis Junonis Laciniae detecta. Q. Fulvius Flaccus censor ædem Fortunæ Equestris, quam in Hispania prætor bello Celtiberico voverat, faciebat eniso studio, ne ullum Romæ amplius aut magnificentius templum esset. Magnum ornamentum se templo ratus adjecturum, si tegulæ marmoreæ essent, profectus in Bruttios, ædem Junonis Laciniae ad partem dimidiam detegit: id satis fore ratus ad tegendum, quod ædificaretur. Naves paratæ fuerunt, quæ tollerent atque asportarent, auctoritate censoria sociis deterritis id sacrilegium prohibere. Postquam censor rediit, tegulæ, expositæ de navibus, ad templum portabantur: quamquam, unde essent, silebatur, non tamen celari potuit. Fremitus igitur in curia ortus est: ex omnibus partibus postulabatur, ut consules eam rem ad senatum referrent. Ut vero arcessitus in curiam censor venit, multo infestius singuli universique præsentem lacerare: *Templum augustissimum regionis ejus, quod non Pyrrhus, non Hannibal violassent, violare parum habuisse, nisi detexisset fæde, ac prope diruisset. Detractum culmen templo, nudatum tectum patere imbribus putrefaciendum: censorem, moribus regendis creatum, cui sarta tecta exigere sacris publicis, et loca*

U. C. 579. *tuenda, more majorum traditum esset ; eum per socio-*
 A. C. 173. *rum urbes diruentem templa, nudantemque tecta æ-*
dium sacrarum, vagari : et, quod, si in privatis socio-
rum ædificiis faceret, indignum videri posset, id Deum
immortalium templa demolientem facere : et obstrin-
gere religione populum Romanum, ruinis templorum
templa ædificantem : tamquam non iidem ubique Dii
immortales sint, sed spoliis aliorum alii colendi exor-
nandique. Quum, priusquam referretur, adpareret,
quid sentirent Patres, relatione facta, in unam om-
nes sententiam ierunt, ut hæ tegulæ reportandæ in
templum locarentur, piaculariaque Junoni fierent.
Quæ ad religionem pertinent, cum cura facta : te-
gulas relictas in area templi, quia reponendarum
nemo artifex inire rationem potuerit, redemptores
nunciarunt.

IV. Ex prætoribus, qui in provincias ierant, N. Fabius Massiliæ moritur, quum in citeriorem Hispaniam iret. Itaque, quum id nunciatum a Massiliensibus legatis esset, senatus decrevit, ut P. Furius et Cn. Servilius, quibus succedebatur, inter se sortirentur, uter citeriorem Hispaniam prorogato imperio obtineret. Sors opportuna fuit ; P. Furius idem, cujus ea provincia fuerat, remaneret. Eodem anno, quum agri Ligustini et Gallici, quod bello captum erat, aliquantum vacaret, senatusconsultum factum, ut is ager viritim divideretur. Decemviros in eam rem ex senatusconsulto creavit A. Atilius prætor urbanus, M. Æmilius Lepidum, C. Cassium, T. Æbutium Carum, C. Tremellium, P. Cornelium Cethegum, Q. et L. Appuleios, M. Cæcilium, C. Sallonium, C. Munatium. Diviserunt dena jugera in singulos, sociis nominis Latini terna. Per idem

tempus, quo hæc agebantur, legati ex Ætolia Ro- U. C. 579.
mam venerunt de discordiis seditionibusque suis, et A. C. 173.
Thessali legati, nunciantes, quæ in Macedonia ge-
rerentur.

V. Perseus, jam bellum vivo patre cogitatum in Perseus ani-
animo volvens, omnes, non gentes modo Græciæ, mos Græ-
sed civitates etiam, legationibus mittendis, pollicen- corum sibi
do plura, quam præstando, sibi conciliabat. Erant conciliat.
tamen magna ex parte hominum ad favorem ejus
inclinati animi, et aliquanto quam in Eumenem pro-
pensioniores : quum Eumenis beneficiis muneribusque
omnes Græciæ civitates et plerique principum obli-
gati essent ; et ita se in regno suo gereret, ut, quæ
sub ditione ejus, urbes nullius liberæ civitatis fortu-
nam secum mutatam vellent. Contra Persea fama
erat post patris mortem uxorem manu sua occi-
disse : Apellem, ministrum quondam fraudis in fra-
tre tollendo, atque ob id requisitum a Philippo ad
supplicium, exsulantem, arcessitum post patris mor-
tem ingentibus promissis ad præmia tantæ perpe-
trata rei clam interfecisse : intestinis externisque
præterea multis cædibus infamem, nec ullo commen-
dabilem merito, præferebant vulgo civitates tam-
pio erga propinquos, tam justo in cives, tam muni-
fico erga omnes homines regi, seu fama et majestate
Macedonum regum præoccupati ad spernendam ori-
ginem novi regni ; seu mutationis rerum cupidi ; seu
quia eum objectum esse Romanis volebant. Erant
autem non Ætoli modo in seditionibus, propter in-
gentem vim æris alieni, sed Thessali etiam : ea con-
tagione, velut tabes, in Perrhæbiam quoque id per-
vaserat malum. Quum Thessalos in armis esse
nunciatum est, Ap. Claudium legatum ad eas res ad-

U. C. 579. spiciendas componendasque senatus misit. Qui,
 A. C. 173. utriusque partis principibus castigatis, quum injusto
 fœnore gravatum æs alienum, ipsis magna ex parte
 concedentibus, qui onerarent, levasset, justi crediti
 solutionem in * annorum pensiones distribuit. Per
 eumdem Appium eodemque modo compositæ in Per-
 rhæbia res. Ætolorum caussas Marcellus Delphis
 per idem tempus hostilibus actas animis, quas in-
 testino gesserant bello, cognovit. Quum certatum
 utrimque temeritate atque audacia cerneret, decreto
 quidem suo neutram partem aut levare, aut onerare
 voluit: communiter ab utrisque petiit, abstinerent
 bello, et oblivione præteritorum discordias finirent.
 Hujus reconciliationis inter ipsos fides obsidibus ul-
 tro citroque datis firmata est. Corinthum, ut ibi
 deponerentur obsides, convenitur.

Legati in
 Macedo-
 niam et
 Ægyptum.

Legati ab
 Antiocho
 Romam
 veniunt.

VI. A Delphis et Ætolico concilio Marcellus in
 Peloponnesum trajecit, quo Achæis edixerat con-
 ventum. Ubi, conlaudata gente, quod constanter
 vetus decretum de arcendis aditu finium regibus
 Macedonum tenuissent, insigne adversus Persea
 odium Romanorum fecit: quod ut maturius erum-
 peret, Eumenes rex, commentarium ferens secum,
 quod de adparatibus belli omnia inquirens fecerat,
 Romam venit. Per idem tempus quinque legati ad
 regem missi, qui res in Macedonia adspicerent.
 Alexandriam iidem ad Ptolemæum renovandæ ami-
 citiæ causa proficisci jussi. Legati erant hi, C. Va-
 lerius, Cn. Lutatius Cerco, Q. Bæbius Sulca, M.
 Cornelius Mammula, M. Cæcilius Denter. Et ab
 Antiocho rege sub idem tempus legati venerunt:
 quorum princeps Apollonius, in senatum introduc-
 tus, multis justisque caussis regem excusavit, *Quod*

stipendium serius quoad diem præstaret : id se omne U. C. 579.
advexisse, ne cuius, nisi temporis, gratia regi fieret. A. C. 178.

Donum præterea adferre, vasa aurea quingentūm pondo. Petere regem, ut, quæ cum patre suo societas atque amicitia fuisset, ea secum renovaretur ; imperaretque sibi populus Romanus, quæ bono fidelique socio regi essent imperanda : se nullo usquam cessaturum officio. Ea merita in se senatus fuisse, quum Romæ esset, eam comitatem juventutis, ut pro rege, non pro obside, omnibus ordinibus fuerit. Legatis benigne responsum, et societatem renovare cum Antiocho, quæ cum patre ejus fuerat, A. Atilius prætor urbanus jussus. Quæstores urbani stipendium, vasa aurea censores acceperunt : eisque negotium datum est, ut ponerent ea, in quibus templis videretur : legatoque centum millium æris munus missum, et ædes liberæ hospitio datæ, sumtusque decretus, donec in Italia esset. Legati, qui in Syria fuerant, renunciaverunt, in maximo eum honore apud regem esse, amicissimumque populo Romano.

VII. In provinciis eo anno hæc. C. Cicereius Corsi victi.
 prætor in Corsica signis conlatis pugnavit : septem millia Corsorum cæsa ; capti amplius mille et septingenti. Voverat in ea pugna prætor ædem Junoni Monetæ. Pax deinde data petentibus Corsis, et exacta ceræ ducena millia pondo. Ex Corsica subacta Cicereius in Sardiniam transmisit. Et in Liguribus in agro Statiellati pugnatum ad oppidum Carystum. Eo se magnus exercitus Ligurum contulerat. Pri- Ligures
 mo sub adventum M. Popillii consulis mœnibus sese quoque
 continebant : deinde, postquam oppidum obpugnaturum Romanum cernebant, progressi ante portas, aciem struxerunt : nec consul (ut qui id ipsum ob-

U. C. 579. pugnatione comminanda quæsisset) moram certamini fecit. Pugnatum est amplius tres horas, ita ut neutro inclinaret spes. Quod ubi consul vidit, nulla parte moveri Ligurum signa, imperat equitibus, ut equos conscendant, ac tribus simul partibus in hostes, quanto maximo possent tumultu, incurrant. Pars magna equitum mediam trajecit aciem, et ad terga pugnantium pervasit. Inde terror injectus Liguribus : diversi in omnes partes fugerunt : perpauci retro in oppidum, quia inde se maxime objecerat eques : et pugna tam pervicax multos absumserat Ligurum, et in fuga passim cæsi sunt. Decem millia hominum cæsa traduntur ; amplius septingenti passim capti : signa militaria relata octoginta duo. Nec incruenta victoria fuit : amplius tria millia militum amissa ; quum, cedentibus neutris, ex parte utraque primores caderent.

VIII. Post hanc pugnam ex diversa fuga in unum conlecti Ligures, quum majorem multo partem civium amissam, quam superesse, cernerent, (nec enim plus decem millia hominum erant) dediderunt sese ; nihil quidem illi pacti : speraverant tamen, non atrocius, quam superiores imperatores, consulem in se sæviturum. At ille arma omnibus ademit, oppidum diruit, ipsos bonaque eorum vendidit : literasque senatui de rebus ab se gestis misit. Quas quum A. Atilius prætor in curia recitasset, (nam consul alter Postumius, agris recognoscendis in Campania occupatus, aberat) atrox res visa senatui : *Statiellates, qui uni ex Ligurum gente non tulissent arma adversus Romanos, tum quoque obpugnatos, non ultro inferentes bellum ; deditos in fidem populi Romani omni ultimæ crudelitatis exemplo laceratos ac*

deletos esse : tot millia capitum innoxiorum, fidem in- U. C. 579.
plorantia populi Romani, ne quis umquam se postea A. C. 173.
dedere auderet, pessimo exemplo venisse : et distrac-
tos passim justis quondam hostibus populi Romani pa-
catis servire. Quas ob res placere senatui, M. Popil-
lium consulem Ligures, pretio emtoribus reddito, ipsos
restituere in libertatem ; bonaque ut iis, quidquid ejus
recuperari possit, reddantur curare. Arma primo quo-
que tempore fieri in ea gente : consulem de provincia
decedere, quum deditos in sedem suam Ligures resti-
tuisset. Claram victoriam vincendo obpugnantes, non
sæviendo in adflictos, fieri.

IX. Consul, qua ferocia animi usus erat in Ligu-
 ribus, eandem ad non parendum senatui habuit.
 Legionibus extemplo Pisas in hibernacula missis,
 iratus Patribus, infestus prætori, Romam rediit : se-
 natuque extemplo ad ædem Bellonæ vocato, multis
 verbis invectus est in prætorem : *qui, quum ob rem*
bello bene gestam, uti Diis immortalibus honos habere-
tur, referre ad senatum debuisset, adversus se pro hosti-
bus senatusconsultum fecisset, quo victoriam suam ad
Ligures transferret, dedique iis prope consulem prætor
juberet. Itaque multam ei se dicere : a Patribus pos-
tulare, ut senatusconsultum in se factum tolli juberent :
supplicationemque, quam absentes ex literis, de bene
gesta republica missis, decernere debuerint, præsentem
honoris Deorum primum caussa, deinde et sui aliquo
tandem respectu, decernerent. Nihil lenioribus,
quam absens, senatorum aliquot orationibus incre-
pitus, neutra inpetrata re, in provinciam redit. Al-
ter consul Postumius, consumpta ætate in recognos-
cendis agris, ne visa quidem provincia sua, comitio-
rum caussa Romam rediit : consules C. Popillium

U. C. 579. Lænatem, P. Ælium Ligurem creavit. Prætores
 A. C. 173. exinde facti C. Licinius Crassus, M. Junius Pennus,
 Sp. Lucretius, Sp. Cluvius, Cn. Sicinius, C. Mem-
 mius iterum.

X. Eo anno lustrum conditum est. Censores e-
 rant Q. Fulvius Flaccus, A. Postumius Albinus.
 Postumius condidit. Censa sunt civium Romano-
 rum capita ducenta sexaginta novem millia et quin-
 decim. Minor aliquanto numerus, quia L. Postu-
 mius consul pro concione edixerat, qui sociûm La-
 tini nominis ex edicto C. Claudii consulis redire in
 civitates suas debuissent, ne quis eorum Romæ, sed
 omnes in suis civitatibus censerentur. Concors et
 e republica censura fuit: omnes, quos senatu move-
 runt, quibusque equos ademerunt, ærarios fecerunt,
 et tribu moverunt: neque ab altero notatum alter
 probavit. Fulvius ædem Fortunæ Equestris, quam
 proconsul in Hispania, dimicans cum Celtiberorum
 legionibus, voverat, annos sex post, quam voverat,
 dedicavit: et scenicos ludos per quatrimum, unum
 diem in circo fecit. L. Cornelius Lentulus, decem-
 vir sacrorum, eo anno mortuus est: in locum ejus
 subfectus A. Postumius Albinus. Locustarum tan-
 tæ nubes a mari vento repente in Apuliam inlatæ
 sunt, ut examinibus suis agros late operirent: ad
 quam pestem frugum tollendam Cn. Sicinius prætor
 designatus, cum imperio in Apuliam missus, ingenti
 agmine hominum ad conligendas eas coacto, ali-
 quantum temporis absumsit. Principium insequen-
 tis anni, quo C. Popillius et P. Ælius fuerunt con-
 sules, residuas contentiones ex priore anno habuit.
 Patres referri de Liguribus, renovarique senatuscon-
 sultum volebant, et consul Ælius referebat. Popil-

Locustæ
 in Apulia.

U. C. 580.
 A. C. 172.

lius et collegam et senatum pro fratre deprecabatur : U. C. 380. præ se ferens, si qui decernerent, intercessurum, A. C. 172. collegam deterruit. Patres, eo magis utrique pariter consulum infensi, in cœpto perstabant. Itaque, quum de provinciis ageretur, et Macedonia, jam imminente Persei bello, peteretur, Ligures ambobus consulibus decernuntur. Macedoniam decreturos negant, ni de M. Popillio referretur. Postulantibus deinde, ut novos exercitus scribere, aut supplementum veteribus liceret, utrumque negatum est. Prætoribus quoque in Hispaniam supplementum petentibus negatum : M. Junio in citeriorem, Sp. Lucretio in ulteriorem. C. Licinius Crassus urbanam jurisdictionem, Cn. Sicinius inter peregrinos erat sortitus, C. Memmius Siciliam, Sp. Cluvius Sardiniam. Consules, ob ea irati senatui, Latinis feriis in primam quamque diem indictis, in provinciam abituros esse denunciarunt ; nec quidquam reipublicæ acturos, præterquam quod ad provinciarum administrationem adtineret.

XI. Attalum, regis Eumenis fratrem, legatum ve- Eumenes Romam venit. nisse Romam, Valerius Antias his consulibus scribit, ad deferenda de Perseo crimina, indicandosque adparatus belli. Plurimum annales, et quibus credidisse malis, ipsum Eumenem venisse tradunt. Eumenes igitur, ut Romam venit, exceptus cum tanto honore, quantum non meritis tantum ejus, sed beneficiis etiam suis, ingentia quæ in eum congesta erant, existimaret deberi populus Romanus, in senatum est introductus. *Caussam veniendi sibi Romam fuisse, dixit, præter cupiditatem visendi Deos hominesque, quorum beneficio in ea fortuna esset, supra quam ne optare quidem auderet, etiam ut coram moneret senatum, ut Persei conatis obviam iret.* Orsus inde a Phi-

U. C. 580. lippi consiliis, necem Demetrii filii retulit, adversantis
 A. C. 172. Romano bello; Bastarnarum gentem excitam sedibus
 Perseum suis, quorum auxiliis fretus in Italiam transiret. Hæc
 suspectum facit eum volutantem in animo, obpressum fato, regnum ei
 Romanis, reliquisse, quem infestissimum esse sensisset Romanis:
 itaque Persea, hæreditarium a patre relictum bellum,
 et simul cum imperio traditum, jamjam primum alere
 ac fovere omnibus consiliis. Florere præterea juventute,
 quam stirpem longa pax ediderit, florere opibus regni,
 florere etiam ætate. Quæ quum corporis robore ac vi-
 ribus vigeat, animum esse inveteratum diutina arte at-
 que usu belli. Jam inde a puero, patris contubernio,
 Romanis quoque bellis, non finitimis tantum, aduetum,
 missum a patre in expeditiones multas variasque. Jam
 ex quo ipse accepisset regnum, multa, quæ non vi, non
 dolo, Philippus, omnia expertus, potuisset moliri, ad-
 mirando rerum successu tenuisse. Accessisse ad vires
 eam, quæ longo tempore, multis magnisque meritis pa-
 reretur, auctoritatem.

XII. Nam apud Græciæ atque Asiæ civitates vereri
 majestatem ejus omnes: nec, pro quibus meritis, pro
 qua munificentia tantum ei tribuatur, cernere: nec di-
 cere pro certo posse, utrum felicitate id quadam ejus
 accadat, an, quod ipse vereatur dicere, invidia adversus
 Romanos favorem illi conciliet. Inter ipsos quoque
 reges ingentem auctoritate; Seleuci filiam duxisse eum,
 non petentem, sed petitem ultro; sororem dedisse Prusiæ
 precanti ac oranti: celebratas esse utrasque nuptias
 gratulatione donisque innumerabilium legationum, et
 velut auspiciis nobilissimis populis deductas esse. Bæo-
 torum gentem, captatam Philippo, numquam ad scri-
 bendum amicitiae fædus adduci potuisse: tribus nunc
 locis cum Perseo fædus incisum literis esse: uno Thebis,

*altero ad Delum, augustissimo et celeberrimo in tem- U. C. 580.
plo, tertio Delphis: in Achaïco concilio vero, nisi dis- A. C. 172.
cussa res per paucos Romanum imperium intentantes
esset, eo rem prope adductam, ut aditus et in Achaiam
daretur. At, Hercule, suos honores, cujus merita in
eam gentem privatim, an publice, sint majora, vix dici
posset, partim desertos per incultum ac negligentiam,
partim hostiliter sublato esse. Jam, Ætolos, quem
ignorare, in seditionibus suis non ab Romanis, sed a
Perseo præsidium petiisse? His eum fultum societati-
bus atque amicitiiis eos domesticos adparatus belli ha-
bere, ut externis non egeat; triginta millia peditum,
quinque millia equitum: in decem annos frumentum
præparare, ut abstinere et suo et hostium agro frumen-
tandi caussa possit. Jam pecuniam tantam habere, ut
decem millibus mercenariorum militum, præter Mace-
donum copias, stipendium in totidem annos præpara-
tum habeat: præter annum, quod ex metollis regiis ca-
piat, vectigal. Arma vel tribus tantis exercitibus in
armamentaria conguessisse. Juventutem, ut jam Mace-
donia deficiat, velut ex perenni fonte unde hauriat,
Thraciam subjectam esse.*

XIII. Reliquum orationis adhortatio fuit. Non Hortatur
ego hæc, inquit, incertis jactata rumoribus, et cupidius ad bellum
credita, quia vera esse de inimico crimina volebam, ad- contra Per-
fero ad vos, Patres conscripti; sed comperta et explo-
rata, haud secus quam si speculator missus a vobis sub-
jecta oculis referrem. Neque, relicto regno meo, quod
amplum et egregium vos fecistis, mare tantum trajecis-
sem, ut vana ad vos adferendo fidem abrogarem mihi.
Cernebam nobilissimas Asiæ et Græciæ civitates, in dies
magis denudantes judicia sua, mox, si permitteretur, eo
processuras, unde receptum ad pœnitendum non habe-

U. C. 580. *rent. Cernebam Persea, non continentem se Macedo-*
 A. C. 172. *niæ regno, alia armis occupantem, alia, quæ vi subigi*
non possunt, favore ac benevolentia complectentem.
Videbam, quam inpar esset sors, quum ille vobis bellum,
vos ei securam pacem præstaretis; quamquam mihi
quidem non parare, sed gerere pene bellum videbatur.
Abrupolim, socium atque amicum vestrum, regno ex-
pulit. Artetarum Illyrium, quia scripta ab eo quædam
vobis comperit, socium item atque amicum vestrum,
interfecit. Eversam et Callicritum Thebanos, princi-
pes civitatis, quia liberius adversus eum in concilio Bæo-
torum locuti fuerant, deluturosque ad vos, quæ age-
rentur, professi erant, tollendos curavit. Auxilium
Byzantiis adversus fædus tulit, Dolopiæ bella intulit,
Thessaliam et Doridem cum exercitu pervasit, ut in
bello intestino deterioris partis auxilio meliorem adfli-
geret. Confudit et miscuit omnia in Thessalia Perrhæ-
biaque spe novarum tabularum, ut manu debitorum ob-
noxia sibi optimates obprimeret. Hæc quum vobis qui-
escentibus et patientibus fecerit, et concessam sibi Græ-
ciam esse a vobis videat; pro certo habet, neminem si-
bi, antequam in Italiam trajecerit, armatum obscursu-
rum. Hoc quam vobis tutum aut honestum sit, vos vi-
deritis: ego certe mihi turpe esse duxi, prius Persea
ad bellum inferendum, quam me socium ad prædicen-
dum, ut caveretis, venire in Italiam. Functus neces-
sario mihi officio, et quodam modo liberata atque exo-
nerata fide mea, quid ultra facere possum, quam uti
Deos Deasque precer, ut vos et vestræ reipublicæ, et
nobis sociis atque amicis, qui ex vobis pendemus, con-
sulatis?

XIV. Hæc oratio movit Patres conscriptos: ce-
 terum in præsentia nihil, præterquam fuisse in curia

regem, scire quisquam potuit: eo silentio clausa curia erat: bello denique perfecto, quæque dicta ab rege, quæque responsa essent, emanavere. Persei deinde regis legatis post paucos dies senatus datus est. Ceterum, præoccupatis non auribus magis, quam animis, ab Eumene rege, omnis et defensio et deprecatio legatorum respuebatur: et exasperavit animos ferocia animi Harpali, qui princeps legationis erat. *Is, velle quidem et laborare, dixit, regem, ut purganti, se nihil hostile dixisse aut fecisse, fides habeatur: ceterum, si pervicacius caussam belli quæri videat, forti animo defensurum se. Martem communem esse, et eventum incertum belli.* Omnibus civitatibus Græciæ atque Asiæ curæ erat, quid Persei legati, quid Eumenes in senatu egisset: et propter adventum ejus, quem moturum aliquid rebantur, miserant pleræque civitates, alia in speciem præferentes, legatos: et legatio Rhodiorum erat, ac Satyrus princeps, haud dubius, quin Eumenes civitatem quoque suam Persei criminibus junxisset. Itaque omni modo per patronos hospitesque disceptandi cum rege locum in senatu quærebat. Quod quum contigisset, libertate intemperantius invecus in regem, quod Lyciorum gentem adversus Rhodios concitasset, graviorque Asiæ esset, quam Antiochus fuisset; popularem quidem ac gratam populis Asiæ (nam eo quoque jam favor Persei venerat) orationem habuit: ceterum invisam senatui, inutilemque sibi et civitati suæ. Eumeni vero conspiratio adversus eum, favorem apud Romanos fecit: ita omnes ei honores habiti, donaque quam amplissima data, cum sella curuli atque eburneo scipione.

U. C. 580.

A. C. 172.

Legati

Persei.

Rhodii

frustra

Eumenem

accusant.

U. C. 580.
A. C. 172.

In Eumenem percussor a Perseo subornati.

XV. Legationibus dimissis, quum Harpalus, quantā eximia celeritate poterat, regressus in Macedoniam, nunciasset regi, nondum quidem parantes bellum reliquisse se Romanos, sed ita infestos, ut facile adpareret, non dilaturos; et ipse, præterquam quod et ita credebat futurum, jam etiam volebat, in flore virum se credens esse. Eumeni ante omnes infestus erat: a cujus sanguine ordiens bellum, Evandrum Cretensem, ducem auxiliorum, et Macedonas tres, adsuetos ministeriis talium facinorum, ad cædem regis subornat: literasque eis dat ad Praxo hospitam, principem auctoritate et opibus Delphorum. Satis constabat, Eumenem, ut sacrificaret Apollini, Delphos adscensurum. Progressi cum Evandro insidiatores, nihil aliud ad peragendum inceptum, quam loci opportunitatem, omnia circumeuntes, quærebant. Adscendentibus ad templum a Cirrha, priusquam perveniretur ad frequentia ædificiis loca, maceria erat ab læva semitæ paullum exstans a fundamento, qua singuli transirent; dextra pars labe terræ in aliquantum altitudinis diruta erat: post maceriam se abdiderunt, gradibus adstructis, ut ex ea, velut e muro, tela in prætereuntem conjicerent. Primo a mari circumfusa turba amicorum ac satellitum procedebat: deinde extenuabant paullatim angustię agmen. Ubi ad eum locum ventum est, qua singulis eundum erat, primus semitam ingressus Pantaleon Ætolię princeps, cum quo institutus regi sermo erat. Tum insidiatores exorti saxa duo ingentia devolvunt: quorum altero caput ictum est regi, altero humerus sopitus: ex semita proclivi in declive multis super prolapsum jam saxis congestis, et ceteri quidem

etiam amicorum et satellitum, postquam cadentem U. C. 589. videre, diffugiunt, Pantaleon constanter inpavidus A. C. 172. mansit ad protegendum regem.

XVI. Latrones, quum brevi circumitu maceriæ decurrere ad conficiendum saucium possent, velut perfecta re, in jugum Parnasi refugerunt eo cursu, ut, quum unus non facile sequendo per invia atque ardua moraretur fugam eorum, ne comprehenso indicium emanaret, occiderint comitem. Ad corpus re- Eumenes
gis primo amici, deinde satellites ac servi concurre- sopitus
runt, tollentes sopitum vulnere ac nihil sentientem. vulnere
tollitur. Vivere tamen ex calore et spiritu remanente in præcordiis senserunt; victurum exigua ac prope nulla spes erat. Quidam ex satellitibus, secuti latronum vestigia, quum usque ad jugum Parnasi, nequidquam fatigati, pervenissent, re infecta redierunt. Adgressi facinus Macedones, ut inconsulte, ita audacter coeptum, nec consulte et timide reliquerunt. Com-
potem jam sui regem amici postero die deferunt ad navem: inde Corinthum: a Corintho, per Isthmi jugum navibus traductis, Æginam trajiciunt. Ibi adeo secreta ejus curatio fuit, admittentibus nemi- Convales-
nem, ut fama mortuum in Asiam perferret. Attalus cit.
quoque celerius, quam dignum concordia fraterna erat, credidit: nam et cum uxore fratris, et præfecto arci, tamquam jam haud dubius regni hæres, est locutus. Quæ postea non fefellere Eumenem: et, quamquam dissimulare et tacite habere id patique statuerat, tamen in primo congressu non temperavit, quin uxoris petendæ præmaturam festinationem fratri objiceret. Romam quoque fama de morte Eumenis perlata est.

XVII. Sub idem tempus C. Valerius ex Græcia,
VOL. IV. Q

U. C. 580. qui legatus ad visendum statum regionis ejus specu-
 A. C. 172. landaque consilia Persei regis missus erat, rediit;
 congruentiaque omnia criminibus ab Eumene adlatis
 referebat: simul et adduxerat secum Praxo a Del-
 phis, cujus domus receptaculum latronum fuerat, et
 L. Rammium Brundisinum, qui talis indicii delator
 erat. Princeps Brundisii Rammius fuit; hospitio
 quoque et duces Romanos omnes, et legatos extera-
 rum quoque gentium insignes, præcipue regios, ac-
 cipiebat: ex eo notitia ei cum absente Perseo fuerat:
 literisque spem amicitiae interioris magnæque inde
 fortunæ facientibus, ad regem profectus, brevi per-
 familiaris haberi, trahique, magis quam vellet, in ar-
 canos sermones est cœptus. Promissis enim ingen-
 tibus præmiis petere institit ab eo rex, *Quoniam du-
 ces omnes legatique Romani hospitio ejus uti adsuissent,
 quibus eorum ipse scripsisset, ut venenum dandum cu-
 raret: cujus scire se comparisonem plurimum difficul-
 tatis et periculi habere, pluribus consociis comparari:
 eventu præterea incerto esse, ut aut satis efficacia ad
 rem peragendam, aut tuta ad rem celandam dentur.
 Se daturum, quod nec in dando, nec datum, ullo signo
 deprendi posset.* Rammius, veritus ne, si abnuisset,
 primus ipse veneni experimentum esset, facturum
 pollicitus proficiscitur: nec Brundisium ante redire,
 quam convento C. Valerio legato, qui circa Chalci-
 dem esse dicebatur, voluit. Ad eum primum indicio
 delato, jussu ejus Romam simul venit. Introductus
 in curiam, quæ acta erant, exposuit.

Paratur
 bellum
 in Persea.

XVIII. Hæc ad ea, quæ ab Eumene delata erant,
 accessere, quo maturius hostis Persens judicaretur:
 quippe quem non justum modo adparare bellum regio
 animo, sed per omnia clandestina grassari scelera la-

trociniarum ac veneficiarum cernebant. Belli ad-
ministratio ad novos consules rejecta est: in præ-
sentia tamen Cn. Sicinium prætorem, cujus inter
cives et peregrinos jurisdictio erat, scribere milites
placuit; qui, Brundisium ducti, primo quoque tem-
pore Apolloniam in Epirum trajicerentur ad occu-
pandas maritimas urbes, ubi consul, cui provincia
Macedonia obvenisset, classem adpellere tuto, et
copias per commodum exponere posset. Eumenes,
aliquamdiu Æginæ retentus periculosa et difficili cu-
ratione, quum primum tuto potuit, profectus Perga-
mum, præter pristinum odium recenti etiam scelere
Persei stimulante, summa vi parabat bellum. Legati
eo ab Roma, gratulantes quod e tanto periculo eva-
sisset, venerunt. Quum Macedonicum bellum in an-
num dilatum esset, ceteris prætoribus jam in provin-
cias profectis, M. Junius et Sp. Lucretius, quibus
Hispaniæ provinciæ obvenerant, fatigato sæpe idem
petendo senatu, tandem pervicerunt, ut supplemen-
tum sibi ad exercitum daretur tria millia peditum,
centum et quinquaginta equites in Romanas legio-
nes: in socialem exercitum quinque millia peditum,
et trecentos equites, imperare sociis jussi. Hoc co-
piarum in Hispanias cum prætoribus novis porta-
tum est.

XIX. Eodem anno, quia per recognitionem Pos-
tumii consulis magna pars agri Campani, quem pri-
vati sine discrimine passim possederant, recuperata
in publicum erat, M. Lucretius tribunus plebis pro-
mulgavit, ut agrum Campanum censores fruendum
locarent: quod factum tot annis post captam Ca-
puam non fuerat, ut in vacuo vagaretur cupiditas
privatorum. Quum in expectatione senatus esset,

U. C. 580. bello etiam non indicto, tamen jam decreto, qui regum
 A. C. 172. suam, Persei qui secuturi amicitiam essent, legati
 Ariarathis Ariarathis, puerum filium regis secum adducentes,
 filius Ro- Romam venerunt: quorum oratio fuit, *regem edu-*
 mæ. *candum filium Romam misisse, ut jam inde a puero*
adsuesceret moribus Romanis hominibusque. Petere,
ut eum non sub hospitum modo privatorum custodia,
sed publicæ etiam curæ ac velut tutelæ vellent esse.
 Ea regis legatio grata senatui fuit. Decreverunt, ut
 Cn. Sicinius prætor ædes instructas locaret, ubi filius
 regis comitesque ejus habitare possent. Et Thracum
 legatis, apud se disceptantibus, et societatem ami-
 citiamque petentibus, et, quod petebant, datum est,
 et munera binum millium æris summæ in singulos
 missa. Hos utique populos, quod ab tergo Mace-
 doniæ Thracia esset, adsumptos in societatem gaude-
 bant. Sed ut in Asia quoque et insulis explorata
 omnia essent, Ti. Claudium Neronem, M. Decimium
 legatos miserunt: adire eos Cretam et Rhodum jus-
 serunt, simul renovare amicitiam, simul speculari,
 num sollicitati animi sociorum ab rege Perseo es-
 sent.

XX. In suspensa civitate ad expectationem novi
 belli, nocturna tempestate columna rostrata in Ca-
 pitolio * bello Punico consulis, cui collega Ser. Ful-
 vius fuit, tota ad imum fulmine discussa est. Ea
 res, prodigii loco habita, ad senatum relata est. Pa-
 tres ad aruspices referre, et decemviros adire libros
 jusserunt. Decemviri, lustrandum oppidum, sup-
 plicationem obsecrationemque habendam, victimis
 majoribus sacrificandum et in Capitolio Romæ, et
 in Campania ad Minervæ promontorium, renuncia-
 runt: ludos per decem dies Jovi optimo maximo

primo quoque die faciendos. Ea omnia cum cura facta. Aruspices, in bonum versurum id prodigium, prolationemque finium et interitum perduellium portendi, responderunt; quod ex hostibus spolia fuissent ea rostra, quæ tempestas disjecisset. Accesserunt, quæ cumularent religiones animis. Saturniæ, nunciatum erat, sanguine per triduum in oppido pluisse: Calatiæ asinum tripedem natum, et taurum cum quinque vaccis uno ictu fulminis exanimatos. Auximi terra pluisse. Horum quoque prodigiorum caussa res divinæ factæ, et supplicatio unum diem feriæque habitæ.

XXI. Consules ad id tempus in provincias non exierant, quia neque, uti de M. Popillio referrent, senatui obsequabantur, et, nihil aliud decernere prius, statutum Patribus erat. Aucta etiam invidia est Popillii literis ejus, quibus iterum cum Statiellatibus Liguribus proconsul pugnasse se scripsit, ac se decem millia eorum occidisse: propter cujus injuriam belli ceteri quoque Ligurum populi ad arma ierunt. Tum vero non absens modo Popillius, qui deditis contra jus ac fas bellum intulisset, et pacatos ad rebellium incitasset, sed consules, quod non exirent in provinciam, in senatu increpiti: hoc consensu Patrum accensi M. Marcius Sermo et Q. Marcius Scylla, tribuni plebis, et consulibus multam se dicturos, nisi in provinciam exirent, denunciarunt; et rogationem, quam de Liguribus deditis promulgare in animo haberent, in senatu recitarunt. Sanciebatur, ut qui ex Statiellis deditis in libertatem restitutus ante Kalendas Sextiles primas non esset, cujus dolo malo is in servitutem venisset, ut juratus senatus decerneret, qui eam rem quæreretur animadverteretque. Ex

Res in Li-
guria gestæ.

U. C. 580. auctoritate deinde senatus eam rogationem promul-
 A. C. 172. garunt. Priusquam proficiscerentur consules, C. Cicerio prætori prioris anni ad ædem Bellonæ senatus datus est. Is, expositis, quas in Corsica res gessisset, postulatoque frustra triumpho, in monte Albano, quod jam in morem venerat, ut sine publica auctoritate fieret, triumphavit. Rogationem Marciam de Liguribus magno consensu plebes scivit jussitque: ex eo plebiscito C. Licinius prætor consuluit senatum, quem quærere ea rogatione vellet. Patres ipsum eum quærere jusserunt.

XXII. Tum demum consules in provinciam profecti sunt, exercitumque a M. Popillio ceperunt. Neque tamen M. Popillius reverti Romam audebat, ne causam diceret, adverso senatu, infestiore populo, apud prætorem, qui de quæstione in se posita senatum consuluisset. Huic detractationi ejus tribuni plebis, alterius rogationis denunciatione, obcurrerunt: ut, si non ante Idus Novembres in urbem Romam introisset, de absente eo C. Licinius statueret ac judicaret. Hoc tractus vinculo quum redisset, ingenti cum invidia in senatum venit. Ibi quum laceratus jurgiis multorum esset, senatusconsultum factum est, ut, qui Ligurum post Q. Fulvium, L. Manlium consules hostes non fuissent, ut eos C. Licinius, Cn. Sicinius prætores in libertatem restituendos curarent, agrumque iis trans Padum consul C. Popillius daret. Multa millia hominum hoc senatusconsulto restituta in libertatem, transductisque Padum ager est adsignatus. M. Popillius rogatione Marcia bis apud C. Licinium causam dixit: tertio prætor, gratia consulis absentis et Popilliæ familiæ precibus victus, Idibus Martiis adesse reum jussit,

quo die novi magistratus inituri erant honorem ; ne diceret jus, qui privatus futurus esset. Ita rogatio de Liguribus arte fallaci elusa est. U. C. 580.
A. C. 172.

XXIII. Legati Karthaginienses eo tempore Romæ erant, et Gulussa filius Masinissæ : inter eos magnæ contentiones in senatu fuere. Karthaginienses querebantur, præter agrum, de quo ante legati ab Roma, qui in re præsentī cognoscerent, missi essent, amplius septuaginta oppida castellaque agri Karthaginiensis biennio proximo Masinissam vi atque armis possedisse. Id illi, cui nihil pensi sit, facile esse. Karthaginienses fœdere inligatos silere. Prohiberi enim extra fines efferre arma. Quamquam sciant, in suis finibus, si inde Numidas pellerent, se gesturos bellum ; illo haud ambiguo capite fœderis deterri, quo diserte retentur cum sociis populi Romani bellum gerere. Sed jam ultra superbiam crudelitatemque et avaritiam ejus non pati posse Karthaginienses : missos esse, qui orarent senatum, ut trium harum rerum unam ab se inpetrari sinerent : ut vel ex æquo apud socium populum, quid cujusque esset, disceptarent : vel permetterent Karthaginiensibus, ut adversus injusta arma pio justoque se tutarentur bello : vel ad extremum, si gratia plus, quam veritas, apud eos valeret, semel statuerent, quid donatum ex alieno Masinissæ vellent. Modestius certe daturus eos, et scituros, quid dedissent : ipsum nullum, præterquam suæ libidinis arbitrio, finem facturum. Horum si nihil inpetrarent, et aliquod suum post datam a P. Scipione pacem delictum esset, ipsi potius animadverterent in se. Tutam servitutem se sub dominis Romanis, quam libertatem expositam ad injurias Masinissæ, malle. Perire namque semel ipsis satius esse, quam sub acerbissimi carnificis arbitrio spiritum ducere.

U. C. 580. Sub hæc dicta lacrimantes procubuerunt; stratique
A. C. 172. humi, non sibi magis misericordiam, quam regi*.

Gulussa
defendit
patrem.

XXIV. Interrogari Gulussam placuit, quid ad ea responderet, aut, si prius mallet, expromeret, super qua re Romam venisset. Gulussa, *Neque sibi facile esse, dixit, de iis rebus agere, de quibus nihil mandati a patre haberet: neque patri facile fuisse mandare, quum Karthaginienses, nec de qua re acturi essent, nec omnino ituros se Romam, indicaverint. In æde Æsculapii clandestinum eos per aliquot noctes consilium principum habuisse, unde præterea legatos occultis cum mandatis Romam mitti. Eam causam fuisse patri mittendi se Romam, qui deprecaretur senatum, ne quid communibus inimicis criminantibus se crederent, quem ob nullam aliam causam, nisi propter constantem fidem erga populum Romanum, odissent. His utrimque auditis, senatus, de postulatis Karthaginiensium consultus, respondere ita jussit: Gulussam placere ex templo in Numidiam proficisci, et nunciare patri, ut de iis, de quibus Karthaginienses querantur, legatos quamprimum ad senatum mittat; denunciaretque Karthaginiensibus, ut ad disceptandum veniant. Si aliquid possent Masinissæ honoris causa, et fecisse et facturos esse: jus gratiæ non dare. Agrum, qua cujusque sit, possideri velle: nec novos statuere fines, sed veteres observari, in animo habere. Karthaginiensibus victis se et urbes, et agros concessisse; non ut in pace eriperent per injuriam, quæ jure belli non ademissent. Ita regulus Karthaginiensesque dimissi. Munera ex instituto data utrisque, aliaque hospitalia comiter conservata.*

Senatus
respon-
sum.

Legati in
Macedo-
niam mis-
si redeunt.

XXV. Sub idem tempus Cn. Servilius Cæpio, Ap. Claudius Centho, T. Annius Luscus legati, ad res repetendas in Macedoniam renunciandamque ami-

citiam regi missi, redierunt: qui jam sua sponte in- U. C. 580.
festum Persi senatum insuper accenderunt, relatis A. C. 172.
ordine, quæ vidissent, quæque audissent. *Vidisse se
per omnes urbes Macedonum summa vi parari bellum.
Quum ad regem pervenissent, per multos dies conveni-
endi ejus potestatem non factam: postremo, quum des-
perato jam conloquio profecti essent, tum demum se ex
itinere revocatos, et ad eum introductos esse. Suæ ora-
tionis summam fuisse; fædus, cum Philippo ictum, cum
ipso eo post mortem patris renovatum: in quo diserte
prohiberi eum, extra fines arma efferre; prohiberi, socios
populi Romani lacessere bello. Exposita deinde ab se
ordine, quæ ipsi nuper in senatu Eumenem vera omnia
et comperta referentem audissent. Samothracæ præ-
terea per multos dies occultum consilium cum legationi-
bus civitatum Asiæ regem habuisse. Pro his injuriis
satisfieri, senatum æquum censere, reddique sibi res so-
ciisque suis, quas contra jus fæderis habeat. Regem
ad ea primo accensum ira inclementer locutum, avari-
tiam superbiamque Romanis objicientem frequenter:
quod alii super alios legati venirent speculari dicta
factaque sua, quod se ad nutum imperiumque eorum
omnia dicere ac facere æquum censerent. Postremo,
multum ac diu vociferatum, reverti postero die jussisse:
scriptum se responsum dare velle. Tum ita sibi scrip-
tum traditum esse: Fædus, cum patre ictum, ad se ni-
hil pertinere. Id se renovari, non quia probaret, sed
quia in nova possessione regni patienda omnia essent,
passum. Si novum fædus secum facere vellent, conve-
nire prius de conditionibus debere: et, si in animum in-
ducerent, ut ex æquo fædus fieret, et se visurum, quid
sibi faciundum esset, et illos credere reipublicæ consul-
turos. Atque ita se proripuisse, et submoveri e regia.*

U. C. 580. *omnes cæptos. Tum se amicitiam et societatem renun-*
 A. C. 172. *ciasse : qua voce eum accensum restitisse, atque voce*
clara denunciasset sibi, ut triduo regni sui decederent
finibus. Ita se profectos : nec sibi, aut venientibus, aut
manentibus, quidquam hospitaliter aut benigne factum.
 Thessali deinde Ætolique legati auditi. Senatui, ut
 scirent quam primum, quibus ducibus usura respub-
 lica esset, literas mitti consulibus placuit, ut, uter eo-
 rum posset, Romam ad magistratus creandos veniret.

Gentius
 ab Issensi-
 bus Romæ
 insimula-
 tur.

XXVI. Nihil magnopere, quod memorari adti-
 neat, rei publicæ eo anno consules gesserant : ma-
 gis e republica visum erat, comprimi ac sedari ex-
 asperatos Ligures. Quum Macedonicum bellum ex-
 spectaretur, Gentium quoque Illyriorum regem sus-
 pectum Issenses legati fecerunt : simul questi, fines
 suos secundo populatum, simul nunciantes, *uno ani-*
mo vivere Macedonum atque Illyriorum regem : com-
muni consilio parare Romanis bellum : et specie lega-
torum Illyrios speculatores Romæ esse, Perse auctore
missos, ut, quid ageretur, scirent. Illyrii vocati in
 senatum : qui quum legatos se esse missos ab rege
 dicerent ad purganda crimina, si qua de rege Is-
 senses deferrent ; quæsitum, ecquid ita non adissent
 magistratum, ut ex instituto loca, lautia, accipe-
 rent ? sciretur denique venisse eos, et super qua re
 venissent ? Hæsitantibus in responso, ut curia exce-
 derent, dictum. Responsum tamquam legatis, ut
 qui adire senatum non postulassent, dari non pla-
 cuit : mittendosque ad regem legatos censuerunt,
 qui nunciarent, qui socii quererentur apud senatum,
 exustum a rege agrum : *non æquum eum facere, qui ab*
sociis suis non abstineret injuriam. In hanc legatio-
 nem, missi, A. Terentius Varro, C. Plætorius, C.

Cicereius. Ex Asia, qui circa socios reges missi U. C. 580. A. C. 172. Legati ex Asia re- erant, legati redierunt, qui renunciarunt, *Eumenem in ea, Antiochum in Syria, Ptolemæum in Alexandria sese convenisse. Omnes sollicitatos legationibus Persei, sed egregie in fide permanere, pollicitosque omnia, quæ populus Romanus imperasset, præstatu- ros: et civitates socias adisse: ceteras satis fidus; solos Rhodios fluctuantes et inbutos Persei consiliis invenisse. Venerant Rhodii legati ad purganda ea, quæ vulgo jactari de civitate sciebant: ceterum senatum iis dari, quum novi consules magistratum inissent, placuit.*

XXVII. Belli adparatum non differendum cen- Adparatus in Persea. suerunt. C. Licinio prætori negotium datur, ut ex veteribus quinquagemis, in navalibus Romæ subductis, quæ possent usui esse, reficeret, pararetque naves quinquaginta. Si quid ad eum numerum explendum deesset, C. Memmio collegæ in Siciliam scriberet, ut eas, quæ in Sicilia naves essent, reficeret atque expediret, ut Brundisium primo quoque tempore mitti possent. Socios navales libertini ordinis in viginti et quinque naves ex civibus Romanis C. Licinius prætor scribere jussus: in quinque et viginti parem numerum Cn. Sicinius sociis imperaret: idem prætor peditum octo millia, quadringentos equites a sociis Latini nominis exigeret. Hunc militem qui Brundisii acciperet, atque in Macedoniam mitteret, A. Atilius Serranus, qui priore anno prætor fuerat, deligitur: Cn. Sicinius prætor qui exercitum paratum ad trajiciendum haberet. C. Popillio consuli ex auctoritate senatus C. Licinius prætor scribit, ut et legionem secundam, quæ maxime veterana in Liguribus erat, et socios Latini nominis quatuor millia peditum, ducentos equites Idi-

U. C. 580. bus Februariis Brundisii adesse juberet. Hac classe
 A. C. 172. et hoc exercitu Cn. Sicinius provinciam Macedo-
 niam obtinere, donec successor veniret, jussus, pro-
 rogato in annum imperio. Ea omnia, quæ senatus
 censuit, inpigre facta sunt. Duodequadragenta quin-
 queremes ex navalibus deductæ: qui deduceret eas
 Brundisium, L. Porcius Licinus præpositus: duode-
 cim ex Sicilia missæ. Ad frumentum classi exerci-
 tuique coëmendum in Apuliam Calabriamque tres
 legati missi, Sex. Digitius, T. Juventius, M. Cæci-
 lius. Ad omnia præparata Cn. Sicinius prætor, pa-
 ludatus ex urbe profectus, Brundisium venit.

XXVIII. Exitu prope anni C. Popillius consul
 Romam rediit aliquanto serius, quam senatus cen-
 suerat: cui primo quoque tempore magistratus
 creari, quum tantum bellum immineret, jussum erat.
 Itaque non secundis auribus Patrum auditus est
 consul, quum in æde Bellonæ de rebus in Liguribus
 gestis dissereret: subclamationes frequentes erant
 interrogationesque, cur scelere fratris obpressos Li-
 gures in libertatem non restituisset? Comitia con-
 sularia, in quam edicta erant diem, ante diem duo-
 decimum Kalendas Martias sunt habita. Creati con-
 sules, P. Licinius Crassus, C. Cassius Longinus.
 Postero die prætores facti, C. Sulpicius Galba, L.
 Furius Philus, L. Canuleius Dives, C. Lucretius
 Gallus, C. Caninius Rebilus, L. Villius Annalis.
 His prætoribus provinciæ decretæ: duæ jure Romæ
 dicendo, Hispania, et Sicilia, et Sardinia; ut uni
 sors integra esset, quo senatus censuisset. Consu-
 libus designatis imperavit senatus, ut, qua die ma-
 gistratum inissent, hostiis majoribus rite mactatis,
 precarentur, ut, quod bellum populus Romanus in

animo haberet gerere, ut id prosperum eveniret. U. C. 580.
 Eodem die decrevit senatus, C. Popillius consul ludos per dies decem Jovi optimo maximo voveret, A. C. 172.
 donaque circa omnia pulvinaria dari, si respublica decem annos in eodem statu fuisset. Ita ut censuerant, in Capitolio vovit consul ludos fieri, donariaque dari, quanta ex pecunia decresset senatus, quum centum et quinquaginta non minus adessent : præeunte verba Lepido pontifice maximo, id votum susceptum est. Eo anno sacerdotes publici mortui, L. Æmilius Papus decemvir sacrorum, et Q. Fulvius Flaccus pontifex, qui priore anno fuerat censor. Hic fœda morte periit. Ex duobus filiis ejus, qui tum in Illyrico militabant, nunciatum alterum decessisse, alterum gravi et periculoso morbo ægrum esse. Obruit animum simul luctus metusque : mane ingressi cubiculum servi laqueo dependentem invenere. Erat opinio, post censuram minus compotem fuisse sui : vulgo Junonis Laciniæ iram ob spoliatum templum alienasse mentem ferebant. Subfectus in Æmilii locum decemvir M. Valerius Messalla : in Fulvii pontifex Cn. Domitius Ahenobarbus, oppido adolescens sacerdos lectus.

XXIX. P. Licinio, C. Cassio consulibus, non U. C. 581.
 urbs tantum Roma, nec terra Italia, sed omnes re- A. C. 171.
 ges civitatesque, quæ in Europa, quæque in Asia Exponitur
 erant, converterant animos in curam Macedonici ac quis esset
 Romani belli. Eumenem quum vetus odium stimu- regum ani-
 labat, tum recens ira, quod scelere ejus prope ut mus erga
 victima mactatus Delphis esset. Prusias, Bithyniæ Romanos
 rex, statuerat abstinere armis, eventumque expec- et Persea.
 tare : nam neque pro Romanis se æquum censere
 adversus fratrem uxoris arma ferre ; et apud Persea

U. C. 581. victorem veniam per sororem inpetrabilem fore.

A. C. 171. Ariarathes, Cappadocum rex, præterquam quod Romanis suo nomine auxilia pollicitus erat, ex quo est junctus Eumeni ad unitate, in omnia belli pacisque se consociaverat consilia. Antiochus imminebat quidem Ægypti regno, et pueritiam regis, et inertiam tutorum spernens; et ambigendo de Cœle Syria causam belli se habiturum existimabat, gesturumque sine ullo impedimento, occupatis Romanis in Macedonico bello, id bellum: tamen omnia et per suos legatos senatui, et ipse legatis eorum eximie pollicitus erat. Ptolemæus propter ætatem alieni etiam tum arbitrii erat: tutores et bellum adversus Antiochum parabant, quo vindicarent Cœlen Syriam, et Romanis omnia pollicebantur ad Macedonicum bellum. Masinissa et frumento juvabat Romanos, et auxilia cum elephantis Misagenemque filium mittere ad bellum parabat: consilia autem in omnem fortunam ita disposita habebat. Si penes Romanos victoria esset, suas quoque in eodem statu mansuras res, neque ultra quidquam movendum: non enim passuros Romanos, vim Karthaginensibus adferri. Si fractæ essent opes Romanorum, quæ tum protegerent Karthaginenses, suam omnem Africam fore. Gentius, rex Illyriorum, fecerat potius, cur suspectus esset Romanis, quam satis statuerat, utram foveret partem; inpetuque magis, quam consilio, his aut illis se adjuncturus videbatur. Cotys Thrax, Odrysarum rex, evidenter Macedonum partis erat.

Quis liberarum civitatum.

XXX. Hæc sententia regibus quum esset de bello, in liberis gentibus populisque plebs ubique omnis ferme, ut solet, deterioribus erat ob regem

Macedonasque inclinata; principum diversa cer-
 neres studia. Pars ita in Romanos effusi erant, ut
 auctoritatem inmodico favore conrumperent: pauci
 ex iis justitia imperii Romani capti; plures ita, si
 præcipuam operam navassent, potentes sese in civi-
 tatibus suis futuros rati. Pars altera regiæ adula-
 tionis erat, quos æs alienum et desperatio rerum
 suarum, eodem manente statu, præcipientes ad novan-
 da omnia agebat; quosdam ventosum ingenium,
 quia Perseus magis auræ popularis erat. Tertia pars,
 optima eadem et prudentissima, si utique optio do-
 mini potioris daretur, sub Romanis, quam sub rege,
 malebat esse: si liberum inde arbitrium fortunæ
 esset, neutram partem volebant potentiorē altera
 obpressa fieri; sed, inlibatis potius viribus utriusque
 partis, pacem ex eo manere: ita inter utrosque op-
 timam conditionem civitatum fore; protegente al-
 tero semper inopem ab alterius injuria. Hæc sen-
 tientes, certamina fautorum utriusque partis taciti
 ex tuto spectabant. Consules, quo die magistratum
 inierunt, ex senatusconsulto quum circa omnia fana,
 in quibus lectisternium majorem partem anni esse
 solet, majoribus hostiis inmolassent, inde preces
 suas acceptas ab Diis immortalibus ominati, senatui,
 rite sacrificatum, precationemque de bello factam,
 renunciarunt. Aruspices ita responderunt, *si quid*
rei novæ inciperetur, id maturandum esse: victoriam,
triumphum, prorogationem imperii portendi. Patres,
quod faustum felixque populo Romano esset, centuria-
tis comitiis primo quoque die ferre ad populum con-
sules, jusserunt, ut, quod Perseus, Philippi filius,
Macedonum rex, adversus fædus cum patre Philippo
ictum, et secum post mortem ejus renovatum, sociis po-

U. C. 581.
 A. C. 171.

S. C. de
 bello in
 Persea.

U. C. 581. *puli Romani arma intulisset, agros vastasset, urbesque*
 A. C. 171. *occupasset; quodque belli parandi adversus populum*
Romanum consilia inisset, arma, milites, classem ejus
rei caussa comparasset; ut, nisi de iis rebus satisfacis-
set, bellum cum eo iniretur. Hæc rogatio ad popu-
 lum lata est.

XXXI. Senatusconsultum inde factum est, *Ut con-*
sules inter se provincias Italiam et Macedoniam com-
pararent, sortirenturve. Cui Macedonia obvenisset, *ut*
is regem Persea, quique ejus sectam secuti essent, nisi
populo Romano satisfacissent, bello persequeretur. Le-
 giones quatuor novas scribi placuit, binas singu-
 lis consulibus. Id præcipue provinciæ Macedoniæ
 datum, quod, quum alterius consulis legionibus qui-
 na millia et duceni equites ex vetere instituto daren-
 tur in singulas legiones, in Macedoniam sena millia
 peditum scribi jussa; equites treceni æqualiter in
 singulas legiones: et in sociali exercitu consuli al-
 teri auctus numerus; sexdecim millia peditum, oc-
 tingentos equites (præter eos, quos Cn. Sicinius dux-
 isset, sexcentos equites) in Macedoniam trajiceret.
 Italiæ satis visa duodecim millia sociorum peditum,
 sexcenti equites. Illud quoque præcipuum datum
 sorti Macedoniæ, ut centuriones militesque veteres
 scriberet, quos vellet, consul usque ad quinquaginta
 annos. In tribunis militum novatum eo anno prop-
 ter Macedonicum bellum, quod consules ex senatus-
 consulto ad populum tulerunt, ne tribuni militum
 eo anno suffragiis crearentur, sed consulum præto-
 rumque in iis faciendis judicium arbitriumque esset.
 Inter prætores ita partita imperia: prætorem, cu-
 jus sors fuisset, ut iret, quo senatus censuisset,
 Brundisium ad classem ire placuit; utque ibi recog-

nōsceret socios navales, dimissisque, si qui parum idonei essent, supplementum legeret ex libertinis, et daret operam, ut duæ partes civium Romanorum, tertia sociorum esset. Commeatus classi legionibusque ut ex Sicilia Sardiniaque subveherentur, prætoribus, qui eas provincias sortiti essent, mandari placuit, ut alteras decumas Siculis Sardisque imperarent, utque id frumentum ad exercitum in Macedoniam portaretur. Siciliam C. Caninius Rebilus est sortitus, L. Furius Philus Sardiniam, L. Canuleius Hispaniam, C. Sulpicius Gálba urbanam jurisdictionem, L. Villius Annalis inter peregrinos. C. Lucretio Gallo, quo senatus censuisset, sors evenit.

XXXII. Inter consules magis cavillatio, quam magna contentio, de provincia fuit. Cassius, *sine sorte se Macedoniam obpugnaturum*, dicebat, *nec posse collegam, salvo jurejurando, secum sortiri. Prætorem eum, ne in provinciam iret, in concione jurasse, se stato loco statisque diebus sacrificia habere, quæ, absente se, recte fieri non possent: quæ non magis consule, quam prætore, absente recte fieri possent. Si senatus, non quid vellet in consulatu potius, quam quid in prætura jura-
verit P. Licinius, animadvertendum esse censeat, se tamen futurum in senatus potestate.* Consulti Patres, cui consulatum populus Romanus non negasset, ab se provinciam negari, superbum rati, sortiri consules jusserunt. P. Licinio Macedonia, C. Cassio Italia obvenit. Legiones inde sortiti sunt: prima et tertia in Macedoniam trajicerentur, secunda et quarta ut in Italia remanerent. Delectus consules multo intentiorem, quam alias, curam habebant. Licinius veteres quoque scribebat milites centurionesque: et multi voluntate nomina dabant, quia locupletes vide-

U. C. 581.
A. C. 171.

U. C. 581. bant, qui priore Macedonico bello, aut adversus
 A. C. 171. Antiochum in Asia, stipendia fecerant. Quum tri-
 buni militum centuriones, sed primum quemque, ci-
 tarent, tres et viginti centuriones, qui primos pilos
 duxerant, citati tribunos plebis adpellarunt. Duo
 ex collegio, M. Fulvius Nobilior et M. Claudius Mar-
 cellus, ad consules rejiciebant: *Eorum cognitionem
 esse debere, quibus delectus, quibusque bellum mandatum
 esset: ceteri, cognituros se, de quo adpellati essent,
 aiebant; et, si injuria fieret, auxilium civibus laturos.*

XXXIII. Ad subsellia tribunorum res agebatur: eo M. Popillius consularis, advocatus, centuriones, et consul venerunt. Consule inde postulanti, ut in concione ea res ageretur, populus in concionem advocatus. Pro centurionibus M. Popillius, qui bien- nio ante consul fuerat, ita verba fecit: *Militares homines et stipendia justa, et corpora, et ætate, et adsi- duis laboribus, confecta habere: nihil recusare tamen, quo minus operam reipublicæ dent: id tantum depre- cari, ne inferiores iis ordines, quam quos, quum mili- tassent, habuissent, adtribuerentur.* P. Licinius consul senatusconsulta recitari jussit: primum, quod bellum senatus Perseo jussisset: deinde, quod ve- teres centuriones quam plurimum ad id bellum scribi censuisset, nec ulli, qui non major annis quinquaginta esset, vacationem militiæ esse. Deprecatus est deinde, *ne novo bello, tam propinquo Italiæ, ad- versus regem potentissimum, aut tribunos militum, de- lectum habentes, impedirent; aut prohiberent consulem, quem cuique ordinem assignari e republica esset, cum assignare.* Si quid in ea re dubium esset, ad senatum rejicerent.

XXXIV. Postquam consul, quæ voluerat, dixit,

Sp. Ligustinus ex eo numero, qui tribunos plebis ad- U. C. 587.
 pellaverant, a consule et ab tribunis petiit, ut sibi A. C. 171.
 paucis ad populum agere liceret. Permissu omnium
 ita locutus fertur. *Sp. Ligustinus tribus Crustuminae* Sp. Ligus-
ex Sabinis sum oriundus, Quirites. Pater mihi juge- tini oratio
rum agri reliquit et parvum tugurium, in quo natus ad popu-
educatusque sum : hodieque ibi habito. Quum primum lum.
in ætatem veni, pater mihi uxorem fratris sui filiam de-
dit : quæ secum nihil adtulit, præter libertatem pud-
icitiamque, et cum his fœcunditatem, quanta vel in diti-
domo satis esset. Sex filii nobis, duæ filiæ sunt : utræ-
que jam nuptæ. Filii quatuor togas viriles habent, duo
prætextati sunt. Miles sum factus, P. Sulpicio, C.
Aurelio consulibus. In eo exercitu, qui in Macedoniam
est transportatus, biennium miles gregarius fui adversus
Philippum regem : tertio anno virtutis caussa mihi T.
Quinctius Flaminius decumum ordinem hastatum ad-
signavit. Devicto Philippo Macedonibusque, quum in
Italiam portati ac dimissi essemus, continuo miles vo-
luntarius cum M. Porcio consule in Hispaniam sum
profectus. Neminem omnium imperatorum, qui vivant,
acriorem virtutis spectatorem ac judicem fuisse sciunt,
qui et illum et alios duces longa militia experti sunt :
hic me imperator dignum judicavit, cui primum hasta-
tum prioris centuriæ adsignaret. Tertio iterum volun-
tarius miles factus sum in eum exercitum, qui adversus
Ætolos et Antiochum regem est missus : a M. Acilio
mihi primus princeps prioris centuriæ est adsignatus.
Expulso rege Antiocho, subactis Ætolis, reportati su-
mus in Italiam : et deinceps bis, quæ annua merebant
legiones, stipendia feci. Bis deinde in Hispania mi-
litavi, semel Q. Fulvio Flacco, iterum Ti. Sempronio
Graccho prætore. A Flacco inter ceteros, quos virtu-

U. C. 581. *tis causa secum ex provincia ad triumphum deducebat,*
 A. C. 171. *deductus sum: a Ti. Graccho rogatus, in provinciam*
 ii. *Quater intra paucos annos primum pilum duxi:*
quater et tricies virtutis causa donatus ab imperatori-
bus sum: sex civicas coronas accepi: viginti duo sti-
pendia annua in exercitu emerita habeo, et major annis
sum quinquaginta. Quod si mihi nec stipendia omnia
emerita essent, necdum atas vacationem daret, tamen,
quum quatuor milites pro me uno vobis dare, P. Licini,
possem, æquum erat me dimitti. Sed hæc pro causa
mea dicta accipiatis velim: ipse me, quoad quisquam,
qui exercitus scribit, idoneum militem iudicabit, num-
quam sum excusaturus. Ordinem quo me dignum ju-
dicent tribuni militum, ipsorum est potestatis: ne quis
me virtute in exercitu præstet, dabo operam; ut semper
ita fecisse me et imperatores mei, et qui una stipendia
fecerunt, testes sunt. Vos quoque æquum est, commi-
litones, etsi adpellationis vobis usurpatis jus, quum ado-
lescentes nihil adversus magistratum senatusque aucto-
ritatem usquam feceritis, nunc quoque in potestate se-
natus ac consulum esse, et omnia honesta loca ducere,
quibus rempublicam defensuri sitis.

XXXV. Hæc ubi dixit, conlaudatum multis ver-
 bis consul ex concione in senatum duxit. Ibi quo-
 que ei ex auctoritate senatus gratiæ actæ, tribunique
 militares in legione prima primum pilum virtutis
 causa ei adsignarunt: ceteri centuriones, omnia
 adpellatione, ad delectum obedienter responderunt.
 Quo maturius in provincias magistratus proficisce-
 rentur, Latinæ Kalendis Juniis fuere: coque sol-
 lemnis perfecto, C. Lucretius prætor, omnibus, quæ
 ad classem opus erant, præmissis, Brundisium est
 profectus. Præter eos exercitus, quos consules com-

parabant, C. Sulpicio Galbæ prætori negotium da- U. C. 591.
 tum, ut quatuor legiones scriberet urbanas justo nu- A. C. 171.
 mero peditum equitumque; iisque quatuor tribunos

militum ex senatu legeret, qui præessent: sociis Latini nominis imperaret quindecim millia peditum, mille et ducentos equites. Is exercitus uti paratus esset, quo senatus censuisset. P. Licinio consuli ad exercitum civilem socialemque petenti addita auxilia, Ligurum duo millia, Cretenses sagittarii, (incertus numerus, quantum rogati auxilia Cretenses missent) Numidæ item equites elephantique. In eam rem legati ad Masinissam Karthaginiensesque missi, L. Postumius Albinus, Q. Terentius Culleo, C. Aburius. In Cretam item legatos tres ire placuit, A. Postumium Albinum, C. Decimium, A. Licinium Nervam.

XXXVI. Per idem tempus legati ab rege Perseo venerunt: eos in oppidum intromitti non placuit, quum jam bellum regi eorum et Macedonibus et senatus decresset, et populus jussisset. In ædem Belonæ in senatum introducti ita verba fecerunt: *Mi-* Legati a Perseo.
rari Persea regem, quid in Macedoniam exercitus trans-
portati essent. Si inpetrari a senatu posset, ut ii re-
vocentur, regem de injuriis, si quas sociis factas quere-
rentur, arbitrato senatus satisfacturum esse. Sp. Carvilius, ad eam ipsam rem ex Græcia remissus ab Cn. Sicinio, in senatu erat: is Perrhæbiam expugnatam armis, Thessaliæ aliquot urbes captas, cetera, quæ aut ageret, aut pararet rex, quum argueret, respondere ad ea legati jussi. Postquam hæsitabant, negantes sibi ultra quidquam mandatum esse, jussi renunciare regi, *Consulem P. Licinium brevi cum exercitu futurum in Macedonia esse: ad eum, si satisfacere in animo esset, mitteret legatos. Romam quod præ-*

U. C. 581. *terea mitteret, non esse : neminem eorum per Italiam*
 A. C. 171. *ire liciturum.* Ita dimissis, P. Licinio consuli mandatum, intra undecimum diem juberet eos Italia excedere, et Sp. Carvilius mitteret, qui, donec navem conscendissent, custodiret. Hæc Romæ acta, nondum profectis in provinciam consulibus. Jam Cn. Sicinius, qui, priusquam magistratu abiret, Brundisium ad classem et ad exercitum præmissus erat, trajectis in Epirum quinque millibus peditum, trecentis equitibus, ad Nymphæum in agro Apolloniati castra habebat. Inde tribunos cum duobus millibus militum ad occupanda Dassaretiorum et Illyriorum castella, ipsis arcessentibus præsidia, ut tutiores a finitimorum inpetu Macedonum essent, misit.

Legati R.
 in Græ-
 ciam, et
 Illyricum.

XXXVII. Paucis post diebus Q. Marcius, A. Atilius, et P. et Ser. Cornelii Lentuli, et L. Decimius, legati in Græciam missi, Corcyram peditum mille secum advexerunt: ibi inter se et regiones, quas obirent, et milites diviserunt. Decimius missus est ad Gentium, regem Illyriorum, quem, si aliquem respectum amicitiae eum habere cerneret, tentare, aut etiam ad belli societatem perlicere jussus. Lentuli in Cephalleniam missi, ut in Peloponnesum trajicerent, oramque maris, in occidentem versi, ante hiemem circumirent. Marcio et Atilio Epirus, Ætolia, et Thessalia circumeundæ adsignantur. Inde Bœotiam atque Eubœam adspicere jussi; tum in Peloponnesum trajicere: ibi congressuros se cum Lentulis constituunt. Priusquam digrederentur a Corcyra, literæ a Perseo adlatæ sunt, quibus quærebat, quæ caussa Romanis aut in Græciam trajiciendi copias, aut urbes occupandi, esset? Cui rescribi nihil placuit; nuncio ipsius, qui literas adtulerat, dici,

præsidii causa ipsarum urbium Romanos facere. Len-^{U. C. 581.}
tuli, circumeuntes Peloponnesi oppida, quum sine^{A. C. 171.}
discrimine omnes civitates adhortarentur, ut, quo
animo, qua fide adjuvissent Romanos, Philippi pri-
mum, deinde Antiochi bello, eodem adversus Persea
juvarent, fremitum in concionibus audiebant: Achæis
indignantibus, eodem se loco esse, (qui omnia a prin-
cipiis Macedonici belli præstitissent Romanis, et Ma-
cedonum Philippi bello hostes fuissent) quo Messenii
atque Elii, qui pro Antiocho hoste arma adversus po-
pulum Romanum tulissent; ac, nuper in Achaicum
contributi concilium, velut præmium belli se victo-
ribus Achæis tradi quererentur.

XXXVIII. Marcius et Atilius ad Gitanas, Epiri
oppidum decem millia ab mari, quum adscenderent,
concilio Epirotarum habito, cum magno omnium ad-
sensu auditi sunt: et quadringentos juventutis eorum
in Orestas, ut præsidio essent liberatis ab se Macedo-
nibus, miserunt. Inde in Ætoliam progressi, ac pau-
cos ibi morati dies, dum in prætoris mortui locum
alius subficeretur, et Lycisco prætore facto, quem
Romanorum favere rebus satis compertum erat,
transierunt in Thessaliam. Eo legati Acarnanum,
et Bæotorum exsules venerunt. Acarnanes nunciare
jussi, *Quæ Philippi primum, Antiochi deinde bello,*
decepti pollicitationibus regis, adversus populum Ro-
manum commisissent, ea conrigendi occasionem illis ob-
latam. Si male meriti clementiam populi Romani ex-
perti essent, bene merendo liberalitatem experirentur.
Bæotis exprobratum, societatem eos cum Perseo
junxisse: iis, quum culpam in Ismeniam, principem
alterius partis, conferrent, et quasdam civitates dis-
sentientes in causam deductas, *adpurituum id esse,*

U. C. 581. Marcius respondit : *singulis enim civitatibus de se ipsis*
 A. C. 171. *consulendi potestatem facturos.* Thessalorum Larissæ
 fuit concilium : ibi et Thessalis benigna materia
 gratias agendi Romanis pro libertatis munere fuit ;
 et legatis, quod, et Philippi prius et post Antiochi
 bello, enise adjuti a gente Thessalorum essent : hac
 mutua commemoratione meritorum accensi animi
 multitudinis ad omnia decernenda, quæ Romani vel-
 lent. Secundum hoc concilium legati a Perseo rege
 Legati a Perseo ad Marcium. venerunt, privati maxime hospitii fiducia, quod ei
 paternum cum Marcio erat. Ab hujus necessitu-
 dinis commemoratione orsi, petierunt legati, in con-
 loquium veniendi regi potestatem faceret. Marcius,
*Et se ita a patre suo accepisse, dixit, amicitiam hos-
 pitiumque cum Philippo fuisse : minime inmemorem
 necessitudinis ejus legationem eam suscepisse. Conlo-
 quium, si satis commode valeret, non fuisse dilaturum :
 nunc, ubi primum posset, ad Peneum flumen, qua trans-
 itus ab Homolio Dium esset, præmissis, qui nunci-
 arent regi, venturos.*

Conlo-
 quium
 inter re-
 gem et le-
 gatos Ro-
 manos.

XXXIX. Et tum quidem ab Dio Perseus in inte-
 riora regni recipit se, levi aura spei objecta, quod
 Marcius ipsius causa suscepisse se legationem dix-
 isset. Post dies paucos ad constitutum locum vene-
 runt. Magnus comitatus fuit regius, quum amico-
 rum, tum satellitum turba stipante. Non minore
 agmine legati venerunt, et ab Larissa multis prose-
 quentibus, et legationibus civitatum, quæ convene-
 rant Larissam, et renunciare domum certa, quæ au-
 dissent, volebant. Inerat cura insita mortalibus vi-
 dendi congregientes nobilem regem, et populi princi-
 pis terrarum omnium legatos. Postquam in con-
 spectu steterunt, dirimente amne, paullisper inter-

nunciando cunctatio fuit, utri transgrederentur : ali- U. C. 581.
A. C. 171.
quid illi regiæ majestati, aliquid hi populi Romani
nomini, quum præsertim Perseus petisset conloqui-
um, existimabant deberi. Joco etiam Marcius cunc-
tantes movit. *Minor, inquit, ad majorem, et (quod*
Philippo ipsi cognomen erat) filius ad patrem transeat.
Facile persuasum id regi est. Aliud deinde ambige-
batur, cum quam multis transiret. Rex, cum omni
comitatu transire, æquum censebat : legati vel cum
tribus venire jubebant, vel, si tantum agmen tradu-
ceret, obsides daret, nihil fraudis fore in conloquio.
Hippian et Pantauchum, quos et legatos miserat,
principes amicorum, obsides dedit. Nec tam in
pignus fidei obsides desiderati erant, quam ut adpa-
reret sociis, nequaquam ex dignitate pari congredi
regem cum legatis. Salutatio non tamquam hostium,
sed hospitalis ac benigna fuit ; positisque sedibus
con sederunt.

XL. Quum paullisper silentium fuisset : *Expec-* Marcii
oratio.
tari, nos, inquit Marcius, arbitror, ut respondeamus
literis tuis, quas Corcyram misisti ; in quibus quæris,
quid ita legati cum militibus venerimus, et præsidia in
singulas urbes dimittamus ? Ad hanc interrogationem
tuam et non respondere vereor, ne superbum sit, et ve-
ra respondere, ne nimis acerbum audienti tibi videatur.
Sed quum aut verbis castigandus, aut armis sit, qui
fædus rumpit ; sicut bellum adversus te alii, quam mi-
hi, mandatum malim, ita orationis acerbitem adver-
sus hospitem, utcumque est, subibo : sicut medici, quum
salutis caussa tristiora remedia adhibent. Ex quo reg-
num adeptus es, unam rem te, quæ facienda fuerit, se-
natus fecisse censet ; quod legatos Romam ad renovan-
*dum * * * judicat potius, quam, quum renovatum esset,*

U. C. 581. violandum. *Abrupolim, socium atque amicum populi*

A. C. 171. *Romani, regno expulisti. Artetari interfectores, ut cæde (ne quid ultra dicam) lætatum adpareret, recepisti, qui omnium Illyriorum fidissimum Romano nomini regulum occiderant. Per Thessaliam et Maliensem agrum cum exercitu contra fœdus Delphos isti: Byzantiis item contra fœdus misisti auxilia. Cum Bæotis, sociis nostris, secretam tibi ipsi societatem, quam non licebat, jurejurando pepigisti. Thebanos legatos, Eversam et Callicritum, venientes a nobis, quærere malo, quis interfecerit, quam arguere. In Ætolia bellum intestinum et cædes principum per quos, nisi per tuos, factæ videri possunt? Dolopes a te ipso evastati sunt. Eumenes rex, ab Roma quum in regnum rediret, prope ut victima Delphis in sacrato loco ante aras mactatus, quem insimulet, piget referre. Quæ hospes Brundisinus occulta facinora indicet, certum habeo, et scripta tibi omnia ab Roma esse, et legatos tuos renunciasse. Hæc ne dicerentur a me, uno modo vitare potuisti, non quærendo, quam ob causam exercitus in Macedoniam trajicerentur, aut præsidia in sociorum urbes mitteremus. Quærenti tibi superbius tacuissemus, quam vera respondimus. Equidem pro paterno nostro hospitio faveo orationi tuæ, et opto, ut aliquam mihi materiam præbeas agendæ tuæ apud senatum causæ.*

Perseus se
purgat.

XLI. Ad ea rex: Bonam causam, si apud iudices æquos ageretur, apud eosdem et accusatores et iudices agam. Eorum autem, quæ objecta sunt mihi, partim ea sunt, quibus nescio an gloriari debeam; partim, quæ fateri non erubescam; partim, quæ verbo objecta verbo negare sit. Quid enim, si legibus vestris hodie reus sim, aut index Brundisinus, aut Eumenes mihi objiciat, ut accusare potius vere, quam conviciari, videantur?

Scilicet, nec Eumenes, quum tam multis gravis publice ac privatim sit, alium, quam me, inimicum habuit: neque ego potio-rem quemquam ad ministeria facinorum, quam Rammium, (quem neque umquam ante videram, neceram postea visurus) invenire potui. Et Thebanorum, quos naufragio perisse constat, et Artetari cædis mihi reddenda ratio est: in qua tamen nihil ultra obijcitur, quam interfectores ejus in regno exsulasse meo. Cujus conditionis iniquitatem ita non sum recusaturus, si vos quoque accipitis, ut, quicumque exsules in Italiam aut Romam se contulerunt, his facinorum, propter quæ damnati sunt, auctores vos fuisse fateamini. Si hoc et vos recusabitis, et omnes aliæ gentes, ego quoque inter ceteros ero. Et, Hercule, quid adtinet cuiquam exsili-um patere, si nusquam exsuli futurus locus est? Ego tamen istos, ut primum in Macedonia esse, admonitus a vobis, comperi, requisitos abire ex regno jussi, et in perpetuum interdixi finibus meis. Et hæc quidem mihi, tamquam caussam dicenti reo, objecta sunt: illa, tamquam regi, et quæ de fœdere, quod mihi est vobiscum, disceptationem habeant. Nam, si est in fœdere ita scriptum, ut ne, si bellum quidem quis inferat, tueri me regnumque meum liceat, mihi fatendum est, quod me armis adversus Abrupolim, socium populi Romani, defenderim, fœdus violatum esse. Sin autem hoc et ex fœdere licuit, et jure gentium ita comparatum est, ut arma armis propulsentur, quid tandem me facere de-ruit, quum Abrupolis fines mei regni usque ad Amphipolim pervastasset, multa libera capita, magnam vim Mancipiorum, multa millia pecorum abegisset? Quiescerem et paterer, donec Pellam et in regiam meam armatus pervenisset? At enim bello quidem justo sum persecutus; sed vinci non oportuit eum, neque ea, quæ

U. C. 581. *victis accidunt, pati: quorum casum quum ego subierim,*
 A. C. 171. *qui sum armis lacessitus, quid potest queri sibi acci-*
disse, qui caussa belli fuit? Non sum eodem modo de-
fensurus, Romani, quod Dolopas armis coërcuerim:
quia, etsi non merito eorum, jure feci meo; quum mei
regni, meæ ditionis essent, vestro decreto patri adtri-
buti meo. Nec, si caussa reddenda sit, non vobis, nec
fæderatis, sed iis, qui ne in servos quidem sæva atque
injusta imperia probant, plus æquo et bono sævisse in
eos videri possum: quippe Euphranorem, præfectum a
me inpositum, ita occiderunt, ut mors pœnarum ejus
levissima fuerit.

XLII. *At, quum processissem inde ad visendas Laris-*
sam, et Antrona, et Pylleon, quo in propinquo multo
ante debita vota persolverem, Delphos sacrificandi
caussa adscendi. Et hic, criminis augendi caussa, cum
exercitu me fuisse adjicitur. Scilicet, ut, quod nunc
vos facere queror, urbes occuparem, arcibus inponerem
præsidia. Vocate in concilium Græciæ civitates, per
quas iter feci; queratur unusquibet militis mei inju-
riam; non recusabo, quin, simulato sacrificio, aliud
petisse videar. Ætolis et Byzantiis præsidia misimus,
et cum Bæotis amicitiam fecimus. Hæc, qualiacumque
sunt, per legatos meos non solum indicata, sed etiam
excusata sunt sæpe in senatu vestro: ubi aliquos ego
disceptatores, non tam æquos, quam te, Q. Marci, pa-
ternum amicum et hospitem, habebam. Sed nondum
Romam accusator Eumenes venerat; qui calumniando
omnia detorquendoque suspecta et invisa efficeret, et
persuadere vobis conaretur, non posse Græciam in
libertate esse, et vestro munere frui, quoad regnum
Macedoniæ incolume esset. Circumagetur hic orbis:
erit mox, qui arguat, nequidquam Antiochum ultra

juga Tauri remotum: graviorem multo Asia, quam ^{U. C. 581.} Antiochus fuerit, Eumenem esse: nec conquiescere ^{A. C. 171.} socios vestros posse, quoad regia Pergami sit: eam arcem supra capita finitimarum civitatum inpositam. Ego hæc, Q. Marci et A. Atili, quæ aut a vobis objecta, aut purgata a me sunt, talia esse scio, ut aures, ut animi audientium sint: nec tam referre, quid ego, aut qua mente fecerim, quam quomodo id vos factum accipiat. Conscius mihi sum, nihil me scientem deliquisse: et, si quid fecerim imprudentia lapsus, corrigi me et emendari castigatione hac posse. Nihil certe insanabile, nec quod bello et armis persequendum esse censeatis, commisi: at frustra clementiæ gravitatisque vestræ fama vulgata per gentes est, si talibus de causis, quæ vix querela et expostulatione dignæ sunt, arma capitis, et regibus sociis bella infertis.

XLIII. Hæc dicenti tum adsensus Marcius auctor fuit mittendi Romam legati, quum experienda omnia ad ultimum, nec prætermittendum spem ullam censisset. Reliqua consultatio erat, quonam modo tutum iter legatis esset: ad id quum necessaria petitio induciarum videretur, cuperetque Marcius, neque aliud conloquio petisset, gravate et in magnam gratiam petentis concessit: nihil enim satis para- ^{Induciæ.} tum ad bellum in præsentia habebant Romani, non exercitum, non ducem: quum Perseus (ni spes vana pacis obcæcasset consilia) omnia præparata atque instructa haberet, et suo maxime tempore atque alieno hostibus incipere bellum posset. Ab hoc conloquio, fide induciarum interposita, legati Romani in Bœotiam comparati sunt. Ibi jam motus ^{Bœotiæ} cœperat esse, discedentibus a societate communis ^{motus.} concilii Bœotorum quibusdam populis, ex quo re-

U. C. 581. nunciatum erat, respondisse legatos, adpariturum,
 A. C. 171. quibus populis proprie societatem cum rege jungi displicuisset. Primi a Chæronea legati, deinde a Thebis, in ipso itinere occurrerunt, adfirmantes non interfuisse se, quo societas ea decreta esset, concilio: quîs, legati, nullo in præsentia responso dato, Chalcidem se sequi jusserunt. Thebis magna contentio orta erat ex alio certamine. Comitibus prætoribus Bœotorum victa pars, injuriam persequens, coacta multitudine decretum fecit Thebis, ne Bœotarchæ urbibus reciperentur. Exsules Thespias universi concesserunt: inde (recepti enim sine cunctatione erant) Thebas, jam mutatis animis, revocati decretum faciunt, ut duodecim, qui privati cœtum et concilium habuissent, exsilio multarentur. Novus deinde prætor (Ismenias is erat, vir nobilis ac potens) capitalis pœnæ absentes eos decreto damnat. Chalcidem fugerant: inde ad Romanos Larissam profecti, causam cum Perseo societatis in Ismeniam contulerant. Ex contentione ortum certamen: utriusque tamen partis legati ad Romanos venerunt, et exsules accusatoresque Ismenię, et Ismenias ipse.

XLIV. Chalcidem ut ventum est, aliarum civitatum principes, id quod maxime gratum erat Romanis, suo quique proprio decreto Persei societatem adspernati, Romanis se adjungebant: Ismenias gentem Bœotorum in fidem Romanorum permitti æquum censebat: inde certamine orto, nisi in tribunal legatorum perfugisset, haud multum abfuit, quin ab exsulibus fautoribusque eorum interficeretur. Thebæ quoque ipsæ, quod Bœotiæ caput est, in magno tumultu erant, aliis ad regem trahentibus civitatem, aliis ad Romanos: et turba Coronæorum Haliartio-

rumque convenerat ad defendendum decretum regiae societatis: sed constantia principum, docentium cladibus Philippi Antiochique, quanta esset vis et fortuna imperii Romani, victa eadem multitudo et, ut tolleretur regia societas, decrevit, et eos, qui auctores paciscendae amicitiae fuerant, ad satisfaciendum legatis Chalcidem misit, fideique legatorum commendari civitatem iussit. Thebanos Marcius et Atilius læti audierunt, auctoresque et his separatim singulis fuerunt ad renovandam amicitiam mittendi Romam legatos. Ante omnia exsules restitui jusserunt, et auctores regiae societatis decreto suo damnarunt. Ita, quod maxime volebant, discusso Boeotico concilio, Peloponnesum proficiscuntur, Ser. Cornelio Chalcidem arcesso. Argis præbitum est iis concilium: ubi nihil aliud a gente Achæorum petierunt, quam ut mille milites darent: id præsidium ad Chalcidem tuendam, dum Romanus exercitus in Græciam trajiceretur, missum est. Marcius et Atilius, peractis, quæ agenda in Græcia erant, principio hiemis Romam redierunt.

Boeoticum
concilium
discussum.

XLV. Inde legatio sub idem tempus in Asiam circum insulas missa: tres erant legati, Ti. Claudius, P. Postumius, M. Junius: ii circumeuntes hortabantur socios ad suscipiendum adversus Persea pro Romanis bellum; et, quo quæque opulentior civitas erat, eo adcuratius agebant, quia minores secutura majorum auctoritatem erant. Rhodii maximi ad omnia momenti habebantur, quia non favere tantum, sed adjuvare etiam viribus suis bellum poterant, quadraginta navibus auctore Hegesilocho comparatis: qui, quum in summo magistratu esset, (Prytanin ipsi vocant) multis rationibus pervicerat

Legati
Rom. in
Asiæ in-
sulas.

U. C. 581. Rhodios, ut, omissa, quam sæpe vanam experti es-
 A. C. 171. sent, regum fovendorum spe, Romanam societatem
 (unam tum in terris vel viribus, vel fide stabilem)
 retinerent. *Bellum imminere cum Perseo: desideratu-
 ros Romanos eundem navalem adparatum, quem nu-
 per Antiochi, quem Philippi ante bello vidissent: tre-
 pidaturos tum repente paranda classe, quum mittenda
 esset; nisi reficere naves, nisi instruere navalibus sociis
 cæpissent. Id eo magis enise faciendum esse, ut cri-
 mina delata ab Eumene fide rerum refellerent. His
 incitati, quadraginta navium classem instructam
 ornatamque legatis Romanis advenientibus, ut non
 expectatam adhortationem esse adpareret, ostende-
 runt. Et hæc legatio magnum ad conciliandos ani-
 mos civitatum Asiæ momentum fuit. Decimius
 unus sine ullo effectu, captarum etiam pecuniarum
 ab regibus Illyriorum suspicione infamis, Romam
 rediit.*

Perseus le-
 gatos By-
 zantium et
 Rhodum
 mittit.

XLVI. Perseus, quum a conloquio Romanorum
 in Macedoniam recepisset sese, legatos Romam de
 inchoatis cum Marcio conditionibus pacis misit: et
 Byzantium et Rhodum literas legatis ferendas dedit.
 In literis eadem sententia ad omnes erat: *conlocu-
 tum se cum Romanorum legatis: quæ audisset, quæ-
 que dixisset, ita disposita, ut superior fuisse in dis-
 ceptatione videri posset. Apud Rhodios legati ad-
 diderunt, Confidere pacem futuram: auctoribus enim
 Marcio atque Atilio, missos Romam legatos. Si per-
 gerent Romani contra fædus movere bellum, tum omni
 gratia, omni ope enitendum fore Rhodiis, ut reconcili-
 ent pacem. Si nihil deprecando proficiant, id agen-
 dum, ne omnium rerum jus ac potestas ad unum popu-
 lum perveniat. Quum ceterorum id interesse, tum*

præcipue Rhodiorum, qui plus inter alias civitates dignitate atque opibus excellant: quæ serva atque obnoxia fore, si nullus alio sit, quam ad Romanos, respectus.

U. C. 581.

A. C. 171.

Magis et literæ et verba legatorum benigne sunt audita, quam momentum ad mutandos animos habuerunt: potentior esse partis melioris auctoritas cœperat. Responsum ex decreto est: *Optare pacem Rhodios: si bellum esset, ne quid ab Rhodiis speraret aut peteret rex, quod veterem amicitiam, multis magnisque meritis pace belloque partam, disjungeret sibi ab Romanis.* Ab Rhodo redeuntes, Bœotiæ quoque civitates, et Thebas, et Coronæam, et Haliartum, adierunt: quibus expressum invitis existimabatur, ut, relicta regia societate, Romanis adjungerentur. Thebani nihil moti sunt: quamquam nonnihil, et damnatis principibus, et restitutis exsulibus, succensebant Romanis. Coronæi et Haliartii, favore quodam insito in reges, legatos in Macedoniam miserunt, præsidium petentes, quo se adversus inpotentem superbiam Thebanorum tueri possint. Cui legationi responsum ab rege est, *præsidium se propter inducias cum Romanis factas mittere non posse: tamen suadere, ita a Thebanorum injuriis, qua possent, ut se vindicarent, ne Romanis præberent causam in se sæviendi.*

XLVII. Marcus et Atilius Romam quum venissent, legationem in Capitolio ita renunciarunt, ut nulla re magis gloriarentur, quam decepto per inducias et spem pacis rege. Adeo enim adparatibus belli fuisse instructum, ipsis nulla parata re, ut omnia opportuna loca præoccupari ante ab eo potuerint, quam exercitus in Græciam trajiceretur. Spatio autem in-

Marcus
legationem
renunciat.

U. C. 581. *duciarum sumto, venturum illum nihilo paratiorem;*
 A. C. 171. *Romanos omnibus instructiores rebus capturos bellum.*

Senibus
inproba-
tus.

Bætorum quoque se concilium arte distraxisse, ne conjungi amplius ullo consensu Macedonibus possent. Hæc, ut summa ratione acta, magna pars senatus adprobabat: veteres et moris antiqui memores negabant, se in ea legatione Romanas agnoscere artes. Non per insidias et nocturna prælia, nec simulatam fugam inprovisosque ad incautum hostem reditus, nec ut astu magis, quam vera virtute, gloriarentur, bella majores gessisse: indicare prius, quam gerere, solitos bella, denunciare etiam; interdum locum finire, in quo dimicaturi essent. Eadem fide indicatum Pyrrho regi medicum, vitæ ejus insidiantem: eadem Faliscis vinctum traditum proditorem liberorum regis. Hæc Romana esse, non versutiarum Punicarum, neque calliditatis Græcæ: apud quos fallere hostem, quam vi superare, gloriosius fuerit. Interdum in præsens tempus plus profici dolo, quam virtute: sed ejus demum animum in perpetuum vinci, cui confessio expressa sit, se neque arte, neque casu, sed conlatis cominus viribus, justo ac pio bello esse superatum. Hæc seniores, quibus nova hæc minus placebat sapientia: vicit tamen ea pars senatus, cui potior utilis, quam honesti, cura erat, ut comprobaretur prior legatio Marcii, et eodem rursus in Græciam cum quinquere milibus remitteretur, jubereturque cetera, uti e republica maxime visum esset, agere. A. quoque Atilium miserunt ad occupandam Larissam in Thessalia, timentes, ne, si induciarum dies exisset, Perseus, præsidio eo misso, caput Thessaliæ in potestate haberet. Duo millia peditum Atilius ab Cn. Sicinio accipere ad eam rem

In Græ-
ciam re-
mittitur.

agendam jussus : et P. Lentulo, qui ex Achaia redi- U. C. 581.
 erat, trecenti milites Italici generis dati, ut Thebis A. C. 171.
 daret operam, ut in potestate Bœotia esset.

XLVIII. His præparatis, quamquam ad bellum
 consilia erant destinata, senatum tamen præberi le-
 gatis placuit. Eadem fere, quæ in conloquio ab Legati Per-
 rege dicta erant, relata ab legatis. Insidiarum Eu- sei auditi.
 meni factarum crimen, et maxima cura, et minime
 tamen probabiliter, (manifesta enim res erat) defen-
 sum. Cetera deprecatio erat : sed non eis animis
 audiebantur, qui aut doceri, aut flecti possent. De- Excedere
 nunciatum, extemplo mœnibus urbis Romæ, Italia Italia jussi.
 intra trigesimum diem excederent. P. Licinio de-
 inde consuli, cui Macedonia provincia obvenerat,
 denunciatum, ut exercitui diem primam quamque
 diceret ad conveniendum. C. Lucretius prætor, cui Lucretius
 classis provincia erat, cum quadraginta quinque- prætor in
 remibus ab urbe profectus : nam ex reffectis navibus Græciam
navigat.
 alias in alium usum retineri ad urbem placuit. Præ-
 missus a prætore est frater Lucretius cum quinque-
 reme una : jussusque, ab sociis ex fœdere acceptis
 navibus, ad Cephalleniam classi obcurrere. Ab
 Rheginis triremi una, ab Locris duabus, ab Uriti-
 bus quatuor, præter oram Italiæ supervectus Cala-
 briæ extremum promontorium in Ionio mari, Dyr-
 rhachium trajicit. Ibi decem ipsorum Dyrrhachi-
 norum, duodecim Issæorum, quinquaginta quatuor
 Gentii regis lembos nactus, simulans se credere, eos
 in usum Romanorum comparatos esse, omnibus ab-
 ductis, die tertio Corcyram, inde protinus in Ce-
 phalleniam trajicit. C. Lucretius prætor ab Nea-
 poli profectus, superato freto, die quinto in Ceph-
 alleniam transmisit. Ibi stetit classis, simul obperiens,

U. C. 581. ut terrestres copiae trajicerentur, simul, ut onerariae,
 A. C. 171. ex agmine suo per altum dissipatae, consequerentur.

Licinius XLIX. Per hos forte dies P. Licinius consul,
 cos. profi- votis in Capitolio nuncupatis, paludatus ab urbe
 ciscitur in profectus est. Semper quidem ea res cum magna
 Macedo- dignitate ac maiestate geritur: praecipue tamen
 niam. dignitate ac maiestate geritur: praecipue tamen
 convertit oculos animosque, quum ad magnum no-
 bilemque, aut virtute aut fortuna, hostem, euntem
 consulem prosequuntur. Contrahit enim non officii
 modo cura, sed etiam studium spectaculi, ut videant
 ducem suum, cuius imperio consilioque summam
 rempublicam tuendam permiserunt. Subit deinde
 cogitatio animum, qui belli casus, quam incertus
 fortunae eventus, communisque Mars belli sit: ad-
 versa, secunda, quaeque inscitia et temeritate ducum
 clades saepe acciderint, quae contra bona prudentia
 et virtus adtulerit. Quem scire mortalium, utrius
 mentis, utrius fortunae consulem ad bellum mittant?
 triumphantemne mox cum exercitu victore scanden-
 tem Capitolium ad eosdem Deos, a quibus proficis-
 catur, visuri; an hostibus eam praebituri laetitiam
 sint? Persi autem regi, adversus quem ibatur, fa-
 mam et bello clara Macedonum gens, et Philippus
 pater, inter multa prospere gesta Romano etiam
 nobilitatus bello, praebat; tum ipsius Persei num-
 quam, ex quo regnum accepisset, desitum belli ex-
 pectatione celebrari nomen. Cum his cogitationi-
 bus omnium ordinum homines proficiscentem con-
 sulem prosecuti sunt. Duo consulares tribuni mili-
 tum cum eo missi, C. Claudius, Q. Mucius; et tres
 illustres juvenes, P. Lentulus, et duo Manlii Aci-
 dini: alter M. Manlii, alter L. Manlii filius erat.
 Cum iis consul Brundisium ad exercitum, atque

inde, cum omnibus copiis transvectus, ad Nymphaeum in Apolloniati agro posuit castra. U. C. 581.
A. C. 171.

L. Paucos ante dies Perseus, postquam legati, ab Perseus
consilium
habet. Roma regressi, præciderant spem pacis, consilium habuit. Ibi aliquamdiu diversis sententiis certatum est. Erant, quibus vel stipendium pendendum, si injungeretur, vel agri parte cedendum, si multarent; quidquid denique aliud pacis causa patientium esset, non recusandum videretur, nec committendum, ut in aleam tanti casus se regnumque daret. *Si possessio haud ambigua regni maneret, multa diem tempusque adferre posse, quibus non amissa modo recuperare, sed timendus ultro iis esse, quos nunc timeret, posset.* Ceterum multo major pars ferocioris sententiæ erat: *Quidquid cessisset, cum eo simul regno protinus cedendum esse, adfirmabant. Neque enim Romanos pecunia aut agro egere: sed hoc scire, quum omnia humana, tum maxima quæque et regna et imperia sub casibus multis esse. Karthaginiensium opes fregisse sese, et cervicibus eorum præpotentem finitimum regem inposuisse: Antiochum progeniemque ejus ultra juga Tauri remotum. Unum esse Macedoniae regnum, et regione propinquum, et quod, sicubi populo Romano sua fortuna labet, antiquos animos regibus suis videatur posse facere. Dum integræ res * * apud animum suum Perseu debere, utrum, singula concedendo, nudatus ad extremum opibus extorrisque regno, Samothraciam aliamve quam insulam petere ab Romanis, ubi privatus superstes regno suo in contemptu atque inopia consenescat, malit: an, armatus vindex fortunæ dignitatisque suæ, ita ut viro forti dignum sit, patiatur, quodcumque casus belli tulerit; aut victor liberet orbem terrarum ab imperio Romano. Non esse admirabilius*

U. C. 581. *Romanos Græcia pelli, quam Hannibalem Italia pul-*
 A. C. 171. *sum esse : neque, Hercule, videre, quid conveniat, fratri,*
adfectanti per injuriam regnum, summa vi restitisse ;
alienigenis bene parto eo cedere. Postremo ita bello et
pace quari, ut inter omnes conveniat, nec turpius quid-
quam esse, quam sine certamine cessisse regno : nec
præclarius quidquam, quam pro dignitate ac majestate
omnem fortunam expertum esse.

LI. Pellæ, in vetere regia Macedonum, hoc consilium erat. Geramus ergo, inquit, Diis bene juvantibus, quando ita videtur, bellum : literisque circa præfectos dimissis, Citium (Macedoniæ oppidum est) copias omnes contrahit : ipse centum hostiis sacrificio regaliter Minervæ, quam vocant Alcidem, confecto, cum purpuratorum et satellitum manu profectus Citium est : eo jam omnes Macedonum externorumque auxiliorum convenerant copię. Castra ante urbem ponit, omnesque armatos in campo struxit. Summa omnium quadraginta millia armata fuere : quorum pars ferme dimidia phalangitæ erant. Hippias Berœæus præerat. Delecta deinde et viribus et robore ætatis, ex omni cætratorum numero, duo erant agemata : hanc ipsi legionem vocabant. Præfectos habebant Leonatum et Thrasippum Eulyestas. Ceterorum cætratorum trium ferme millium hominum, dux erat Antiphilus Edessæus. Pæones, et ex Parorea et Parstrymonia (sunt autem ea loca subjecta Thraciæ) et Agrianes, admixtis etiam Thracibus incolis, trium millium ferme et ipsi expleverunt numerum. Armaverat contraxeratque eos Didas Pæon, qui adolescentem Demetrium occiderat. Et armatorum duo millia Gallorum erant, præfecto Asclepiodoto. Ab Heraclea ex Sintiis

Copiæ
Persei.

tria millia Thracum liberorum suum ducem habebant. Cretensium par pene numerus suos duces sequebatur, Susum Phalarneum et Syllum Gnossium. Et Leonides Lacedæmonius quingentis ex Græcia, mixto generi hominum, præerat. Regii is generis ferebatur; exsul, damnatus frequenti concilio Achæorum, literis ad Persea deprensus. Ætolorum et Bœotorum, qui non explebant plus quam quingentorum omnes numerum, Lyco Achæus præfectus erat. Ex his mixtis tot populorum, tot gentium auxiliis, duodecim millia armatorum ferme efficiebantur. Equitum ex tota Macedonia contraxerat tria millia. Venerat eodem Cotys, Seuthæ filius, rex gentis Odrysarum, cum mille delectis equitibus, pari ferme peditum numero. Summa totius exercitus triginta novem millia peditum erant, quatuor equitum. Satis constabat, secundum eum exercitum, quem Magnus Alexander in Asiam trajecit, numquam ullius Macedonum regis copias tantas fuisse.

LII. Sextus et vicesimus annus agebatur, ex quo petenti Philippo data pax erat: per id omne tempus quæta Macedonia et progeniem ediderat, cujus magna pars matura militiæ esset, et levibus bellis Thracum adcolarum, quæ exercerent magis, quam fatigaret, sub adsidua tamen militia fuerat: et diu meditatam Philippo primo, deinde et Persi, Romanum bellum, omnia ut instructa parataque essent, effecerat. Mota parumper acies, (non justo decursu tamen) ne stetisse tantum in armis viderentur: armatosque, sicut erant, ad concionem vocavit. Ipse constitit in tribunali, circa se habens filios duos: quorum major Philippus, natura frater, adoptione filius; minor, quem Alexandrum vocabant, naturalis

U. C. 581.

A. C. 171.

U. C. 581. erat. Cohortatus est milites ad bellum: injuriam
A. C. 171. populi Romani in patrem seque commemoravit:

Oratio
Persei ad
milites.

*Illum, omnibus indignitatibus compulsum ad rebellandum, inter adparatum belli fato obpressum: ad se simul legatos, simul milites ad occupandas Græciæ urbes missos. Fallaci deinde conloquio per speciem reconciliandæ pacis extractam hiemem, ut tempus ad comparandum haberent. Consulem nunc venire cum duabus legionibus Romanis, quæ * * trecenos equites habeant, et pari ferme numero sociorum peditum equitumque. Eo ut accedant regum auxilia Eumenis et Masinissæ, non plus septem millia peditum, duo equitum futura. Auditis hostium copiis, respicerent suum ipsi exercitum; quantum numero, quantum genere militum præstarent tironibus, raptim ad id bellum conscriptis, ipsi, a pueris eruditi artibus militiæ, tot subacti atque durati bellis. Auxilia Romanis Lydos, et Phrygas, et Numidas esse: sibi Thracas, Gallosque, ferocissimas gentium. Arma illos habere ea, quæ sibi quisque paraverit pauper miles: Macedonas prompta ex regio adparatu, per tot annos patris sui cura et impensa facta. Commeatum illis quum procul, tum omnibus sub casibus maritimis fore: se et pecuniam et frumentum, præter redditus metallorum, in decem annos seposuisse. Omnia, quæ Deorum indulgentia, quæ regia cura præparanda fuerant, plena cumulataque habere Macedonas: animum habendum esse, quem habuerint majores eorum; qui, Europa omni domita, transgressi in Asiam, incognitum famæ aperuerint armis orbem terrarum: nec ante vincere desierint, quam Rubro mari inclusis, quod vincerent, defuerit. At, Hercule, nunc non de ultimis Indiæ oris, sed de ipsius Macedoniæ possessione certamen fortunam indixisse. Cum patre*

suo gerentes bellum Romanos speciosum Græciæ liberandæ tulisse titulum : nunc propalam Macedoniam in servitutem petere, ne rex vicinus imperio sit Romano, ne gens bello nobilis arma habeat. Hæc enim tradenda superbis dominis esse cum rege regnoque, si absistere bello, et facere imperata velint.

LIII. Quum per omnem orationem satis frequenti adsensu subclamatum esset ; tum vero ea vociferatio, simul indignantium minitantiumque, partim jubentium bonum animum habere regem, exorta est, ut finem dicendi faceret : tantum jussis ad iter parare, (jam enim dici, movere castra ab Nymphæo Romanos) concione dimissa, ad audiendas legationes civitatum Macedoniæ se contulit : venerant autem ad pecunias, pro facultatibus quæque suis, et frumentum pollicendum ad bellum. Omnibus gratiæ actæ, remissum omnibus ; satis regiones adparatus ad ea dictum subficere : vehicula tantum imperata, ut tormenta, telorumque missilium ingentem vim præparatam, bellicumque aliud instrumentum veherent. Profectus inde toto exercitu, Eordæam petens, ad Begorritem, quem vocant, lacum positus castris, postero die in Elimeam ad Haliacmona fluvium processit. Deinde saltu angusto superatis montibus, quos Cambunios vocant, descendit ad (Tripolim vocant) Azorum, Pythium, et Dolichen incolentes. Hæc tria oppida paullisper cunctata, quia obsides Larissæis dederant, victa tamen præsentī metu, in dedicationem concesserunt. Benigne his adpellatis, haud dubius Perrhæbos quoque idem facturos, urbem, nihil cunctatis, qui incolebant, primo adventu recipit. Cyretias obpugnare coactus, primo etiam die acri concursu ad portas armatorum est repulsus : postero

U. C. 581.

A. C. 171.

Macedoniæ
civitates
pecuniam
obferunt.It in Thes-
saliā.

U. C. 581. die omnibus copiis adortus, in deditioem omnes
 A. C. 171. ante noctem accepit.

LIV. Mylæ, proximum oppidum, ita munitum, ut inexcuperabilis munimenti spes incolas ferociores faceret, non portas claudere regi satis habuerunt, sed probris quoque in ipsum Macedonasque procacibus jaculati sunt: quæ res, quum infestiorum hostem ad obpugnandum fecisset, ipsos desperatione veniæ ad tuendos sese acrius accendit. Itaque per triduum ingentibus utrimque animis et obpugnata sunt, et defensæ. Multitudo Macedonum ad subeundum in vicem prælium haud difficulter succedebat: oppidanos, diem, noctem eosdem tuentes mœnia, non vulnera modo, sed etiam vigiliæ et continens labor conficiebat: quarto die quum et scalæ undique ad muros erigerentur, et porta vi majore obpugnaretur; oppidani depulsi muris ad portam tuendam concurrunt, eruptionemque repentinam in hostes faciunt: quæ quum iræ magis inconsultæ, quam veræ fiduciæ virium esset, pauci et fessi ab integris pulsi terga dederunt; fugientesque per patentem portam hostes acceperunt. Ita capta urbs ac direpta est: libera quoque corpora, quæ cædibus superfuerunt, venundata. Diruto magna ex parte et incenso oppido profectus, ad Phalannam castra movit: inde postero die Gyrtonem pervenit. Quo quum T. Minucium Rufum et Hippium, Thessalorum prætorem, cum præsidio intrasse accepisset, ne tentata quidem obpugnatione, prætergressus, Elatiam et Gonnum, percussis inopinato adventu oppidanis, recepit. Utraque oppida in faucibus sunt, quæ Tempe adeunt; magis Gonnum: itaque et firmiore id præsidio tutum equitum pedi-

tumque, ad hoc fossa triplici ac vallo munitum, reliquit. Ipse, ad Sycurium progressus, obperiri ibi hostium adventum statuit; simul et frumentari passim exercitum jubet in subjecto hostium agro: namque Sycurium est sub radicibus Ossæ montis: qua in meridiem vergit, subjectos habet Thessaliæ campos; ab tergo Macedoniam atque Magnesiam. Ad has opportunitates accedit summa salubritas et copia, pluribus circumjectis fontibus, perennium aquarum.

LV. Consul Romanus, per eosdem dies Thessaliam cum exercitu petens, iter expeditum primo per Epirum habuit: deinde, postquam in Athamaniam est transgressus, asperi ac prope invii soli, cum ingenti difficultate parvis itineribus ægre Gomphos pervenit: cui si, vexatis hominibus equisque, tiro-nem exercitum ducenti acie instructa et loco suo et tempore obstitisset rex, ne Romani quidem abnuunt, magna sua cum clade fuisse pugnatu-<sup>Cos. ad re-
gem vadit.</sup>ros. Postquam Gomphos sine certamine ventum est, præter gaudium periculosi saltus superati, contemptus quoque hostium, adeo ignorantium opportunitates suas, accessit. Sacrificio rite perfecto, consul, et frumento dato militibus, paucos ad requiem jumentorum hominumque moratus dies, quum audiret vagari Macedonas effusos per Thessaliam, vastari-
que sociorum agros, satis jam reffectum militem ad Larissam ducit. Inde, quum tria millia ferme ab-
esset a Tripoli, (Sceam vocant) super Peneum am-
nem posuit castra. Per idem tempus Eumenes ad
Chalcidem navibus accessit cum Attalo atque Athe-<sup>Eumenis
adventus.</sup>næo fratribus, Philetæro fratre relicto Pergami ad
tutelam regni: inde cum Attalo et quatuor millibus

U. C. 581. peditum, mille equitum, ad consulem venit. Chal-
 A. C. 171. cide relictæ duo millia peditum, quibus Athenæus
 præpositus. Et alia eodem auxilia Romanis ex
 omnibus undique Græciæ populis convenerunt, quo-
 rum pleraque (adeo parva erant) in oblivionem adduc-
 ta: Apolloniatae trecentos equites, centum pedites
 miserunt. Ætolorum alæ unius instar, quantum in
 tota gente equitum erat, venerant; et Thessalorum
 omnis equitatus separatus erat: non plus quam tre-
 centi erant equites in castris Romanis. Achæi ju-
 ventutis suæ, Cretico maxime armatu, ad mille de-
 derunt.

Lucretius
 prætor in
 Bœotia.

LVI. Sub idem tempus et C. Lucretius prætor,
 qui navibus præerat ad Cephalleniam, M. Lucretio
 fratre cum classe super Maleam Chalcidem jusso
 petere, ipse triremem conscendit, sinum Corinthium
 petens ad præoccupandas in Bœotia res: tardior ei
 navigatio propter infirmitatem corporis fuit. M.
 Lucretius, Chalcidem adveniens, quum a P. Lentulo
 Haliartum obpugnari audisset, nuncium, prætoris
 verbis, qui abscedere eum inde juberet, misit. Bœ-
 otorum juventute, quæ pars cum Romanis stabat,
 eam rem adgressus legatus, a mœnibus abscessit.
 Hæc soluta obsidio locum alteri novæ obsidioni de-
 dit: namque extemplo M. Lucretius cum exercitu
 navali, decem millibus armatorum, ad hoc duobus
 millibus regionum, qui sub Athenæo erant, Haliar-
 tum circumsedit: parantibusque jam obpugnare,
 supervenit a Creüsa prætor. Ad idem fere tempus
 et ab sociis naves Chalcidem convenerunt: duæ
 Punicæ quinqueremes, duæ ab Heraclea ex Ponto
 triremes, quatuor Chalcedone, totidem Samo, tum
 quinque Rhodiæ quadriremes. Prætor, quia nus-

quam erat maritimum bellum, remisit sociis : et Q. U. C. 581.
A. C. 171.
 Marcus Chalcidem navibus venit, Alope capta, Larissa, quæ Cremaste dicitur, obpugnata. Quum hic status in Bæotia esset, Perseus, quum ad Sycurium (sicut ante dictum est) stativa haberet, frumento undique circa ex agris convecto, ad vastandum agrum Pheræorum misit : ratus ad juvandas sociorum urbes longius ab castris abstractos deprehendi Romanos posse. Quos quum eo tumultu nihil motos animadvertisset, prædam quidem, præterquam hominum, (pecora autem maxime omnis generis fuere) divisit ad epulandum militibus.

LVII. Sub idem deinde tempus consilium et consul et rex habuerunt, unde bellum ordirentur. Regis creverunt animi vastatione concessa sibi ab hoste Perseus in
Romanos
ducit.
 Pheræi agri : itaque eundem inde ad castra, nec dandum ultra spatium cunctandi, censebat. Et Romani censebant, cunctationem suam infamem apud socios esse, maximopere indigne ferentes, non latam Pheræis opem. Consultantibus, quid agerent, (aderant autem Eumenes et Attalus in consilio) trepidus nuncius adfert, hostem magno agmine adesse. Consilio dimisso, signum extemplo datur, ut arma capiant. Interim placet, ex regiis auxiliis centum equites et parem numerum jaculatorum peditum exire. Perseus hora ferme diei quarta, quum paullo plus mille passus abesset a castris Romanis, consistere signa peditum jussit : prægressus ipse cum equitibus ac levi armatura, et Cotys cum eo ducesque aliorum auxiliorum præcesserunt. Minus quingentos passus ab castris aberant, quum in conspectu fuere hostium equites : duæ alæ erant magna ex parte Gallorum, (Cassignatus præerat) et levis ar-

U. C. 581. maturæ centum fere et quinquaginta Mysi aut Cre-
 A. C. 171. tenses. Constitit rex, incertus quantum esset hos-
 tium. Duas inde ex agmine turmas Thracum, duas
 Macedonum, cum binis Cretensium cohortibus et
 Equestre Thracum, misit. Proelium, quum pares numero es-
 proelium. sent, neque ab hac aut illa parte nova auxilia subve-
 nirent, incerta victoria finitum est. Eumenis ferme
 triginta interfecti; inter quos Cassignatus dux Gal-
 lorum cecidit: et tunc quidem Perseus ad Sycurium
 copias reduxit. Postero die circa eandem horam in
 eundem locum rex copias admovit, plaustis cum
 aqua sequentibus: nam duodecim millium passuum
 via omnis sine aqua, et plurimi pulveris erat: ad-
 fectosque siti, si primo in conspectu dimicassent,
 pugnatuos fuisse adparebat. Quum Romani quies-
 sent, stationibus etiam intra vallum reductis, regii
 quoque in castra redeunt. Hoc per aliquot dies fe-
 cerunt, sperantes fore, ut Romani equites abeuntium
 novissimum agmen adgrederentur: inde certamine
 orto, quum longius a castris eos eliciuissent, facile,
 ubiubi essent, se, qui equitatu et levi armatura plus
 possent, conversuros aciem.

LVIII. Postquam inceptum non succedebat, cas-
 tra propius hostem movit rex, et a quinque millibus
 passuum communiit: inde, luce prima in eodem,
 quo solebat, loco peditum acie instructa, equitatum
 omnem levemque armaturam ad castra hostium du-
 cit. Visus et plurium et propior solito pulvis tre-
 pidationem in castris Romanis fecit. Et primo vix
 creditum nuncianti est, quia prioribus continuis die-
 bus numquam ante horam quartam hostis adparu-
 erat: tum solis ortus erat. Deinde ut plurium cla-
 more et cursu a portis dubitatio exemta est, tumul-

Perseus
 equitatum
 omnem ad
 castra hos-
 tium du-
 cit.

tus ingens oboritur: tribuni, præfectique, et centuriones in prætorium; miles ad sua quisque tentoria discurrit. Minus quingentos passus a vallo instruxerat Perseus suos circa tumulum, quem Callicinum vocant. Lævo cornu Cotys rex præerat cum omnibus suæ gentis: equitum ordines levis armatura interposita distinguebat. In dextro cornu Macedones erant equites: intermixti turmis eorum Creten-
ses. Huic armaturæ Milo Berœæus, equitibus et summæ partis ejus Meno Antigoniensis præerat. Proximi cornibus constiterant regii equites, et mixtum genus, delecta plurium gentium auxilia: Patrocles Antigoniensis hic et Pæoniæ præfectus Didas erant præpositi. Medius omnium rex erat: circa eum agema, quod vocant, equitumque sacræ alæ. Ante se statuit funditores jaculatorésque; quadringentorum manus utraque numerum expleverat: Ionem Thessalonicensem et Timanora Dolopem iis præfecit. Sic regii constiterant. Consul, intra vallum peditum acie instructa, et ipse equitatum omnem cum levi armatura misit: pro vallo instructi sunt. Dextro cornu præpositus C. Licinius Crassus, consulis frater, cum omni Italico equitatu, velitibus intermixtis: sinistro M. Valerius Lævinus sociorum ex Græcis populis equites habebat, ejusdem gentis levem armaturam. Mediam autem aciem cum delectis equitibus extraordinariis tenebat Q. Mucius: ducenti equites Galli ante signa horum instructi, et de auxiliis Eumenis Cyrtiorum gentis trecenti. Thessali quadringenti equites parvo intervallo super vallum cornu locati. Eumenes rex Attalusque cum omni manu sua ab tergo inter postremam aciem ac vallum steterunt.

U. C. 581.

A. C. 171.

Consulis
acies.

U. C. 581. LIX. In hunc modum maxime instructæ acies,
A. C. 171.

Prælium.

par ferme utrimque numerus equitum ac levis armaturæ, concurrunt, a funditoribus jaculatoribusque, qui præcesserunt, prælio orto. Primi omnium Thracæ, haud secus quam diu claustris retentæ feræ, concitati cum ingenti clamore in dextrum cornu, Italicos equites, incurrerunt; ut usu belli et ingenio impavida gens turbaretur: gladiis hastas petere pedites, nunc succidere crura equis, nunc ilia subfodere. Perseus, in mediam invectus aciem, Græcos primo inpetu avertit: quibus quum gravis ab tergo instaret hostis; Thessalorum equitatus, qui a lævo cornu brevi spatio disjunctus in subsidiis fuerat extra concursum, primo spectator certaminis, deinde, inclinata re, maximo usui fuit. Cedentes enim sensim integris ordinibus, postquam se Eumenis auxiliis adjunxerunt, et cum eo tutum inter ordines suos receptum sociis fuga dissipatis dabant, et, quum minus conferti hostes instarent, progredi etiam ausi, multos fugientium obvios exceperunt. Nec regii, sparsi jam ipsi passim sequendo, cum ordinatis et certo incedentibus gradu manus conserere audebant. Quum, victor equestri prælio rex parvo momento si adjuvisset, debellatum esset, opportune adhortanti supervenit phalanx, quam sua sponte, ne audaci cœpto deessent, Hippias et Leonatus raptim adduxerant, postquam prospere pugnasse equitem acceperunt. Fluctuante rege inter spem metumque tantæ rei cogendæ, Cretensis Evander, quo ministro Delphis ad insidias Eumenis regis usus erat, postquam agmen impeditum venientium sub signis vidit, ad regem adcurrit, et monere institit, *ne elatus felicitate summam rerum temere in non necessariam aleam daret. Si con-*

Rex equestri prælio victor.

tentus bene re gesta quiesset eo die, vel pacis honesta U. C. 581.
conditionem habiturum, vel plurimos belli socios, qui A. C. 171.
fortunam sequerentur, si bellare mallet. In hoc con- Receptui
 silium pronior erat animus regis. Itaque, conlau- canit.
 dato Evandro, signa referri, peditumque agmen red-
 ire in castra jubet; equitibus receptui canere.

LX. Cecidere eo die ab Romanis ducenti equites,
 duo millia, haud minus, peditum; capti ferme du-
 centi equites: ex regiis autem viginti equites, qua-
 draginta pedites interfecti. Postquam rediere in
 castra victores, omnes quidem læti, ante alios Thra-
 cum insolens lætitia eminebat: cum cantu enim su-
 perfixa capita hostium portantes redierunt. Apud
 Romanos non mœstitia tantum ex male gesta re,
 sed pavor etiam erat, ne extemplo castra hostis
 adgrederetur. Eumenes suadere, ut trans Peneum Cos. trans
 transferret castra; ut pro munimento amnem habe- Peneum
 ret, dum perculsi milites animos conligerent. Con- castra
 sul moveri flagitio timoris fatendi: victus tamen ra- transfert.
 tione, silentio noctis transductis copiis, castra in
 ulteriore ripa communit. Rex, postero die ad laces-
 sendos prælio hostes progressus, postquam trans am-
 nem in tuto posita castra animadvertit, fatebatur
 quidem peccatum, quod pridie non institisset victis;
 sed aliquanto majorem culpam esse, quod nocte fo-
 ret cessatum: nam, ut neminem alium suorum mo-
 veret, levi armatura inmissa, trepidantium in transitu
 fluminis hostium deleri magna ex parte copias po-
 tuisse. Romanis quidem præsens pavor demtus erat,
 in tuto castra habentibus: damnum inter cetera
 præcipue famæ movebat: et in consilio apud con-
 sulem pro se quisque in Ætolos conferebant caus-
 sam; ab iis fugæ terrorisque principium ortum: secutos

U. C. 581. *pavorem Ætolorum et ceteros socios Græcorum populorum.*
 A. C. 171. *Quinque principes Ætolorum primi terga ver-*
tentes conspecti dicebantur. Thessali pro concione
laudati, ducesque eorum etiam virtutis caussa donati.

Perseus
 suos donat.

LXI. Ad regem spolia cæsorū hostiū refere-
 bantur : dona ex his, aliis arma insignia, aliis equos,
 quibusdam captivos dono dabat : scuta erant supra
 mille quingenta ; loricæ thoracesque mille amplius
 summam explebant ; galearum gladiatorumque et mis-
 silium omnis generis major aliquanto numerus. Hæc,
 per se ampla, pleraque multiplicata verbis regis, quæ
 ad concionem vocato exercitu habuit. *Præjudica-*
tum eventum belli habetis. Meliorem partem hostium,
equitatum Romanum, quo invictos se esse gloriabantur,
fudistis. Equites enim illis principes juventutis, equi-
tes seminarium senatus : inde lectos in Patrum nume-
rum consules, inde imperatores creant : horum spolia
paullo ante divisimus inter vos. Nec minorem de le-
gionibus peditum victoriam habetis : quæ, nocturna fu-
ga vobis subtractæ, naufragorum trepidatione passim
natantium flumen compleverunt. Sed facilius nobis se-
quentibus victos Peneum superare erit, quam illis tre-
pidentibus fuit ; transgressique extemplo castra obpug-
nabimus, quæ hodie cepissemus, ni fugissent. Aut, si
acie decernere volent, eundem pugnæ pedestris eventum
expectate, qui equitum in certamine fuerit. Et qui
vicerant alacres, spolia cæsorū hostiū humeris
gerentes, ante ora sua audivere, ex eo, quod accide-
rat, spem futuri præcipientes : et pedites, aliena
gloria accensi, præcipue qui Macedonum phalangis
erant, sibi quoque et navandæ regi operæ, et similem
gloriam ex hoste pariendi, occasionem optabant.
 Concione dimissa, postero die profectus inde ad

Mopsium posuit castra : tumulus hic inter Tempe et Larissam medius est. U. C. 581.
A. C. 171.

LXII. Romani, non abscedentes ab ripa Penei, transtulerunt in locum tutiorem castra. Eo Misagenes Numida venit cum mille equitibus, pari peditum numero, ad hoc elephantis duobus et viginti. Per eos dies consilium habenti regi de summa, quum jam consedisset ferocia ab re bene gesta, ausi sunt quidam amicorum consilium dare, ut secunda fortuna in conditione honestæ pacis uteretur potius, quam, spe vana evectus, in casum inrevocabilem se daret. *Modum inponere secundis rebus, nec nimis credere serenitati præsentis fortunæ, prudentis hominis et merito felicitis esse. Mitteret ad consulem, qui fædus in easdem leges renovarent, quibus Philippus pater ejus pacem a T. Quinctio victore accepisset. Neque finiri bellum magnificentius, quam a tam memorabili pugna; neque spem firmiorem pacis perpetuæ dari, quam quæ perculosos adverso prælio Romanos molliores factura sit ad paciscendum. Quod si Romani tum quoque insita pertinacia æqua adspernarentur, Deos hominesque et moderationis Persei, et illorum pervicacis superbiæ, futuros testes. Numquam ab talibus consiliis abhorrebat regis animus : itaque plurimum adsensu comprobata est sententia. Legati, ad consulem missi, adhibito frequenti consilio, auditi sunt. Pacem petere, Perseus pactum peti. vectigal, quantum Philippus pactus esset, daturum Persea Romanis pollicentes : urbibus, agris, locisque, quibus Philippus cessisset, cessurum primum : hæc legati. Submotis his, quum consultarent, Romana constantia vicit in consilio. Ita tum mos erat, in adversis vultum secundæ fortunæ gerere, moderari animos in secundis. Responderi placuit, Ita pacem dari, si de Frustra.*

U.C. 581. *summa rerum liberum senatui permittat rex de se deque*

A. C. 171. *universa Macedonia statuendi jus.* Hæc quum renun-
ciassent legati, miraculo ignaris moris pertinacia
Romanorum esse; et plerique vetare, amplius men-
tionem pacis facere: ultro mox quæsitu-
ros, quod oblatum fastidiant. Perseus hanc ipsam superbiam,
quippe ex fiducia virium esse, timere: et, summam
pecuniæ augens, si pretio pacem emere posset, non
destitit animum consulis tentare. Postquam nihil
ex eo, quod primo responderat, mutabat, desperata
pace, ad Sycurium, unde profectus erat, rediit, belli
casum de integro tentaturus.

Græci fa-
vent Per-
seo.

LXIII. Fama equestris pugnæ, vulgata per Græ-
ciam, nudavit voluntates hominum: non enim so-
lum, qui partis Macedonum erant, sed plerique, in-
gentibus Romanorum obligati beneficiis, quidam vim
superbiamque experti, læti eam famam accepere:
non ob aliam causam, quam pravo studio, quo etiam
in certaminibus ludicris vulgus utitur deteriori atque
infirmiori favendo. Eodem tempore in Bæotia sum-
ma vi Haliartum Lucretius prætor obpugnarat: et,
quamquam nec habebant externa auxilia obsessi,
præter Coronæorum juniores, qui prima obsidione
mœnia intraverant, neque sperabant, tamen ipsi ani-
mis magis, quam viribus, resistebant: nam et erup-
tiones in opera crebro faciebant; et arietem admo-
tum, libramento plumbi gravatum, ad terram urge-
bant; et, si qua declinarent, qui agebant, ictum,
pro diruto muro novum tumultuario opere, raptim
ex ipsa ruinæ strage congestis saxis, exstruebant.
Quum operibus obpugnatio lentior esset, scalas per
manipulos dividi prætor jussit, ut corona undique
mœnia adgressurus; eo magis subfecturam ad id

Haliarti
obpugna-
tio.

multitudinem ratus, quod, qua parte palus urbem ^{U. C. 581.} cingit, nec adtinebat obpugnari, nec poterat. Ipse ^{A. C. 171.} ab ea parte, qua duæ turres, quodque inter eas muri prorutum fuerat, duo millia militum delectorum admovit; ut eodem tempore, quo ipse transcendere ruinas conaretur, concursu adversus se oppidanorum facto, scalis vacua defensoribus mœnia capi parte aliqua possent. Haud segniter oppidani vim ejus arcere parant: nam super stratum ruinis locum, fascibus aridis sarmentorum injectis, stantes cum ardentibus facibus accensuros ea se sæpe minabantur, ut, incendio intersepti ab hoste, spatium ad objiciendum interiorem murum haberent. Quod inceptum eorum fors inpediit: nam tantus repente effusus est imber, ut nec accendi facile pateretur, et exstingueret accensa. Itaque et transitus per distracta fumantia virgulta patuit; et, in unius loci præsidium omnibus versis, mœnia quoque pluribus simul partibus scalis capiuntur. In primo tumultu captæ urbis seniores inpubesque, quos casus obvios obtulit, passim cæsi: armati in arcem confugerunt: et postero die, quum spei nihil superesset, deditione facta, sub corona venierunt. Fuerunt autem duo millia ferme et quingenti: ornamenta urbis, statuæ et tabulæ pictæ, et quidquid pretiosæ prædæ fuit, ad naves delatum: urbs diruta a fundamentis. Inde Thebas ductus exercitus: quibus sine certamine receptis, urbem tradidit exsulibus, et qui Romanorum partis erant: adversæ factionis hominum, fautorumque regis ac Macedonum familias sub corona vendidit. His gestis in Bœotia, ad mare ac naves rediit.

LXIV. Quum hæc in Bœotia gererentur, Perseus ^{Perseus frustra cas-} ad Sycurium stativa dierum aliquot habuit. Ubi ^{tra Roma-}

U. C. 581. quum audisset, raptim Romanos circa ex agris de-
 A. C. 171. messum frumentum convehere, deinde ante sua
 na incen- quemque tentoria spicas fascibus desecantem, quo
 dere vult. purius frumentum tereret, ingentes acervos per tota
 castra stramentorum fecisse: ratus incendio oppor-
 tuna esse, faces, tædamque, et malleolos stuppæ in-
 litos pice parari jubet: atque ita media nocte pro-
 fectus, ut prima luce adgressus falleret. Nequid-
 quam: primæ stationes obpressæ tumultu ac terrore
 suo ceteros exciverunt: signumque datum est arma
 extemplo capiendi; simulque in vallo, ad portas,
 miles instructus erat, et intentus propugnationi cas-
 trorum. Perseus et extemplo circumegit aciem, et
 prima impedimenta ire, deinde peditum signa ferri
 jussit: ipse cum equitatu et levi armatura substitit
 ad agmen cogendum; ratus, id quod accidit, inse-
 cuturos ad extrema ab tergo carpenda hostes. Breve
 certamen levis armaturæ maxime cum procursatori-
 bus fuit: equites peditesque sine tumultu in castra
 redierunt. Demessis circa segetibus, Romani ad
 Cranonium intactum agrum castra movent. Ibi
 quum securi, et propter castrorum longinquitatem,
 et viæ inopis aquarum difficultatem, quæ inter Sy-
 curium et Cranona est, stativa haberent; repente
 prima luce in imminentibus tumultis equitatus regius
 cum levi armatura visus ingentem tumultum fecit.
 Pridie per meridiem profecti ab Sycurio erant: pe-
 ditum agmen sub lucem reliquerant in proxima pla-
 nitie. Stetit paullisper in tumulis, elici posse ratus
 ad equestre certamen Romanos: qui postquam ni-
 hil movebant, equitem mittit, qui pedites referre ad
 Sycurium signa juberet; ipse mox insecutus. Ro-
 mani equites, modico intervallo sequentes, sicubi

sparsos ac dissipatos invadere possent, postquam confertos abire, signa atque ordines servantes, viderunt, et ipsi in castra redeunt. U. C. 581.
A. C. 171.

LXV. Inde, obfensus longinquitate itineris, rex ad Mopsium castra movit; et Romani, demessis Cranonis segetibus, in Phalannæum agrum trans-eunt. Ibi quum ex transfuga cognosset rex, sine ullo armato præsidio passim vagantes per agros Romanos metere, cum mille equitibus, duobus millibus Thracum et Cretensium profectus, quum, quantum adcelerare poterat, effuso agmine issent, inproviso adgressus est Romanos: juncta vehicula, pleraque onusta, mille admodum capiuntur, sexcenti ferme homines. Prædam custodiendam ducendamque in castra trecentis Cretensium dedit: ipse, revocato ab effusa cæde equite et reliquis peditum, ducit ad proximum præsidium, ratus haud magno certamine obprimi posse. L. Pompeius tribunus militum præerat, qui percussos milites repentino hostium adventu in propinquum tumultum recepit, loci se præsidio, quia numero et viribus impar erat, defensurus. Ibi quum in orbem milites coëgisset, ut densatis scutis ab jactu sagittarum et jaculorum sese tuerentur, Perseus, circumdato armatis tumulo, alios adscensum undique tentare jubet, et cominus prælium conserere, alios eminus tela ingerere. Anceps Romanos terror circumstabat: nam neque conferti pugnare propter eos, qui adscendere in tumultum conabantur, poterant: et, ubi ordines procursando solvissent, patebant jaculis sagittisque. Maxime cestrosphendonis vulnerabantur: hoc illo bello novum genus teli inventum est. Bipalme spiculum hastili

L. Pompeii
et militum
ejus fortitudo.

semicubitali infixum erat, crassitudine digiti: huic Cestro-
sphendonæ
descriptio.

U. C. 581. ad libramen pinnæ tres, velut sagittis solent, circumdabantur: funda media duo funalia inparia habebat: cum majori sinu libratum funditor habena rotaret, excussum, velut glans, emicabat. Quum et hoc, et alio omni genere telorum, pars vulnerata militum esset, nec facile jam arma fessi sustinerent, instare rex, ut dederent se, fidem dare, præmia interdum polliceri: nec cujusquam ad deditionem flecebatur animus; quum ex insperato jam obstinatis mori spes adfulsit. Nam quum ex frumentatoribus refugientes quidam in castra nunciassent consuli, circumsideri præsidium; motus periculo tot civium (nam octingenti ferme, et omnes Romani erant) cum equitatu ac levi armatura (accesserant nova auxilia, Numidæ pedites equitesque et elephanti) castris egreditur: et tribunis militum imperat, ut legionum signa sequantur. Ipse, velitibus ad firmanda levium armorum auxilia adjectis, ad tumultum præcedit: consulis latera tegunt Eumenes, Attalus, et Misa-genes, regulus Numidarum.

Pellitur
Perseus.

LXVI. Quum in conspectu prima signa suorum circumsessis fuerunt, Romanis quidem ab ultima desperatione recreatus est animus: Perseus, cui primum omnium fuerat, ut, contentus fortuito successu, captis aliquot frumentatoribus occisisque, non tereret tempus in obsidione præsidii; secundum, ea quoque tentata utcumque, quum sciret nihil roboris secum esse, dum liceret intacto, abire; et ipse hostium adventum, elatus successu, mansit, et, qui phalangem arcesserent, propere misit: qua et serius, quam res postulabat, et raptim acta, turbati cursu adversus instructos et præparatos erant adventuri. Consul anteveniens extemplo prælium conseruit.

Primo resistere Macedones; deinde, ut nulla re pa-
 res erant, amissis trecentis peditibus, viginti quatuor
 primoribus equitum ex ala, quam sacram vocant, in-
 ter quos Antimachus etiam præfectus alæ cecidit,
 abire conantur. Ceterum iter prope ipso prælio
 tumultuosius fuit. Phalanx, abs trepido nuncio ad-
 cita, quum raptim duceretur, primo in angustiis
 captivorum agmini oblata vehiculisque frumento
 onustis: iis cæsis, ingens ibi vexatio partis utrius-
 que fuit, nullo expectante, utcumque explicaretur
 agmen, sed armatis detrudentibus per præceps inpe-
 dimenta, (neque enim aliter via aperiri poterat) ju-
 mentis, quum stimularentur, in turba sævientibus.
 Vix ab incondito agmine captivorum expedierant
 sese, quum regio agmini peculsisque equitibus ob-
 currunt. Ibi vero clamor jubentium referre signa
 ruinæ quoque prope similem trepidationem fecit:
 ut, si hostes, introire angustias ausi, longius inse-
 cuti essent, magna clades accipi potuerit. Consul,
 recepto ex tumulto præsidio, contentus modico suc-
 cessu, in castra copias reduxit. Sunt, qui eo die
 magno prælio pugnatum auctores sint: octo millia
 hostium cæsa, in his Sopatrum et Antipatrum regio-
 duces: vivos captos circiter duo millia octingentos,
 signa militaria capta viginti septem. Nec incruen-
 tam victoriam fuisse: supra quatuor millia et tre-
 centos de exercitu consulis cecidisse: signa sinistra
 alæ quinque amissa.

LXVII. Hic dies et Romanis refecit animos, et
 Persea perculit, ut, dies paucos ad Mopsium mora-
 tus, sepulturæ maxime militum amissorum cura,
 præsidio satis valido ad Gonnum relicto, in Mace-
 doniam reciperet copias. Timotheum quemdam ex

U. C. 581.
A. C. 171.

In Macedo-
niam redit.

U. C. 581. regis præfectis cum modica manu relinquit ad Philam, jussu Magnetæ et propinquos tentare. Quum Pellam venisset, exercitu in hiberna dimisso, ipse cum Cotye Thessalonicam est profectus. Eo fama adfertur, Atlesbim regulum Thracum, et Corragum Eumenis præfectum, in Cotyis fines inpetum fecisse: et regionem, Marenen quam vocant, cepisse. Itaque, dimittendum Cotyn ad sua tuenda ratus, magnis proficiscentem donis prosequitur: ducenta talenta, semestre stipendium, equitatu numerat, quum primo annum dare constituisset. Consul, postquam profectum Persea audivit, ad Gonnum castra movet, si potiri oppido posset. Ante ipsa Tempe in faucibus situm, Macedoniæ claustra tutissima præbet, et in Thessaliam opportunum Macedonibus decursum. Quum et loco et præsidio valido inexpugnabilis res esset, abstinit incepto. In Perrhæbiam flexis itineribus, Malloea primo inpetu capta ac direpta, Tripoli aliaque Perrhæbia recepta, Larissam rediit: inde Eumene atque Attalo domum remissis, Misagenem Numidasque in hiberna in proximis Thessalis urbibus distribuit: et partem exercitus ita per totam Thessaliam divisit, ut et hiberna commoda omnes haberent, et præsidio urbibus essent. Q. Mucium legatum cum duobus millibus ad obtinendam Ambraciam misit. Græcarum civitatum socios omnes præter Achæos dimisit: cum exercitus parte profectus in Achaiam Phthiotim, Pteleum desertum fuga oppidanorum diruit a fundamentis, Antrona voluntate colentium recepit. Ad Larissam deinde exercitum admovit: urbs deserta erat; in arcem omnis multitudo concesserat: eam obpugnare adgreditur. Primi omnium Macedones, regium præsidium, metu

Cos. in
hiberna se
confert.

excesserant: a quibus relictī oppidani in deditionem U. C. 581.
extemplo veniunt. Dubitari inde, utrum Demetrias A. C. 171.
prius adgredienda foret, an in Bœotia adspiciendæ
res. Thebani, vexantibus eos Coronæis, in Bœo-
tiam arcescebant: ad horum preces, quia hibernis
aptior regio, quam Magnesia erat, in Bœotiam
duxit.

EPITOME LIBRI XLIII.

PRÆTORES aliquot, eo quod avarè et crudeliter provincias administrassent, damnati sunt. P. Licinius Crassus proconsul complures in Græcia urbes expugnavit, et crudeliter diripuit: ob id captivi, qui ab eo sub corona venierant, ex senatusconsulto postea restituti sunt. Item a præfectis classium Romanarum multa inpotenter in socios facta. Res præterea a Perseo rege in Thracia prospere gestas continet, victis Dardanis et Illyrico, cujus rex erat Gentius. Motus, qui in Hispania ab Olonico factus erat, ipso interemto cōsedit. M. Æmilius Lepidus a censoribus princeps in senatu lectus.

T. LIVII PATAVINI

LIBER XLIII.

EADEM æstate, qua in Thessalia equestri pugna
vicere Romani, legatus, in Illyricum a consule U. C. 587.
A. C. 171.
missus, opulenta duo oppida vi atque armis coëgit in Gesta in
Illyrico.
deditionem; omniaque iis sua concessit, ut opinione
clementiæ eos, qui Carnuntem munitam urbem incol-
lebant, adliceret: postquam nec, ut dederent se,
compellere, neque capere obsidendo poterat; ne
duabus obpugnationibus nequidquam fatigatus miles
esset, quas prius intactas urbes reliquerat, diripuit.
Alter consul C. Cassius nec in Gallia, quam sortitus
erat, memorabile quidquam gessit: et per Illyricum Cassius per
Illyricum
in Macedo-
niam ire
conatur.
ducere legiones in Macedoniam vano incepto est co-
natus. Ingressum hoc iter consulem senatus ex
Aquileiensiū legatis cognovit: qui, querentes colo-
niam suam novam et infirmam, necdum satis muni-
tam, inter infestas nationes Istrorum et Illyriorum
esse, quum peterent, ut senatus curæ haberet, quo-
modo ea colonia muniretur, interrogati, vellentne
eam rem C. Cassio consuli mandari? responderunt,
Cassium, Aquileiam indicto exercitu, profectum per
Illyricum in Macedoniam esse. Ea res primo incre-
dibilis visa: et pro se quisque credere, Carnis forsi-
tan aut Istris bellum inlatum. Tum Aquileienses,
nihil se ultra scire, nec audere adfirmare, quam tri-
ginta dierum frumentum militi datum; et duces, qui

U. C. 581. ex Italia itinera in Macedoniam nossent, conquisitos
 A. C. 171. abductosque. Enimvero senatus indignari, tantum
 consulem acsum, ut suam provinciam relinqueret, in
 alienam transiret; exercitum novo periculoso itinere
 inter exteras gentes duceret, viam tot nationibus in
 Italiam aperiret. Decernunt frequentes, ut C. Sul-
 picius prætor tres ex senatu nominet legatos, qui eo
 die proniscantur ex urbe; et, quantum adcelerare
 possent, Cassium consulem, ubicumque sit, perse-
 quantur; nuncient, ne bellum cum ulla gente mo-
 veat, nisi cum qua senatus gerendum censuerat.
 Legati hi profecti, M. Cornelius Cethegus, M. Ful-
 vius, P. Marcus Rex. Metus de consule atque
 exercitu distulit eo tempore muniendæ Aquileiæ
 curam.

Hispano-
 rum que-
 relæ de
 magistra-
 tibus
 Rom.

II. Hispaniæ deinde utriusque legati aliquot po-
 pulorum in senatum introducti. Ii, de magistratuum
 Romanorum avaritia superbiaque conquesti, nisi ge-
 nibus ab senatu petierunt, ne se socios fœdius spo-
 liari vexarique, quam hostes, patiantur. Quum et
 alia indigna quererentur, manifestum autem esset,
 pecunias captas; L. Canuleio prætori, qui Hispan-
 niam sortitus erat, negotium datum est, ut in singu-
 los, a quibus Hispani pecunias peterent, quinos re-
 cuperatores ex ordine senatorio daret, patronosque,
 quos vellent, sumendi potestatem faceret. Vocatis
 in curiam legatis recitatum est senatusconsultum,
 jussique nominare patronos: quatuor nominaverunt,
 M. Porcium Catonem, P. Cornelium Cn. F. Scipio-
 nem, L. Æmilium L. F. Paullum, C. Sulpicium Gal-
 lum. Cum M. Titinio primum, qui prætor A. Man-
 lio, M. Junio consulibus in citeriore Hispania fuerat,
 recuperatores sumserunt. Bis ampliatus, tertio ab-

solutus est reus. Dissensio inter duarum provinci- U. C. 581.
arum legatos est orta: citerioris Hispaniæ populi A. C. 171.
M. Catonem et Scipionem; ulterioris L. Paullum et
Gallum Sulpicium patronos sumserunt. Ad recupe-
ratores adducti a citerioribus populis P. Furius Phi-
lus, ab ulterioribus M. Matienus. Ille Sp. Postu-
mio, Q. Mucio consulibus triennio ante, hic biennio
prius, L. Postumio, M. Popillio consulibus, prætor
fuerat. Gravissimis criminibus accusati ambo ampli-
atque: quum dicenda de integro caussa esset, excu-
sati exsilii caussa solum vertisse. Furius Præneste,
Matienus Tibur exsulatum abierunt. Fama erat,
prohiberi a patronis nobiles ac potentes compellare;
auxitque eam suspicionem Canuleius prætor, quod,
omissa ea re, delectum habere instituit: dein repente
in provinciam abiit, ne plures ab Hispanis vexaren-
tur. Ita, præteritis silentio obliteratis, in futurum
consultum ab senatu Hispanis, quod inpetrarunt, ne
frumenti æstimationem magistratus Romanus ha-
beret; neve cogeret vicesimas vendere Hispanos,
quanti ipse vellet; et ne præfecti in oppida sua ad
pecunias cogendas inponerentur.

III. Et alia novi generis hominum ex Hispania
legatio venit: ex militibus Romanis et ex Hispanis
mulieribus, cum quibus connubium non esset, natos
se memorantes, supra quatuor millia hominum, ora-
bant, ut sibi oppidum, in quo habitarent, daretur.
Senatus decrevit, *uti nomina sua apud L. Canuleium*
profiterentur: eorumque si quos manumisisset, eos Car-
teiam ad oceanum deduci placere. Qui Carteiensium
domi manere vellent, potestatem fore, uti numero colo-
norum essent, agro adsignato. Latinam eam coloniam
fuisse, libertinorumque adpellari. Eodem tempore ex

U. C. 581. Africa et Gulussa, Masinissæ regis filius, legatus
 A. C. 171. patris, et Karthaginienses venerunt. Gulussa prior
 Gulussa et legati Kar- in senatum introductus, et, quæ missa erant ad bel-
 thaginien- lum Macedonicum a patre suo, exposuit; et, si qua
 ses Romæ. præterea vellent imperare, præstaturum merito po-
 puli Romani est pollicitus: et monuit Patres con-
 scriptos, ut a fraude Karthaginensium caverent:
*classis eos magnæ parandæ consilium cepisse; specie
 pro Romanis, et adversus Macedonas: ubi ea parata
 instructaque esset, ipsorum fore potestatis, quem hostem
 aut socium habeant.*

* * * *

U. C. 582. IV. * * * tantum pavorem ingressi castra, osten-
 A. C. 170. tantes capita, fecerunt, ut, si admotus extemplo ex-
 ercitus foret, capi castra potuerint. Tum quoque
 fuga ingens facta est: et erant, qui legatos mitten-
 dos ad pacem precibus petendam censerent: civita-
 tesque complures, eo nuncio audito, in deditionem
 venerunt: quibus purgantibus sese, culpamque in
 duorum amentiam conferentibus, qui se ultro ad
 poenam ipsi obtulissent, quum veniam dedisset præ-
 tor; profectus extemplo ad alias civitates, omnibus
 imperata facientibus, quieto exercitu pacatum a-
 grum, qui paullo ante ingenti tumultu arserat, pera-
 gravit. Hæc lenitas prætoris, qua sine sanguine
 ferocissimam gentem domuerat, eo gratior plebi Pa-
 tribusque fuit, quo crudelius avariusque in Græcia
 bellatum, et ab consule Licinio et ab Lucretio præ-
 tore, erat. Lucretium tribuni plebis absentem con-
 cionibus adsiduis lacerabant, quum reipublicæ caus-
 sa abesse excusaretur: sed tum adeo vicina etiam
 inexplorata erant, ut is eo tempore in agro suo An-

tiati esset, aquamque ex manubiis Antium ex flu- U. C. 582.
mine Loracinæ duceret. Id opus centum triginta A. C. 170.
millibus æris locasse dicitur: tabulis quoque pictis
ex præda fanum Æsculapii exornavit. Invidiam in- Abderita-
famiamque ab Lucretio averterunt in Hortensium rum quere-
successorem ejus Abderitæ legati, flentes ante cu- læ de Hor-
riam, querentesque, *oppidum suum ab Hortensio ex-*
pugnatum ac direptum esse. Caussam excidii fuisse
urbi, quod, quum centum millia denariûm et tritici
quingenta millia modium imperaret, spatium petie-
runt, quo de ea re et ad Hostilium consulem, et Ro-
nam mitterent legatos. Vixdum ad consulem se per-
venisse, et audisse oppidum expugnatum, principes se-
curi percussos, sub corona ceteros venisse. Indigna se-
natui visa: decreveruntque eadem de Abderitis,
quæ de Coronæis decreverant priore anno; eadem-
que pro concione edicere Q. Mænum prætorem jus-
serunt. Et legati duo, C. Sempronius Blæsus, Sex.
Julius Cæsar, ad restituendos in libertatem Abderi-
tas missi. Iisdem mandatum, ut et Hostilio consuli
et Hortensio prætori nunciarent, senatum Abderitis
injustum bellum inlatum, conquirique omnes, qui in
servitute sint, et restitui in libertatem, æquum cen-
sere.

V. Eodem tempore de C. Cassio, qui consul pri- Querelæ de
ore anno fuerat, tum tribunus militum in Macedonia Cassio.
cum A. Hostilio erat, querelæ ad senatum delatæ
sunt, et legati regis Gallorum Cincibili venerunt.
Fratres ejus verba in senatu fecit, questus, Alpino-
rum populorum agros sociorum suorum depopula-
tum C. Cassium esse, et inde multa millia hominum
in servitutem abripuisse. Sub id tempus Carnorum
Istrorumque et Iapydum legati venerunt: *Duces sibi*

U. C. 562. ab consule Cassio primum imperatos, qui in Macedo-
 A. C. 170. niam ducenti exercitum iter monstrarent : pacatum ab
 se, tamquam ad aliud bellum gerendum, abisse : inde
 ex medio regressum itinere hostiliter peragrasse fines
 suos : passim rapinasque et incendia facta : nec se ad id
 locorum scire, propter quam causam consuli pro hosti-
 bus fuerint. Et regulo Gallorum absenti, et his po-
 pulis responsum est, Senatum ea, quæ facta queran-
 tur, neque scisse futura, neque, si sint facta, probare.
 Sed indicta causa damnari absentem consularem vi-
 rum, injurium esse, quum is reipublicæ causa absit.
 Ubi ex Macedonia redisset C. Cassius, tum, si coram
 eum arguere vellent, cognita re senatum daturum ope-
 ram, uti satisfiat. Nec responderi tantum iis genti-
 bus, sed legatos mitti, duos ad regulum trans Alpes,
 tres circa eos populos placuit, qui indicarent, quæ
 Patrum sententia esset. Munera mitti legatis ex
 binis millibus æris censuerunt : duobus fratribus re-
 gulis hæc præcipua ; torques duo ex quinque pondo
 auri facti, et vasa argentea quinque ex viginti pon-
 do, et duo equi phalerati cum agasonibus, et eques-
 tria arma ac sagula ; et comitibus eorum vestimenta
 liberis servisque. Hæc missa : illa petentibus data,
 ut denorum equorum iis commercium esset, educen-
 dique ex Italia potestas fieret. Legati cum Gallis
 missi trans Alpes, C. Lælius, M. Æmilius Lepidus :
 ad ceteros populos C. Sicinius, P. Cornelius Blasio,
 T. Memmius.

VI. Multarum simul Græciæ Asiæque civitatum
 legati Romam convenerunt. Primi Athenienses in-
 troduci : ii, se, quod navium habuerint militumque,
 P. Licinio consuli et C. Lucretio prætori misisse expo-
 suerunt, quibus eos non usos frumenti sibi centum mil-

*lia imperasse: quod, quamquam sterilem terram arent, ipsosque etiam agrestes peregrino frumento alerent, tamē, ne deessent officio, confecisse; et alia, quæ imperarentur, præstare paratos esse. Milesii, nihil præstitisse memorantes, si quid imperare ad bellum senatus vellet, præstare se paratos esse, polliciti sunt. Alabandenses templum Urbis Romæ se fecisse commemoraverunt, ludosque anniversarios ei Divæ instituisse: et coronam auream quinquaginta pondo, quam in Capitolio ponerent, donum Jovi optimo maximo, adtulisse, et scuta equestria trecenta; ea, cui jussissent, tradituros. Donum ut in Capitolio ponere, et sacrificare liceret, petebant. Hoc Lampsaceni, octoginta pondo coronam adferentes, petebant, commemorantes, *Discessisse se a Perseo, postquam Romanus exercitus in Macedoniam venisset, quum sub ditione Persei, et ante Philippi fuissent. Pro eo, et quod imperatoribus Romanis omnia præstissent, id se tantum orare, ut in amicitiam populi Romani reciperentur: et, si pax cum Perseo fieret, exciperentur, ne in regiam potestatem reciperentur. Ceteris legatis comiter responsum; Lampsacenos in sociorum formulam referre Q. Mænius prætor jussus: munera omnibus in singulos binum millium æris data. Alabandenses scuta reportare ad A. Hostilium consulem in Macedoniam jussi. Et ex Africa legati simul Karthaginensium, tritici decies centum millia et hordei quingenta indicantes se ad mare devecta habere, ut, quo senatus censuisset, deportarent. Id munus officiumque suum scire minus esse, quam pro meritis populi Romani et voluntate sua: sed sæpe alias, bonis in rebus utriusque populi, se gratorum fideliumque socium muneribus functos esse. Item Masinissæ le-**

U. C. 592.

A. C. 170.

U. C. 582. gati, tritici eamdem summam polliciti, et mille et
 A. C. 170. ducentos equites, duodecim elephantos : et, si quid
 aliud opus esset, uti imperaret senatus : æque pro-
 penso animo, ac quæ ipse ultro pollicitus sit, præsta-
 turum esse. Gratia et Karthaginiensibus et regi
 actæ ; rogatique, ut ea, quæ pollicerentur, ad Hosti-
 lium consulem in Macedoniam deportarent. Legatis
 in singulos binum millium æris munera missa.

VII. Cretensium legatis, commemorantibus, se,
 quantum sibi imperatum a P. Licinio consule esset
 sagittariorum, in Macedoniam misisse, quum inter-
 rogati non inficiarentur, *apud Persea majorem nume-
 rum sagittariorum, quam apud Romanos, militare,*
responsum est : Si Cretenses bene ac gnaviter destina-
rent potiore populi Romani, quam regis Persei, ami-
icitiam habere, senatum quoque Romanum iis, tamquam
certis sociis, responsum daturum esse. Interea nuncia-
rent suis, placere senatui, dare operam Cretenses, ut,
quos milites intra præsidia regis Persei haberent, eos
primo quoque tempore domum revocarent. Cretensi-

Chalciden-
 ses legati.

bus cum hoc responso dimissis, Chalcidenses vocati ;
 quorum legatio ipso introitu, ob id quod Mictio
 princeps eorum pedibus captus lectica est introlatus,
 ultimæ necessitatis extemplo visa res : in qua ita
 adfecto excusatio valetudinis, aut ne ipsi quidem
 petenda visa foret, aut data petenti non esset.

Querelæ
 de mag.
 Rom.

Quum sibi nihil vivi reliquum, præterquam linguam
 ad deplorandas patriæ suæ calamitates, præfatus es-
 set, exposuit civitatis primum suæ benefacta, et ve-
 tera, et ea, quæ Persei bello præstitissent ducibus
 exercitibusque Romanis : tum quæ primo C. Lucre-
 tius in populares suos prætor Romanus superbe,
 avaro, crudeliter fecisset : deinde quæ tum cum ma-

xime L. Hortensius faceret. Quemadmodum omnia U. C. 582.
 sibi, etiam iis, quæ patiantur, tristiora, patienda es- A. C. 170.
 se ducant potius, quam se dedant Persi. Quod ad
Lucretium Hortensiumque adtineret, scire, tutius fuisse
claudere portas, quam in urbem eos accipere. Qui ex-
clusissent eos, Emathiam, Amphipolim, Maroneam,
Ænum, incolumes esse: apud se templa omnibus or-
nementis compilata; spoliataque sacrilegiis C. Lucre-
tium navibus Antium devertisse, libera corpora in servi-
tutem abrepta, fortunas sociorum populi Romani direp-
tas esse, et quotidie diripi. Nam, ex instituto C. Lu-
cretii, Hortensium quoque in tectis hieme pariter atque
æstate navales socios habere, et domos suas plenas turba
nautica esse; versari inter se, conjuges, liberosque suos,
quibus nihil neque dicere pensi, neque facere.

VIII. Arcessere in senatum Lucretium placuit, ut
 disceptaret coram, purgaretque sese. Ceterum mul-
 to plura præsens audivit, quam in absentem jacta
 erant; et graviores potentioresque accessere accusa-
 tores duo tribuni plebis, M. Juventius Thalna et
 Cn. Aufidius. Ii non in senatu modo eum lacera-
 runt, sed in concionem etiam pertracto, multis ob-
 jectis probris, diem dixerunt. Senatus jussu Chal- Senatus
 cidensibus Q. Mænius prætor respondit: *Quæ bene* respondum.
meritos sese, et ante, et in eo bello, quod geratur, de
populo Romano dicant, ea et scire vera eos referre se-
natum, et, perinde ac debeant, grata esse. Quæ facta
a C. Lucretio, fierique ab L. Hortensio prætoribus Ro-
manis querantur; ea neque facta, neque fieri volun-
tate senatus, quem non posse existimare? qui sciat,
bellum Persi, et ante Philippo patri ejus, intulisse po-
pulum Romanum pro libertate Græciæ: non ut ea a
magistratibus sociis atque amicis paterentur. Literas

U. C. 582. *se ad L. Hortensium prætorem daturos esse; quæ*
 A. C. 170. *Chalcidenses querantur acta, ea senatui non placere: si*
qui in servitutem liberi venissent, ut eos conquirendos
primo quoque tempore, restituendosque in libertatem
curaret: sociorum navalium neminem, præter magis-
tros, in hospitia deduci æquum censere. Hæc Horten-
sio jussu senatus scripta. Munera binûm millium
æris legatis missa, et vehicula Mictioni publice lo-
cata, quæ eum Brundisium commode perveherent.
 C. Lucretium, ubi dies, quæ dicta erat, venit, tri-
 buni ad populum accusarunt, multamque decies cen-
 tum millium æris dixerunt. Comitibus habitis, omnes
 quinque et triginta tribus eum condemnarunt.

Lucretius
damnatur.

IX. In Liguribus eo anno nihil memorabile ges-
 tum: nam nec hostes moverunt arma, neque consul
 in agrum eorum legiones induxit: et, satis explorata
 pace ejus anni, milites duarum legionum Romanarum
 intra dies sexaginta, quam in provinciam venit,
 dimisit: sociorum nominis Latini exercitu mature in
 hiberna Lunam et Pisas deducto, ipse cum equitibus
 Galliæ provinciæ pleraque oppida adiit. Nusquam
 alibi, quam in Macedonia, bellum erat: suspectum
 tamen et Gentium Illyriorum regem habebant: ita-
 que et octo naves ornatas a Brundisio senatus cen-
 suit mittendas ad C. Furium legatum Issam, qui cum
 præsidio duarum Issensium navium insulæ præerat.
 Duo millia militum in eas naves sunt inposita, quæ
 Q. Mænius prætor ex senatusconsulto in ea parte
 Italiæ, quæ objecta Illyrico est, conscripsit; et con-
 sul Hostilius Ap. Claudium in Illyricum cum quatuor
 millibus peditum misit, ut adcolas Illyrici tutaren-
 tur: qui, non contentus iis, quas adduxerat, copiis,
 auxilia ab sociis conrogando, ad octo millia homi-

Res in Il-
lyrico ges-
tæ.

num vario genere armavit: peragrataque omni ea U. C. 582.
 regione, ad Lychnidum Dassaretiorum consedit. A. C. 170.

X. Haud procul inde Uscana oppidum finium ple- Ap. Clau-
 rumque Persei erat: decem millia civium habebat, dus ab Us-
 et modicum, custodiæ caussa, Cretensium præsi- canensibus
 dium. Inde nuncii ad Claudium occulti veniebant: cæsus.
Si propius copias admovisset, paratos fore, qui prode-
rent urbem. Et operæ pretium esse, non se amicosque
tantum, sed etiam milites præda expleturum. Spes
 cupiditati admota ita obcæcavit animum, ut nec ex
 iis, qui venerunt, quemquam retineret; nec obsides,
 pignus futuros furto et fraude agendæ rei, posceret;
 nec mitteret exploratum; nec fidem acciperet: die
 tantum statuta profectus a Lychnido, duodecim mil-
 lia ab urbe, ad quam tendebat, posuit castra. Quar-
 ta inde vigilia signa movit, mille ferme ad præsi-
 dium castrorum relictis: incompositi, longo ag-
 mine effusi, infrequentes, quum nocturnus error dis-
 siparet, ad urbem pervenerunt. Crevit negligentia,
 postquam neminem armatum in muris viderunt.
 Ceterum, ubi primum sub jactu teli fuerunt, duabus
 simul portis erumpitur; et ad clamorem erumpen-
 tium ingens strepitus e muris ortus ululantium mu-
 lierum cum crepitu undique æris: et incondita mul-
 tudo, turba inmixta servili, variis vocibus persona-
 bat. Hic tam multiplex undique objectus terror ef-
 fecit, ne sustinere primam procellam eruptionis Ro-
 mani possent. Itaque fugientes plures, quam pug-
 nantes, interemti sunt: vix duo millia hominum cum
 ipso legato in castra perfugerunt. Quo longius iter
 in castra erat, eo plures fessos consecrandi hostibus
 copia fuit. Ne moratus quidem in castris Appius,
 ut suos dissipatos fuga conligeret, (quæ res palatis

U. C. 582.

A. C. 170. per agros saluti fuisset) ad Lychnidum protinus reliquias cladis reduxit.

XI. Hæc et alia, haud prospere in Macedonia gesta, ex Sex. Digitio tribuno militum, qui sacrificii caussa Romam venerat, sunt audita. Propter quæ veriti Patres, ne quæ major ignominia acciperetur, legatos in Macedoniam, M. Fulvium Flaccum, et M. Caninium Rebilum, miserunt, qui comperta, quæ agerentur, referrent: et ut A. Hostilius consul comitia consulibus subrogandis ita ediceret, uti mense Januario comitia haberi possent, et ut primo quoque tempore in urbem rediret. Interim M. Ræcio prætori mandatum, ut edicto senatores omnes ex tota Italia (nisi qui reipublicæ caussa abessent) Romam revocaret. Qui Romæ essent, ne quis ultra mille passuum ab Roma abesset. Ea, uti senatus censuit, sunt facta. Comitia consularia ante diem quintum Kalendas Septembres fuere. Creati consules sunt Q. Marcius Philippus iterum et Cn. Servilius Cæpio: post diem tertium prætores sunt facti C. Decimius, M. Claudius Marcellus, C. Sulpicius Gallus, C. Marcius Figulus, Ser. Cornelius Lentulus, P. Fonteius Capito. Designatis prætoribus præter duas urbanas, quatuor provinciæ sunt decretæ; Hispania, et Sardinia, et Sicilia, et classis. Legati ex Macedonia, exacto admodum mense Februario, redierunt. Hi, quas res ea æstate prospere gessisset rex Perseus, referebant, quantusque timor socios populi Romani cepisset, tot urbibus in potestatem regis redactis. *Exercitum consulis infrequentem comitatibus vulgo datis per ambitionem esse: culpam ejus rei consulem in tribunos militum, contra illos in consulem conferre. Ignominiam, Claudii temeritate accep-*

tam, elevare eos Patres acceperunt, qui perpauca Ita- U. C. 582.
lici generis, et magna ex parte tumultuario delectu A. C. 170.
conscriptos ibi milites amissos referebant. Consules
 designati, ubi primum magistratum inissent, de Ma-
 cedonia referre ad senatum jussi: destinataeque pro-
 vinciae iis sunt Italia et Macedonia. Hoc anno in-
 tercalatum est: tertio die post Terminalia Kalendae
 intercalares fuere. Sacerdotes intra eum annum U. C. 583.
 mortui, L. Flaminus * * pontifices duo decesse- A. C. 169.
 runt, L. Furius Philus et C. Livius Salinator: in
 locum Furii T. Manlium Torquatum, in Livii M.
 Servilium pontifices legerunt.

XII. Principio insequentis anni quum consules
 novi Q. Marcius et Cn. Servilius de provinciis retu-
 lissent, primo quoque tempore aut comparare eos
 inter se Italiam et Macedoniam, aut sortiri placuit:
 priusquam id sors cerneret, in incertum, ne quid
 gratia momenti faceret, in utramque provinciam,
 quod res desideraret supplementi, decerni. In Ma-
 cedoniam peditum Romanorum sex millia, sociorum
 nominis Latini sex millia: equites Romanos ducen-
 tos quinquaginta, socios trecentos. Veteres milites
 dimitti, ita ut in singulas Romanas legiones ne plus
 sena millia peditum, treceni equites essent. Alteri
 consuli nullus certus finitus numerus civium Roma-
 norum, quem in supplementum legeret: id modo
 finitum, ut duas legiones scriberet, quae quina millia
 peditum et ducenos haberent, equites trecenos: La-
 tinorum major, quam collegae, decretus numerus;
 peditum decem millia et sexcenti equites: quatuor
 praeterea legiones scribi jussae, quae, si quo opus es-
 set, educerentur. Tribunos his, non permissum, ut
 consules facerent: populus creavit. Sociis nominis

U. C. 583. Latini sexdecim millia peditum, et mille equites imperati. Hunc exercitum parari tantum placuit, ut exiret, si quo res posceret. Macedonia maxime curam præbebat: in classem mille socii navales cives Romani libertini ordinis, ex Italia * scribi jussi; totidem ut ex Sicilia scriberentur: et, cui ea provincia evenisset, mandatum, ut eos in Macedoniam, ubicumque classis esset, deportandos curaret. In Hispaniam tria millia peditum Romanorum in supplementum, trecenti equites decreti. Finitus ibi quoque in legiones militum numerus, peditum quina millia, trecenti et triceni equites. Et sociis imperare prætor, cui Hispania obvenisset, jussus quatuor millia peditum, et trecentos equites.

XIII. Non sum nescius, ab eadem negligentia, qua nihil Deos portendere vulgo nunc credant, neque nunciari admodum nulla prodigia in publicum, neque in annales referri: ceterum et mihi, vetustas res scribenti, nescio quo pacto, antiquus fit animus; et quædam religio tenet, quæ illi prudentissimi viri publice suscipienda censuerint, ea pro dignis habere, quæ in meos annales referam. Anagnia duo prodigia eo anno sunt nunciata; facem in cælo conspectam, et bovem feminam locutam publice ali. Minturnis quoque per eos dies cæli ardentis species adfulserat. Reate imbri lapidavit. Cumis in arce Apollo triduum ac tres noctes lacrimavit: in urbe Romana duo æditui nunciarunt, alter, in æde Fortunæ anguem jubatum a compluribus visum esse: alter, in æde Primigeniæ Fortunæ, quæ in colle est, duo diversa prodigia; palmam in area enatam, et sanguine interdium pluisse. Duo non suscepta prodigia sunt, alterum quod in privato loco factum esset;

palnam enatam inpluvio suo T. Marcius Figulus U. C. 583.
 nunciabat: alterum, quod in loco peregrino, Fregel- A. C. 169.
 lis in domo L. Atrei hasta, quam filio militi emerat,
 interdiu plus duas horas arsisse, ita ut nihil ejus am-
 bureret ignis, dicebatur. Publicorum prodigiorum
 caussa libri a decemviris aditi; quadraginta majori-
 bus hostiis quibus Diis consules sacrificarent, et ad-
 diderunt, uti supplicatio fieret, cunctique magistra-
 tus circa omnia pulvinaria victimis majoribus sacri-
 ficarent, populusque coronatus esset. Omnia, uti
 decemviri præierunt, facta.

XIV. Censoribus deinde creandis comitia edicta
 sunt: petierunt censuram principes civitatis, C. Va-
 lerius Lævinus, L. Postumius Albinus, P. Mucius
 Scævola, M. Junius Brutus, C. Claudius Pulcher,
 Ti. Sempronius Gracchus. Hos duos censores cre-
 avit populus Romanus. Quum delectus habendi
 major, quam alias, propter Macedonicum bellum cura
 esset, consules plebem apud senatum accusabant,
 quod et juniores non responderent. Adversus quos
 C. Sulpicius et M. Claudius tribuni plebis causam
 egerunt. *Non consulibus, sed ambitiosis consulibus,
 delectum difficilem esse: neminem invitum militem ab
 iis fieri. Id ita ut esse scirent et Patres conscripti,
 prætores, quibus et vis imperii minor et auctoritas esset,
 delectum, si ita senatui videretur, perfecturos esse. Id
 prætoribus magna Patrum * non sine sugillatione
 consulum, mandatum est. Censores, ut eam rem
 adjuvarent, ita in concione edixerunt, Legem cen-
 sui censendo dicturos esse, ut, præter commune omnium
 civium jusjurandum, hæc adjurarent: Tu minor annis
 sex et quadraginta es, tuque ex edicto C. Claudii, Ti.
 Sempronii censorum ad delectum prodito: et, quoties-*

U. C. 583. *cumque delectus erit, quem hic censores magistratum*
 A. C. 169. *habebunt, si miles factus non eris, in delectu prodibis.*

Item, quia fama erat, multos ex Macedonicis legionibus, incertis commeatibus per ambitionem imperatorum ab exercitu abesse, edixerunt de militibus, P. Ælio, C. Popillio consulibus, postve eos consules in Macedoniam scriptis, *Ut, qui eorum in Italia essent, intra dies triginta, censi prius apud sese, in provinciam redirent: qui in patris aut avi potestate essent, eorum nomina ad se ederentur. Missorum quoque causas sese cognituros esse: et, quorum ante emerita stipendia gratiosa missio sibi visa esset, eos milites fieri jussuros.* Hoc edicto literisque censorum per fora et conciliabula dimissis, tanta multitudo juniorum Romani convenit, ut gravis urbi turba insolita esset.

XV. Præter delectum eorum, quos in supplementum mitti oportebat, quatuor a C. Sulpicio prætore scriptæ legiones sunt, intraque undecim dies delectus est perfectus. Consules deinde sortiti provincias sunt: nam prætores propter jurisdictionem maturius sortiti erant. Urbana C. Sulpicio, peregrina C. Decimio obtigerat, Hispaniam M. Claudius Marcellus, Siciliam Ser. Cornelius Lentulus, Sardiniam P. Fonteius Capito, classem C. Marcius Figulus erat sortitus. Consulum Cn. Servilio Italia, Q. Marcio Macedonia obvenit. Latinisque actis, Marcius exemplo est profectus. Cæpione deinde referente ad senatum, quas ex novis legionibus duas legiones secum in Galliam duceret, decrevere Patres, ut C. Sulpicius, M. Claudius prætores ex his, quas scripsissent, legionibus, quas videretur, consuli darent. Indigne patiente prætorum arbitrio consulem subiectum, dimisso senatu, ad tribunal prætorum stans

postulavit, ex senatusconsulto destinarent sibi duas U. C. 583.
 legiones: prætores consuli in eligendo arbitrium A. C. 169.
 fecerunt. Senatum deinde censores legerunt: M.
 Æmilius Lepidus princeps ab tertiis jam censoribus
 lectus. Septem e senatu ejecti sunt. In censu ac-
 cipiendo populi milites ex Macedonico exercitu, qui
 quam multi abessent ab signis, census docuit, in
 provinciam cogebant: caussas stipendiis missorum
 cognoscebant: et, cujus nondum justa missio visa
 esset, ita jusjurandum adigebant: *Ex tui animi sen-
 tentia, tu ex edicto C. Claudii, Ti. Sempronii censorum
 in provinciam Macedoniam redibis, quod sine dolo
 malo facere poteris?*

XVI. In equitibus recensendis tristis admodum Censores
 eorum atque aspera censura fuit: multis equos ade- obfendunt
 merunt: in ea re quum equestrem ordinem obfen- ordinem
 dissent, flammam invidiæ adjecere edicto, quo edixe- equestrem.
 runt, *Ne quis eorum, qui Q. Fulvio, A. Postumio cen-
 soribus publica vectigalia aut ultro tributa conduxis-
 sent, ad hastam suam accederet, sociusve aut adfinis
 ejus conductionis esset.* Sæpe id querendo veteres
 publicani quum inpetrare nequissent ab senatu, ut
 modum potestati censoriæ inponerent, tandem tri-
 bunum plebis P. Rutilium, ex rei privatæ conten-
 tione iratum censoribus, patronum caussæ nacti
 sunt. Clientem libertinum parietem in Sacra via
 adversus ædes publicas demoliri jusserant, quod pub-
 lico inædificatus esset: adpellati a privato tribuni:
 quum præter Rutilium nemo intercederet, censores
 ad pignora capienda miserunt, multamque pro cou-
 cione privato dixerunt. Hinc contentione orta,
 quum veteres publicani se ad tribunum contulissent,
 rogatio repente sub unius tribuni nomine promul-

U. C. 589. gatur : *Quæ publica vectigalia, ultro tributa C. Clau-*
 A. C. 169. *dus et Ti. Sempronius locassent, ea rata locatio ne es-*

set : de integro locarentur, et ut omnibus redimendi et
conducendi promiscue jus esset. Diem ad ejus roga-
 tionem concilio tribunus plebis dixit : qui postquam
 venit, ut censores ad dissuadendum processerunt,
 Graccho dicente, silentium fuit : quum Claudio ob-
 streperetur, audientiam facere præconem jussit. Eo
 facto, advocatam a se concionem tribunus questus, et
 in ordinem se coactum, ex Capitolio, ubi erat con-
 cilium, abiit. Postero die ingentes tumultus ciere.

Tribunus
plebis
diem iis
dicit.

Ti. Gracchi primum bona consecravit, quod in multa
 pignoribusque ejus, qui tribunum adpellasset, inter-
 cessionem non parendo, se in ordinem coëgisset. C.
 Claudio diem dixit, quod concionem ab se avocas-
 set, et utrique censori perduellionem se judicare
 pronunciavit, diemque comitiis a C. Sulpicio præ-
 tore urbano petiit. Non recusantibus censoribus,
 qui minus primo quoque tempore judicium de se po-
 pulus faceret, in ante dies octavum et septimum
 Kalendas Octobres comitiis perduellionis dicta dies.
 Censores extemplo in atrium Libertatis adscen-
 derunt : et, ibi signatis tabellis publicis, clausoque
 tabulario, et dimissis servis publicis, negarunt, se
 prius quidquam publici negotii gesturos, quam judi-
 cium populi de se factum esset. Prior Claudius
 caussam dixit : et, quum ex duodecim centuriis equi-
 tum octo censorem condemnassent, multæque aliæ
 primæ classis, extemplo principes civitatis in con-
 spectu populi, annulis aureis positis, vestem muta-
 runt, ut supplices plebem circumirent. Maxime ta-
 men sententiam vertisse dicitur Ti. Gracchus, quod,
 quum clamor undique plebis esset, periculum Grac-

Absolvun-
tur.

cho non esse, conceptis verbis juravit, si collega U. C. 588.
 damnatus esset, non exspectato de se iudicio, comi- A. C. 169.
 tem exsilii ejus futurum. Adeo tamen ad extremum
 spei venit reus, ut octo centuriæ ad damnationem
 defuerint. Absoluto Claudio, tribunus plebis nega-
 vit se Gracchum morari.

XVII. Eo anno, postulantibus Aquileiensium le-
 gatis, ut numerum colonorum augeret, mille et quin-
 gentæ familiæ ex senatusconsulto scriptæ, triumviri-
 que, qui eas deducerent, missi sunt, T. Annius Lus-
 cus, P. Decius Subulo, M. Cornelius Cethegus. Eo-
 dem anno C. Popillius et Cn. Octavius legati, qui in
 Græciam missi erant, senatusconsultum, Thebis pri-
 mum recitatum, per omnes Peloponnesi urbes cir-
 cumtulērunt, *Ne quis ullam rem in bellum magistrati-*
bus Romanis conferret, præterquam quod senatus cen-
suisset. Hoc fiduciam in posterum quoque præbu-
 erat, levatos se oneribusque impensisque, quibus,
 alia aliis imperantibus, exhauriebantur. Achaïco
 concilio Argis agitato, benigne locuti auditique,
 egregia spe futuri status fidissima gente relicta, in
 Ætoliā trajecerunt. Ibi nondum quidem seditio
 erat, sed omnia suspecta, criminumque inter ipsos
 plena: ob quæ obsidibus postulatis, neque exitu rei
 inposito, in Acarnaniā inde profecti legati sunt.
 Thyrii concilium legatis Acarnanes dederunt. Ibi
 quoque inter factiones erat certamen: quidam prin-
 cipum postulare, ut præsidia in urbes suas induce-
 rentur adversus amentiam eorum, qui ad Macedonas
 gentem trahebant: pars recusare, ne, quod bello
 captis et hostibus mos esset, id pacatæ et sociæ civi-
 tates ignominia acciperent. Justa deprecatio hæc
 visa. Larissam ad Hostilium proconsulem (ab eo

U. C. 583. enim missi erant) legati redierunt. Octavium reti-
 A. C. 169 nuit secum. Popillium cum mille ferme militibus in
 hiberna Ambraciam misit.

Persei ex- XVIII. Perseus, principio hiemis egredi Macedo-
 peditio in niæ finibus non ausus, ne qua in regnum vacuum in-
 Illyricum. rumperent Romani, sub tempus brumæ, quum inex-
 superabiles ab Thessalia montes nivis altitudo facit,
 occasionem esse ratus frangendi finitimorum spes
 animosque, ne quid, averso se in Romanum bellum,
 periculi subesset, quum a Thracia pacem Cotys, ab
 Epiro Cephalus repentina defectione a Romanis
 præstarent, Dardanos recens domuisset bello, solum
 infestum esse Macedoniæ latus, quod ab Illyrico pa-
 teret, cernens, neque ipsis quietis Illyriis, et aditum
 præbentibus Romanis, si domuisset proximos Illy-
 riorum, Gentium quoque regem jam diu dubium in
 societatem perlici posse, cum decem millibus pedi-
 tum, quorum pars phalangitæ erant, et duobus mil-
 libus levium armatorum, et quingentis equitibus
 profectus, Stuberam venit. Inde frumento com-
 plurium dierum sumto, jussoque adparatu obpug-
 nandarum urbium sequi, tertio die ad Uscanam
 (Penestianæ terræ ea maxima urbs est) posuit cas-
 tra; prius tamen, quam vim admoveret, missis, qui
 tentarent nunc præfectorum præsidii, nunc oppida-
 norum animos: erat autem ibi cum juventute Illy-
 riorum Romanum præsidium. Postquam nihil pa-
 cati referebant, obpugnare est adortus, et corona
 eam capere conatus est: quum sine intermissione
 interdiu noctuque alii aliis succedentes, pars scalas
 muris, ignem portis inferrent, sustinebant tamen
 eam tempestatem propugnatores urbis; quia spes
 erat, neque hiemis vim diutius pati Macedonas in

aperto posse, nec ab Romano bello tantum regi U. C. 583.
 laxamenti fore, ut posset morari. Ceterum, post- A. C. 169.
 quam vineas agi, turresque excitari viderunt, victa
 pertinacia est: nam, præterquam quod adversus vim
 pares non erant, ne frumenti quidem aut ullius alte-
 rius rei copia intus erat, ut in necopinata obsidione.
 Itaque quum spei nihil ad resistendum esset, C. Car-
 vilius Spoletinus et C. Afranius a præsidio Romano
 missi, qui a Perseo peterent, primo, ut armatos sua-
 que secum ferentes abire sineret; dein, si id minus
 inpetrarent, vitæ tantum libertatisque fidem accipe-
 rent. Promissum id benignius est ab rege, quam
 præstitum: exire enim sua secum efferentibus jussis
 primum arma ademit: his urbe egressis, et Illyrio-
 rum cohors, (quingenti erant) et Uscanenses se ur-
 bemque dediderunt.

XIX. Perseus, præsidio Uscanæ inposito, multi-
 tudinem omnem deditorum, quæ prope numero
 exercitum æquabat, Stuberam abducit. Ibi Roma-
 nis, (quatuor millia autem hominum erant) præter
 principes, in custodiam civitatum divisus, Usca-
 nensibus Illyriisque venditis, in Penestiam exercitum
 reducit ad Oæneum oppidum in potestatem redigen-
 dum: et alioqui opportune situm, et transitus ea est
 in Labeates, ubi Gentius regnabat. Prætereunti
 frequens castellum, Draudacum nomine, peritorum
 quidam regionis ejus, *nihil Oæneo capto opus esse, ait,*
nisi in potestate et Draudacum sit: opportunius etiam
ad omnia positum esse. Admoto exercitu, omnes
 extemplo dediderunt sese. Qua spe celeriore dedi-
 tione erectus, postquam animadvertit, quantus agmi-
 nis sui terror esset, undecim alia castella eodem metu
 in potestatem redigit: ad perpauca vi opus fuit, ce-

U. C. 583. tera voluntate dedita : et in his recepti mille et quin-
 A. C. 169. genti dispositi per præsidia milites Romani. Magno
 usui Carvilius Spoletinus erat in conloquiis, dicendo,
 nihil in ipsos sævitum. Ad Oæneum perventum est,
 quod sine justa obpugnatione capi non poterat ; et
 majore aliquanto, quam cetera, juventute, et validum
 oppidum mœnibus erat : et hinc amnis Artatus no-
 mine, hinc mons præaltus et aditu difficilis cingebat :
 hæc spem ad resistendum oppidanis dabant. Per-
 seus, circumvallato oppido, aggerem a parte superi-
 ore ducere instituit, cujus altitudine muros supera-
 ret : quod opus dum perficitur, crebris interim præ-
 liis, quibus per excursiones et mœnia sua oppidani
 tutabantur, et opera hostium inpediebant, magna eor-
 um multitudo variis casibus absumpta est : et, qui
 supererant, labore diurno nocturnoque et vulneribus
 inutiles erant. Ubi primum agger injectus muro
 est, et cohors regia, quos Nicatoras adpellant, tran-
 scendit, et scalis multis simul partibus inpetus in ur-
 bem est factus : puberes omnes interfecti sunt ; con-
 juges liberosque eorum in custodiam dedit : prædæ
 alia militum cessere. Stuberam inde victor revertens
 ad Gentium legatos, Pleuratum Illyrium, exsulantem
 apud se, et Aputeum Macedonem a Berœa,
 Legatos ad Gentium Perseus mittit. Iis mandat, ut exponerent æstatis ejus hie-
 misque acta sua adversus Romanos Dardanosque :
 adjicerent recentia in Illyrico hibernæ expeditionis
 opera : hortarentur Gentium in amicitiam secum et
 cum Macedonibus jungendam.

XX. Hi, transgressi jugum Scordi montis, per
 Illyrici solitudines, quas de industria populando
 Macedones fecerant, ne transitus faciles Dardanis in
 Illyricum aut Macedoniam essent, Scodram labore

ingenti tandem pervenerunt. Lissi rex Gentius erat: U. C. 583.
 eo adciti legati, mandata exponentes, benigne auditi A. C. 169.
 sunt: qui responsum sine effectu tulerunt; *Volunta-* Gentius pec-
tem sibi non deesse ad bellandum cum Romanis: cete- cuniam po-
rum ad conandum id, quod velit, pecuniam maxime scit.
deesse. Hæc Stuberam retulere regi, tum maxime
 captivos ex Illyrico vendenti. Extemplo iidem le-
 gati, addito Glaucia ex numero custodum corporis,
 remittuntur sine mentione pecuniæ, qua una barba-
 rus inops inpelli ad bellum poterat. Ancyram inde
 populatus Perseus, in Penestas rursum exercitum
 reducit: firmatisque Uscanæ, et circa eam per
 omnia castella, quæ receperat, præsidiiis, in Mace-
 doniam sese recipit.

XXI. L. Cœlius, legatus Romanus, præerat Illy- Res gestæ
 rico: qui, moveri non ausus, quum in iis locis rex a Rom. in
 esset, post profectionem demum ejus conatus in Pe- Illyrico.
 nestis Uscanam recipere, a præsidio, quod ibi Mace-
 donum erat, cum multis vulneribus repulsus, Lych-
 nidum copias reduxit. Inde post dies paucos M.
 Trebellium Fregellanum cum satis valida manu in
 Penestas misit ad obsides ab his urbibus, quæ in
 amicitia cum fide permanserant, accipiendos. Pro-
 cedere etiam in Parthinos (ii quoque obsides dare
 pepigerant) jussit: ab utraque gente sine tumultu
 exigi. Penestarum obsides Apolloniam, Parthino-
 rum Dyrrachium (tum Epidamni magis celebre no-
 men Græcis erat) missi. Ap. Claudius, acceptam in
 Illyrico ignominiam conrigere cupiens, Phanotem
 Epiri castellum adortus obpugnare, et auxilia Atha-
 manum Thesprotorumque, præter Romanum exerci-
 tum, ad sex millia hominum secum adduxit: neque
 operæ pretium fecit, Cleva, qui relictus a Perseo

U. C. 563. erat, cum valido præsidio defendente. Et Perseus,
A. C. 169. in Elimeam profectus, et circa eam exercitu lustrato,

Perseus
frustra
Stratum
tentat.

ad Stratum, vocantibus Epirotis, ducit. Stratus
validissima tum urbs Ætoliæ erat: sita est super
Ambracium sinum, prope amnem Acheloum. Cum
decem millibus peditum eo profectus est et equitibus
trecentis: quos pauciores propter angustias viarum
et asperitatem duxit. Tertio die quum pervenisset
ad Citium montem, vix transgressus propter altitu-
dinem nivis, locum quoque castris ægre invenit.
Profectus inde, magis quia manere non poterat,
quam quod tolerabilis aut via aut tempestas esset,
cum ingenti vexatione, præcipue jumentorum, altero
die ad templum Jovis, quem Nicæum vocant, posuit
castra. Ad Arachthum inde flumen, itinere ingenti
emenso, retentus altitudine amnis, mansit. Quo
spatio temporis ponte perfecto, traductis copiis diei
progressus iter, obvium Archidamum principem Æ-
tolorum, per quem ei Stratus tradebatur, habuit.

XXII. Eo die ad finem agri Ætoli castra posita.
Inde altero die ad Stratum perventum: ubi, prope
Acheloum amnem castris positis, quum exspectaret,
effusos omnibus portis Ætolos in fidem suam ven-
turos, clausas portas, atque ipsa ea nocte, qua vene-
rat, receptum Romanum præsidium cum C. Popillio
legato invenit. Principes, qui præsentis Archidami
auctoritate compulsi regem arcessierant, obviam
egresso Archidamo segiores facti, locum adversæ
factioni dederant ad Popillium cum mille peditibus
ab Ambracia arcessendum. In tempore et Dinar-
chus, præfectus equitum gentis Ætolorum, cum sex-
centis peditibus et equitibus centum venit. Satis
constabat, eum, tamquam ad Persea tendentem,

Stratum venisse: mutato deinde cum fortuna animo, U. C. 583.
 Romanis se, adversus quos venerat, junxisse. Nec A. C. 169.
 Popillius securior, quam debebat esse, inter tam
 mobilia ingenia erat: claves portarum custodiamque
 murorum suæ extemplo potestatis fecit: Dinarchum
 Ætolosque cum juventute Stratiorum in arcem per
 præsidii speciem amovit. Perseus, ab imminentibus
 superiori parti urbis tumulis tentatis conloquiis,
 quum obstinatos atque etiam telis procul arcentes
 videret, quinque millia passuum ab urbe trans Peti-
 tarum amnem posuit castra. Ibi consilio advocato,
 quum Archidamus Epirotarumque transfugæ retine-
 rent, Macedonum principes non pugnandum cum
 infesto tempore anni censerent, nullis præparatis
 commeatibus; quum inopiam prius obsidentes, quam
 obsessi, sensuri essent, maxime quod hostium haud
 procul inde hiberna erant; territus in Aperantiam
 castra movit. Aperantii eum, propter Archidami
 magnam in ea gente gratiam auctoritatemque, con-
 sensu omnium acceperunt: is ipse cum octingento-
 rum militum præsidio his est præpositus.

XXIII. Rex cum minore vexatione jumentorum
 hominumque, quam venerat, in Macedoniam rediit.
 Appium tamen ab obsidione Phanotis fama ducentis
 ad Stratum Persei submovit. Clevas, cum præsidio Clevæ Ma-
 inpigrorum juvenum insecutus, sub radicibus prope cedonis
 inviis montium ad mille hominum ex agmine inpe- gesta.
 dito occidit, ad ducentos cepit. Appius, superatis
 angustiis, in campo, quem Elæona vocant, stativa
 dierum paucorum habuit. Interim Clevas, adsumto
 Philostrato, qui Epirotarum gentem habebat, in
 agrum Antigonensem transcendit. Macedones ad
 depopulationem profecti; Philostratus cum cohorte

U. C. 583. sua in insidiis loco obscuro consedit : in palatos po-
 A. C. 169. pulatores quum erupissent ab Antigonea armati, fu-
 gientes eos persequentes effusius in vallem insessam
 ab hostibus præcipitant : ibi ad mille occisis, cen-
 tum ferme captis, ubique prospere gesta re, prope
 stativa Appii castra movent, ne qua vis sociis suis ab
 Romano exercitu inferri possit. Appius, nequid-
 quam in his locis terens tempus, dimissis Chaonum-
 que, et si qui alii Epirotæ erant, præsidii, cum Ita-
 licis militibus in Illyricum regressus, per Parthino-
 rum socias urbes in hiberna militibus dimissis, ipse
 Romam sacrificii caussa rediit. Perseus ex Penes-
 tarum gente mille pedites, ducentos equites revoca-
 tos, Cassandriam, præsidio ut essent, misit. Ab
 Gentio eadem adferentes redierunt : nec deinde alios
 atque alios mittendo tentare eum destitit, quum ad-
 pareret, quantum in eo præsidii esset ; nec tamen
 inpetrare ab animo posset, ut inpensam in rem
 maximi ad omnia momenti faceret. * * * *

EPITOME LIBRI XLIV.

Q. *MARCIUS PHILIPPUS* per invios saltus penetravit in Macedoniam, compluresque urbes occupavit. Rhodii misere legatos Romam, minantes, se Perseo auxilio futuros, nisi populus Romanus cum eo pacem atque amicitiam jungeret : indigne id latum. Quum id bellum *L. Æmilio Paulo*, sequentis anni consuli iterum, mandatum esset, *Paullus*, in concione precatus, ut, quidquid diri populo Romano inmineret, in domum suam converteretur, et in Macedoniam profectus, vicit *Persen*, totamque Macedoniam in potestatem redegit. Antequam confugeret, *C. Sulpicius Gallus* tribunus militum prædixit exercitui, ne miraretur, quod luna nocte proxima defectura esset. Gentius quoque rex *Illyriorum*, quum rebellasset, ab *Anicio* prætore victus, venit in deditionem, et cum uxore, et liberis, et propinquis, Romam missus est. *Alexandria* legati a *Cleopatra* et *Ptolemæo* regibus venerunt, querentes de *Antiocho* rege *Syriæ*, quod his bellum inferret. *Perses*, sollicitatis in auxilium *Eumene* rege *Pergami*, et *Gentio* rege *Illyriorum*, quia his pecuniam, quam promiserat, non dabat, ab iis relictus est.

T. LIVII PATAVINI

LIBER XLIV.

U. C. 583. **P**INCIPIO veris, quod hiemem eam, qua hæc
A. C. 169. gesta sunt, insecutum est, ab Roma profectus
Q. Marcius Philippus consul cum quinque millibus
(quod in supplementum legionum secum trajecturus
erat) Brundisium pervenit. M. Popillius consularis
et alii pari nobilitate adolescentes tribuni militum in
Macedonicas legiones consulem secuti sunt. Per
eos dies et C. Marcius Figulus prætor, cui classis
provincia evenerat, Brundisium venit: et simul ex
Italia profecti, Corcyram altero die, tertio Actium
Acarnaniæ portum tenuerunt. Inde consul, ad Am-
braciam egressus, itinere terrestri petit Thessaliam.
Prætor, superato Leucata, Corinthium sinum invec-
tus, et Creüsæ relictis navibus, terra et ipse per me-
diam Bœotiam diei unius expedito itinere Chalcidem
ad classem contendit. Castra eo tempore A. Hos-
tilius in Thessalia circa Palæpharsalum habebat;
sicut nulla re bellica memorabili gesta, ita ad cunc-
tam militarem disciplinam ab effusa licentia formato
milite, et sociis cum fide cultis, et ab omni genere
injuriæ defensis. Audito successoris adventu, quum
arma, viros, equos cum cura inspexisset, ornato ex-
ercitu obviam venienti consuli processit. Et primus
eorum congressus ex dignitate ipsorum ac Romani
nominis, et in rebus deinde gerendis *. Proconsul

Marcus
cos. et
Marcus
pr. traji-
ciunt in
Græciam.

enim ad exercitum **. Paucis post diebus consul U. C. 583.
 concionem apud milites habuit: orsus a parricidio A. C. 169.
 Persei perpetrato in fratrem, cogitato in parentem,
 adjecit, *post scelere partum regnum, veneficia, cædes,*
latrocinio nefando petitum Eumenem, injurias in popu-
lum Romanum, direptiones sociarum urbium contra fæ-
odus, ea omnia quam Diis quoque invisa essent, sensurum
in exitu rerum suarum. Favere enim pietati fideique
Deos, per quæ populus Romanus ad tantum fastigii ve-
nerit. Vires deinde populi Romani, jam terrarum
orbem complectentis, cum viribus Macedoniæ, exer-
citus cum exercitibus comparavit. Quanto majores
Philippi Antiochique opes non majoribus copiis fractas
esse?

II. Hujus generis adhortatione accensis militum
 animis, consultare de summa gerendi belli cœpit.
 Eo et C. Marcius prætor a Chalcide, classe accepta,
 venit. Placuit, non ultra morando in Thessalia
 tempus terere, sed movere extemplo castra, atque
 pergere inde in Macedoniam; et prætorem dare
 operam, ut eodem tempore classis quoque invehatur
 hostium litoribus. Præture dimisso, consul, men-
 struum jusso milite secum ferre, profectus decimo
 post die, quam exercitum acceperat, castra movit:
 et, unius diei progressus iter, convocatis itinerum
 ducibus, quum, exponerent in consilio, jussisset, qua
 quisque ducturus esset; submotis iis, quam potissi-
 mum peteret, retulit ad consilium. Aliis per Py-
 thium placebat via: aliis per Cambunios montes,
 qua priore anno duxerat Hostilius consul: aliis præ-
 ter Ascuridem paludem. Restabat aliquantum viæ
 communis: itaque in id tempus, quo prope divor-
 tium itinerum castra posituri erant, deliberatio ejus

Cos. in Ma-
 cedoniam
 contendit.

U. C. 583. rei differtur: in Perrhæbiam inde ducit, et inter
 A. C. 169. Azorum et Dolichen stativa habuit ad consulendum
 rursus, quam potissimum capesseret viam. Per eos-
 dem dies Perseus, quum adpropinquare hostem sci-
 ret, quod iter petiturus esset ignarus, omnes saltus
 Perseus
 aditus oc-
 cupat. insidere præsiidiis statuit. In jugum Cambuniorum
 montium (Volustana ipsi vocant) decem millia levis
 armaturæ juvenum cum duce Asclepiodoto mittit:
 ad castellum, quod super Ascuridem paludem erat,
 (Lapathus vocatur locus) Hippias tenere saltum cum
 duodecim millium Macedonum præsidio jussus. Ipse
 cum reliquis copiis primo circa Diurn stativa habuit:
 deinde, adeo ut obtorpuisse inops consilii videretur,
 cum equitibus expeditis litore nunc Heracleum, nunc
 Philam percurrerat, eodem inde cursu Diurn repe-
 tens.

Macedo-
 niam in-
 greditur
 Marcius.

III. Interim consuli sententia stetit eo saltu du-
 cere, ubi propter Octolophum diximus regis castra *.
 Præmitti tamen quatuor millia armatorum ad loca
 opportuna præoccupanda placuit: quibus præpositi
 sunt M. Claudius, Q. Marcius consulis filius: con-
 festim et universæ copię sequebantur. Ceterum
 adeo ardua et aspera et confragosa via fuit, ut præ-
 missi expediti biduo quindecim millium passuum ægre
 itinere confecto castra posuerint: turrim Eudieru,
 quem cepere, locum adpellant. Inde postero die
 septem millia progressi, tumulo haud procul hostium
 castris capto, nuncium ad consulem remittunt: *per-
 ventum ad hostem esse, loco se tuto et ad omnia oppor-
 tuno consedissee; ut, quantum extendere iter posset, con-
 sequeretur.* Sollicito consuli, et propter itineris dif-
 ficultatem, quod ingressus erat, et eorum vicem,
 quos paucos inter media præsidia hostium præmise-

rat, nuncius ad Ascuridem paludem obcurrit. Ad- U. C. 583.
 dita igitur et ipsi fiducia est, conjunctisque copiis, A. C. 169.
 castra tumulo, qui tenebatur, qua aptissimum ad loci
 naturam erat, sunt adclinata. Non hostium modo
 castra, quæ paullo plus mille passuum aberant, sed
 omnis regio ad Dium et Philam, oraque maris, late
 patente ex tam alto jugo prospectu, oculis subjici-
 tur. Quæ res accendit militi animos, postquam
 summam belli, ac regias omnes copias, terramque
 hostilem tam e propinquo conspexerunt. Itaque
 quum alacres, protinus duceret ad castra hostium,
 consulem hortarentur; dies unus fessis labore viæ
 ad quietem datus est: tertio die, parte copiarum ad
 præsidium castrorum relictâ, consul ad hostem ducit.

IV. Hippias nuper ad tuendum saltum ab rege ^{Levia præ-}
 missus erat: qui, ex quo castra Romana in tumulo ^{lia cum}
 conspexit, præparatis ad certamen animis suorum, ^{Macedoni-}
 venienti agmini consulis obvius fuit: et Romani ex-
 pediti ad pugnam exierant, et hostes: levis armatura
 erat, promptissimum genus ad lacesendum certamen.
 Congressi igitur extemplo, tela conjecerunt: multa
 utrimque vulnera temerario incursu et accepta, et
 inlata: pauci utriusque partis ceciderunt. Irritatis
 in posterum diem animis, majoribus copiis atque in-
 festius concursum ab illis, si loci satis ad explican-
 dam aciem fuisset: jugum montis, in angustum dor-
 sum cuneatum, vix ternis ordinibus armatorum in
 fronte patuit. Itaque, paucis pugnantibus, cetera
 multitudo, præcipue qui gravium armorum erant,
 spectatores pugnae stabant: levis armatura etiam per
 amfractus jugi procurrere, et ab lateribus cum levi
 armatura conserere, per iniqua atque æqua loca pug-
 nam petere: ac, pluribus ea die vulneratis, quam in-

U. C. 582. terfectis, prælium nocte diremum est. Tertio die
 A. C. 169. egere consilio Romanus imperator : nam neque manere in jugo inopi, neque regredi sine flagitio, atque etiam periculo ; sed cedenti ex superioribus locis instare hostis poterat : nec aliud restabat, quam audacter commissum pertinaci audacia, quæ prudens interdum in exitu est, conrigere. Ventum quidem erat eo, ut, si hostem similem antiquis Macedonum regibus habuisset consul, magna clades accipi potuerit : sed, quum ad Diem per litora cum equitibus vagaretur rex, et ab duodecim millibus prope clamorem et strepitum pugnantium audiret, nec auxit copias integros fessis submittendo, neque ipse, quod plurimum intererat, certamini adfuit : quum Romanus imperator, major sexaginta annis, et prægravis corpore, omnia militaria munera ipse inpigre obiret. Egregie ad ultimum in audacter commisso perseveravit : et, Popillio relicto in custodia jugi, per invia transgressus, præmissis, qui repurgarent iter, Attalum et Misagenem, cum suæ gentis utrumque auxiliaribus, præsidio esse saltum aperientibus jubet :ipse, equites inpedimenta que præ se habens, cum legionibus agmen cogit.

Difficultas
 itinerum.

V. Inenarrabilis labor descendantibus cum ruina jumentorum sarcinarumque. Progressis vixdum quatuor millia passuum nihil optabilius esse, quam redire, qua venerant, si possent. Hostilem prope tumultum agmini elephantum præbebant : qui, ubi ad invia venerant, dejectis rectoribus, cum horrendo stridore pavorem ingentem, equis maxime, incutiebant, donec traducendi eos ratio inita est. Per proclive, sumto fastigio, longi duo validi asseres ex inferiore parte in terra defigebantur, distantes inter se

paullo plus, quam quanta belluæ latitudo est : in eos ^{U. C. 583.}
transversi incumbentes tigni, ad tricenos longi pedes, ^{A. C. 169.}
ut pons esset, injungebantur ; humusque insuper injiciebatur : modico deinde infra intervallo similis alter pons : dein tertius, et plures ex ordine, quarupes abscisæ erant, fiebant. Solido procedebat elephas in pontem : cujus priusquam in extremum procederet, subcisis asseribus conlapsus pons, usque alterius initium pontis, prolabi eum leniter cogebat : alii elephanti pedibus insistentes, alii clunibus subsidentes, prolabebantur : ubi planicies altera pontis accepisset eos, rursus simili ruina inferioris pontis deferebantur, donec ad æquiorem vallem perventum est. Paulo plus septem millia die Romani processerunt ; minimum pedibus itineris confectum : plerumque provolventes se simul cum armis aliisque oneribus, cum omni genere vexationis, processerunt : adeo ut ne dux quidem et auctor itineris inficiaretur, parva manu deleri omnem exercitum potuisse. Nocte ad modicam planiciem pervenerunt : neque, an infestus is locus esset, septus undique, circumspiciendi spatium fuit. Vix tandem ex insperato stabilem ad insistendum nactis locum, postero quoque die in tam cava valle obperiri Popillium, ac relictas cum eo copias, necesse fuit : quos et ipsos, quum ab nulla parte hostis terruisset, locorum asperitas hostiliter vexavit. Tertio die conjunctis copiis eunt per saltum, quem incolæ Callipencen adpellant : quarto inde die per æque invia, sed adsuetudine peritius, et meliore cum spe, quod nec hostis umquam adparebat, et mari adpropinquabant, degressi in campos, inter Heraclæum et Libethrum posuerunt castra peditum ; quorum pars major tumulos tenebat : ii vallem, campi

U. C. 583. quoque partem, ubi eques tenderet, amplectebatur.
A. C. 169.

VI. Lavanti regi dicitur nunciatum, hostes adesse: quo nuncio quum pavidus exsiluisset e solio, victum se sine prælio clamitans proripuit; et, subinde per alia atque alia pavidam consilia et imperia trepidans, duobus ex amicis Pellam, alterum Asclepiodotum, ubi pecunia deposita erat, ex præsiidiis revocat; omnesque aditus aperit bello. Ipse, ab Dio auratis statuis omnibus raptim, ne præda hosti essent, in classem congestis, ocius demigrare Pydnam cogit: et, quæ temeritas consulis videri potuisset, quod eo processisset, unde invito hoste regredi nequiret, eam non inconsultam audaciam fecit. Duos enim saltus, per quos inde evadere possent, habebant Romani: unum per Tempe in Thessaliam, alterum in Macedoniam præter Dium; quæ utraque regiis tenebantur præsiidiis. Itaque si dux intrepidus decem dies primam speciem adpropinquantis terroris sustinuisset, neque receptus Romanis per Tempe in Thessaliam, neque commeatibus pervehendis eo patuisset iter. Sunt enim Tempe saltus, etiamsi non bello fiat infestus, transitu difficilis: nam præter angustias per quinque millia, qua exiguum jumento onusto iter est, rupes utrimque ita abscisæ sunt, ut despici vix sine vertigine quadam simul oculorum animique possit: terret et sonitus et altitudo per mediam vallem fluentis Penei amnis. Hic locus, tam suapte natura infestus, per quatuor distantia loca præsiidiis regis fuit insessus: unum in primo aditu ad Gonnum erat: alterum Condylon castello inexpugnabili: tertium circa Lapathunta, quem Characa adpellant: quartum viæ ipsi, qua et media et angustissima val-

lis est, inpositum, quam vel decem armatis tueri facile est. Intercluso per Tempe simul aditu com-
 meatibus, simul reditu, ipsi montes, per quos descenderant, repetendi erant: quod ut furto fefellerant, ita propalam, tenentibus superiora cacumina hostibus, non poterant: et experta difficultas spem omnem incidisset. Supererat nihil aliud in temere commisso, quam in Macedoniam ad Dium per medios evadere hostes: quod, nisi Dii mentem regi ademissent, ipsum ingentis difficultatis erat. Nam quum Olympi radices montis paullo plus quam mille passuum ad mare relinquant spatium, cujus dimidium loci occupat ostium late restagnans Baphyri amnis, partem planiciæ aut Jovis templum, aut oppidum tenet; reliquum perexiguum fossa modica valloque claudi poterat, et saxorum ad manum silvestrisque materiæ tantum erat, ut vel murus objici, turresque excitari potuerint. Quorum nihil quam dispexisset cæcata mens subito terrore, nudatis omnibus præsidii, patefactisque bello, ad Pydnam refugit.

VII. Consul, plurimum et præsidii et spei cernens in stultitia et segnitie hostis, remisso nuncio ad Sp. Lucretium Larissam, ut castella, relicta ab hoste, circa Tempe occuparet, præmisso Popillio ad explorandos transitus circa Dium, postquam patere omnia in omnes partes animadvertit, secundis castris pervenit ad Dium: metarique sub ipso templo, ne quid sacro in loco violaretur, jussit. Ipse, urbem ingres-
 sus, sicut non magnam, ita exornatam publicis locis et multitudine statuarum, munitamque egregie, vix satis credere, in tantis rebus sine caussa relictis non aliquem subesse dolum. Unum diem ad exploranda circa omnia moratus, castra movet: satisque cre-

U. C. 583.
 A. C. 169.

Cos. Dium
 pervenit.

U. C. 583. dens, paratam frumenti copiam fore, eo die ad am-
 A. C. 169. nem nomine Mityn processit. Postero die progres-
 sus, Agassam urbem, tradentibus sese ipsis, recepit :
 et, ut reliquorum Macedonum animos sibi concilia-
 ret, obsidibus contentus, sine præsidio relinquere se
 eis urbem, immunesque ac suis legibus victuros, est
 pollicitus. Progressus inde diei iter, ad Ascordum
 flumen posuit castra : et, quantum procederet lon-
 gius a Thessalia, eo majorem rerum omnium ino-
 Inopia la-
 borat. piam sentiens, regressus ad Dium est ; dubitatione
 omnibus exenta, quid intercluso ab Thessalia pati-
 endum fuisset, cui procul inde abscedere tutum non
 esset. Perseus, contractis in unum omnibus copiis
 ducibusque, increpare præfectos præsidiorum, ante
 omnes Asclepiodotum atque Hippiam : ab his dicere
 claustra Macedoniæ tradita Romanis esse : cujus
 culpæ reus nemo justius, quam ipse, fuisset. Con-
 suli postquam ex alto inspecta classis spem fecit,
 cum commeatu naves venire, (ingens enim caritas
 annonæ ac prope inopia erat) ab invectis jam portum
 audit, onerarias naves Magnesiæ relictas esse. In-
 certo inde, quidnam agendum foret, (adeo sine ulla
 ope hostis quæ adgravaret, cum ipsa difficultate re-
 rum pugnandum erat) peropportune literæ a Sp.
 Lucretio adlatæ sunt : castella se, quæ super Tempe
 essent et circa Philan, tenere omnia, frumentique
 in iis et aliarum in usum rerum copiam invenisse.

Dium re-
 linquit.

VIII. His magnopere lætus consul ab Dio ad Phi-
 lan ducit, simul ut præsidium ejus firmaret, simul ut
 militi frumentum, cujus tarda subvectio erat, divide-
 ret. Ea profectio famam haudquaquam secundam
 habuit : nam alii, metu recessisse eum ab hoste, fe-
 rebant, quia manenti imperatori prælio dimicandum

foret: alii ignarum, belli quæ in dies fortuna nova-
 ret; ut qui, obferentibus sese rebus, omisisset e ma-
 nibus ea, quæ mox repeti non possent. Simul enim
 cessit possessione Dii, excitavit hostem, ut nunc tan-
 dem sentiret, recuperanda esse, quæ prius culpa
 amissa forent. Audita enim profectione consulis,
 regressus Dium, quæ disjecta ac vastata ab Romanis
 erant, reficit: pinnas mœnium decussas reponit, ab
 omni parte muros firmat: deinde quinque millia pas-
 suum ab urbe citra ripam Enipei amnis castra ponit;
 amnem ipsum, transitu perdifficilem, pro munimen-
 to habiturus. Fluit ex valle Olympi montis, æstate
 exiguus, hibernis idem incitatus pluviis: et supra
 rupes ingentes gurgitibus facit, et intra prorupta, in
 mare evolvendo terram, præaltas voragines, cavato-
 que medio alveo ripas utrimque præcipites. Hoc
 flumine Perseus septum iter hostis credens, extrahere
 reliquum tempus ejus ætatis in animo habebat.
 Inter hæc consul a Phila Popillium cum duobus mil-
 libus armatorum Heracleum mittit: abest a Phila
 quinque millia ferme passuum, media regione inter
 Dium Tempeque, in rupe anni imminente positum.

IX. Popillius, priusquam armatos muris admove-
 ret, misit, qui magistratibus principibusque suade-
 rent, fidem clementiamque Romanorum, quam vim,
 experiri mallent: nihil ea consilia moverunt, quia
 ignes ad Enipeum ex regis castris adparebant. Tum
 terra marique (et classis adpulsa ab litore stabat)
 simul armis, simul operibus machinisque, obpugnari
 cœpti. Juvenes etiam quidam Romani, ludicro cir-
 censi ad usum belli verso, partem humillimam muri
 ceperunt. Mos erat tum, nondum hac effusione in-
 ducta bestiis omnium gentium circum complendi,

U. C. 583.

A. C. 169.

Perseus
Dium re-
dit.Heracleum
captum.

Testudo.

U. C. 583. varia spectaculorum conquirere genera : nec, semel
A. C. 169. quadrigis, semel desultore misso, vix unius horæ
tempus utrumque curriculum complebat. Inter ce-
tera sexageni ferme juvenes, interdum plures, adpa-
ritoribus ludi armati inducebantur : horum inductio
in parte simulacrum decurrentis exercitus erat ; ex
parte elegantioris exercitii, quam militaris artis, pro-
piorque gladiatorium armorum usum. Quum alios
decursus edidissent motus, quadrato agmine facto,
scutis super capita densatis, stantibus primis, se-
cundis submissioribus, tertiis magis et quartis, post-
remis etiam genu nisis, fastigatam, sicut tecta ædi-
ficiorum sunt, testudinem faciebant. Hinc quinqu-
aginta ferme pedum spatio distantes duo armati pro-
currebant, comminatique inter se, ab ima in summam
testudinem per densata scuta quum evasissent, nunc
velut propugnantes per oras extremæ testudinis,
nunc in media inter se concurrentes, haud secus
quam stabili solo persultabant. Huic testudini si-
millima parti muri admota, quum armati superstan-
tes subissent, propugnatoribus muri fastigio altitudi-
nis æquabantur : depulsisque iis, in urbem duorum
signorum milites transcenderunt. Id tantum dissi-
mile fuit, quod, et in fronte extrema, et ex lateribus,
soli non habebant super capita delata scuta ne nu-
darent corpora ; sed prætectæ pugnantium more :
ita nec ipsos tela ex muro missa subeuntes læserunt,
et testudini injecta imbris in modum lubrico fastigio
innoxia ad imum labebantur. Et consul, capto jam
Heracleo, castra eo promovit ; tamquam Dium, at-
que, inde submoto rege, in Pieriam etiam progres-
surus. Sed hiberna jam præparans, vias commeati-
bus subvehendis ex Thessalia muniri jubet, et eligi

horreis opportuna loca, tectaue ædificari, ubi diver- U. C. 583.
sari portantes commeatus possent. A. C. 169.

X. Perseus, tandem a pavore eo, quo adtonitus fuerat, recepto animo, malle, imperiis suis non obtemperatum esse, quum trepidans gazam in mare de-
jici Pellæ, Thessalonicæ navalia jusserat incendi. Andronicus, Thessalonicam missus, traxerat tempus, id ipsum quod accidit, pœnitentiæ relinquens locum : incautior Nicias Pellæ projiciendo pecuniæ partem, quod fuerat nactus : sed in rem emendabilem visus lapsus esse, quod per urinatores omne ferme extrac-
tum est : tantusque pudor regi pavoris ejus fuit, ut urinatores clam interfici jusserit ; deinde Andronicum quoque et Nician, ne quis tam dementis imperii conscius existeret. Inter hæc C. Marcius, cum classe ab Heracleo Thessalonicam profectus, et agrum plu-
ribus locis, expositis per litora armatis, late vasta- Variæ urbes
vit, et procurentes ab urbe, secundis aliquot præliis, a Romanis
trepidatos intra mœnia compulit : jamque ipsi urbi frustra ten-
tatæ.
terribilis erat, quum, dispositis omnis generis tormentis, non vagi modo circa muros, temere adpropinquantes, sed etiam qui in navibus erant, saxis tormento emicantibus percutiebantur. Revocatis igitur in naves militibus, omissaque Thessalonicæ obpugnatione, Æniam inde petunt : quindecim millia passuum ea urbs abest, adversus Pydnam posita, fertili agro. Pervastatis finibus ejus, legentes oram, Antigoneam perveniunt : ibi, egressi in terram, primo et vastarunt agros passim, et aliquantum prædæ contulerunt ad naves : dein palatos eos adorti Macedones, mixti pedites equitesque, fugientes effuse ad mare persecuti, quingentos ferme occiderunt, et non minus ceperunt. Nec aliud, quam ultima necessitas,

U. C. 583. quum recipere se tuto ad naves prohiberentur, ani-
 A. C. 169. mos militum Romanorum, simul desperatione alia
 salutis, simul indignitate, irritavit. Redintegrata in
 litore pugna est: adjuvare et, qui in nāvibus erant.
 Ibi Macedonum ducenti ferme cæsi; par numerus
 captus. Ab Antigonea classis profecta, ad agrum
 Pallenensem excensionem ad populandum fecit. Fi-
 nium is ager Cassandrensiū erat, longe fertilissi-
 mus omnis oræ, quam prætervecti fuerant. Ibi Eu-
 Eumenes jungit se prætori. menes rex, viginti tectis navibus ab Elea profectus,
 obviū fuit; et quinque missæ a Prusia rege tectæ
 naves.

XI. Hac viriū accessione animus crevit prætori,
 ut Cassandream obpugnaret. Condita est a Cassan-
 dro rege in ipsis faucibus, quæ Pallenensem agrum
 ceteræ Macedoniæ jungunt, hinc Toronaïco, hinc
 Macedonico septa mari. Eminet namque in altum
 lingua, in qua sita est: nec minus, quam in altum
 magnitudine Atho mons, excurrit, obversa in regio-
 nem Magnesiæ duobus imparibus promontoriis; quo-
 rum majori Posideum est nomen, minori Canas-
 træum. Divisis partibus obpugnare adorti: Roma-
 nus ad Clitas, quas vocant, munimenta, cervis etiam
 objectis, ut viam intercluderet, a Macedonico ad To-
 ronaïcum mare perducit: ab altera parte euripus est:
 inde Eumenes obpugnabat. Romanis in fossa com-
 plenda, quam nuper objecerat Perseus, plurimum
 erat laboris. Ibi quærenti prætori, quia nusquam
 cumuli adparebant, quo regesta e fossa terra foret,
 monstrati sunt fornices: *non ad eamdem crassitudi-
 nem, qua veterem murum, sed simplici laterum ordine,
 structos esse.* Consilium igitur cepit, transfosso pa-
 riete iter in urbem patefacere: fallere autem ita se

posse, si, muros a parte alia scalis adortus, tumultu U. C. 583.
 injecto, in custodiam ejus loci propugnatores urbis A. C. 169.
 avertisset. Erant in præsidio Cassandreæ, præter
 non contemnendam juventutem oppidanorum, oc-
 tingenti Agrianes, et duo millia Penestarum Illyrio-
 rum, a Pleurato inde missi, bellicosum utrumque
 genus. His tuentibus muros, quum subire Romani
 summa vi niterentur, momento temporis parietes for-
 nicum perfossi urbem patefecerunt: quod si, qui in-
 rupere, armati fuissent, extemplo cepissent. Hoc
 ubi perfectum esse opus militibus nunciatum est,
 clamorem alacres gaudio repente tollunt, aliis parte
 alia in urbem inrupturis.

XII. Hostes primum admiratio cepit, quidnam
 sibi repentinus clamor vellet: postquam patere ur-
 bem accepere præfecti præsidii Pytho et Philippus,
 pro eo, qui occupasset adgredi, opus factum esse
 rati, cum valida manu Agrianum Illyriorumque
 erumpunt: Romanosque, qui alii aliunde coïbant
 convocabanturque, ut signa in urbem inferrent, in-
 compositos atque inordinatos fugant, persequuntur-
 que ad fossam: in quam compulsos ruina cumulant:
 sexcenti ferme ibi interfecti, omnesque prope, qui
 inter murum fossamque deprehensi erant, vulneran-
 tur. Ita suo ipse conatu percussus prætor, segnior
 ad alia factus consilia erat: et ne Eumeni quidem,
 simul a mari, simul a terra adgredienti, quidquam
 satis procedebat. Placuit igitur utrique, custodiis
 firmatis, ne quod præsidium ex Macedonia intromit-
 ti posset, quoniam vis aperta non processisset, ope-
 ribus mœnia obpugnare. Hæc parantibus his, de-
 cem regii lembi, ab Thessalonica cum delectis Gal-
 lorum auxiliaribus missi, quum in salo stantes hos-

U. C. 583. tium naves conspexissent ; ipsi, obscura nocte, sim-
 A. C. 169. plici ordine, quam poterant proxime litus tenentes,
 intrarunt urbem. Hujus novi præsidii fama absistere obpugnatione simul Romanos regemque coëgit : circumvecti promontorium, ad Toronen classem adpulerunt. Eam quoque obpugnare adorti, ubi valida defendi manu animadverterunt, irritum incepto Demetriadem petunt. Ibi quum adpropinquantes repleta mœnia armatis vidissent, prætervecti ad Iölcon classem adpulerunt ; inde, agro vastato, Demetriadem quoque adgressuri.

XIII. Inter hæc et consul, ne segnis sederet tantum in agro hostico, M. Popillium cum quinque millibus militum ad Melibœam urbem obpugnandam mittit. Sita est in radicibus Ossæ montis, qua parte in Thessaliam vergit, opportune imminens super Demetriadem. Primus adventus hostium perculit incolas loci : conlectis deinde ex necopinato pavore animis, discurrunt armati ad portas ac mœnia, qua suspecti aditus erant : spemque extemplo inciderunt, capi primo inpetu posse. Obsidio igitur parabatur, et opera obpugnationum fieri cœpta. Perseus, quum audisset, simul Melibœam a consulis exercitu obpugnari, simul classem Iölci stare, ut inde Demetriadem adgrederetur, Euphranorem quemdam ex ducibus cum delectis duobus millibus Melibœam mittit : eidem imperatum, ut, si a Melibœa submovisset Romanos, Demetriadem prius occulto itinere intraret, quam ab Iölco ad urbem castra moverent Romani. Et ab obpugnatoribus Melibœæ, quum in superioribus locis repente adparuisset, cum trepidatione multa relictæ opera sunt, ignisque injectus : ita a Melibœa abscessum est. Euphranor, soluta

unius urbis obsidione, Demetriadem extemplo du- U. C. 583.
cit: nec tum mœnia modo, sed agros etiam confi- A. C. 169.
derunt se a populationibus tueri posse: et eruptio-
nes in vagos populatores non sine vulneribus hostium
factæ sunt. Circumvecti tamen mœnia sunt prætor
et rex, situm urbis contemplantes, si qua parte ten-
tare aut opere aut vi possent. Fama fuit, per Cy-
dantem Cretensem et Antimachum, qui Demetriadi
præerat, tractatas inter Eumenem et Persea con-
ditiones amicitiae: ab Demetriade certe abscessum
est. Eumenes ad consulem navigat: gratulatus, Eumenes
quod prospere Macedoniam intrasset, Pergamum in in regnum
regnum abit. Marcius Figulus prætor, parte classis abit.
in hiberna Sciathum missa, cum reliquis navibus
Oreum Bœotiae petit, eam urbem aptissimam ratus,
unde exercitibus, qui in Macedonia, quique in Thes-
salia erant, mitti commeatus possent. De Eumene
rege longe diversa tradunt. Si Valerio Antiati cre-
das, nec classe adjutum ab eo prætorem esse, quum
sæpe eum literis arcessisset, tradit; nec cum gratia
ab consule profectum in Asiam, indignatum, quod,
ut iisdem castris tenderet, permissum non fuerit: ne
ut equites quidem Gallos, quos secum adduxerat, re-
linqueret, inpetrari ab eo potuisse. Attalum fratrem
ejus et remansisse apud consulem, et sinceram ejus
fidem æquali tenore egregiamque operam in eo bello
fuisse.

XIV. Dum bellum in Macedonia geritur, legati
Transalpini ab regulo Gallorum (Balanos ipsius tra-
ditur nomen; gentis, ex qua fuerit, non traditur)
Romam venerunt, pollicentes ad Macedonicum bel-
lum auxilia. Gratiae ab senatu actæ, muneraque

U. C. 583. missa, torquis aureus duo pondo, et pateræ aureæ
A. C. 169.

Prusiæ et
Rhodiorum le-
gati.

Rhodi-
orum su-
perba ora-
tio.

quatuor pondo, equus phaleratus, armaque equestria. Secundum Gallos Pamphyli legati coronam auream, ex viginti millibus Philippearum factam, in curiam intulerunt: petentibusque iis, ut id donum in cella Jovis optimi maximi ponere, et sacrificare in Capitolio liceret, permissum: benigneque amicitiam renovare volentibus legatis responsum, et binûm millium æris singulis missum munus. Tum ab rege Prusia, et paullo post ab Rhodiis, de eadem re longe aliter disserentes legati auditi sunt: utraque legatio de pace reconcilianda cum rege Perseo egit. Prusiæ preces magis, quam postulatio, fuere, profitentis, *et ad id tempus se cum Romanis stetisse, et, quoad bellum foret, staturum. Ceterum quum ad se a Perseo legati venissent de finiendo cum Romanis bello, et iis pollicitum deprecatorem apud senatum futurum; petere, si possent inducere in animum, ut finiant iram, se quoque in gratia reconciliatæ pacis posse uti: hæc regii legati. Rhodii, superbe commemoratis erga populum Romanum beneficiis, et pene victoriæ, utique de Antiocho rege, majore parte ad se vindicata, adjecerunt: Quum pax inter Macedonas Romanosque esset, sibi amicitiam cum rege Perseo cæptam: eam se invitos, nullo ejus in se merito, quoniam ita Romanis visum sit in societatem se belli trahere, interruppisse. Tertium se annum multa ejus incommoda belli sentire: mari intercluso, inopia insulam premi, amissis maritimis vectigalibus atque com meatibus. Quum id ultra pati non possent, legatos alios ad Persea in Macedoniam misisse, qui ei denunciarent, Rhodiis placere, pacem eum componere cum Romanis: se Romam eadem nun-*

ciatum missos. Per quos stetisset, quo minus belli finis fieret, adversus eos quid sibi faciendum esset, Rhodios consideraturos esse. Ne nunc quidem hæc sine indignatione legi audirive posse, certum habeo : inde existimari potest, qui habitus animorum audientibus ea Patribus fuerit

XV. Claudius, nihil responsum, auctor est : tantum senatusconsultum recitatum, quo Caras et Lycios liberos esse juberet populus Romanus, literasque extemplo ad utramque gentem * scirent indicatum mitti. Qua audita re, principem legationis, cujus magniloquentiam vix curia paullo ante ceperat, conruisse. Alii responsum esse tradunt, *Populum Romanum et principio hujus belli haud vanis auctoribus compertum habuisse, Rhodios cum Perseo rege adversus rempublicam suam occulta consilia inisse : et, si id ante dubium fuisset, legatorum paullo ante verba ad certum redegissee : et plerumque ipsam se fraudem, etiamsi initio cautior fuerit, detegere. Rhodios nuncio in orbe terrarum arbitria belli pacisque agere : Deorum nutu arma sumtuos positurosque Romanos esse : jam non Deos fœderum testes, sed Rhodios habituros. Itane tandem iis pareatur, exercitusque de Macedonia deportentur ? Visuros esse, quid sibi faciendum sit. Quid Rhodii visuri sint, ipsos scire. Populum certe Romanum, devicto Perseo, quod prope diem sperent fore, visurum, ut pro meritis cujusque in eo bello civitatis gratiam dignam referat. Munus tamen legatis in singulos binum millium æris missum est : quod ii non acceperunt.*

XVI. Literæ deinde recitatæ Q. Marcii consulis sunt, *Quemadmodum, saltu superato, in Macedoniam transisset : ibi et ex aliis locis commeatus a prætore*

U. C. 583. *prospectos in hiemem habere, et ab Epirotis viginti mil-*
 A. C. 169. *lia modium tritici, decem hordei sumsisse: ut pro eo*
frumento pecunia Romæ legatis eorum curaretur.
Vestimenta militibus ab Roma mittenda esse: equis
ducentis ferme opus esse, maxime Numidis: nec sibi in
his locis ullam copiam esse. Senatusconsultum, ut
 ea omnia ex literis consulis fierent, factum est. C.
 Sulpicius prætor sex millia togarum, triginta tuni-
 carum, et equos, deportanda in Macedoniam, præ-
 bendaque arbitrato consulis locavit, et legatis Epi-
 rotarum pecuniam pro frumento solvit; et Onesim-
 um, Pythonis filium, nobilem Macedonem, in se-
 natum introduxit. Is pacis semper auctor regi
 fuerat, monueratque, sicut pater ejus Philippus in-
 stitutum usque ad ultimum vitæ diem servabat, quo-
 tidie bis in die fœderis icti cum Romanis perlegendi;
 ut eum morem, si non semper, crebro tamen usur-
 paret. Postquam deterrere eum a bello nequii, primo
 subtrahere sese per alias atque alias causas, ne
 interesset iis, quæ non probabat, cœpit: postremo,
 quum suspectum se esse cerneret, et proditiōis
 interdum crimine insimulari, ad Romanos trans-
 fugit: magno usui consuli fuit. Ea introductus in
 curiam quum memorasset, senatus in formulam so-
 ciorum eum referri jussit: locum, lautia præberi:
 agri Tarentini, qui publicus populi Romani esset,
 ducenta jugera dari, et ædes Tarenti emi: uti ea
 curaret, C. Decimio prætori mandatum. Censores
 censum Idibus Decembribus, severius quam ante,
 habuerunt: multis equi ademti, inter quos P. Ru-
 tilio, qui tribunus plebis eos violenter accusarat:
 tribu quoque is motus, et ærarius factus. Ad opera
 publica facienda quum eis dimidium ex vectigalibus

ejus anni adtributum ex senatusconsulto a quæstoribus esset ; Ti. Sempronius ex ea pecunia, quæ ipsi adtributa erat, ædes P. Africani pone Veteres ad Vortumni signum, lanienasque et tabernas conjunctas in publicum emit, basilicamque faciendam curavit, quæ postea Sempronia adpellata est.

U. C. 583.

A. C. 169.

XVII. Jam in exitu annus erat, et propter Macedonici maxime belli curam in sermonibus homines habebant, quos in annum consules ad finiendum tandem id bellum crearent : itaque senatusconsultum factum est, ut Cn. Servilius primo quoque tempore ad comitia habenda veniret. Senatusconsultum Sulpicius prætor ad consulem * post paucos dies recitavit, quibus ante diem * * in urbem venturum. Et consul maturavit, et comitia eo die, qui dictus erat, sunt perfecta. Consules creati L. Æmilius Paullus iterum, septimo decimo anno postquam primo consul fuerat, et C. Licinius Crassus. Prætores postero die facti Cn. Bæbius Tamphilus, L. Anicius Gallus, Cn. Octavius, P. Fonteius Balbus, M. Æbutius Elva, C. Papirius Carbo. Omnia ut maturius agerentur, belli Macedonici stimulabat cura : itaque designatos ex templo sortiri placuit provincias ; ut, utri Macedonia consuli, cuique prætori classis venisset, sciretur : ut jam inde cogitarent pararentque, quæ bello usui forent, senatumque consulerent, si qua re consulto opus esset. *Latinas, ubi magistratum inissent, quod per religiones posset, primo quoque tempore fieri placere ; neque consulem, cui eundem in Macedoniam esset, teneri.* His decretis, consulibus Italia et Macedonia, prætoribus, præter duas jurisdictiones in urbe, classis, et Hispania, et Sicilia, et Sardinia provinciæ nominatæ sunt. Consulum, Æmilio Mace-

U. C. 583. donia, Licinio Italia evenit. Prætores, Cn. Bæbius
 A. C. 169. urbanam, L. Anicius peregrinam, et si quo senatus
 censuisset, Cn. Octavius classem, P. Fonteius His-
 paniam, M. Æbutius Siciliam, C. Papirius Sardi-
 niam est sortitus.

XVIII. Extemplo adparuit omnibus, non segniter
 id bellum L. Æmilium gesturum ; præterquam quod
 alius vir erat, etiam quod dies noctesque intentus ea
 sola, quæ ad id bellum pertinerent, animo agitabat.
 Jam omnium primum a senatu petit, ut legatos in
 Macedoniam mitterent ad exercitus visendos classem-
 que, et comperta referenda, quid aut terrestribus aut
 navalibus copiis opus esset : præterea ut explorarent
 copias regias, quantum possent, quaque provincia
 nostra, qua hostium foret : utrum intra saltus castra
 Romani haberent, an jam omnes angustię exsupe-
 ratæ, et in æqua loca pervenissent : qui fideles nobis
 socii, qui dubii suspensæque ex fortuna fidei, qui
 certi hostes viderentur : quanti præparati comme-
 atus, et unde terrestri itinere, unde navibus subpor-
 tarentur : quid ea æstate terra marique rerum ges-
 tarum esset : ex his bene cognitis certa in futurum
 consilia capi posse ratus. Senatus Cn. Servilio con-
 suli negotium dedit, ut is in Macedoniam, quos L.
 Æmilio videretur, legaret. Legati biduo post pro-
 fecti, Cn. Domitius Ahenobarbus, A. Licinius Nerva,
 L. Bæbius. Bis in exitu anni ejus lapidatum esse
 nunciatum est ; in Romano agro, simul in Veienti-
 bus : novemdiale sacrum factum est. Sacerdotes
 eo anno mortui sunt, P. Quinctilius Varus, flamen
 Martialis ; et M. Claudius Marcellus decemvir : in
 cujus locum Cn. Octavius subfectus. Et jam mag-
 nificientia crescente notatum est, ludis circensibus

P. Cornelii Scipionis Nasicæ et P. Lentuli ædiliū ^{U. C. 583.}
 curulium sexaginta tres Africanas, et quadraginta ^{A. C. 169.}
 ursos et elephantos lusisse.

XIX. L. Æmilio Paulo, C. Licinio consulibus, ^{U. C. 584.}
 Idibus Martiis principio insequentis anni, quum in ^{A. C. 168.}
 exspectatione Patres fuissent, maxime quidnam consul de Macedonia, cujus ea provincia esset, referret; nihil se habere, Paullus, quod referret, quum nondum legati redissent, dixit. Ceterum Brundisii legatos jam esse, bis ex cursu Dyrrachium ejectos. Cognitis mox, quæ nosci prius in rem esset, relaturum: id fore intra perpaucos dies. Et, ne quid profectionem suam teneret, pridie Idus Aprilis Latinis esse constitutam diem. Sacrificio rite perfecto, se et Cn. Octavium, simul senatus censuisset, exituros esse. C. Licinio collegæ suo fore curæ, se absente, ut, si qua parari mittive ad id bellum opus sit, parentur mittanturque. Interea legationes exterarum nationum audiri posse. Sacrificio rite per- ^{Alexandri-}
 fecto, primi Alexandrini, legati ab Ptolemæo et ^{ni legati.}
 Cleopatra regibus, vocati sunt. Sordidati, barba et capillo promisso, cum ramis oleæ ingressi curiam, procubuerunt: et oratio, quam habitus, fuit miserabilior. Antiochus Syriæ rex, qui obses Romæ fuerat, per honestam speciem majoris Ptolemæi reducendi in regnum, bellum cum minore fratre ejus, qui tum Alexandriam tenebat, gerens, et ad Pelusium navali prælio victor fuerat, et, tumultuario opere ponte per Nilum facto, transgressus cum exercitu, obsidione ipsam Alexandriam terrebat: nec procul abesse, quin potiretur regno opulentissimo, videbatur. Ea legati querentes orabant senatum, ut opem regno regibusque amicis imperio ferrent. Ea merita populi Romani in Antiochum, eam apud

U. C. 584. omnes reges gentesque auctoritatem esse, ut, si legatos
 A. C. 168. misissent, qui denunciarent, non placere senatui, sociis
 regibus bellum fieri, extemplo abscessurus a manibus
Alexandriæ, abducturusque exercitum in *Syriam* esset.
 Quod si cunctentur facere, brevi extorres regno *Ptole-*
mæum et *Cleopatram* *Romam* venturos, cum pudore
 quodam populi *Romani*, quod nullum opem in ultimo
 discrimine fortunarum tulissent. Moti Patres pre-
 cibus *Alexandrinorum*, extemplo *C. Popillium Læ-*
natem, et *C. Decimium*, et *C. Hostilium* legatos, ad
 finiendum inter reges bellum, miserunt. Prius *An-*
tiochum, dein *Ptolemæum* adire jussi, et nunciare,
 ni absistatur bello, per utrum stetisset, eum non pro
 amico, nec pro socio habituros esse.

Ad Antio-
 chum et
 Ptolemæ-
 um mittun-
 tur legati.

XX. His intra triduum simul cum legatis *Alex-*
andrinis profectis, legati ex *Macedonia* *Quinquatri-*
bus ultimis adeo exspectati venerunt, uti, nisi vesper
 esset, extemplo senatum vocaturi consules fuerint.
 Postero die senatus fuit, legatique auditi sunt. Ii
 nunciant, *Majore periculo, quam emolumento, exer-*
citum per invios saltus in Macedoniam inductum. Pi-
eriam, quo processisset, regem tenere: castra castris
prope ita conlata esse, ut flumine Enipeo interjecto
arceantur: neque regem pugnandi potestatem facere,
nec nostris vim ad cogendum esse. Hiemem etiam
asperam rebus gerendis intervenisse, in otio militem
*ali, nec plus quam sex * * frumentum habere. Ma-*
cedonum dici triginta millia armatorum esse. Si Ap.
Claudio circa Lychnidum satis validus exercitus foret,
potuisse ancipiti bello distinere regem: nunc et Ap-
pium, et quod cum eo præsidii sit, in summo periculo
esse, nisi propere aut justus exercitus eo mittatur, aut
illi inde deducantur. Ad classem se ex castris pro-

fectos, sociorum navalium partem morbo audisse absumtam ; partem, maxime qui ex Sicilia fuerint, domos suas abisse, et homines navibus deesse : qui sint, neque stipendium accepisse, neque vestimenta habere. Eumenem classemque ejus, tamquam vento adlatas naves, sine caussa et venisse, et abisse : nec animum ejus regis constare satis visum. Sicut omnia de Eumene dubia, Attali egregie constantem fidem nunciabant.

XXI. Legatis auditis, tunc de bello referre sese S. consultum de belli adparatu.
L. Æmilius dixit. Senatus decrevit, ut in octo legiones parem numerum tribunorum consules et populus crearent : creari autem neminem eo anno placere, nisi qui honorem gessisset. Tum ex omnibus tribunis militum uti L. Æmilius in duas legiones in Macedoniam, quos eorum velit, eligat, et ut, sollemni Latinarum perfecto, L. Æmilius consul, Cn. Octavius prætor, cui classis obtigisset, in provinciam profisciscantur. Aditus est his tertius L. Anicius prætor, cujus inter peregrinos jurisdictio erat : eum in provinciam Illyricum circa Lychnidum Ap. Claudio succedere placuit. Delectus cura C. Licinio consuli inposita : is septem millia civium Romanorum et equites ducentos scribere jussus ; et sociis nominis Latini septem millia peditum imperare, quadringentos equites ; et Cn. Servilio Galliam obtinenti provinciam literas mittere, ut sexcentos equites conscriberet. Hunc exercitum ad collegam primo quoque tempore mittere in Macedoniam jussus : neque in ea provincia plus quam duas legiones esse ; eas repleri, ut sena millia peditum, trecenos haberent equites : ceteros equites peditesque in præsidiis disponi : qui eorum idonei ad militandum non essent, dimitti.

U. C. 584. Decem præterea millia peditum imperata sociis, et
 A. C. 168. octingenti equites. Id præsidii additum Anicio, præter duas legiones, quas portare in Macedoniam est jussus, quina millia peditum et ducenos habentes, trecenos equites : et in classem quinque millia navalium socium sunt scripta. Licinius consul duabus legionibus obtinere provinciam jussus : eo addere sociorum decem millia peditum, et sexcentos equites.

L. Æmili oratio. XXII. Senatusconsultis perfectis, L. Æmilius consul e curia in concionem processit, orationemque talem habuit. *Animadvertisse videor, Quirites, majorem mihi, sortito Macedoniam provinciam, gratulationem factam, quam quum aut consul essem consulatus, aut quo die magistratum inissem : neque id ob aliam causam, quam quia bello in Macedonia, quod diu trahitur, existimastis dignum majestate populi Romani exitum per me inponi posse. Deos quoque huic fuisse sorti spero, eosdemque in rebus gerendis adfuturos esse. Hæc partim opinari, partim sperare possum. Illud adfirmare pro certo habeo audeoque, me omni ope adnissurum esse, ne frustra vos hanc spem de me conceperitis. Quæ ad bellum opus sunt, et senatus decrevit, et (quoniam extemplo proficisci placet, neque ego in mora sum) C. Licinius collega, vir egregius, æque enise parabit, ac si ipse id bellum gesturus esset. Vos, quæ scripsero senatui, aut vobis, credite : rumores credulitate vestra ne alutis, quorum auctor nemo exstabit. Nam nunc quidem, quod vulgo fieri, hoc præcipue bello, animadverti, nemo tam famæ contemtor est, cujus non debilitari animus possit. In omnibus circulis, atque etiam (si Diis placet) in conviviiis sunt, qui exercitus in Macedoniam ducant ; ubi castra locanda sint, sciant ; quæ loca præsidiis occupanda ;*

quando, aut quo saltu intranda Macedonia; ubi horrea ponenda; qua terra, mari subvehantur commeatus; quando cum hoste manus conserendæ; quando quiescendum sit. Nec, quid melius faciendum sit, modo statuunt, sed, quidquid aliter, quam ipsi censuere, factum est, consulem veluti dicta die accusant. Hæc magna impedimenta res gerentibus sunt: nec enim omnes tam firmi et constantis animi contra adversum rumorem esse possunt, quam Fabius fuit: qui suum imperium minui per vanitatem populi maluit, quam secunda fama male rem gerere. Non sum is, qui non existimem admonendos duces esse: immo eum, qui de sua unius sententia omnia gerat, superbum judico magis, quam sapientem. Quid ergo est? Primum a prudentibus, et proprie rei militaris peritis, et usu doctis, monendi imperatores sunt: deinde ab his, qui intersunt gerendis * loco, qui hostem, qui temporum opportunitatem vident, qui in eodem velut navigio participes sunt periculi. Itaque si quis est, qui, quod e republica sit, suadere se mihi in eo bello, quod gesturus sum, confidat; ne deneget operam reipublicæ, et in Macedoniam mecum veniat: nave, equo, tabernaculo, viatico etiam a me juvabitur. Si quem id facere piget, et otium urbanum militiæ laboribus præoptat, e terra ne gubernaverit. Sermonum satis ipsa præbet urbs: loquacitatem suam contineat: nos castrensibus consiliis contentos futuros esse sciat. Ab hac concione, Latinis, quæ pridie Kalendas Apriles fuerunt, in monte sacrificio rite perpetrato, protinus inde et consul et prætor Cn. Octavius in Macedoniam profecti sunt. Traditum est memoriæ, majore, quam solita, frequentia prosequentium consulem celebratum; ac prope certa spe ominatos esse

U. C. 584.
A. C. 168.

U. C. 584. homines, finem esse Macedonico bello, maturumque
 A. C. 168. reditum cum egregio triumpho consulis fore.

Perseus sibi
 adjungit
 Gentium.

XXIII. Dum hæc in Italia geruntur, Perseus, quod jam inchoatum perficere, quia inpena pecuniæ facienda erat, non inducebat in animum, ut Gentium Illyriorum regem sibi adjungeret; hoc, postquam intrasse saltum Romanos, et adesse discrimen ultimum belli animadvertit, non ultra differendum ratus; quum per Hippiam legatum trecenta argenti talenta pactus esset, ita ut obsides ultro citroque darentur, Pantauchum misit, ex fidissimis amicis, ad ea perficienda. Medeone Labeatidis terræ Pantauchus regi Illyrio obcurrit: ibi et jusjurandum ab rege et obsides accepit: missus et a Gentio est legatus, nomine Olympio, qui jusjurandum a Perseo obsidesque exigeret. Cum eodem ad pecuniam accipiendam missi sunt, et, auctore Pantaucho, qui Rhodum legati cum Macedonibus irent, Parmenio et Morcus destinantur: quibus ita mandatum, uti, jurejurando, obsidibusque, et pecunia accepta, tum demum Rhodum proficiscerentur: *duorum simul regum nomine incitari Rhodios ad bellum Romanum posse: adjunctam civitatem, penes quam unam tum rei navalis gloria esset, nec terra nec mari spem relicturam Romanis.* Venientibus Illyriis Perseus, ab Enipeo amni ex castris cum omni equitatu profectus, ad Dium obcurrit. Ibi ea, quæ convenerunt, circumfuso agmine equitum facta; quos adesse fœderi sancitæ cum Gentio societatis volebat rex, aliquantum eam rem ratus animorum iis adjecturam: et obsides in conspectu omnium dati, acceptique: et, Pellam ad thesauros regios missis, qui pecuniam ac-

ciperent, qui Rhodum irent cum Illyriis legatis, U. C. 584. A. C. 168.
 Thessalonicæ conscendere jussi. Ibi Metrodorus Legati Persei et Gentii ad Rhodios,
 erat, qui nuper ab Rhodo venerat : auctoribusque
 Dinone et Polyarato, principibus civitatis ejus, adfir-
 mabat, Rhodios paratos ad bellum esse : is princeps
 junctæ cum Illyriis legationis datus est.

XXIV. Eodem tempore ad Eumenem et ad An- Persei man-
 tiochum communia mandata, quæ subjicere conditio data ad
 rerum poterat. *Natura inimica inter se esse liberam* Eumenem
civitatem et regem. Singulos populum Romanum et Antio-
adgredi, et, quod indignius sit, regum viribus reges ob-
pugnare. Attalo adjutore, patrem suum obpressum :
Eumene adjuvante, et quadam ex parte etiam Philippo
patre suo, Antiochum obpugnatum : in se nunc et Eu-
menem et Prusiam armatos esse. Si Macedonia reg-
num sublatum foret, proximam Asiam esse ; quam jam
ex parte, sub specie liberandarum civitatum, suam fe-
cerint : deinde Syriam. Jam Prusiam Eumeni honore
præferri, jam Antiochum victorem præmio belli ab
Ægypto arceri. Hæc cogitantem providere jubebat,
ut aut ad pacem secum faciendam compelleret Roma-
nos, aut perseverantes in bello injusto communes duceret
omnium regum hostes. Ad Antiochum aperta man-
data erant ; ad Eumenem per speciem captivorum
redimendorum missus legatus erat : verum occultiora
quædam agebantur, quæ in præsentia invisum quidem
et suspectum Romanis Eumenem falsis gravioribus
 * *. Proditor enim ac prope hostis habitus, dum
 inter se duo reges captantes fraude et avaritia cer-
 tant. Cydas erat Cretensis, ex intimis Eumenis :
 hic prius ad Amphipolim cum Chimaro quodam po-
 populari suo, militante apud Persea, inde postea ad
 Demetriadem, semel cum Menecrate quodam, ite-

U. C. 584. rum cum Antimacho, regiis ducibus, sub ipsis mœ-
 A. C. 168. nibus urbis conlocutus fuerat. Eropon quoque, qui
 tum missus est, duabus ad eundem Eumenem jam
 ante legationibus functus erat. Quæ conloquia oc-
 culta et legationes infames quidem erant: sed, quid
 actum esset, quidve inter reges convenisset, ignora-
 batur. Res autem ita sese habuit.

XXV. Eumenes neque favit victoriæ Persei, ne-
 que bello eum invadere animo habuit: non tam quia
 paternæ inter eos inimiciæ erant, quam ipsorum
 odiis inter se accensæ. Non ea regum æmulatio,
 ut æquo animo Persea tantas adipisci opes, tantam-
 que gloriam, quanta Romanis victis eum manebat,
 Eumenes visurus fuerit. Cernebat et Persea, jam
 inde ab initio belli, omni modo spem pacis tentasse,
 et in dies magis, quo propior admoveretur terror,
 nihil neque agere aliud, neque cogitare. Romanos
 quoque, quia traheretur diutius spe ipsorum bellum,
 et ipsos duces, et senatum, non abhorrere a finiendo
 tam incommodo ac difficili bello. Hac utriusque
 partis voluntate explorata, quod fieri etiam sua
 sponte tædio validioris, metu infirmioris credebatur
 posse, in eo suam operam venditare concilianda gra-
 tia magis cupiit. Nam, modo ne juvaret bello
 Romanos terra marique, modo pacis patrandæ cum
 Romanis paciscebatur mercedem: ne bello inter-
 esset, mille et quingenta talenta: in utroque non
 fidem modo se, sed obsides quoque, dare paratum
 esse, ostendebat. Perseus ad rem inchoandam
 promptissimus erat, cogente metu, et de obsidibus
 accipiendis sine dilatione agebat, conveneratque, ut
 accepti Cretam mitterentur. Ubi ad pecuniæ men-
 tionem ventum erat, ibi hæsitabat: et utique alte-

ram in tanti nominis regibus turpem ac sordidam, et danti, et magis accipienti, mercedem esse. Malebat in spem Romanæ pacis non recusare inpensam, sed eam pecuniam perfecta re daturum; interea Samothracæ in templo depositurum. Ea insula quum ipsius ditionis esset, videre Eumenes nihil interesse, an Pellæ pecunia esset: id agere, ut partem aliquam præsentem ferret. Ita, nequidquam inter se captati, nihil præter infamiam movere.

XXVI. Nec hæc tantum Perseo per avaritiam est dimissa res, quum pecuniam tutam et pacem habere per Eumenem, quæ vel parte regni redimenda esset, ac receptus protrahere inimicum mercede onustum, et hostes merito ei Romanos posset facere: sed etiam Gentii regis parata societas, et tum Gallorum, effusorum per Illyricum, ingens agmen oblatum avaritia dimissum est. Veniebant decem millia equitum, par numerus peditum, et ipsorum jungentium cursum equis, et in vicem prolapsorum equitum vacuos capientium ad pugnam equos. Hi pacti erant, eques de nos præsentibus aureos, pedes quinos, mille dux eorum. Venientibus his Perseus ab Enipeo ex castris profectus obviam cum dimidia copiarum parte denunciare per vicos urbesque, quæ viæ propinquæ sunt, coepit, ut commeatus expedirent, frumenti, vini, pecorum ut copia esset: ipse equos, phalerasque, et sagula, donum principibus ferre, et parum auri, quod inter paucos divideret, multitudinem credens trahi spe posse. Ad Almanam urbem pervenit, et in ripa fluminis Axii posuit castra: circa Desudabam in Mædica exercitus Gallorum consederat, mercedem pactam obperiens. Eo mittit Antigonom, ex purpuratis unum, qui juberet, multitudinem Gallorum

Persei
avaritia.

Gallorum
auxilia
recusat.

U. C. 584. ad Bylazora (Pæoniæ is locus est) castra movere,
 A. C. 168. principes ad se venire frequentes : septuaginta quinque millia ab Axio flumine et castris regis aberant. Hæc mandata ad eos quum pertulisset Antigonus, adjecissetque, per viam quanta omnium præparata cura regis copia multitudini foret, quibusque muneribus principes advenientes, vestis, argenti, equorumque excepturus rex esset, de his quidem se coram cognituros respondent : illud, quod præsens pepigissent, interrogant, ecquid aurum, quod in singulos pedites equitesque dividendum esset, secum adduxisset ? Quum ad id nihil responderetur, Clondicus regulus eorum, *Abi, renuncia ergo, inquit, regi, nisi aurum obsidesque acceperissent, nusquam inde Gallos longius vestigium moturos.* Hæc relata regi quum essent, advocato consilio, quum, quid omnes suasuri essent, adpareret, ipse, pecuniæ, quam regni, melior custos, institit de perfidia et feritate Gallorum disserere. *Multorum jam ante cladibus expertum, periculosum esse, tantam multitudinem in Macedoniam accipere, ne graviores eos socios habeant, quam hostes Romanos. Quinque millia equitum sat esse, quibus et uti ad bellum possent et quorum multitudinem ipsi non timeant.*

XXVII. Adparebat in omnibus, mercedem multitudinis timere, nec quidquam aliud : sed, quum suadere consulenti nemo auderet, remittitur Antigonus, qui nunciaret, quinque millium equitum opera tantum uti regem : contemnere multitudinem aliam. Quod ubi audivere barbari, ceterorum quidem fremitus fuit, indignantium se frustra excitos sedibus suis : Clondicus rursus interrogat, ecquid ipsis quinque millibus, quod convenisset, numeraret ? Quum

adversus id quoque misceri ambages cerneret, invio-
lato fallaci nuncio, (quod vix speraverat ipse posse
contingere) retro ad Istrum, perpopulati Thraciam,
qua vicina erat viæ, redierunt. Quæ manus, quieto
sedente rege ad Enipeum, adversus Romanos Per-
rhæbiæ saltum in Thessaliam traducta, non agros tan-
tum nudare populando potuit, ne quos inde Romani
commeatus expectarent, sed ipsas exscindere urbes,
tenente ad Enipeum Perseo Romanos, ne urbibus
sociis opitulari possent. Ipsis quoque Romanis de
se cogitandum fuisset: quando neque manere, a-
missa Thessalia, unde exercitus alebatur, potuissent,
neque progredi, quum ex adverso castra Macedo-
num * * *. qui ea pependerant spe, haud mediocriter
debilitavit. Eadem avaritia Gentium regem sibi alie-
navit: nam, quum trecenta talenta Pellæ missis a
Gentio numerasset, signare eos pecuniam passus.
Inde decem talenta ad Pantauchum missa, eaque
præsentia dari regi jussit: reliquam pecuniam, sig-
natam Illyriorum signo, portantibus suis præcipit,
parvis itineribus veherent: dein, quum ad finem
Macedoniæ ventum esset, subsisterent ibi, ac nun-
cios ab se obperirentur. Gentius, exigua parte pe-
cuniæ accepta, quum adsidue Pantaucho ad laces-
sendos hostili facto Romanos stimularetur, M. Per-
pernam et L. Petillium legatos, qui tum forte ad
eum venerant, in custodiam conjecit. Hoc audito,
Perseus, contraxisse eum necessitates ratus ad bel-
lum utique cum Romanis, ad revocandum, qui pe-
cuniam portabat, misit: velut nihil aliud agens,
quam ut, quanta maxima posset, præda ex victo Ro-
manis reservaretur. Et ab Eumene Eropon, ignotis,
quæ occulte acta erant, redit. De captivis actum

U. C. 584.

A. C. 168.

Gentium
in fraudem
inpellit.

U. C. 584. esse et ipsi evulgaverant, et Eumenes consulem, vi-
A. C. 168. tandæ suspicionis caussa, certiolem fecit.

Classis
Persei.

XXVIII. Perseus, post reditum ab Eumene Ero-
pontis spe dejectus, Antenorem et Callippum præ-
fectos classis cum quadraginta lembis (adjectæ ad
hunc numerum quinque pristæ erant) Tenedum
mittit; ut inde sparsæ per Cycladas insulas naves,
Macedoniam cum frumento petentes, tutarentur.
Cassandreæ deductæ naves in portus primum, qui
sub Atho monte sunt, inde Tenedum placido mari
quum trajecissent, stantes in portu Rhodias apertas
naves Eudamumque præfectum earum, inviolatas,
atque etiam benigne adpellatos dimiserunt. Cogni-
to deinde, in latere altero quinquaginta onerarias
suarum, stantibus in ostio portus Eumenis rostratis,
quibus Damius præerat, inclusas esse; circumvecti
propere, ac submotis terrore hostium navibus, one-
rarias, datis, qui prosequerentur, decem lembis, in
Macedoniam mittunt: ita ut in tutum persecuti
redirent Tenedum. Nono post die ad classem, jam
ad Sigeum stantem, redierunt. Inde Subota (insula
est interjecta Elææ et Atho) trajiciunt. Forte po-
stero die, quam Subota classis tenuit, quinque et
triginta naves, quas hippagogos vocant, ab Elææ
profectæ cum equitibus Gallis equisque, Phanas pro-
montorium Chiorum petebant, unde transmittere in
Macedoniam possent. Attalo ab Eumene mitteban-
tur. Has naves per altum ferri quum ex specula
signum datum Antenori esset, profectus a Subotis,
inter Erythrarum promontorium Chiumque, qua
artissimum fretum est, iis obcurrit. Nihil minus
credere præfecti Eumenis, quam Macedonum clas-
sem in illo vagari mari: nunc Romanos esse, nunc

Attalum, aut remissos aliquos ab Attalo ex castris Romanis Pergamum petere. Sed quum jam adpropinquantium forma lemborum haud dubia esset, et concitatio remorum, directæque in se proræ, hostes adpropinquare aperuissent; tunc injecta trepidatio est, quum resistendi spes nulla esset, inhabilique navium genere, et Gallis vix quietem ferentibus in mari. Pars eorum, qui propiores continenti litori erant, in Erythræam enarunt: pars, velis datis, ad Chium naves ejecere, relictisque equis, effusa fuga urbem petebant. Sed, propius urbem lembi accessuque commodiore quum exposuissent armatos, partim in via fugientes Gallos adepti Macedones ceciderunt, partim ante portam exclusos: clauserant enim Chii portam, ignari, qui fugerent, aut sequerentur. Octingenti ferme Gallorum occisi, ducenti vivi capti: equi, pars in mari, fractis navibus, absumti; partim nervos subciderunt in litore Macedones: viginti eximiæ equos formæ cum captivis eisdem decem lembos, quos ante miserat, Antenor devehere Thessalonicam jussit, et primo quoque tempore ad classem reverti: Phanis se eos expectaturum. Triduum ferme classis ad urbem stetit. Phanas inde progressi sunt, et, spe celerius reversis decem lembis, evecti Ægeo mari Delum trajecerunt.

XXIX. Dum hæc geruntur, legati Romani, C. Popillius, et C. Decimius, et C. Hostilius, a Chalcide profecti, tribus quinquereuib; Delum quum venissent, lembos ibi Macedonum quadraginta, et quinque regis Eumenis quinquereuib; invenerunt. Sanctitas templi insulæque inviolatos præstabat omnes. Itaque permixti Romanique et Macedones et Eumenis navales socii in templo, inducias religione loci

U. C. 584. præbente, versabantur. Antenor, Persei præfectus,
 A. C. 168. quum aliquas alto præferri onerarias naves ex speculis significatum foret, parte lemborum ipse insequens, parte per Cycladas disposita, præterquam si quæ Macedoniam peterent, omnes aut subprimebat, aut spoliabat naves : quibus poterat, Popillius aut Eumenis naves subcurrebat : sed vecti nocte binis aut ternis plerumque lembis Macedones fallebant. Per id fere tempus legati Macedones Illyriique simul Rhodum venerunt, quibus auctoritatem addidit non lemborum modo adventus, passim per Cycladas atque Ægæum vagantium mare, sed etiam conjunctio ipsa regum Persei Gentiique, et fama cum magno numero peditum equitumque venientium Gallorum. Et jam quum accessissent animi Dinoni ac Polyarato, qui Persei partium erant, non benigne modo responsum regibus est, sed palam pronunciatum, *bello finem se auctoritate sua inposituros esse : itaque ipsi quoque reges æquos adhiberent animos ad pacem accipiendam.*

Gentius
 ab Anicio
 victus.

XXX. Jam veris principium erat, novique duces in provinciam venerant ; consul Æmilius in Macedoniam, Octavius Oreum ad classem, Anicius in Illyricum, cui bellandum adversus Gentium. Patre Pleurato rege Illyriorum et matre Eurydica genitus fratres duos, Platorem utroque parente, Caravantium matre eadem natum, habuit. Hoc propter ignobilitatem paternam minus suspecto, Platorem occidit et duos amicos ejus, Ettritum et Epicadum, inpigros viros, quo tutius regnaret. Fama fuit, Honuni Dardanorum principis filiam Etutam pacto fratri cum invidisse, tamquam his nuptiis adjungenti sibi Dardanorum gentem : et similis id vero fecit ducta ea virgo, Platore interfecto. Gravis deinde,

demto fratris metu, popularibus esse cœpit : et violentiam insitam ingenio intemperantia vini accendebat. Ceterum, sicut ante dictum est, ad Romanum incitatus bellum, Lissum omnes copias contraxit : quindecim millia armatorum fuerunt. Inde, fratre in Caviorum gentem, vi aut terrore subigendam, cum mille peditibus et quinquaginta equitibus misso, ipse ad Bassaniam urbem quinque millia ab Lisso ducit. Socii erant Romanorum : itaque per missos nuncios prius tentati, obsidionem pati, quam dedere sese, maluerunt. Caravantium in Caviis Durnium oppidum advenientem benigne accepit : Caravantis altera urbs exclusit : et, quum agros eorum effuse vastaret, aliquot palati milites agrestium concursu interfecti sunt. Jam et Ap. Claudius, adsumtis ad eum exercitum, quem habebat, Bullinorum, et Apolloniatium, et Dyrrachinorum auxiliis, profectus ex libernis, circa Genusuum amnem castra habebat ; audito fœdere inter Persea et Gentium, et legatorum violatorum injuria accensus, bellum haud dubie adversus eum gesturus. Anicius prætor, eo tempore Apolloniæ auditis, quæ in Illyrico gererentur, præmissisque ad Appium literis, ut se ad Genusuum obperiretur, triduo et ipse in castra venit : et ad ea, quæ habebat, auxilia adsumtis Parthinorum juventutis duobus millibus peditum et equitibus ducentis, (peditibus Epicadus, equitibus Algalsus præerat) parabat ducere in Illyricum, maxime ut Bassanitas solveret obsidione. Tenuit inpetum ejus fama lemborum vastantium maritimam oram. Octoginta erant lembi, auctore Pantaucho missi a Gentio ad Dyrrachinorum et Apolloniatium agros populandos. Tum classis ad

U. C. 584.

A. C. 168.

*

*

*

*

to eo, tradiderunt se.

XXXI. Deinceps et urbes regionis ejus idem faciebant, adjuvante inclinationem animorum clementia in omnes et justitia prætoris Romani. Ad Scodram inde ventum est, id quod belli caput fuerat; non eo solum, quod Gentius eam sibi ceperat velut regni totius arcem, sed etiam quod Labeatium gentis munitissima longe est et difficilis aditu. Duo cingunt eam flumina, Clausala latere urbis, quod in orientem patet, præfluens, Barbana ab regione occidentis, ex Labeatide palude oriens: hi duo amnes confluentes incidunt Oriundi flumini; quod, ortum ex monte Scodro, multis et aliis auctum aquis, mari Hadriatico infertur. Mons Scodrus, longe altissimus regionis ejus, ab oriente Dardaniam subjectam habet, a meridie Macedoniam, ab occasu Illyricum. Quamquam munitum situ naturali oppidum erat, gensque id tota Illyriorum et rex ipse tuebatur, tamen prætor Romanus, quia prima successerant prospere, fortunam totius rei principia secuturam esse ratus, et repentinum valiturum terrorem, instructo exercitu ad mœnia succedit. Quod si clausis portis muros portarumque turres, dispositis armatis, defendissent, vano cum incepto mœnibus pepulissent Romanos: nunc, porta egressi, prælium loco æquo majore animo commiserunt, quam sustinuerunt. Pulsi enim et fuga globati, quum ducenti amplius in ipsis faucibus portæ cecidissent, tantum intulerunt terrorem, ut oratores extemplo ad prætorem mitteret Gentius Teuticum et Bellum, principes gentis, per quos inducias peteret, ut deliberare de statu rerum suarum posset. Triduo in hoc dato, quum castra

Romana quingentos ferme passus ab urbe abessent, U. C. 584.
A. C. 169.
navem conscendit, et flumine Barbana navigat in
lacum Labeatum, velut secretum locum petens ad
consultandum; sed, ut adparuit, falsa spe excitus,
Caravantium fratrem, multis millibus armatorum
actis ex ea regione, in quam missus erat, adventare:
qui postquam evanuit rumor, tertio post die navem
eamdem secundo amni Scodram demisit: præmissis-
que nunciis, ut sibi adpellandi prætoris potestas fie-
ret, copia facta, in castra venit. Et principium ora- Gentius
se dedit.
tionis ab accusatione stultitiæ orsus suæ, postremo
ad preces lacrimasque effusus, genibus prætoris ac-
cidens, in potestatem sese dedit. Primo, bonum
animum habere jussus, ad cœnam etiam invitatus,
in urbem ad suos rediit, et cum prætore eo die ho-
norifice est epulatus: deinde in custodiam C. Cassio
tribuno militum traditus, vix gladiatorio accepto
decem talentis ab rege rex, ut in eam fortunam
recideret.

XXXII. Anicius, Scodra recepta, nihil prius,
quam requisitos Petillium Perpernamque legatos ad
se duci, jussit: quibus splendore suo restituto, Per-
pernam extemplo mittit ad comprehendendos ami-
cos cognatosque regis: qui, Medeonem, Labeatum
gentis urbem, profectus, Etlevam uxorem cum filiis
duobus, Scerdilædo Pleuratoque, et Caravantium
fratrem Scodram in castra adduxit. Anicius, bello
Illyrio intra triginta dies perfecto, nuncium victoriæ
Perpernam Romam misit: et post dies paucos Gen-
tium regem ipsum cum parente, conjuge, ac liberis,
ac fratre, aliisque principibus Illyriorum. Hoc
unum bellum prius perpetratum, quam cœptum,
Romæ auditum est. Quibus diebus hæc agebantur,

U. C. 584. Perseus quoque in magno terrore erat, propter ad-
 A. C. 168. ventum simul Æmilii novi consulis, quem cum in-
 gentibus minis adventare audiebat, simul Octavii
 prætoris. Nec minus terroris a classe Romana et
 periculo maritimæ oræ habebat. Thessalonicæ
 Eumenes et Athenagoras præerant cum parvo præ-
 sidio duorum millium cætratorum. Eo et Andro-
 clem præfectum mittit, jussum sub ipsis navalibus
 castra habere. Æniam mille equites cum Antigono
 misit ad tutandam maritimam oram: ut, quocumque
 litore adplicuisse naves hostium audissent, extemplo
 ferrent agrestibus opem: quinque millia Macedo-
 num missa ad præsidium Pythii et Petrachæ, quibus
 præpositi erant Histæus, et Theogenes, et Milo.
 His profectis, ripam munire Enipei fluminis ad-
 gressus est, quia sicco alveo transiri poterat. Huic
 ut omnis multitudo vacaret, feminæ, ex propinquis
 urbibus coactæ, cibaria in castra adferebant: miles
 jussus ex propinquis silvis

Perseus ri-
 pam Enipei
 munit.

* * * *

XXXIII. * * *. postremo sequi se utrarios ad
 mare, quod minus trecentos passus aberat, jussit,
 et in litore alios alibi modicis intervallis fodere:
 montes ingentis altitudinis spem faciebant, eo magis
 quia nullos apertos evergerent rivos, occultos conti-
 nere latices, quorum venæ in mare permanentes
 undæ miscerentur. Vix deducta summa arena erat,
 quum scaturigines turbidæ primo et tenues emicare,
 dein liquidam multamque fundere aquam, velut
 Deum dono, cœperunt. Aliquantum ea quoque res
 duci famæ et auctoritatis apud milites adjecit. Jus-
 sis deinde militibus expedire arma, ipse cum tribunis
 primisque ordinibus vadit ad contemplandos trans-

itus; qua descensus facilis armatis, qua in ulte-
riorem ripam minime iniquus adscensus esset. His <sup>U. C. 584.
A. C. 166.</sup> satis exploratis, illa quoque primum, ut ordine ac
sine tumultu omnia in agmine ad nutum imperium-
que ducis fierent, providit. Ubi omnibus simul
pronunciaretur, quod fieret, neque omnes exaudi-
rent; incerto imperio accepto, alios, ab se adjicien-
tes, plus eo, quod imperatum sit, alios minus facere:
clamores deinde dissonos oriri omnibus locis, et
prius hostes, quam ipsos, quid paretur, scire. Pla-
cere igitur, tribunum militum primo pilo legionis
secretum edere imperium: illum, et dein singulos,
proximo cuique in ordine centurioni dicere, quid
opus facto sit; sive a primis signis ad novissimum
agmen, sive ab extremis ad primos perferendum im-
perium sit. Vigiles etiam novo more scutum in vi-
giliam ferre vetuit: non enim in pugnam vigilem
ire, ut armis utatur, sed ad vigilandum, ut, quum
senserit hostium adventum, recipiat se, excitetque
ad arma alios. Scuto præ se erecto stare galeatos:
deinde ubi fessi sint, innisos pilo, capite super mar-
ginem scuti posito, sopitos stare: ut fulgentibus
armis procul conspici ab hoste possint, ipsi nihil
provideant. Stationum quoque morem mutavit:
armati omnes, et frenatis equis equites, diem totum
perstabant: id quum æstivis diebus, urente adsiduo
sole, fieret, tot horarum æstu et languore ipsos
equosque fessos integri sæpe adorti hostes, vel pauci
plures vexabant: itaque ex matutina statione ad
meridiem decedi, et in postmeridianam succedere
alios jussit: ita numquam fatigatos recens hostis
adgredi poterat.

U. C. 584.

A. C. 168.

Oratio
Æmilii ad
milites.Fervet in
castris
opus.

XXXIV. Hæc quum ita fieri placere, concione advocata, pronunciasset, adjecit urbanæ concioni convenientem orationem. *Unum imperatorem in exercitu providere et consulere, quid agendum sit, debere, nunc per se, nunc cum iis, quos advocaverit in consilium : qui non sint advocati, eos nec palam, nec secreto jactare consilia sua. Militem hæc tria curare debere, corpus ut quam validissimum et perniciosissimum habeat, arma apta, cibum paratum ad subita imperia : cetera scire de se Diis immortalibus et imperatori suo curæ esse. In quo exercitu milites, consul, et imperator rumoribus vulgi circumagatur, ibi nihil salutare esse. Se, quod sit officium imperatoris, provisurum, ut bene gerendæ rei occasionem eis præbeat : illos nihil, quod futurum sit, quærere : ubi datum signum sit, tum militarem operam navare. Ab his præceptis concionem dimisit ; vulgo etiam veteranis fatentibus, se illo primum die, tamquam tirones, quid agendum esset in re militari, didicisse. Non sermonibus tantum his, cum quanto adsensu audissent verba consulis, ostenderunt ; sed rerum præsens effectus erat. Neminem totis mox castris quietum videres : acuere alii gladios : alii galeas bucculasque, scuta alii loricasque tergere : alii aptare corpori arma, experiri que sub his membrorum agilitatem : quater alii pila, alii micare gladiis, mucronemque intueri : ut facile quis cerneret, ubi primum conserendi manum cum hoste data occasio esset, aut victoria egregia, aut morte memorabili inituros bellum. Perseus quoque quum, adventu consulis simul et veris principio, strepere omnia moverique apud hostes, velut novo bello, cerneret, mota a Phila castra in adversa*

ripa posita, nunc ad contemplanda opera sua circumire ducem, haud dubie transitus speculantem,

U. C. 584.
A. C. 168.

* * * *

norum esse.

XXXV. Quæ res Romanis auxit animos, Macedonibus regique eorum haud mediocrem adtulit terrorem. Et primo subprimere in occulto famam ejus rei est conatus, missis, qui Pantauchum inde venientem adpropinquare castris vetarent: sed jam et pueri quidam visi ab suis erant inter obsides Illyrios ducti: et, quo quæque adcuratius curantur, eo facilius loquacitate regionum ministrorum emanant.

Sub idem tempus Rhodii legati in castra venerunt cum iisdem de pace mandatis, quæ Romæ ingentem iram Patrum excitavere. Multo iniquioribus animis a castrensi consilio auditi sunt. Itaque quum alii præcipites sine responso * agendos castris, pronun-

Rhodii legati in castra veniunt.

ciavit, post diem quintumdecimum se responsum daturum. Interim, ut adpareret, quantum pacificantium Rhodiorum auctoritas valuisset, consultare de

ratione belli gerendi cœpit. Placebat quibusdam, et maxime majoribus natu, per Enipei ripam munitionesque vim facere: *confertis et vim facientibus*

Consilia de bello.

resistere Macedonas non posse: ex tot castellis aliquanto altioribus ac munitioribus, quæ validis præsedibus insedissent, priore anno dejectos: aliis placebat, Octavianum cum classe Thessalonicam petere, et populatione maritimæ oræ dstringere copias regias: ut, altero ab tergo se ostendente bello, circumactus ad interiorum partem regni tuendam, nudare aliqua parte transitus Enipei cogeretur. Ipsi natura et operibus inexcussibilis ripa videbatur: et, præterquam quod tormenta ubique disposita essent, missi-

U. C. 584. libus etiam melius et certiore ictu hostes uti audierat.

A. C. 168. Alio spectabat mens tota ducis : dimissoque consilio Perrhæbos mercatores, Schœnum et Menophilum, notæ et fidei jam sibi et prudentiæ homines, arcessitos secreto percunctatur, quales ad Perrhæbiam transitus sint. Quum loca non iniqua esse dicerent, præsidiiis autem regis obsideri, spem cepit, si nocte inproviso valida manu adgressus necopinantes esset, dejici præsidia posse. *Jacula enim et sagittas et cetera missilia in tenebris, ubi, quid petatur, procul provideri nequeat, inutilia esse : gladio cominus geri rem*

Nasica mittitur ad Pythium.

in permixta turba, quo miles Romanus vincat. His ducibus usus, prætorem Octavium arcessitum, exposito, quid pararet, Heracleum cum classe petere jubet, et mille hominibus decem dierum cocta cibaria habere. Ipse P. Scipionem Nasicam, Q. Fabium Maximum filium suum cum quinque delectis millibus Heracleum mittit, velut classem consensuros ad maritimam oram interioris Macedoniæ, quod in consilio agitatum erat, vastandam. Secreto indicatum, cibaria his præparata ad classem esse, ne quid eos moraretur. Inde jussi duces itineris ita dividere viam, ut quarta vigilia tertio die Pythium adoriri possent. Ipse postero die, ut distineret regem ab circumspectu rerum aliarum, prima luce medio in alveo cum stationibus hostium prælium commisit : pugnatumque utrimque est levi armatura : nec gravioribus armis in tam inæquali alveo pugnari poterat. Descensus ripæ utriusque in alveum trecentorum ferme passuum erat : medium spatium torrentis, alibi aliter cavati, paullo plus quam mille passus patebat. Ibi in medio, spectantibus utrimque ex vallo castrorum hinc rege, hinc consule cum

Prælia in alveo Eniper.

suis legionibus, pugnatum est. Missilibus procul ^{U. C. 584.}
 regia auxilia melius pugnabant; cominus stabilior ^{A. C. 168.}
 et tutior, aut parma, aut scuto Ligustino, Romanus erat. Meridie fere receptui cani suis consul jussit: ita eo die diremtum prœlium est, haud paucis utrimque interfectis. Sole orto postero die, irritatis certamine animis, etiam acrius concursum est: sed Romani, non ab his tantum, cum quibus contractum certamen erat, sed multo magis ab ea multitudine, quæ disposita in turribus stabat, omni genere missilium telorum ac saxis maxime vulnerabantur. Ubi propius ripam hostium subissent, tormentis missa etiam ad ultimos perveniebant. Multo pluribus eo die amissis, consul paullo serius recepit suos. Tertio die prœlio abstinuit, degressus ad imam partem castrorum, veluti per devexum in mare brachium transitum tentaturus. Perseus, quod in oculis erat,

* * * *

XXXVI. * * * anni post circumactum solstitium ^{Æmilii}
 erat; hora diei jam ad meridiem vergebat; iter ^{cunctatio.}
 multo pulvere et incalescente sole factum erat: lassitudo et sitis jam sentiebatur, et, meridie instante, magis accessurum utrumque adparebat. Statuit sic adfectos recenti atque integro hosti non objicere. Sed tantus ardor in animis ad dimicandum utrimque erat, ut consuli non minore arte ad suos eludendos, quam ad hostes, opus esset. Nondum omnibus instructis, instabat tribunis militum, ut maturarent instruere: circumibat ipse ordines, animos militum hortando in pugnam accendebat. Ibi primo alacres signum poscebant: deinde, quantum incre-

U. C. 584. ceret æstus, et vultus minus vigentes et voces seg-

A. C. 168. niores erant, et quidam incumbentes scutis, nisque pilis stabant. Tum jam aperte primis ordinibus imperat, metarentur frontem castrorum, et inpedimenta constituerent. Quod ubi fieri milites sensere, alii gaudere palam, quod fessos viæ labore flagrantissimo æstu non coëgisset pugnare : legati circa imperatorem ducesque externi erant, inter quos et Attalus, omnes adprobantes, quum pugnaturum consulem credebant : neque enim ne his cunctationem aperuerat suam : tunc mutatione consilii subita quum alii silerent, Nasica unus ex omnibus ausus est monere consulem, *Ne hostem quidem ludificatos priores imperatores, fugiendo certamen, manibus emittere. Vereri, ne nocte abeat, sequendus maximo labore ac periculo in intima Macedoniæ ; exercitusque, sicut prioribus ducibus, per calles saltusque Macedonicorum montium vagando circumagatur. Se magnopere suadere, dum in campo patenti hostem habeat, adgredia-tur, nec oblatam occasionem vincendi amittat.* Consul, nihil obfensus libera admonitione tam clari adolescentis, *Et ego, inquit, animum istum habui, Nasica, quem tu nunc habes : et, quem ego nunc habeo, tu habebis. Multis belli casibus didici, quando pugnandum, quando abstinendum pugna sit. Non operæ sit stanti nunc in acie docere, quibus de caussis hodie quiesse melius sit : rationes alias reposcito : nunc auctoritate re-teris imperatoris contentus eris.* Conticuit adolescens ; haud dubie videre aliqua inpedimenta pugnae consulem, quæ sibi non adparerent.

Nasicæ
conloqui-
um cum
Paullo.

XXXVII. Paullus, postquam metata castra inpedimentaue conlocata animadvertit, ex postrema

acie triarios primos subducit : deinde principes, stan- U. C. 584.
A. C. 168.
tibus in prima acie hastatis, si quid hostis moveret :

postremo hastatos, ab dextro primum cornu singu-
lorum paullatim signorum milites subtrahens. Ita
pedites, equitibus cum levi armatura ante aciem hosti
obpositis, sine tumultu abducti : nec ante, quam
prima frons valli ac fossa perducta est, ex statione
equites revocati sunt. Rex quoque, quum sine de-

tractatione paratus pugnare eo die fuisset, contentus,
quod per hostem moram fuisse pugnae scirent, et
ipse in castra copias reduxit. Castris permunitis,
C. Sulpicius Gallus tribunus militum secundae legio-
nis, qui praetor superiore anno fuerat, consulis per-
missu ad concionem militibus vocatis pronunciavit,

nocte proxima, ne quis id pro portento acciperet, ab Eclipsis lu-
nae præ-
dicta a
Sulpicio.
hora secunda usque ad quartam horam noctis lunam
defecturam esse. Id, quia naturali ordine statis tem-

poribus fiat, et sciri ante et praedici posse. Itaque
quemadmodum, quia certi solis lunaeque et ortus et oc-
casus sint, nunc pleno orbe, nunc senescente exiguo
cornu fulgere lunam non mirarentur ; ita ne obscurari
quidem, quum condatur umbra terrae, trahere in pro-
digium debere. Nocte, quam pridie Nonas Septem-

bres insecuta est dies, edita hora luna quum defe-
cisset, Romanis militibus Galli sapientia prope di-
vina videri : Macedonas, ut triste prodigium, occa-
sum regni perniciemque gentis portendens, movit :
nec aliter vates : clamor ululatusque in castris Ma-
cedonum fuit, donec luna in suam lucem emersit.

Postero die tantus utrique ardor exercitui ad con-
currendum fuerat, ut et regem et consulem suorum
quidam, quod sine proelio discessum esset, accusa-
rent. Regi prompta defensio erat, non eo solum,

U. C. 584. quod hostis prior, aperte pugnam detractans, in
 A. C. 168. castra copias reduxisset; sed etiam, quod eo loco
 signa constituisset, quo phalanx, quam inutilem vel
 mediocris iniquitas loci efficeret, promoveri non pos-
 set. Consul ad id, quod pridie prætermisisset pug-
 nandi occasionem videbatur, et locum dedisse hosti,
 si nocte abire vellet, tunc quoque per speciem in-
 molandi terere videbatur tempus, quum luce prima
 signum propositum pugnae ad exeundum in aciem
 fuisset. Tertia demum hora, sacrificio rite perpe-
 trato, ad consilium vocavit; atque ibi, quod rei
 gerendae tempus esset, loquendo et intempestive
 consultando videbatur quibusdam extrahere: post
 sermones tamen consul orationem habuit.

Æmilii
 oratio de
 pugna di-
 lata.

XXXVIII. *P. Nasica, egregius adolescens, ex om-
 nibus unus, quibus hesterno die pugnari placuit, denu-
 davit mihi suum consilium: idem postea, ita ut trans-
 isse in sententiam meam videri posset, tacuit. Qui-
 busdam aliis absentem carpere imperatorem, quam præ-
 sentem monere, melius visum est. Et tibi, P. Nasica,
 et quicumque idem, quod tu, occultius senserunt, non
 gravabor reddere dilatae pugnae rationem. Nam tan-
 tum abest, ut me hesternæ quietis pæniteat, ut serva-
 tum a me exercitum eo consilio credam: in qua me
 opinione esse ne quis sine causa vestrum credat, reco-
 gnoscat, agetum, mecum, si videtur, quam multa pro
 hoste et adversus nos fuerint. Jam omnium primum,
 quantum numero nos præsent, neminem vestrum nec
 ante ignorasse, et hesterno die implicatam intuentes
 aciem animadvertisse, certum habeo. Ex hac nostra
 paucitate quarta pars militum præsidio inpedimentis
 relictæ erat: nec ignavissimum quemque relinqui ad
 custodiam sarcinarum scitis. Sed fuerimus omnes:*

parvum hoc tandem esse credimus, quod ex his castris, U. C. 584. in quibus hac nocte mansimus, exituri in aciem hodierno A. C. 168. aut summum crastino die, si ita videbitur, Diis bene juvantibus, sumus? Nihilne interest, utrum militem, quem neque viæ labor hodie, neque operis fatigaverit, requietum, integrum in tentorio suo arma capere jubeas, atque in aciem plenum virium, vigentem et corpore et animo educas? an longo itinere fatigatum, et onere fessum, madentem sudore, ardentibus siti faucibus, ore atque oculis repletis pulvere, torrentem meridiano sole, hosti objicias recenti, quieto, qui nulla re ante consumtas vires ad prælium adferat? Quis, pro Deum fidem! ita comparatus, vel iners atque inbellis, fortissimum virum non vicerit? Quid? quod hostes per summum otium instruxerant aciem, reparaverant animos, stabant compositi suis quisque ordinibus? nobis tunc repente trepidandum in acie instruenda erat, et incompositis concurrendum?

XXXIX. *At, Hercule, aciem quidem inconditam inordinatamque habuissemus: castra munita, provisam aquationem, tutum ad eam iter præsidii inpositis, explorata circa omnia; an nihil nostri habentes præternudum campum, in quo pugnaremus? Majores vestri castra munita portum ad omnes casus exercitus ducebant esse: unde ad pugnam exirent, quo jactati tempestate pugnae receptum haberent: ideo, quum munitæ ea sepissent, præsidio quoque valido firmabant; quod, qui castris exutus erat, etiamsi pugnando acie vicisset, pro victo haberetur. Castra sunt victori receptaculum, victo perfugium. Quam multi exercitus, quibus minus prospera pugnae fortuna fuit, intra vallum compulsi, tempore suo, interdum momento post, eruptione facta, victorem hostem pepulerunt? Patria*

U. C. 584. altera est militaris hæc sedes, vallumque pro manibus,
 A. C. 168. et tentorium suum cuique militi domus ac penates sunt.

Sine ulla sede vagi dimicassetus, ut quo victores nos reciperemus? His difficultatibus et impedimentis pugnae illud obponitur: Quid si hostis hac interposita nocte abisset, quantum rursus sequendo eo penitus in ultimam Macedoniam exhauriendum laboris erat? Ego autem, neque mansurum eum, neque in aciem copias educturum fuisse, certum habeo, si cedere hinc statuisset: quanto enim facilius abire fuit, quum procul abessemus, quam nunc, quum in cervicibus sumus? Nec falleret nos, nec interdum nec nocte abeundo. Quid autem est nobis optatius, quam ut, quorum castra, præalta fluminis ripa tuta, vallo insuper septa ac crebris turribus, obpugnare adorti sumus, eos, relictis munimentis, agmine effuso abeuntes, in patentibus campis ab tergo adoriamur? Hæ dilatæ pugnae ex hesterno die in hodiernum caussæ fuerunt. Pugnare enim et ipsi mihi placet; et ideo, quia per Enipeum amnem septa ad hostem via erat, alio saltu, dejectis hostium præsidiis, novum iter aperui; neque prius, quam debellavero, absistam.

XL. Post hanc orationem silentium fuit, partim traductis in sententiam ejus, partim verentibus nequidquam obfendere in eo, quod, utcumque prætermisum, revocari non posset. Ac ne illo ipso quidem die, aut consule, aut rege, (rege, quod nec fessos, ut pridie, ex via, neque trepidantes in acie instruenda et vixdum compositos adgressurus erat; consule, quod in novis castris non ligna, non pabulum convectum erat, ad quæ petenda ex propinquis agris magna pars militum e castris exierat) neutro imperatorum volente, Fortuna, quæ plus consiliis humanis pollet, contraxit certamen. Flumen erat

Certamen
casu con-
trahitur.

haud magnum propius hostium castris, ex quo et U. C. 584.
Macedones et Romani aquabantur, præsidiis ex utra- A. C. 168.
que ripa positis, ut id facere tuto possent. Duæ
cohortes a parte Romanorum erant, Marrucina et
Peligna; duæ turmæ Samnitium equitum, quibus
præerat M. Sergius Silus legatus: et aliud pro cas-
tris stativum erat præsidium sub C. Cluvio legato,
tres cohortes, Firmana, Vestina, Cremonensis; duæ
turmæ equitum, Placentina et Æsernina. Quum
otium ad flumen esset, neutris lacessentibus, hora
circiter quarta jumentum, e manibus curantium elap-
sum, in ulteriorem ripam effugit: quod quum per
aquam, ferme genu tenus altam, tres milites seque-
rentur, Thraces duo id jumentum ex medio alveo in
suam ripam trahentes; altero eorum occiso, recep-
toque eo jumento, ad stationem suorum se recipie-
bant. Octingentorum Thracum præsidium in hos-
tium ripa erat: ex his pauci primo, ægre passi po-
pularem in suo conspectu cæsum, ad persequendos
interfectores fluvium transgressi sunt: dein plures,
postremo omnes, et cum præsidio,

*

*

*

*

prælium ducit.

XLI. Movebat imperii majestas, gloria viri, ante
omnia ætas, quod major sexaginta annis juvenum
munia in parte præcipua laboris periculique capes-
sebat. Intervallum, quod inter cætratos et pha-
langes erat, inplevit legio, atque aciem hostium in-
terrupit. A tergo cætratis erat, frontem adversus
clipeatos habebat: aglaspides adpellabantur. Se-
cundam legionem L. Albinus consularis ducere ad-
versus leucaspidem phalangem jussus: ea media acies

U. C. 584.
A. C. 168.

Fugantur
Macedo-
nes.

hostium fuit. In dextrum cornu, unde circa fluvium commissum praelium erat, elephantes inducti, et ala sociorum: et hinc primum fuga Macedonum est orta. Nam sicut pleraque nova commenta mortalium in verbis vim habent, experiendo, quum agi, non, quemadmodum agantur, edisseri, oportet, sine ullo effectu evanescent; ita tum elephanti in acie nomen tantum sine usu fuerunt. Elephantorum impetum subsecuti sunt socii nominis Latini, pepuleruntque laevum cornu. In medio secunda legio immissa dissipavit phalangem: neque ulla evidentior causa victoriæ fuit, quam quod multa passim praelia erant, quæ fluctuantem turbarent primo, deinde disjecerunt phalangem: cujus confertæ et intentis horrentis hastis intolerabiles vires sunt. Si carptim adgrediendo circumagere immobilem longitudine et gravitate hastam cogas, confusa strue implicantur: si vero aut ab latere, aut ab tergo aliquid tumultus increpuit, ruinæ modo turbantur: sicut tum adversus catervatim incurrentes Romanos, et interrupta multifariam acie, obviam ire cogeantur; et Romani, quacumque data intervalla essent, insinuabant ordines suos. Qui, si universa acie in frontem adversus instructam phalangem concurrissent, quod Pelignis, principio pugnae incaute congressis adversus cætratos, evenit, induissent se hastis, nec confertam aciem sustinuissent.

Equitatus
integer fu-
git.

XLII. Ceterum sicut peditum passim cædes fiebant, nisi qui abjectis armis fugerunt; sic equitatus prope integer pugna excessit. Princeps fugæ rex ipse erat: jam a Pydna cum sacris alis equitum Pellam petebat; confestim Costocus sequebatur Odrysarumque equitatus: cæteræ quoque Mace-

donum alæ integris abibant ordinibus ; quia inter-^{U. C. 584.}
jecta peditum acies, cujus cædes victores tenebant,^{A. C. 168.}
inmemores fecerat sequendi equites. Diu phalanx
a fronte, a lateribus, ab tergo cæsa est : postremo,
qui ex hostium manibus elapsi erant, inermes ad
mare fugientes, quidam aquam etiam ingressi, ma-
nus ad eos, qui in classe erant, tendentes, supplici-
ter vitam orabant : et quum scaphas concurrere un-
dique ab navibus cernerent, ad excipiendos sese ve-
nire rati, ut caperent potius, quam occiderent, lon-
gius in aquam, quidam etiam natantes, progressi
sunt. Sed quum hostiliter e scaphis cæderentur,
retro, qui poterant, nando repetentes terram, in
aliam fœdiorem pestem incidebant : elephantum enim,
ab rectoribus ad litus acti, exeuntes obterebant eli-
debantque. Facile conveniebat, Romanis numquam
una acie tantum Macedonum interfectum. Cæsa
enim ad viginti millia hominum sunt : ad sex mil-
lia, qui Pydnam ex acie perfugerant, vivi in potes-
tatem pervenerunt : et vagi e fuga quinque millia
hominum capta. Ex victoribus ceciderunt non plus
centum, et eorum multo major pars Peligni : vul-
nerati aliquanto plures sunt. Quod si maturius
pugnari cœptum esset, ut satis diei victoribus ad
persequendum superesset, deletæ omnes copiæ fo-
rent : nunc imminens nox et fugientes textit, et
Romanis pigritiem ad sequendum locis ignotis fe-
cit.

XLIII. Perseus ad Piëriam silvam via militari, Regis fuga.
frequenti agmine equitum et regio comitatu, fugit.
Simul in silvam ventum est, ubi plures diversæ se-
mitæ erant, et nox adpropinquabat ; cum perpaucis
maxime fidis via divertit. Equites, sine duce relict, alii

U. C 584. alia in civitates suas dilapsi sunt : perpauci inde Pel-
 A. C. 168. lam celerius, quam ipse Perseus, quia recta expedita
 via ierant, pervenerunt. Rex ad mediam ferme noc-
 tem terrore et variis difficultatibus viæ vexatus est.
 In regia Perseo, qui Pellæ præerat, Euctus regique
 pueri præsto erant : contra ea amicorum, qui, alii
 alio casu servati, ex prælio Pellam venerant, quum
 sæpe arcessiti essent, nemo ad eum venit : tres erant
 tantum cum eo fugæ comites, Evander Cretensis,
 Neo Bœotius, et Archidamus Ætolus : cum iis, jam
 metuens, ne, qui venire ad se abnuerent, majus ali-
 quid mox auderent, quarta vigilia profugit. Secuti
 eum sunt admodum quingenti Cretenses : petebat
 Amphipolim : sed nocte a Pella exierat, properans
 ante lucem Axium amnem trajicere, eum finem
 sequendi, propter difficultatem transitus, fore ratus
 Romanis.

XLIV. Consulem, quum se in castra victor rece-
 pisset, ne sincero gaudio frueretur, cura de minore
 filio stimulabat. P. Scipio is erat, Africanus et ipse
 postea, deleta Karthagine, adpellatus, naturalis con-
 sulis Paulli, adoptione Africani nepos. Is, septi-
 mumdecimum tunc annum agens, quod ipsum curam
 augebat, dum effuse sequitur hostes, in partem aliam
 turba ablatus erat : et, serius quum redisset, tunc
 demum, recepto sospite filio, victoriæ tantæ gaudium
 consul sensit. Amphipolim quum jam fama pugnae
 pervenisset, concursusque matronarum in templum
 Dianæ, quam Tauropolon vocant, ad opem expos-
 cendam fieret ; Diodorus, qui præerat urbi, metuens,
 ne Thraces, quorum duo millia in præsidio erant,
 urbem in tumultu diriperent, ab subornato ab se per
 fallaciam in tabellarii speciem literas in foro medio

accepit. Scriptum in iis erat, *ad Emathiam classem Romanam adpulsam esse, agrosque circa vexari: orare præfectos Emathiæ, ut præsidium adversus populatores mittat.* His lectis, hortatur Thracas, *ut ad tuendam Emathiæ oram proficiscantur: magnam eos cædem prædamque, palatis passim per agros Romanis, facturos.* Simul elevat famam adversæ pugnæ: *quæ si vera foret, alium super alium recentes ex fuga venturos fuisse.* Per hanc caussam Thracibus ablegatis, simul transgressos eos Strymonem vidit, portas clausit.

U. C. 584.
A. C. 168.

XLV. Tertio die Perseus, quam pugnatum erat, Amphipolim venit: inde oratores cum caduceo ad Paullum misit. Interim Hippias, et Milo, et Pantauchus, principes amicorum regis, Berœam, quo ex acie confugerant, ipsi ad consulem profecti, Romanis dedunt: hoc idem et aliæ deinceps metu percussæ parabant facere. Consul, nunciis victoriæ Q. Fabio filio et L. Lentulo et Q. Metello cum literis Romam missis, spolia jacentis hostium exercitus peditibus concessit; equitibus prædam circumjecti agri, dum ne amplius duabus noctibus a castris abessent. Ipse propius mare ad Pydnam castra movit. Berœa primum, deinde Thessalonica, et Pella, et deinceps omnis ferme Macedonia intra biduum dedita. Pydnæi, qui proximi erant, nondum miserant legatos: multitudo incondita plurium simul gentium, turbaque, quæ ex acie fuga in unum compulsa erat, consilium et consensum civitatis inpediebat: nec clausæ modo portæ, sed etiam inædificatæ erant. Missi Milo et Pantauchus sub muros ad conloquium Solonis, qui præsidio erat: per eum emittitur militaris turba: oppidum deditum militibus datur diri-

Perseus ca-
duceatores
mittit ad
consulem.

Tota Ma-
cedonia
dedita.

U. C. 584. A. C. 168. Perseimiseranda sors. piendum. Perseus, una tantum spe Bisaltarum auxilii tentata, ad quos nequidquam miserat legatos, in concionem processit, Philippum secum filium habens: ut et ipsos Amphipolitanos, et equitum peditumque, qui aut semper secuti, aut fuga eodem delati erant, adhortando animos confirmaret. Sed aliquoties dicere incipientem quum lacrimæ præpedissent; quia ipse dicere nequii, Evandro Cretensi editis, quæ agi cum multitudine vellet, de templo descendit. Multitudo, sicut ad conspectum regis fletumque tam miserabilem et ipsa ingemuerat lacrimaveratque, ita Evandri orationem adspernabatur: et quidam ausi sunt media ex concione subclamare, *Abite hinc, ne, qui pauci supersumus, propter vos pereamus.* Horum ferocia vocem Evandri clausit. Rex in domum se recepit, pecuniaque et auro argentoque in lembos, qui in Strymone stabant, delatis, et ipse ad flumen descendit. Thraces, navibus se committere non ausi, domos dilapsi, et aliæ militaris generis turbæ: Cretenses spem pecuniæ secuti: et, quoniam in dividendo plus obfensionum, quam gratiæ, erat, quinquaginta talenta iis posita sunt in ripa diripienda. Ab hac direptione quum per tumultum naves conscenderent, lembum unum in ostio amnis multitudine gravatum merse-
 runt.

Amphipoli-
abit.

Samothra-
cam perve-
nit.

Galepsum eo die, postero Samothracam, quam petebant, perveniunt: ad duo millia talentum pervecta eo dicuntur.

XLVI. Paullus, per omnes deditas civitates dimissis, qui præessent, ne qua injuria in nova pace victis fieret, retentisque apud se caduceatoribus regis, P. Nasicam, ignarus fugæ regis, Amphipolim misit cum modica peditum equitumque manu: si-

mul ut Sinticen evastaret, et ad omnes conatus re-
 gis inpedimento esset. Inter hæc Melibœa a Cn. U. C. 584.
A. C. 168.
 Octavio capitur diripiturque : ad Æginium, ad
 quod obpugnandum Cn. Anicius legatus missus erat,
 ducenti, eruptione ex oppido facta, amissi sunt, ig-
 naris Æginiensibus debellatum esse. Consul, a Pyd-
 na profectus, cum toto exercitu die altero Pellam Consul
Pellam
venit.
 pervenit : et, quum castra mille passus inde posu-
 isset, per aliquot dies ibi stativa habuit, situm urbis
 undique adspiciens ; quam non sine caussa delectam
 esse regiam advertit. Sita est in tumulo, vergente
 in occidentem hibernum : cingunt paludes ineksu-
 perabilis altitudinis æstate et hieme, quas resta-
 gnantes faciunt lacus. In ipsa palude, qua proxima
 urbi est, velut insula eminet, aggeri operis ingentis
 inposita : qui et murum sustineat, et humore cir-
 cumfusæ paludis nihil lædatur. Muro urbis con-
 juncta procul videtur : divisa est intermurali amni,
 et eadem ponte juncta : ut nec, obpugnante ex-
 terno, aditum ab ulla parte habeat ; nec, si quem
 ibi rex includat, ullum nisi per facillimæ custodiæ
 pontem effugium. Et gaza regia in eo loco erat :
 sed tum nihil præter trecenta talenta, quæ missa
 Gentio regi, deinde retenta fuerant, inventum est.
 Per quos dies ad Pellam stativa fuerunt, legationes
 frequentes, quæ ad gratulandum convenerant, max-
 ime ex Thessalia, auditæ sunt. Nuncio deinde ac-
 cepto, Persea Samothracam trajecisse, profectus a
 Pella consul quartis castris Amphipolim pervenit.
 Effusa omnis obvia turba cuivis indicio erat, non
 bono ac justo rege orba

Deinde
Amphi-
polim.

*

*

*

*

EPITOME LIBRI XLV.

PERSEUS ab Æmilio Paulo in Samothrace captus est. Quum Antiochus, Syriæ rex, Ptolemæum et Cleopatram, Ægypti reges, obsideret, et missis ad eum a senatu legatis, qui juberent, ab obsidione socii regis absisteret, editisque mandatis consideraturum se ille, quid faciendum esset, respondisset; unus ex legatis Popullius virga regem circumscripsit: jussitque, antequam circulo excederet, responsum daret: qua asperitate effecit, ut Antiochus bellum omitteret. Legationes gratulantium populorum ac regum in senatum admissæ. Rhodiorum, quia eo bello contra populum Romanum faverant, exclusa: postero die, quum de eo quæreretur, ut iis bellum indiceretur, causam in senatu patriæ suæ legati egerunt: nec tamquam hostes, nec tamquam socii dimissi. Macedonia in provinciæ formam redacta est. Æmilius Paullus, repugnantibus militibus ejus propter minorem prædam, et contradicente Ser. Sulpicio Galba, triumphavit: et Persen cum tribus filiis ante currum duxit: cujus triumphî lætitia ne solida ei contingeret, duorum filiorum funeribus insignita est: quorum alterius mors patris triumphum præcessit, alterius secuta est. Lustrum conditum est a censoribus. Censa sunt civium capita trecenta duodecim millia, octingenta quinque. Prusias, Bithyniæ rex, Romam, ut senatui gratularetur ob victoriam ex Macedonia partam, venit; et Nicomedem filium senatui commendavit. Rex, plenus adulationis, libertum se populi Romani dicebat.

T. LIVII PATAVINI

LIBER XLV.

VICTORIÆ nuncii, Q. Fabius et L. Lentulus U. C. 584.
et Q. Metellus, quanta potuit adhiberi festina- A. C. 168.

tio, celeriter Romam quum venissent, præcerptam
tamen ejus rei lætitiā invenerunt. Quarto post Fama de
die, quam cum rege est pugnatum, quum in circo victoria
ludi fierent, murmur repente populi tota specta- Macedo-
cula pervasit; *pugnatum in Macedonia, et devictum*
regem esse. Dein fremitus increbruit: postremo cla-
mor plaususque, velut certo nuncio victoriæ adlato,
est exortus. Mirari magistratus, et quærere aucto-
rem repentinæ lætitiæ: qui postquam nullus erat,
evanuit quidem tamquam incertæ rei gaudium; omen
tamen lætum insidebat animis. Quod postquam ve-
ris nunciis Fabii Lentulique et Metelli adventu fir-
matum est, quum victoria ipsa, tum augurio animo-
rum suorum, lætabantur. Et aliter traditur circen-
sis turbæ non minus similis veri lætitiā. Ante diem
decimum Kalendas Octobres, ludorum Romanorum
secundo die, C. Licinio consuli, ad quadrigas mit-
tendas escendenti, tabellarius, qui se ex Macedonia
venire diceret, * laureatas literas dicitur: quadrigis
missis, consul currum conscendit: et, quum per cir-
cum reveheretur ad foros publicos, laureatas tabel-
las populo ostendit. Quibus conspectis, repente in-
memor spectaculi populus in medium decurrit: eo

U. C. 584. senatum consul vocavit, recitatisque tabellis, ex auctoritate Patrum pro foris publicis denunciavit populo : *L. Æmilium collegam signis conlatis cum rege Perseo pugansse. Macedonum exercitum cæsum fustumque. Regem cum paucis fugisse : civitates omnes Macedonia in ditionem populi Romani venisse. His auditis, clamor cum ingenti plausu ortus : ludis relictis, domus magna pars hominum ad conjuges liberosque lætum nuncium portabant. Tertius decimus dies erat ab eo, quo in Macedonia pugnatum est.*

Legati
Æmilii.

II. Postero die senatus in curia habitus, supplicationesque decretæ, et senatusconsultum factum est, ut consul, quos, præter milites sociosque navales, conjuratos haberet, dimitteret : de militibus sociisque navalibus dimittendis referretur, quum legati ab *L. Æmilio* consule, a quibus præmissus tabellarius esset, *. Ante diem sextum Kalendas Octobres, hora fere secunda, legati urbem ingressi sunt, ingentem secum obcurrentium, quacumque ibant, prosequentiumque trabentes turbam, in forum ad tribunal perrexerunt. Senatus forte in curia erat : eo legatos consul introduxit. Ibi tantum temporis retenti, dum exponerent, *quantæ regiæ copiæ peditum equitumque fuissent, quot millia ex his cæsa, quot capta forent ; quam paucorum militum jactura tanta hostium strages facta ; quam cum paucis rex fugisset : existimari Samothraciam petiturum, paratam classem ad persequendum esse : neque terra, neque mari elabi posse : eadem hæc paullo post in concionem traducti exposuerunt : renovataque lætitia, quum consul edixisset, ut omnes ades sacrae aperirentur, pro se quisque ex concione ad gratias agendas ire Diis ; ingen-*

tique turba, non virorum modo, sed etiam femina- U. C. 584.
rum, conferta tota urbe Deorum immortalium tem- A. C. 168.
pla. Senatus, revocatus in curiam, supplicationes,
ob rem egregie gestam ab L. Æmilio consule, in
quinque dies circa omnia pulvinaria decrevit, hos-
tiisque majoribus sacrificari jussit. Naves, quæ in
Tiberi paratæ instructæque stabant, ut, si rex posset
resistere, in Macedoniam mitterentur, subduci, et
in navalibus conlocari : socios navales, dato annuo
stipendio, dimitti, et cum his omnes, qui in consulis
verba juraverant : et quod militum Corcyræ, Brun-
disii, ad mare superum, aut in agro Larinati esset,
(omnibus his locis dispositus exercitus fuerat, cum
quo, si res posceret, C. Licinius collegæ ferret o-
pem) hos omnes milites dimitti placuit. Supplica-
tio pro concione populi indicta est, ex ante diem
quintum Idus Octobres cum eo die in quinque dies.

III. Ex Illyrico duo legati, C. Licinius Nerva et
P. Decius, nunciarunt, *exercitum Illyriorum cæsum :
Gentium regem captum, in ditione populi Romani et
Illyricum esse.* Ob eas res, gestas ductu auspicioque
L. Anicii prætoris, senatus in triduum supplicationes
decrevit, ut Latinæ edictæ a consule sunt in ante
quartum et tertium et pridie Idus Novembres. Tra-
didere quidam, legatos Rhodios, nondum missos, Legati
post victoriam nunciatam, velut ad ludibrium stoli- Rhodii lu-
dæ superbiæ, in senatum vocatos esse. Ibi Agesi- dibrio ha-
polim principem eorum ita locutum : *Missos esse le- biti.*
*gatos ab Rhodiis ad pacem inter Romanos et Persea
faciendam ; quod id bellum grave atque incommodum
Græciæ omni, sumtuosum ac damnosum ipsis Romanis
esset. Fortunam perbene fecisse, quando, finito aliter
bello, gratulandi sibi de victoria egregia Romanis op-*

U. C. 584. *portunitatem dedisset.* Hæc ab Rhodio dicta. Re-
 A. C. 168. sponsum ab senatu esse, *Rhodos nec utilitatum*
Græciæ, neque cura impensarum populi Romani, sed
pro Perseo legationem eam misisse. Nam, si ea fuisset
cura, quæ simularetur, tum mittendos legatos fuisse,
quum Perseus, in Thessaliâ exercitu inducto, per bi-
ennium Græcas urbes, alias obsideret, alias denuncia-
tione armorum terreret. Tum nullam pacis ab Rho-
 diis mentionem factam. Postquam superatos saltus
 transgressosque in Macedoniam Romanos audirent, et
 inclusum teneri Persea, tunc Rhodos legationem mi-
 sisse, non ad ullam aliam rem, quam ad Persea ex in-
 minenti periculo eripiendum : cum hoc responso le-
 gatos dimissos.

Persei
 literæ ad
 Æmilium.

IV. Per eosdem dies et M. Marcellus, ex provin-
 cia Hispania decedens, Marcolica nobili urbe capta,
 decem pondo auri, et argenti ad summam sestertii
 decies in ærarium retulit. Paullus Æmilius consul,
 quum castra, ut supra dictum est, ad Siras terræ
 Odomanticæ haberet, quum literas ab rege Perseo
 per ignobiles tres legatos cerneret, et ipse inlacri-
 masse dicitur sorti humanæ : quod, qui paullo ante,
 non contentus regno Macedoniæ, Dardanos Illyrios-
 que obpugnasset, Bastarnarum excivisset auxilia, is
 tum, amisso exercitu, extorris regno, in parvam in-
 sulam compulsus, supplex, fani religione, non viri-
 bus suis, tutus esset. Sed postquam, *Regem Persea*
consuli Paulo salutem, legit ; miserationem omnem
 stultitia ignorantis fortunam suam exemit. Itaque
 quamquam in reliqua parte literarum minime regiæ
 preces erant, tamen sine responso ac sine literis ea
 legatio dimissa est. Sensit Perseus, cujus nominis
 obliviscendum victo esset : itaque alteræ literæ cum

privati nominis titulo missæ, et petiere, et inpetra- U. C. 584.
 vere, ut aliqui ad eum mitterentur, cum quibus lo- A. C. 169.
 qui de statu et conditione suæ fortunæ posset. Missi
 sunt tres legati, P. Lentulus, A. Postumius Albinus,
 A. Antonius. Nihil ea legatione perfectum est, Per-
 seo regium nomen omni vi amplectente, Paulo, ut
 se suaque omnia in fidem et clementiam populi Ro-
 mani permetteret, contendente.

V. Dum hæc aguntur, classis Cn. Octavii Samo-
 thracam est adpulsa. Is quoque, præsentī admoto
 terrore, modo minis, modo spe perlicere, ut se tra-
 deret, quum conaretur; adjuvit in hoc eum res, seu
 casu contracta, seu consilio. L. Atilius inlustris
 adolescens, quum in concione esse populum Samo-
 thracum animum advertisset, a magistratibus petiit,
 ut sibi paucis adloquendi populi potestatem facerent.
 Permisso, *Utrum nos, hospites Samothraces, vere ac-*
cepimus, an falso, sacram hanc insulam, et augusti to-
tam atque inviolati soli esse? Quum creditæ sanctitati
 adsentirentur omnes, *Cur igitur, inquit, pollutam ho-*
micida sanguine regis Eumenis violavit? et, quum om-
 nis præfatio sacrorum eos, quibus non sint puræ manus,
 sacris arceat, *vos penetralia vestra contaminari cruento*
latronis corpore sinetis? Nobilis fama erat, apud om-
 nes Græciæ civitates, Eumenis regis per Evandrum
 Delphis prope perpetrata cædes. Itaque, præter-
 quam quod in potestate Romanorum sese insulam-
 que totam et templum cernebant esse, ne inmerito
 quidem ea sibi exprobrari rati, Theondam, qui sum-
 mus magistratus apud eos erat, (regem ipsi adpel-
 lant) ad Persea mittunt, qui nunciaret, *Argui cædis*
Evandrum Cretensem: esse autem judicia apud sese
more majorum comparata de iis, qui incestas manus in-

U. C. 584. *tulisse intra terminos sacratos templi dicantur. Si*
 A. C. 168.

confideret Evander, innoxium se rei capitalis argui, veniret ad causam dicendam: si committere se iudicio non auderet, liberaret religione templum, ac sibimet ipse consuleret. Perseus, evocato Evandro, iudicium subeundi nullo pacto auctor esse: nec causa, nec gratia parem fore. Suberat et ille metus, ne damnatus auctorem se nefandi facinoris protraheret: reliqui quid esset, nisi ut fortiter moriatur? Nihil palam abnuere Evander: sed quum, veneno se malle mori, quam ferro, dixisset; occulte fugam parabat: quod quum renunciatum regi esset, metuens, ne, tamquam a se subtracto pœnæ reo, iram Samothracum in se converteret, interfici Evandrum iussit. Qua perpetrata temere cæde, subiit extemplo animum, in se nimirum receptam labem, quæ Evandri fuisset: ab illo Delphis vulneratum Eumenem, ab se Samothracæ Evandrum occisum: ita duo sanctissima in terris templa, se uno auctore, sanguine humano violata. Hujus rei crimen, corrupto pecunia Theonda, avertitur, ut renunciaret populo, Evandrum sibi ipsum mortem conscisse.

Evander
Cretensis
occisus a
Perseo.

VI. Ceterum tanto facinore in unicum relictum amicum, ab ipso per tot casus expertum, proditumque, quia non prodiderat, omnium ab se abalienavit animos. Pro se quisque transire ad Romanos: fugæque consilium capere solum prope relictum cogerunt: Oroandemque Cretensem, cui nota Thraciæ ora erat, quia mercaturas in ea regione fecerat, adpellat, ut se sublatum in lembum ad Cotym devehret. Demetrium est portus in promontorio quodam Samothracæ: ibi lembus stabat. Sub occasum solis deferuntur, quæ ad usum necessaria erant: de-

fertur et pecunia, quanta clam deferri poterat. Rex ^{U. C. 584.}
 ipse nocte media, cum tribus consciis fugæ, per pos- ^{A. C. 168.}
 ticum ædium in propinquum cubiculo hortum, atque
 inde, maceriam ægre transgressus, ad mare pervenit.
 Oroandes jam tum, dum pecunia deferretur, primis
 tenebris solverat navem, ac per altum Cretam pete-
 bat. Postquam in portu navis non inventa est, va-
 gatus Perseus aliquamdiu in litore, postremo timens
 lucem jam adpropinquantem, in hospitium redire
 non ausus, in latere templi prope angulum obscu-
 rum delituit. Pueri regii apud Macedonas vocaban-
 tur principum liberi, ad ministerium electi regis : ea
 cohors, persecuta regem fugientem, ne tum quidem
 abscedebat, donec jussu Cn. Octavii pronunciatum
 est per præconem, *Regios pueros Macedonasque alios,*
qui Samothracæ essent, si transirent ad Romanos, in-
columitatem, libertatemque et sua omnia servaturos,
quæ aut secum haberent, aut in Macedonia reliquissent.
 Ad hanc vocem transitio omnium facta est, nomina-
 que dabant ad C. Postumium tribunum militum.
 Liberos quoque parvos regios Ion Thessalonicensis
 Octavio tradidit : nec quisquam, præter Philippum,
 maximum natu e filiis, cum rege relictus. Tum sese
 filiumque Octavio tradidit ; fortunam Deosque, quo-
 rum in templo erant, nulla ope supplicem juvantes,
 accusans. In prætoriam navem inponi jussus : eo-
 dem et pecunia, quæ superfuit, delata est : extem- ^{Tradit se}
 ploque classis Amphipolim repetit. Inde Octavius ^{Romanis.}
 regem in castra ad consulem misit, præmissis literis,
 ut in potestate eum esse et adduci sciret.

VII. Secundam eam Paullus, sicut erat, victoriam
 ratus, victimas cecidit eo nuncio ; et, consilio ad-
 vocato, literas prætoris quum recitasset, Q. Ælium

U. C. 584. A. C. 168. Tuberonem obviam regi misit: ceteros manere in prætorio frequentes jussit. Non alias ad ullum spectaculum tanta multitudo occurrit. Patrum ætate Syphax rex captus in castra Romana adductus erat: præterquam quod nec sua, nec gentis fama comparandus, tunc quoque accessio Punici belli fuerat, sicut Gentius Macedonici. Perseus caput belli erat: nec ipsius tantum, patris avique, quos sanguine ac genere contingebat, fama conspectum eum efficiebat, sed effulgebant Philippus ac Magnus Alexander, qui summum imperium in orbe terrarum Macedonum fecerant. Pullo amictus illo Perseus ingressus est castra, nullo suorum alio comite, qui socius calamitatis miserabiliorem eum faceret: progredi præ turba obcurrentium ad spectaculum non poterat, donec consul lictores misisset, qui submovendo iter ad prætorium facerent. Consurrexit consul, et, jussis sedere aliis, progressusque paullum, introëunti regi dextram porrexit: submittentemque se ad pedes sustulit: nec adtingere genua passus, introductum in tabernaculum adversus advocatos in consilium considerare jussit.

VIII. Prima percontatio fuit, *qua subactus injuria contra populum Romanum bellum tam infesto animo suscepisset; quo se regnumque suum ad ultimum discrimen adduceret?* Quum, responsum expectantibus cunctis, terram intuens, diu tacitus fleret, rursum consul: *Si juvenis regnum accepisses, minus equidem mirarer, ignorasse te, quam gravis aut amicus, aut inimicus esset populus Romanus: nunc vero, quum et bello patris tui, quod nobiscum gessit, interfuisses, et pacis postea, quam cum summa fide adversus eum coluimus, meminisses, quod consilium, quorum et vim bello,*

et fidem in pace expertus esses, cum iis tibi bellum esse, U. C. 584. quam pacem, malle? Nec interrogatus, nec accusa- A. C. 168. tus quum responderet; Utcumque tamen hæc, sive errore humano, seu casu, seu necessitate inciderunt, bonum animum habe: multorum regum, populorum casibus cognita populi Romani clementia non modo spem tibi, sed prope certam fiduciam salutis, præbet. Hæc Græco sermone Perseo: Latine deinde suis, Exemplum insigne cernitis, inquit, mutationis rerum humanarum. Vobis hoc præcipue dico, juvenes: ideo in secundis rebus nihil in quemquam superbe ac violenter consulere decet, nec præsentī credere fortunæ; quum, quid vesper ferat, incertum sit. Is demum vir erit, cujus animum nec prospera flatu suo efferet, nec adversa infringet. Consilio dimisso, tuendi cura regis Q. Ælio mandatur. Eo die et invitatus ad consulem Perseus, et alius omnis ei honos habitus est, qui haberi in tali fortuna poterat.

IX. Exercitus deinde in hiberna dimissus est: ^{Regni} maximam partem copiarum Amphipolis, reliquas ^{Macedo-} propinquæ urbes acceperunt. Hic ^{nici finis.} finis belli, quum quadriennium continuum bellatum esset, inter Romanos ac Persea fuit: idemque finis incliti per Europæ plerumque atque Asiæ omnem regni. Vice-simum ab Carano, qui primus regnavit, Persea numerabant. Perseus, Q. Fulvio, L. Manlio consulibus, regnum accepit: a senatu rex est adpellatus, M. Junio, A. Manlio consulibus: regnavit undecim annos. Macedonum obscura admodum fama usque ad Philippum Amyntæ filium fuit: inde ac per eum crescere quum cœpisset, Europæ se tamen finibus continuit, Græciam omnem et partem Thraciæ atque Illyrici amplexa. Superfudit deinde se in Asi-

U. C. 584. am : et tredecim annis, quibus Alexander regnavit,
 A. C. 168. primum omnia, qua Persarum prope inmenso spatio
 imperium fuerat, suæ ditionis fecit. Arabas hinc
 Indiamque, qua terrarum ultimus finis Rubrum mare
 amplectitur, peragravit. Tum maximum in terris
 Macedonum regnum nomenque : inde morte Alex-
 andri distractum in multa regna, dum ad se quisque
 opes rapiunt, lacerantes viribus : a summo culmine
 fortunæ ad ultimum finem centum quinquaginta an-
 nos stetit.

X. Victoriæ Romanæ fama quum pervasisset in
 Asiam, Antenor, qui cum classe lemborum ad Pha-
 nas stabat, Cassandriam inde trajecit. C. Popillius,
 qui ad Delum præsidio navibus Macedoniam peten-
 tibus erat, postquam debellatum in Macedonia, et
 statione submotos hostium lembos audivit, dimissis
 et ipse Atticis navibus, ad susceptam legationem
 peragendam navigare Ægyptum pergit : ut prius
 obcurrere Antiocho posset, quam ad Alexandreæ
 mœnia accederet. Quum præterveherentur Asiam
 legati, et Loryma venissent, qui portus viginti paul-
 lo amplius millia ab Rhodo abest, ex adverso urbi
 ipsi positus ; principes Rhodiorum obcurrunt (jam
 enim eo quoque victoriæ fama perlata erat) orantes,
ut Rhodum deveherentur : pertinere id ad famam sa-
lutemque civitatis, noscere ipsos omnia, quæ acta essent,
agerenturque Rhodi, et comperta per se, non vulgata
fama, Romam referre. Diu negantes perpulerunt,
 ut moram navigationis brevem pro salute sociæ urbis
 paterentur. Postquam Rhodum ventum est, in con-
 cionem quoque eos iidem precibus pertraxerunt.
 Adventus legatorum auxit potius timorem civitati,
 quam minuit : omnia enim Popillius, quæ singuli

universique eo bello hostiliter dixerant, fecerantque, U. C. 554. A. C. 168.
 retulit : et, vir asper ingenio, augebat atrocitatem
 eorum, quæ dicerentur, vultu truci et accusatoria
 voce : ut, quum propriæ simultatis nulla caussa cum
 civitate esset, ex unius senatoris Romani acerbitate,
 qualis in se universi senatus animus esset, conjecta-
 rent. C. Decimii moderatior oratio fuit, qui, *in ple-*
risque eorum, quæ commemorata a Popillio essent, cul-
pam non penes populum, sed penes paucos concitores
vulgi esse, dixit : eos, venalem linguam habentes, de-
creta plena regiæ adsentationis fecisse : et eas lega-
tiones misisse, quarum Rhodios semper non minus pu-
deret, quam pœniteret. Quæ omnia, si tamen populo
foret, in capita noxiorum versura. Cum magno ad-
 sensu auditus est, non magis eo, quod multitudinis
 noxam elevabat, quam quod culpam in auctores ver-
 terat. Itaque quum principes eorum Romanis re-
 sponderent, nequaquam tamen tam grata oratio eo-
 rum fuit, qui, quæ Popillius objecerat, diluere ut-
 cumque conati sunt ; quam eorum, qui Decimio in
 auctoribus ad piaculum noxæ objiciendis adsensi
 sunt. Decretum igitur extemplo, ut, qui pro Per-
 seo adversus Romanos dixisse quid, aut fecisse, con-
 vincerentur, capitis condemnarentur. Excesserunt
 urbe sub adventu Romanorum quidam, alii mortem
 sibi consciverunt. Legati, non ultra quam quinque
 dies Rhodi morati, Alexandriam proficiscuntur.
 Nec eo segnius judicia ex decreto coram his facto
 Rhodi exercebantur : quam perseverantiam in ex-
 sequenda re Decimii lenitas *.

Rhodio-
rum, qui
Perseo fa-
verant,
damnati.

XI. Quum hæc gererentur, Antiochus frustra
 tentatis mœnibus Alexandriæ abscesserat : cetera- Res Æ-
 que Ægypto potitus, relicto Memphi majore Ptole- gypti.

U. C. 584. mæo, cui regnum quæri suis viribus simulabat, ut
 A. C. 168. victorem mox adgrederetur, in Syriam exercitum
 abduxit. Nec hujus voluntatis ejus ignarus Ptole-
 mæus, dum conterritum obsidionis metu minorem
 fratrem haberet, posse se recipi Alexandreae, et so-
 rore adjuvante, et non repugnantibus fratris amicis,
 ratus; primum ad sororem, deinde ad fratrem ami-
 cosque ejus, non prius destitit mittere, quam pacem
 cum iis confirmaret. Suspectum Antiochum effece-
 rat, quod, cetera Ægypto sibi tradita, Pelusii vali-
 dum relictum erat præsidium: adparebat, claustra
 Ægypti teneri, ut, quum vellet, rursus exercitum
 induceret: bello intestino cum fratre eum exitum
 fore, ut victor, fessus certamine, nequaquam par
 Antiocho futurus esset. Hæc, prudenter animad-
 versa a majore, cum adsensu minor frater, quique
 cum eo erant, acceperunt: soror plurimum adjuvit,
 non consilio modo, sed etiam precibus. Itaque, con-
 sentientibus cunctis pace facta, Alexandream recipi-
 tur, ne multitudinē quidem adversante: quæ in bello,
 non per obsidionem modo, sed etiam postquam a
 mœnibus abscissum est, quia nihil ex Ægypto sub-
 vehabatur, omnium rerum adtenuata inopia erat.
 His quum lætari Antiochum conveniens esset, si re-
 ducendi ejus caussa exercitum Ægyptum induxisset,
 quo specioso titulo ad omnes Asiæ et Græciæ civi-
 tates, legationibus recipiendis literisque dimittendis,
 usus erat, adeo est offensus, ut multo acrius infes-
 tiusque adversus duos, quam ante adversus unum,
 pararet bellum. Cyprum extemplo classem misit:
 ipse, primo vere cum exercitu Ægyptum petens, in
 Cœlen Syriam processit. Circa Rhinocolura Ptole-
 mæi legatis agentibus gratias, quod per eum regnum

patrium recepisset, petentibusque, ut suum munus U. C. 584.
 tueretur, et diceret potius, quid fieri vellet, quam, A. C. 168.
 hostis ex socio factus, vi atque armis ageret, re-
 spondit; *Non aliter neque classem revocaturum, neque*
exercitum reducturum, nisi sibi et tota Cypro, et Pelu-
sio, agroque, qui circa Pelusiacum ostium Nili esset,
cederet: diemque præstituit, intra quam de condi-
 tionibus peractis responsum acciperet.

XII. Postquam dies data induciis præteriiit, * na-
 vigantibus ostio Nili ad Pelusium, per deserta Ara-
 biæ * ad Memphim incolebant, et ab ceteris Ægypti-
 tiis, partim voluntate, partim metu, ad Alexandriam
 modicis itineribus descendit. Ad Leusinem trans-
 gresso flumen, qui locus quatuor millia ab Alexan-
 dria abest, legati Romani obcurrerunt: quos quum
 advenientes salutasset, dextramque Popillio porrige-
 ret; tabellas ei Popillius scriptum habentes tradit,
 atque omnium primum id legere jubet. Quibus per-
 lectis, quum se consideraturum, adhibitis amicis,
 quid faciendum sibi esset, dixisset; Popillius, pro
 cetera asperitate animi, virga, quam in manu gere-
 bat, circumscripsit regem: ac, *Priusquam hoc cir-*
culo excedas, inquit, redde responsum, senatui quod
referam. Obcurrunt Antiocho legati Rom.
 Obstupefactus tam violento imperio pa-
 rumper quum hæsitasset, *Faciam, inquit, quod censet*
senatus. Tum demum Popillius dextram regi, tam-
 quam socio atque amico, porrexit. Die deinde fini-
 ta quum excessisset Ægypto Antiochus, legati, con-
 cordia etiam auctoritate sua inter fratres firmata,
 inter quos vixdum convenerat, pars Cyprum navi-
 gant: et inde, quæ jam vicerat prælio Ægyptias
 naves, classem Antiochi dimittunt. Clara ea per
 gentes legatio fuit, quod haud dubie adempta Antio-

Obcurrunt
Antiocho
legati Rom.

Popillius
virga cir-
cumscribit
regem.

U. C. 584. cho Ægyptus habenti jam, redditumque patrium
 A. C. 168. regnum stirpi Ptolemæi fuerat. Consulum ejus anni, sicut alterius clarus consulatus insigni victoria, ita alterius obscura fama, quia materiam res gerendi non habuit. Jam primum quum legionibus ad conveniendum diem dixit, non auspicato templum intrauit: vitio diem dictam esse augures, quum ad eos relatum est, decreverunt. Profectus in Galliam circa Macros campos ad montes Siciminam et Papi-num stativa habuit: deinde circa eadem loca cum sociis nominis Latini hibernabat: legiones Romanæ, quod vitio dies exercitui ad conveniendum dicta erat, Romæ manserant. Et prætores, præter C. Papi-rium Carbonem, cui Sardinia evenerat, in provin-cias iere: eum jus dicere Romæ (nam eam quoque sortem habebat) inter cives et peregrinos Patres censuerant.

Legati
 Antiochi.

Ptolemæi.

XIII. Et Popillius et ea legatio, quæ missa ad Antiochum erat, Romam rediit; retulit, controversias inter reges sublatas esse, exercitumque ex Ægypto in Syriam reductum. Post ipsorum regum legati venerunt: Antiochi legati, referentes, *Omni victoria potio-rem pacem regi, quæ senatui placuisset, visam: eumque haud secus, quam Deorum imperio, legatorum Romanorum jussis paruisse.* Gratulati deinde victoriam sunt, ad quam summa ope, si quid im-peratum foret, adfuturum regem fuisse. Ptolemæi legati, communi nomine regis et Cleopatrar, gratias egerunt, *Plus eos senatui populoque Romano, quam parentibus suis, plus, quam Diis immortalibus, debere: per quos obsidione miserrima liberati essent, regnum patrium prope amissum recepissent.* Responsum ab senatu est: *Antiochum recte atque ordine fecisse,*

quod legatis paruisset, gratumque id esse senatui populoque Romano. Regibus Ægypti, Ptolemæo Cleopatræque : si quid per se boni commodique evenisset, id magnopere senatum letari : daturumque operam, ut regni sui maximum semper præsidium positum esse in fide populi Romani ducant. Munera legatis ut ex instituto mittenda curaret, C. Papirio prætori mandatum. Literæ deinde Macedonia adlatæ, quæ victoriæ lætitiâ geminarent : *Persea regem in potestatem consulis venisse*. Dimissis legatis, disceptatum inter Pisanos Lunensesque legatos : Pisanis querentibus, agro se a colonis Romanis pelli ; Lunensibus adfirmantibus, eum, de quo agatur, a triumviris agrum sibi adsignatum esse. Senatus, qui de finibus cognoscerent statuerentque, quinqueviros misit, Q. Fabium Buteonem, P. Cornelium Blasionem, T. Sempronium Muscam, L. Nævium Balbum, C. Appuleium Saturninum. Et ab Eumene et ab Attalo et ab Athenæo fratribus, communis legatio de victoria gratulatum venit. Et Masgabæ, regis Masinissæ filio, Puteolis navem egresso, præsto fuit, obviam missus cum pecunia, L. Manlius quæstor, qui Romam eum publico sumtu perduceret. Advenienti extemplo senatus datus est. Is adolescens ita locutus est, ut, quæ rebus grata erant, gratiora verbis faceret. Commemoravit, quot pedites equitesque, quot elephantos, quantum frumenti eo quadriennio pater suus in Macedoniam misisset. Sed duas res ei rubori fuisse : unam, quod rogasset eum per legatos senatus, quæ ad bellum opus essent, et non imperasset ; alteram, quod pecuniam ei pro frumento misisset. Masinissam meminisse, regnum a populo Romano partum auctumque et multiplicatum habere : usu regni contentum scire, dominium et

U. C. 584.

A. C. 168.

Masgaba
Masinissæ
filius.

U. C. 584. *jus eorum, qui dederint, esse. Sumere itaque eosdem,*
 A. C. 168. *non se rogare, æquum esse, neque emere ea, ex fructibus agri ab se dati quæ ibi proveniant. Id Masinissæ satis esse, et fore, quod populo Romano superesset. Cum iis mandatis a patre profectum postea consecutos equites, qui devictam Macedoniam nunciarent, gratulatumque senatui juberent indicare, tantæ eam rem lætitiæ patri suo esse, ut Romam venire velit, Jovique optimo maximo in Capitolio sacrificare, et grates agere: id, nisi molestum sit, ut ei permittatur, ab senatu petere.*

XIV. Responsum regulo est: *Facere patrem ejus Masinissam, quod virum gratum bonumque facere deceat, ut pretium honoremque debito beneficio addat. Et populum Romanum ab eo, bello Punico, forti fidelique opera adjutum; et illum, favente populo Romano, regnum adeptum; æquitate sua postea trium regum bellis deinceps omnibus functum officiis. Victoria vero populi Romani lætari eum regem mirum non esse, qui sortem omnem fortunæ regnique sui cum rebus Romanis inmiscuisset. Grates Diis pro populi Romani victoria apud suos penates ageret; Romæ filium pro eo acturum. Gratulatum quoque satis suo ac patris nomine esse. Ipsum relinquere regnum, et Africa excedere, præterquam quod illi inutile esset, non esse e republica populi Romani, senatum censere. Petenti Masgabæ, ut Hanno Hamilcaris filius obses in locum * exigeret. Munera ex senatusconsulto emere regulo quæstor jussus ex centum pondo argenti, et prosequi eum Puteolos, omnemque sumtum, quoad in Italia esset, præbere, et duas naves conducere, quibus ipse comitesque regis in Africam deveherentur: et comitibus omnibus, liberis servisque, vestimenta data. Haud ita*

multo post de altero Masinissæ filio Misagene literæ U. C. 584.
 adlatæ sunt, *missum eum ab L. Paulo post devictum* A. C. 166.
Persea in Africam cum equitibus suis; navigantem, dis-
persa classe in Hadriatico mari, Brundisium tribus na-
vibus ægrum delatum. Ad eum cum iisdem muneri-
 bus, quæ data Romæ fratri ejus erant, L. Stertinus
 quæstor Brundisium missus: jussusque curare, ut
 ædes hospi-

* * * *

XV. * * * in quatuor urbanas tribus descripti
 erant libertini, præter eos, quibus filius quinquenni
 major ex senatusconsulto esset. Eos, ubi proximo
 lustro censi essent, censeri jusserunt: et eos, qui
 prædium prædiave rustica pluris sestertiūm triginta
 millium haberent, censendi jus factum est. Hoc
 quum ita servatum esset, negabat Claudius, *suffragii*
lationem injussu populi censorem cuiquam homini, ne-
dum ordini universo, adimere posse. Neque enim, si
 tribu movere posset, quod sit nihil aliud, quam mutare
 jubere tribum, ideo omnibus quinque et triginta tribubus
 emovere posse; id est, civitatem libertatemque eripere;
 non, ubi censeatur, finire, sed censu excludere. Hæc
 inter ipsos disceptata: postremo eo descensum est,
 ut ex quatuor urbanis tribubus unam palam in atrio
 Libertatis sortirentur, in quam omnes, qui servitu-
 tem servissent, conjicerent. Esquilinæ sors exiit:
 in ea Ti. Gracchus pronunciavit, libertinos omnes
 censeri placere. Magno ea res honori censoribus
 apud senatum fuit: gratiæ actæ et Sempronio, qui
 in bene cœpto perseverasset; et Claudio, qui non
 inpedisset. Plures, quam a superioribus, et senatu
 emoti sunt, et equos vendere jussi: omnes iidem ab

U. C. 564. utroque et tribu remoti, et ærarii facti : neque ullius,
 A. C. 168. quem alter notaret, ab altero levata ignominia. Petentibus, ut ex instituto ad sarta tecta exigenda, et ad opera, quæ locassent, probanda, anni et bimensis tempus prorogaretur, Cn. Tremellius tribunus, quia lectus non erat in senatum, intercessit. Eodem anno C. Cicereius ædem in monte Albano dedicavit quinquennio post, quam vovit. Flamen Martialis inauguratus est eo anno L. Postumius Albinus.

U. C. 585. XVI. Q. Ælio, M. Junio consulibus de provinciis
 A. C. 167. referentibus, censuere Patres, duas provincias Hispaniam rursus fieri, quæ una per bellum Macedonicum fuerat : et Macedoniam Illyricumque eosdem, L. Paullum et L. Anicium, obtinere, donec de sententia legatorum et res bello turbatas, et statum alium ejus regni formando composuissent. Consulibus Pisæ et Gallia decretæ cum binis legionibus peditum, et equitum quadringentenis. Prætorum sortes fuere, Q. Cassii urbana, M. Juventii Thalmæ inter peregrinos, Ti. Claudii Neronis Sicilia, Cn. Fulvii Hispania citerior, C. Licinii Nervæ ulterior. A. Manlio Torquato Sardinia obvenerat : nequii ire in provinciam, ad res capitales quærendas ex senatusconsulto retentus. De prodigiis deinde nunciatis senatus est consultus. Ædes Deorum Penatium in Velia de cœlo tacta erat : et in oppido Minervio duæ portæ et muri aliquantum. Anagninæ terra pluerat ; et Lanuvii fax in cœlo visa erat ; et Calatiæ in publico agro M. Valerius civis Romanus nunciabat e foco suo sanguinem per triduum et duas noctes manasse. Ob id maxime decemviri libros adire jussi, supplicationem in diem unum populo edixerunt, et quinquaginta capris in foro sacrificaverunt : et alio-

rum prodigiorum caussa diem alterum supplicatio
 circa omnia pulvinaria fuit, et hostiis majoribus sa-
 crificatum est, et urbs lustrata. Inde, quod ad ho-
 norem Deūm immortalium pertineret, decrevit sena-
 tus, *Ut, quoniam perduelles superati, Perseus et Gen-
 tius reges cum Macedonia atque Illyrico in potestate
 populi Romani essent, ut, quanta dona, Ap. Claudio,
 M. Sempronio consulibus, ob devictum Antiochum re-
 gem data ad omnia pulvinaria essent, tanta Q. Cassius
 et M. Juventius prætores curarent danda.*

U. C. 585.

A. C. 167.

XVII. Legatos deinde, quorum de sententia im-
 peratores L. Paullus, L. Anicius componerent res,
 decreverunt decem in Macedoniam, quinque in Illy-
 ricum. In Macedoniam sunt hi nominati, A. Postu-
 mius Luscus, C. Claudius, ambo censorii, C. Lici-
 nius Crassus, collega in consulatu Paulli; tum pro-
 rogato imperio provinciam Galliam habebat. His
 consularibus addidit Cn. Domitium Ahenobarbum,
 Ser. Cornelium Sullam, L. Junium, C. Antistium
 Labeonem, T. Numisium Tarquiniensem, A. Teren-
 tium Varronem. In Illyricum autem hi nominati,
 P. Ælius Ligus consularis, C. Cicereius, et Cn. Bæ-
 bius Tamphilus, (hic priore anno, Cicereius multis
 ante annis prætor fuerat) P. Terentius Tusciveica-
 nus, P. Manilius. Moniti deinde consules a Patri-
 bus, ut, quoniam alterum ex his succedere C. Lici-
 nio, qui legatus nominatus erat, in Galliam oportere-
 ret, primo quoque tempore provincias aut compara-
 rent inter se, aut sortirentur, sortiti sunt. M. Ju-
 nio Pisæ obvenerunt, (quem prius, quam in provin-
 ciam iret, legationes, quæ undique Romam gratula-
 tum convenerunt, introducere in senatum placuit)
 Q. Ælio Gallia. Ceterum quamquam tales viri mit-

Legati in
Macedo-
niam et Il-
lyricum.

U. C. 585. terentur, quorum de consilio sperari posset, imperatores nihil indignum nec clementia nec gravitate populi Romani decreturos esse, tamen in senatu quoque agitata est summa consiliorum, ut inchoata omnia legati ab domo ferre ad imperatores possent.

S. C. de
Macedonia.

XVIII. *Omniū primum liberos esse placebat Macedonas atque Illyrios, ut omnibus gentibus adpareret, arma populi Romani non liberis servitutem, sed contra servientibus libertatem adferre; ut et in libertate gentes quæ essent, tutam eam sibi perpetuamque sub tutela populi Romani esse, et, quæ sub regibus viverent, et in præsens tempus mitiores eos justioresque respectu populi Romani habere se, et, si quando bellum cum populo Romano regibus fuisset suis, exitum ejus victoriam Romanis, sibi libertatem adlaturum crederent. Metalli quoque Macedonici, quod ingens vectigal erat, locationesque prædiorum rusticorum tolli placebat: nam neque sine publicano exerceri posse; et, ubi publicanus est, ibi aut jus publicum vanum, aut libertatem sociis nullam esse. Ne ipsos quidem Macedonas idem exercere posse: ubi in medio præda administrantibus esset, ibi numquam caussas seditionum et certaminis defore. Commune concilium gentis esset, ne improbum vulgus a senatu aliquando libertatem salubri moderatione datam ad licentiam pestilentem traheret. In quatuor regiones describi Macedoniam, ut suum quæque concilium haberet, placuit; et dimidium tributi, quam quod regibus ferre soliti erant, populo Romano pendere. Similia his et in Illyricum mandata: cetera ipsis imperatoribus legatisque relicta, in quibus præsens tractatio rerum certiora subjectura erat consilia.*

Attalus
Romæ.

XIX. Inter multas regum gentiumque et populo-

rum legationes Attalus, frater regis Eumenis, maxi- U. C. 585.
 me convertit in se omnium oculos animosque : ex- A. C. 167.
 ceptus enim est ab his, qui simul eo bello militave-
 runt, haud paullo benignius, quam si ipse rex Eu-
 menes venisset. Adduxerant eum duæ in speciem
 honestæ res : una, gratulatio, conveniens in ea vic-
 toria, quam ipse adjuvisset : altera, querimonia Gal-
 lici tumultus, Advertæque gladiis regnum in dubium
 adductum esse. Suberat et secreta spes honorum
 præmiorumque ab senatu, quæ vix salva pietate ejus
 contingere poterant : erant enim quidam Romano-
 rum quoque non boni auctores, qui spe cupiditatem
 ejus elicerent : *Eam opinionem de Attalo et Eumene*
Romæ esse, tamquam de altero Romanis certo amico,
altero nec Romanis, nec Persi fido socio. Itaque vix
statui posse, utrum, quæ pro se, an, quæ contra fra-
trem petiturus esset, ab senatu magis inpetrabilia fo-
rent : adeo universos omnia et huic tribuere, et illi vero
negare. Eorum hominum (ut res docuit) Attalus Attali spes
 erat, qui, quantum spes spondisset, cuperent, ni prava.
 unius amici prudens monitio velut frenos animo ejus,
 gestienti secundis rebus, inposuisset. Stratius cum
 eo fuit medicus, ad id ipsum a non securo Eumene
 Romam missus, speculator rerum, quæ a fratre age-
 rentur, monitorque fidus, si decedi fide vidisset. Is,
 ad occupatas jam aures sollicitatumque jam animum
 quum venisset, adgressus tempestivis temporibus
 rem prope prolapsam restituit, aliis alia regna cre-
 visse rebus, dicendo : *regnum eorum novum, nullis ve-*
tustis fundatum opibus, fraterna stare concordia : quod Castigantur
unus nomen regium et præcipuum capitis insigne gerat, a Stratio.
omnes fratres regnent. Attalum vero, quia ætate proxi-
mus, quis non pro rege habeat ? neque eo solum, quia

U. C. 585. *tantas præsentis ejus opes cernat, sed quod haud ambi-*

A. C. 167. *guum prope diem regnaturum eum infirmitate ætateque Eumenis esset, nullam stirpem liberum habentis: (necdum enim agnoverat eum, qui postea regnavit). Quid adtineret vim adferre rei, sua sponte mox ad eum adventuræ? Accessisse etiam novam tempestatem regno tumultus Gallici, cui vix consensu et concordia regum resisti queat. Si vero ad externum bellum domestica seditio adjiciatur, sisti non posse; nec aliud eum, quam, ne frater in regno moriatur, sibi ipsi spem propinquam regni erepturum. Si utraque gloriosa res esset, et servasse fratri regnum, et eripuisse; servati tamen regni, quæ juncta pietati sit, potiolem laudem fuisse. Sed enimvero quum detestabilis altera res et proxima parricidio sit, quid ad deliberationem dubii superesse? Utrum enim partem regni petiturum esse, an totum erepturum? si partem; ambo infirmos, distractis viribus, et omnibus injuriis obnoxios fore: si totum; privatumne ergo majorem fratrem, an exulem illa ætate, illa corporis infirmitate, an ultimum mori jussurum? Egregium enim (ut fabulis traditus inpiorum fratrum eventus taceatur) Persei exitum videri, qui ex fraterna cæde raptum diadema in templo Samothracum, velut præsentibus Diis exigentibus pœnas, ad pedes victoris hostis prostratus posuerit. Eos ipsos, qui, non illi amici, sed Eumeni infesti, stimulent eum, pietatem constantiamque laudaturos, si fidem ad ultimum fratri præstitisset.*

Stratio ob-
temperat
Attalus.

XX. Hæc plus valere in Attali animo. Itaque introductus in senatum, gratulatus victoriam, et sua merita eo bello fratrisque, si qua erant, et Gallorum defectionem, quæ nuper ingenti motu facta erat, exposuit. Petiit, ut legatos mitteret ad eos, quorum auctoritate ab armis avocarentur. His pro regni uti-

litate editis mandatis, Ænum sibi et Maroneam pe- U. C. 585.
 tiit. Ita destituta eorum spe, qui, fratre accusato, A. C. 167.
 partitionem regni petiturum crediderant, curiam ex-
 cessit. Ut raro alias quisquam, rex aut privatus,
 tanto favore tantoque omnium adsensu est auditus;
 omnibus honoribus muneribusque, et præsens est
 cultus, et proficiscentem prosecuti sunt. Inter mul-
 tas Asiæ Græciæque legationes Rhodiorum maxime Rhodiorum
 legati civitatem converterunt: nam quum primo in legatio.
 veste candida visi essent, quod gratulantes decebat,
 et, si sordidam vestem habuissent, lugentium Persei
 casum præbere speciem poterant; postquam consulti
 ab M. Junio consule Patres, stantibus in comitio le-
 gatis, an locum, lautia, senatumque darent, nullum
 hospitale jus in iis servandum censuerunt; egressus
 e curia consul, quum Rhodii, gratulatum se de vic-
 toria purgatumque civitatis crimina dicentes venisse,
 petissent, ut senatus sibi daretur, pronunciat: *Sociis
 et amicis et alia comiter atque hospitaliter præstare
 Romanos, et senatum dare consuesse: Rhodios non ita
 meritos eo bello, ut amicorum sociorum numero habendi
 sint.* His auditis, prostraverunt se omnes humi, con-
 sulemque et cunctos, qui aderant, orantes, ne nova
 falsaque crimina plus obesse Rhodiis æquum cense-
 rent, quam antiqua merita, quorum ipsi testes es-
 sent. Extemplo, veste sordida sumta, domos prin-
 cipum cum precibus ac lacrimis circumibant, oran-
 tes, ut prius cognoscerent caussam, quam condem-
 narentur.

XXI. M. Juventius Thalna prætor, cujus inter Thalnæ ro-
 cives et peregrinos jurisdictio erat, populum adver- gatio contra
 sus Rhodios incitabat: rogationemque promulgave- Rhodios.
 rat, *Ut Rhodiis bellum indiceretur: et ex magistrati-*

U. C. 585. *bus ejus anni deligerent, qui ad id bellum cum classe*
 A. C. 167. *mitteretur, se eum sperans futurum esse. Huic ac-*
tioni M. Antonius et M. Pomponius tribuni plebis
adversabantur. Sed et prætor novo maloque exem-
plo rem ingressus erat, quod, ante non consulto se-
natu, non consulibus certioribus factis, de sua unius
sententia rogationem ferret, Vellent, juberentne, Rho-
diis bellum indici ? quum antea semper prius senatus
 de bello consultus esset, deinde ad populum latum;
 et tribuni plebis, quum ita traditum esset, ne quis
 prius intercederet legi, quam privatis suadendi dis-
 suadendique legem potestas facta esset; eoque per-
 sæpe evenisset, ut, qui non professi essent se inter-
 cessuros, animadversis vitiis legis ex ratione dissua-
 dentium, intercederent; et, qui ad intercedendum ve-
 nissent, desisterent, victi auctoritatibus suadentium
 legem. Tum inter prætorem tribunosque omnia in-
 tempestive agendi certamen erat. Tribuni festina-
 tionem prætoris ante tempus intercedendo,

* * * *

in adventum im-

* * * *

Oratio Rho-
diorum in
senatu.

XXII. * * * *peccaverimusne, adhuc dubium est:*
pœnas, ignominias omnes jam patimur. Antea, Kar-
thaginiensibus victis, Philippo, Antiocho superatis,
quum Romam venissemus, ex publico hospitio in cu-
riam gratulatum vobis, Patres conscripti, ex curia in
Capitolium ad Deos vestros dona ferentes; nunc ex
sordido deversorio, vix mercede recepti, ac prope hos-
tium more extra urbem manere jussi, in hoc squalore
venimus in curiam Romanam Rhodii, quos provinciis
nuper Lycia atque Caria, quos præmiis atque hono-

ribus amplissimis donastis. Et Macedonas Illyriosque U. C. 585.
liberos esse (ut audimus) jubetis, quum servierint, an- A. C. 167.
tequam vobiscum bellarent: (nec cujusquam fortunæ
invidemus, immo agnoscimus clementiam populi Ro-
mani) Rhodios, qui nihil aliud quam quieverunt hoc
bello, hostes ex sociis facturi estis? Certe quidem vos
estis Romani, qui ideo felicia bella vestra esse, quia
justa sint, præ vobis fertis; nec tam exitu eorum, quod
vincatis, quam principiis, quod non sine caussa sus-
cipiatis, gloriamini. Messana in Sicilia obpugnata
Karthaginienses, Athenæ obpugnatae et Græcia in ser-
vitutem petita, et adjutus Hannibal pecunia, auxiliis,
Philippum hostem fecerunt. Antiochus ipse, ultro ab
Ætolis hostibus vestris arcessitus, ex Asia classe in
Græciam trajecit; Demetriade, et Chalcide, et saltu
Thermopylarum occupato, de possessione imperii vos
dejicere conatus. Cum Perseo socii vestri obpugnati,
alii interfecti reguli principesque gentium aut popu-
lorum, caussa belli vobis fuere. Quem tandem titu-
lum nostra calamitas habitura est, si perituri sumus?
Nondum segrego civitatis caussam a Polyarato et Di-
none, civibus nostris, et iis, quos, ut traderemus vobis,
adduximus. Si omnes Rhodii æque noxii essemus,
quod nostrum in hoc bello crimen esset? Persei par-
tibus favimus; et, quemadmodum Antiochi Philippi-
que bello pro vobis adversus reges, sic nunc pro rege
adversus vos stetimus. Quemadmodum soleamus socios
juvare, et quam inpigre capessere bella, C. Livium,
L. Æmiliū Regillum interrogate, qui classibus ves-
tris in Asia præfuerunt. Numquam vestrae naves pug-
navere sine nobis: nostra classe pugnavimus semel ad
Samum, iterum in Pamphylia adversus Hannibalem
imperatorem: quæ victoria nobis eo gloriosior est,

U. C. 585. quod, quum ad Samum magnam partem navium ad-
 A. C. 167. versa pugna et egregiam juventutem amissemus, ne
 tanta quidem clade territi, iterum ausi sumus regiæ
 classi ex Syria venienti obviam ire. Hæc non gloriandi
 caussa retuli, (neque enim ea nunc nostra est fortuna)
 sed ut admonerem, quemadmodum adjuvare socios sole-
 rent Rhodii.

XXIII. Præmia, Philippo et Antiocho devictis, am-
 plissima accepimus a vobis. Si, quæ vestra nunc est
 fortuna Deum benignitate et virtute vestra, ea Persei
 fuisset, et præmia petitem ad victorem regem venisse-
 mus in Macedoniam, quid tandem diceremus? Pecuni-
 ane a nobis adjutum, an frumento? auxiliis terres-
 tribus, an navalibus? quod præsidium tenuisse nos? ubi
 pugnasse aut sub illius ducibus, aut per nos ipsos? Si
 quæreret, ubi miles noster, ubi navis intra præsidia sua
 fuisset; quid responderemus? Caussam fortasse di-
 ceremus apud victorem, quemadmodum apud vos di-
 cimus. Hoc enim legatos utroque de pace mittendo
 consecuti sumus, ut ne ab utraque parte gratiam ini-
 remus; ab altera etiam crimen et periculum esset.
 Quamquam Perseus vere objiceret, id quod vos non
 potestis, Patres conscripti, nos principio belli misisse
 ad vos legatos, qui pollicerentur vobis, quæ ad bellum
 opus essent; navalibus, armis, juventute nostra, sicut
 prioribus bellis, ad omnia paratos fore. Ne præsta-
 remus, per vos stetit, qui de quacumque caussa tum
 adspersati nostra auxilia estis. Neque fecimus igitur
 quidquam tamquam hostes, neque honorum sociorum
 defuimus officio; sed a vobis prohibiti præstare fui-
 mus. Quid igitur? nihilne factum neque dictum est
 in civitate vestra, Rhodii, quod nolletis, quo merito
 offenderetur populus Romanus? Hinc jam non, quod

factum est, defensurus sum, (non adeo insanio) sed U. C. 585.
A. C. 167.
publicam causam a privatorum culpa segregaturus.

Nulla enim est civitas, quæ non et improbos cives aliquando, et inperitam multitudinem semper habeat. Etiam apud vos fuisse audiui, qui adsentando multitudini grassarentur: et secessisse aliquando a vobis plebem, nec in potestate vestra rempublicam fuisse. Si hoc in hac tam bene morata civitate accidere potuit, mirari quisquam potest, aliquos fuisse apud nos, qui, regis amicitiam petentes, plebem nostram consiliis depravarent? qui tamen nihil ultra valuerunt, quam ut in officio cessaremus. Non prateribo id, quod gravissimum est in hoc bello crimen civitatis nostræ. Legatos eodem tempore et ad vos, et ad Persea de pace misimus: quod infelix consilium furiosus (ut postea audivimus) orator stultissimum fecit: quem sic locutum constat, tamquam C. Popillius legatus Romanus, quem ad submovendos a bello Antiochum et Ptolemæum reges misistis, loqueretur. Sed tamen ea, sive superbia sive stultitia adpellanda est, eadem, quæ apud vos, et apud Persea fuit. Tam civitatum, quam singulorum hominum mores sunt: gentes quoque aliæ iracundæ, aliæ audaces, quædam timidæ: in vinum, in Venerem proniores aliæ sunt. Atheniensium populum fama est celerem et supra vires audacem esse ad conandum: Lacedæmoniorum cunctatorem, et vix in ea, quibus fudit, ingredientem. Non negaverim, et totam Asiæ regionem inaniora parere ingenia, et nostrorum timidiorum sermonem esse, quod excellere inter finitimas civitates vidantur; et id ipsum non tam viribus nostris, quam vestris honoribus ac judiciis. Satis quidem et tunc in præsentia castigata illa legatio erat, cum tam tristi responso vestro dimissa: si tam parum

U. C. 585. ignominiae pensum est, hæc certe tam miserabilis ac
 A. C. 167. supplex legatio etiam insolentioris, quam illa fuit, legationis satis magnum piaculum esset. Superbiam, verborum præsertim, iracundi oderunt, prudentes irident; utique si inferioris adversus superiorem est: capitali pœna nemo umquam dignam judicavit. Id enimvero periculum erat, ne Romanos Rhodii contemnerent. Etiam Deos aliqui verbis ferocioribus increpant, nec ob id quemquam fulmine ictum audimus.

XXIV. Quid igitur superat, quod purgemus, si nec factum hostile ullum nostrum est, et verba tumidiora legati obfensionem aurium, non perniciem civitatis, meruerunt? Voluntatis nostræ tacitæ velut litem æstimari vestris inter vos sermonibus audio, Patres conscripti: favisce nos regi, et illum vincere maluisse; ideo bello persequendos esse credunt. Alii vestrâ, voluisse quidem nos hoc, non tamen ob id bello persequendos esse: neque moribus, neque legibus ullius civitatis ita comparatum esse, ut, si quis vellet inimicum perire, si nihil fecerit, quo id fiat, capitis damnetur. His, qui nos pœna, non crimine, liberant, gratiam quidem habemus: ipsi nobis hanc dicimus legem; si omnes volumus, quod arguimur, non distinguimus voluntatem a facto: omnes plectamur. Si alii principum nostrorum vobis, alii regi faverunt; non postulo, ut propter nos, qui partiumstrarum fuimus, regis fautores salvi sint: illud deprecor, ne nos propter illos pereamus. Non estis vos illis infestiores, quam civitas ipsa; et hoc qui sciebant, plerique eorum aut profugerunt, aut mortem sibi consciverunt: alii, damnati a nobis, in potestate vestra erunt, Patres conscripti. Ceteri Rhodii, sicut gratiam nullam meriti hoc bello,

ita ne pœnam quidem sumus. Priorum nostrorum be- U. C. 585.
nefactorum cumulus hoc, quod nunc cessatum in officio A. C. 167.
est, expleat. Cum tribus regibus gessistis bella per hos
annos: ne plus obsit nobis, quod uno bello cessavimus,
quam quod duobus bellis pro vobis pugnavimus. Phi-
lippum, Antiochum, Persea, tamquam tres sententias,
ponite: ducæ nos absolunt: una dubia est, ut gravior
sit. Illi de nobis si judicarent, damnati essemus: vos
judicantes, Patres conscripti, si xnoaus in terris, an
funditus deleatur. Non enim de bello deliberatis,
Patres conscripti, quod inferre potestis, gerere non
potestis; quum nemo Rhodiorum arma adversus vos
laturus sit. Si perseverabitis in ira, tempus a vobis
petemus, quo hanc funestam legationem domum refe-
ramus: omnia libera capita, quidquid Rhodiorum vi-
rorum, feminarum est, cum omni pecunia nostra na-
ves conscendemus; ac, relictis penatibus publicis priva-
tisque, Romam veniemus: et, omni auro et argento,
quidquid publici, quidquid privati est, in comitio, in
vestibulo curiæ vestræ, cumulado, corpora nostra con-
jugumque ac liberorum vestræ potestati permittemus,
hic passuri, quodcumque patiendum erit: procul ab
oculis nostris urbs nostra diripiatur, incendatur. Hos-
tes Rhodios esse, Romani judicare possunt: est tamen
et nostrum aliquod de nobis judicium, quo numquam
judicabimus nos vestros hostes: nec quidquam hostile,
etiam si omnia patiemur, faciemus.

XXV. Secundum talem orationem universi rur-
 sus prociderunt, ramosque olæ supplices jactantes,
 tandem excitati, curia excesserunt. Tunc senten-
 tiæ interrogari cœptæ. Infestissimi Rhodiis erant,
 qui consules prætoresve aut legati gesserant in Ma-
 cedonia bellum. Plurimum causam eorum adjovit

U. C. 585. M. Porcius Cato; qui, asper ingenio, tum lenem
 A. C. 167. mitemque senatorem egit. Non inseram simula-
 crum viri copiosi, quæ dixerit, referendo: ipsius
 oratio scripta exstat, Originum quinto libro inclusa.

Rhodiis Rhodiis responsum ita redditum est, ut nec hostes
 anceps re- fierent, nec socii permanerent. Philocrates et As-
 sponsum tymedes principes legationis erant. Partem cum
 datum. Philocrate renunciare Rhodum legationem placuit,
 partem cum As- tymedesque agentur, sciret, certioresque suos faceret. In præ-
 sentia deducere ante certam diem ex Lycia Cariaque
 jusserunt præfectos. Hæc Rhodum nunciata, quæ
 per se tristia fuissent, quia majoris mali levatus erat
 timor, quum bellum timuissent, in gaudium renun-

Rhodi so- ciata verterunt. Itaque extemplo coronam viginti
 cietatem a millium aureorum decreverunt: Theodotum, præ-
 Romanis fectum classis, in eam legationem miserunt. So-
 petunt. cietatem ab Romanis ita volebant peti, ut nullum
 de ea re scitum populi fieret, aut literis mandaretur:
 quod, nisi inpetrarent, major repulsis ignominia
 esset. Præfecti classis id unius erat jus, ut agere
 de ea re sine rogatione ulla perlata posset: nam ita
 per tot annos in amicitia fuerant, ut sociali fœdere
 se cum Romanis non iuligarent ob nullam aliam
 causam, quam ne spem regibus abscinderent aux-
 ilii sui, si cui opus esset, neu sibi ipsis fructus ex
 benignitate et fortuna eorum percipiendi. Tunc
 utique petenda societas videbatur; non quæ tutiores
 eos ab aliis faceret, (nec enim timebant quemquam,
 præter Romanos) sed quæ ipsis Romanis minus
 suspectos. Sub idem fere tempus et Caunii descie-
 vere ab his, et Mylasenses Euromensium oppida
 occuparunt. Non ita fracti animi civitatis erant,

ut non sentirent, si Lycia et Caria ademtae ab Romanis forent, cetera aut se ipsa per defectionem liberarent, aut a finitimis occuparentur, includi se insulae parvae et sterilis agri litoribus, quae nequam alere tantae urbis populum posset: missa igitur juventute, propere et Caunios, quamquam Cibratarum adsciverant auxilia, coegerunt imperio parere; et Mylasenses Alabandenosque, qui, Euro-mensium provincia ademta, ad ipsos conjuncto exercitu venerunt, circa Orthosiam acie vicerunt.

U. C. 585.
A. C. 167.

XXVI. Dum haec ibi, alia in Macedonia, alia Romae geruntur; interim in Illyrico L. Anicius, rege Gentio, sicut ante dictum est, in potestatem redacto, Scodrae, quae regia fuerat, praesidio inposito Gabinium praefecit, Rhizoni et Olcinio urbibus opportunis C. Licinium. Praepositis his Illyrico, cum reliquo exercitu in Epirum est profectus: ubi prima Phanota ei dedita, tota multitudine cum infulis obviam effusa: hic praesidio inposito, in Molossidem transgressus: cujus omnibus oppidis, praeter Passaronem, et Tecmonem, et Phylacen, et Horreum, receptis, primum ad Passaronem ducit. Antinous et Theodotus principes ejus civitatis erant, insignes et favore Persei, et odio adversus Romanos: iidem universae genti auctores desciscendi ab Romanis. Hi conscientia privatae noxae, quia ipsis nulla spes veniae erat, ut communi ruina patriae obprimerentur, clauserunt portas, multitudinem, ut mortem servituti praeponerent, hortantes. Nemo adversus praepotentes viros hiscere audebat. Tandem Theodotus quidam, nobilis et ipse adolescens, quum major a Romanis metus timorem a principibus suis vicisset, *Quae vos rabies, inquit, agitat, qui duorum hominum*

Anicii res
gestae in
Epiro.

U. C. 585. *noxæ civitatis accessionem facitis? Equidem pro patria*
 A. C. 167. *qui letum obpetissent, sæpe fundo audiui: qui patriam*
pro se perire æquum censerent, hi primi inventi sunt.
Quin aperimus portas, et imperium accipimus, quod
orbis terrarum accepit? Hæc dicentem quum multi-
tudo sequeretur, Antinous et Theodotus in primam
stationem hostium inruperunt, atque ibi, obferentes
se ipsi vulneribus, interfecti: urbs dedita est Ro-
manis. Simili pertinacia Cephali principis clausum
Tecmonem, ipso interfecto, per deditionem recepit.
Nec Phylace, nec Horreum, obpugnationem tulerunt.
Pacata Epiro, divisisque in hiberna copiis
per opportunas urbes, regressus ipse in Illyricum,
Scodræ, quo quinque legati ab Roma venerant,
evocatis ex tota provincia principibus, conventum
habuit. Ibi pro tribunali pronunciavit de sententia
consilii: Senatum populumque Romanum Illyrios
esse liberos jubere: præsidia ex omnibus oppidis, arci-
bus, et castellis sese deducturum. Non solum liberos,
sed etiam innumes fore Issenses, et Taulantios, Das-
saretiorum Pirustas, Rhizonitas, Olciniatas, quod, in-
columi Gentio, ad Romanos defecissent. Daorseis
quoque immunitatem dare; quod, relicto Caravantio,
cum armis ad Romanos transissent. Scodrensibus, et
Dassarensibus, et Selepitanis, ceterisque Illyriis, vectigal
dimidium ejus, quod regi pendissent. Inde in tres
partes Illyricum divisit: unam eam fecit, quæ supra
dicta est; alteram Labeatas omnes; tertiam Agra-
vonitas, et Rhizonitas, et Olciniatas, adcolasque
eorum: hac formula dicta in Illyrico, ipse in Epiri
Passaronem in hiberna rediit.

Macedoniæ
 tres urbes
 directæ a
 Romanis.

XXVII. Dum hæc in Illyrico geruntur, Paullus
 ante adventum decem legatorum Q. Maximum

filium, jam ab Roma regressum, ad Æginium et Agassas diripiendas mittit: Agassas, quod, quum Marcio consuli tradidissent urbem, petita ultro societate Romana, defecerant rursus ad Persea: Æginiensium novum crimen erat: famæ de victoria Romanorum fidem non habentes, in quosdam militum, urbem ingressos, hostiliter sævierant. Ad Æniorum quoque hostiliter urbem diripiendam L. Postumium misit, quod pertinacius, quam finitimæ civitates, in armis fuerant. Autumni fere tempus erat; cujus temporis initio circumeundam Græciam, visendaque, quæ nobilitata fama magis auribus accepta sunt, quam oculis noscuntur, ut statuit, præposito castris C. Sulpicio Gallo, profectus cum haud magno comitatu, tegentibus latera Scipione filio et Athenæo Eumenis regis fratre, per Thessaliam Delphos petit, inclitum oraculum: ubi, sacrificio Apollini facto, inchoatas in vestibulo columnas, quibus inposituri statuas regis Persei fuerant, suis statuis victor destinavit. Lebadia quoque templum Jovis Trophonii adiit: ibi quum vidisset os specus, per quod oraculo utentes sciscitatum Deos descendunt, sacrificio Jovi Hercynnæque facto, quorum ibi templum est, Chalcidem ad spectaculum Euripi * ævoque ante insulæ, ponte continenti junctæ, descendit. A Chalcide Aulidem trajicit, trium milium spatio distantem, portum inclitum statione quondam mille navium Agamemnoniæ classis, Dianæque templum, ubi navibus cursum ad Trojam, filia victima aris admota, rex ille regum petiit. Inde Oropum Atticæ ventum est; ubi pro Deo vates Amphilochnus colitur, templumque vetustum est, fontibus rivisque circa amœnum. Athenas inde, plenas

Paullus
 Græciam
 peragrat.

U. C. 585. quidem et ipsas vetustate famæ, multa tamen visenda
 A. C. 167. habentes : arcem, portus, muros Piræeum urbi jun-
 gentes, navalia magnorum imperatorum, simulacra
 Deorum hominumque, omni genere et materiæ et
 artium insignia.

XXVIII. Sacrificio Minervæ præsidi arcis in urbe
 facto profectus, Corinthum altero die pervenit : urbs
 erat tunc præclara ante excidium : arx quoque et
 Isthmus præbuere spectaculum ; arx inter omnia in
 inmanem altitudinem edita, scatens fontibus ; Isth-
 mus duo maria, ab occasu et ortu solis finitima, artis
 faucibus dirimens. Sicyonem inde et Argos nobiles
 urbes adit : inde haud parem opibus Epidaurum,
 sed inclitam Æsculapii nobili templo ; quod, quinque
 millibus passuum ab urbe distans, nunc vestigiis re-
 vulsorum donorum, tum donis dives erat, quæ re-
 mediorum salutarium ægri mercedem sacraverant
 Deo. Inde Lacedæmonem adit, non operum mag-
 nificientia, sed disciplina institutisque memorabilem :
 unde per Megalopolim Olympiam adscendit. Ubi
 et alia quidem spectanda visa, et, Jovem velut præ-
 sentem intuens, motus animo est. Itaque, haud
 secus quam si in Capitolio inmolaturus esset, sacri-
 ficiū amplius solito adparari jussit. Ita peragrata
 Græcia, ut nihil eorum, quæ quisque Persei bello
 privatim aut publice sensisset, inquireret, ne cujus
 metu sollicitaret animos sociorum, Demetriadem
 quum revertit, in itinere sordidata turba Ætolorum
 obcurrit ; mirantique et percunctanti, quid esset,
 defertur, quingentos quinquaginta principes ab Ly-
 cisco et Tisippo, circumsessio senatu per milites Ro-
 manos, missos a Bæbio præside, interfectos ; alios
 in exilium actos esse : bonaque eorum, qui inter-

Redit Paul-
 lus in Ma-
 cedoniam.

fecti essent, et exsulum possidere, qui arguebant. U. C. 585.
A. C. 167.
Jussis Amphipolim adesse, ipse, convento Cn. Octavio Demetriade, postquam fama accidit, trajecisse jam mare decem legatos, omnibus aliis omissis, Apolloniam ad eos pergit: quo quum Perseus obviam Amphipoli nimis soluta custodia processisset, (id diei iter est) ipsum quidem benigne adlocutus est: ceterum, postquam in castra ad Amphipolim venit, graviter increpuisse traditur C. Sulpicium: primum, quod Persea tam procul a se vagari per provinciam passus esset; deinde, quod adeo indulgisset militibus, ut nudare tegulis muros urbis ad tegenda hibernacula sua pateretur: referrique tegulas et resarciri tecta, sicut fuerant, jussit. Et Persea quidem cum majore filio Philippo, traditos A. Postumio, in custodiam misit: filiam cum minore filio, a Samothrace aditos Amphipolim, omni liberali cultu habuit.

XXIX. Ipse, ubi dies venit, quo adesse Amphipoli denos principes civitatum jusserat, literasque Res Macedoniæ componit. omnes, quæ ubique depositæ essent, et pecuniam regiam conferri, cum decem legatis, circumfusa omni multitudine Macedonum, in tribunali consedit. Ad-suetis regio imperio tamen novum formam terribilem præbuit tribunal, submotor aditus, præco, adscensus, insueta omnia oculis auribusque; quæ vel socios, nedum hostes victos, terrere possent. Silentio per præconem facto, Paullus Latine, quæ senatui, quæ sibi ex consilii sententia visa essent, pronunciavit: ea Cn. Octavius prætor (nam et ipse aderat) interpretata sermone Græco referebat. Decretum de Macedonibus.
omnium primum liberos esse jubere Macedonas, habentes urbes eusdem agrosque, utentes legibus suis, annuos cre-

U. C. 585. *antes magistratus : tributum dimidiam ejus, quod pe-*
 A. C. 167. *pendissent regibus, pendere populo Romano. Deinde*
in quatuor regiones dividi Macedoniam : unam fore et
primam partem, quod agri inter Strymonem et Nessum
amnem sit : accessurum huic parti trans Nessum, ad
orientem versum qua Perseus tenuisset vicos, castella,
oppida, præter Ænum, et Maroneam, et Abdera ; trans
Strymonem autem vergentia ad occasum, Bisalticam
omnem cum Heraclea, quam Sinticen adpellant. Se-
cundam fore regionem, quam ab ortu Strymo amplec-
teretur annis, præter Sinticen Heracleam et Bisaltas : ab
occasu qua Axius terminaret fluvius, additis Pæonibus,
qui prope Axium flumen ad regionem orientis colerent.
Tertia pars facta, quam Axius ab oriente, Peneus
amnis ab occasu, cingunt : ad septentrionem Bora mons
objicitur : adjecta huic parti regio Pæoniæ, qua ab
occasu præter Axium amnem porrigitur : Edessa quo-
que et Bercea eodem concesserunt. Quarta regio trans
Boram montem, una parte confinis Illyrico, altera
Epiro. Capita regionum, ubi concilia fierent, primæ
regionis Amphipolim, secundæ Thessalonicen, tertiæ
Pellam, quartæ Pelagoniam fecit. Eo concilia suæ
cujusque regionis indici, pecuniam conferri, ibi magis-
tratus creari jussit. Pronunciavit deinde, neque con-
nubium, neque commercium agrorum ædificiorumque
inter se placere cuiquam extra fines regionis suæ esse.
Metalla quoque auri atque argenti non exerceri : ferri
et aris permitti : vectigal excentibus dimidium
ejus inpositum, quod pependissent regi. Et sale
invecto uti vetuit. Dardanis repetentibus Pæoniam,
quod et sua fuisset, et continens esset finibus suis,
omnibus dare libertatem pronunciavit, qui sub regno
Persei fuissent. Post non inpetratam Pæoniam,

salis commercium dedit: tertiæ regioni imperavit, U. C. 595.
ut Stobos Pæoniæ deveherent, pretiumque statuit. A. C. 167.
Navalem materiam et ipsos cædere, et alios pati
vetuit. Regionibus, quæ adfines barbaris essent,
(excepta autem tertia, omnes erant) permisit, ut
præsidia armata in finibus extremis haberent.

XXX. Hæc, pronunciata primo die conventus,
varie adfecerunt animos. Libertas præter spem
data adrexit, et levatum annuum vectigal. Regiona-
tim commerciis interruptis ita videri lacerata, tam-
quam animalia in artus, alterum alterius indigentes,
distracta: adeo, quanta Macedonia esset, quam di-
visui facilis, et a se ipsa quæque contemta pars
esset, Macedones quoque ignorabant. Pars prima
Bisaltas habet, fortissimos viros, (trans Nessum
amnem incolunt et circa Strymonem) et multas
frugum proprietates, et metalla, et opportunitatem
Amphipolis: quæ objecta claudit omnes ab oriente
sole in Macedoniam aditus. Secunda pars celeberrimas
urbes, Thessalonicen et Cassandriam, habet;
ad hoc Pallenen, fertilem ac frugiferam terram:
maritimas quoque opportunitates ei præbent portus
ad Toronen ac montem Atho, (Æneæ vocant hunc)
alii ad insulam Eubœam, alii ad Hellespontum op-
portune versi. Tertia regio nobiles urbes, Edessam
et Berœam et Pellam, habet, et Vettiorum bellico-
sam gentem: incolas quoque permultos Gallos et
Illyrios, inpigros cultores. Quartam regionem Eor-
dæi et Lyncestæ et Pelagones incolunt; juncta his
Atintania, et Stymphalis, et Elimiotis: frigida hæc
omnis, duraque cultu, et aspera plaga est: cultorum
quoque ingenia terræ similia habet: ferociores eos
et adcolæ barbari faciunt; nunc bello exercentes,

U.C. 585. nunc in pace miscentes ritus suos. Divisæ itaque
 A.C. 167. Macedoniæ partium usibus separatis, quanta universos teneat Macedonas, formula dicta, quum leges quoque se daturum ostendisset.

Judicium
 de Ætolis.

XXXI. Ætoli deinde citati: in qua cognitione magis, utra pars Romanis, utra regi favisset, quæsitum est, quam utri fecissent injuriam, aut accepissent. Noxa liberati interfectores: exilium pulsis æque ratum fuit, ac mors interfectis. A. Bæbius unus est damnatus, quod milites Romanos præbuisset ad ministerium cædis. Hic eventus Ætolorum causæ in omnibus Græciæ gentibus populisque eorum, qui partis Romanorum fuerant, inflavit ad intolerabilem superbiam animos; et obnoxios pedibus eorum subjecit, quos aliqua parte suspicio favoris in regem contigerat. Tria genera principum in civitatibus erant: duo, quæ adulando aut Romanorum imperium, aut amicitiam regum, sibi privatim opes obpressis faciebant civitatibus: medium unum, utrique generi adversum, libertatem et leges tuebatur. His ut major apud suos caritas, ita minor apud externos gratia erat. Secundis rebus elati Romanorum partis ejus fautores, soli tum in magistratibus, soli in legationibus erant. Hi quum frequentes et ex Peloponneso, et ex Bœotia, et ex aliis Græciæ conciliis adessent, implevere aures decem legatorum: *Non eos tantum, qui se propalam per vanitatem jactassent, tamquam hospites et amicos Persei, sed multo plures alios ex occulto favisse: reliquos per speciem tuendæ libertatis in conciliis adversus Romanos omnia instruxisse: nec aliter eas mansuras in fide gentes, nisi, fractis animis partium, aleretur confirmareturque auctoritas eorum, qui nihil præter impe-*

rium Romanorum spectarent. Ab his editis nominibus, evocati literis imperatoris ex Ætolia, Acarnaniaque, et Epiro, et Bœotia, qui Romam ad causam dicendam sequerentur: in Achaiam ex decem legatorum numero profecti duo, C. Claudius et Cn. Domitius, ut ipsi edicto evocarent. Id duabus de causis factum: una, quod fiduciæ plus animorumque esse Achæis ad non parendum credebant, et forsitan etiam in periculo fore Callicratem et ceteros criminum auctores delatoresque: altera, cur præsentibus evocarent, causa erat, quod ex aliis gentibus principum literas deprehensas in commentariis regiis habebant: in Achæis cæcum erat crimen, nullis eorum literis inventis. Ætolis dimissis, Acarnanum citata gens: in his nihil novatum, nisi quod Leucas exempta est Acarnanum concilio. Quærendo deinde latius, qui publice aut privatim partium regis fuissent, in Asiam quoque cognitionem extendere: et ad Antissan in Lesbo insula diruendam, traducendos Methymnam Antissæos, Labeonem miserunt; quod Antenorem, regium præfectum, quo tempore cum lembis circa Lesbum est vagatus, portu receptum comitatibus juvissent. Duo securi percussi viri insignes; Andronicus Andronici filius Ætolus, quod, patrem secutus, arma contra populum Romanum tulisset: et Neo Thebanus, quo auctore societatem cum Perseo junxerant.

U. C. 585.

A. C. 167.

Inquisitiones in eos qui faverant Perseo.

XXXII. His rerum externarum cognitionibus interpositis, Macedonum rursus advocatum concilium: pronunciatum, *Quod ad statum Macedoniae pertinebat, senatores, quos Synedros vocant, legendos esse, quorum consilio respublica administraretur.*

U. C. 585. Nomina deinde sunt recitata principum Macedonum,
 A. C. 167. quos cum liberis, majoribus quam quindecim annos
 Principes natis, præcedere in Italiam placeret. Id, prima spe-
 Macedones cie sævum, mox adparuit multitudini Macedonum
 in Italiam ablegati. pro libertate sua esse factum : nominati sunt enim
 regis amici purpuratique, duces exercituum, præ-
 fecti navium aut præsidiorum ; servire regi humi-
 liter, aliis superbe imperare adsueta : prædivites alii,
 alii, quos fortuna non æquarent, his sumtibus pares :
 regius omnibus victus vestitusque : nulli civilis ani-
 mus, neque legum neque libertatis æquæ patiens.
 Omnes igitur, qui in aliquibus ministeriis regiis,
 etiam qui in minimis legationibus fuerant, jussi
 Macedonia excedere, atque in Italiam ire : qui non
 paruisset imperio, mors denunciata. Leges Macedo-
 niæ dedit cum tanta cura, ut non hostibus victis,
 sed sociis bene meritis, dare videretur : et quas ne
 usus quidem longo tempore (qui unus est legum
 conector) experiendo argueret. Ab seriis rebus
 ludicrum, quod ex multo ante præparato, et in Asiæ
 civitates, et ad reges missis, qui denunciarent, et
 quum circumiret ipse Græciæ civitates, indixerat
 principibus, magno adparatu Amphipoli fecit. Nam
 et artificum omnis generis, qui ludicram artem fa-
 ciebant, ex toto orbe terrarum multitudo, et athle-
 tarum, et nobilium equorum convenit : et legationes
 cum victimis, et quidquid aliud Deorum hominum-
 que caussa fieri magnis ludis in Græcia solet. Ita
 factum est, ut non magnificentiam tantum, sed pru-
 dentiam in dandis spectaculis, ad quæ rudes tum
 Romani erant, admirarentur. Epulæ quoque le-
 gationibus paratæ et opulentia et cura eadem. Vul-

Leges dat
 Macedonia
 Paullus.

go dictum ipsius ferebant, et convivium instruere, U. C. 585.
et ludos parare ejusdem esse, qui vincere bello A. C. 167.
sciret.

XXXIII. Edito ludicro omnis generis, clipeisque Magnificencia
æreis in naves inpositis, cetera omnis generis arma, Paulli.
cumulata in ingentem acervum, precatus Martem,
Minervam, Luamque matrem, et ceteros Deos, qui-
bus spolia hostium dicare jus fasque est, ipse impe-
rator, face subdita, succendit: deinde circumstantes
tribuni militum pro se quisque ignes conjecerunt.
Notata est in illo conventu Europæ Asiæque, undi-
que partim ad gratulationem, partim ad spectaculum
contracta multitudo, tantis navalibus terrestri-
busque exercitibus, ea copia rerum, ea vilitas an-
nonæ, ut et privatis, et civitatibus, et gentibus,
dona data pleraque ejus generis sint ab imperatore,
non in usum modo præsentem, sed etiam quod do-
mos aveherent. Spectaculo fuit ei, quæ venerat,
turbæ non scenicum magis ludicum, non certamina
hominum, aut curricula equorum, quam præda Ma-
cedonica omnis, ut viseretur, exposita statuarum,
tabularumque, textilium, et vasorum ex auro et ar-
gento et ære et ebore factorum ingenti cura in ea
regia: ut non in præsentem modo speciem, qualibus
referta regia Alexandriæ erat, sed in perpetuum
usum fierent. Hæc, in classem inposita, devehenda
Romam Cn. Octavio data. Paullus, benigne lega-
tis dimissis, transgressus Strymonem, mille passuum
ab Amphipoli castra posuit: inde profectus, Pellam
quinto die pervenit. Prætergressus urbem, ad Spe-
læum (quod vocant) biduum moratus, P. Nasicam,
et Q. Maximum filium cum parte copiarum ad
depopulandos Illyrios, qui Persea juverant bello,

U. C. 585. misit, jussos ad Oricum sibi obcurrere: ipse,
 A. C. 167. Epirum petens, quintisdecimis castris Passaronem
 pervenit.

Epiri præda
 data exerci-
 tui.

XXXIV. Haud procul inde Anicii castra abe-
 rant: ad quem literis missis, ne quid ad ea, quæ
 fierent, moveretur; *senatum prædam Epiri civitatum,*
quæ ad Persea defecissent, exercitui dedisse; submis-
 sis centurionibus in singulas urbes, qui se dicerent ad
 præsidia deducenda venisse, ut liberi Epirotæ, sicut
 Macedones, essent, denos principes ex singulis evo-
 cavit civitatibus: quibus, quum denunciasset, ut
 aurum atque argentum in publicum proferretur, per
 omnes civitates cohortes dimisit: ante in ultiores,
 quam in propiores, profecti, ut uno die in omnes
 perveniretur. Edita tribunis centurionibusque erant,
 quæ agerentur: mane omne aurum argentumque
 conlatum: hora quarta signum ad diripiendas urbes
 datum est militibus: tantaque præda fuit, ut in
 equitem quadringeni denarii, peditibus duceni divi-
 derentur, centum quinquaginta millia caputū hu-
 manorum abducerentur. Muri deinde direptarum
 urbium diruti sunt: ea fuere oppida circa septua-
 ginta. Vendita præda omnium, de ea summa militi
 numeratum est. Paullus ad mare Oricum descendit,
 nequaquam, ut ratus erat, expletis militum animis:
 qui, tamquam nullum in Macedonia gessissent bel-
 lum, expertes regiæ prædæ esse indignabantur.
 Orici quum missas cum Scipione Nasica Maximo-
 que filio copias invenisset, exercitu in naves inpo-
 sito, in Italiam trajecit. Et post paucos dies Ani-
 cius, conventu reliquorum Epirotarum Acarnanum-
 que acto, jussisque in Italiam sequi principibus,
 quorum cognitionem causæ reservarat, et ipse, na-

Paullus in
 Italiam tra-
 jecit, ut et
 Anicius.

vibus expectatis, quibus usus Macedonicus exercitus erat, in Italiam trajecit. Quum hæc in Macedonia Epiroque gesta sunt, legati, qui cum Attalo ad finiendum bellum inter Gallos et regem Eumenem missi erant, in Asiam pervenerunt. Induciis per hiemem factis, et Galli domos abierant, et rex in hiberna concesserat Perganum, gravique morbo æger fuerat. Ver primum ex domo excivit: jamque Synnada pervenerant, quum Eumenes ad Sardes undique exercitum contraxerat. Ibi et Romani Solovettium ducem Gallorum Synnadis adlocuti, et Attalus cum eis profectus; sed castra Gallorum intrare eum non placuit, ne animi ex disceptatione irritarentur. P. Licinius cum regulo Gallorum est locutus, retulitque, ferociorem eum deprecando factum: ut mirum videri posset, inter tam opulentos reges, Antiochum Ptolemæumque, tantum legatorum Romanorum verba valuisse, ut extemplo pacem facerent; apud Gallos nullius momenti fuisse.

XXXV. Romam primum reges captivi, Perseus et Gentius, in custodiam cum liberis abducti; dein turba alia captivorum: tum quibus Macedonum denunciatum erat, ut Romam venirent, principumque Græciæ: nam hi quoque non solum præsentibus excitati erant, sed etiam, si qui apud reges esse dicebantur, literis arcessiti sunt. Paullus ipse post dies paucos regia nave ingentis magnitudinis, quam sexdecim versus remorum agebant, ornata Macedonicis spoliis, non insignium tantum armorum, sed etiam regionum textilium, adverso Tiberi ad urbem est subvectus, completis ripis obviam effusa multitudine. Paucos post dies Anicius et Octavius classe sua advecti. Tribus iis omnibus decretus est ab senatu triumphus:

U. C. 585.
A. C. 167.

U. C. 585. *mandatumque Q. Cassio prætori, cum tribunis plebis*
 A. C. 167. *ex auctoritate Patrum ageret, rogationem ad plebem*
 Triumphus *ferrent, ut iis, quo die urbem triumphantes inve-*
 a senatude- *herentur, imperium esset. Intacta invidia media*
 cretusPaul- *herentur, imperium esset. Intacta invidia media*
 lo, Anicio, *sunt : ad summa ferme tendit : nec de Anicii, nec*
 et Octavio. *sunt : ad summa ferme tendit : nec de Anicii, nec*
de Octavii triumpho dubitatum est ; Paullum, cui
ipsi quoque se comparare erubuissent, obtrectatio
carpsit. Antiqua disciplina milites habuerat ; de
præda parcius, quam speraverant ex tantis regiis
opibus, dederat nihil relicturis, (si aviditati indulge-
retur) quod in ærarium deferret. Totus Macedo-
nicus exercitus imperatori erat negligenter adfuturus
comitiis ferendæ legis. Sed eos Ser. Sulpicius Galba,
qui tribunus militum secundæ legionis in Macedonia
fuerat, privatim imperatori inimicus, prensando ipse,
et per suæ legionis milites sollicitando, stimulave-
rat, ut frequentes ad suffragium adessent : Imperio-
sum ducem et malignum antiquando rogationem, quæ
de triumpho ejus ferretur, ulciscerentur : plebem ur-
banam secuturam esse militum judicia. Pecuniam il-
lum dare non potuisse, militem honorem dare posse ?
ne speraret ibi fructum gratiæ, ubi non meruisset.

XXXVI. His incitatis, quum in Capitolio roga-
 tionem eam Ti. Sempronius tribunus plebis ferret,
 et privatis lege dicendi locus esset, nec ad suaden-
 dum, ut in re minime dubia, quisquam procederet ;
 Ser. Galba repente processit, et a tribuno postulavit,

Ser. Galba *Ut, quoniam hora jam octava diei esset, nec satis tem-*
 dissuadet *poris ad demonstrandum haberet, cur L. Æmilium non*
 legem de *juberent triumphare, in posterum diem differrent, et*
 triumpho *juberent triumphare, in posterum diem differrent, et*
 Paulli. *mane eam rem agerent. Integro sibi die ad causam*
eam orandam opus esse. Quum tribunus dicere eo
die, si quid vellet, juberet, in noctem rem dicendo

extraxit, referendo admonendoque, *Exacta acerbe munia militiæ; plus laboris, plus periculi, quam desiderasset res, injunctum; contra in præmiis, in honoribus, omnia artata: militiamque, si talibus succedat ducibus, horridiorem asperiolemque bellantibus; eamdem victoribus inopem atque inhonoratam futuram. Macedonas in meliore fortuna, quam milites Romanos, esse. Si frequentes postero die ad legem antiquandam adessent, intellecturos potentes viros, non omnia in ducis, aliquid et in militum manu esse.* His vocibus incitati, postero die milites tanta frequentia Capitolium compleverunt, ut aditus nulli præterea ad suffragium ferendum esset. Intro vocatæ primæ tribus quum antiquarent, concursus in Capitolium principum civitatis factus est, *Indignum facinus esse, clamitantium, L. Paullum, tanti belli victorem, dispoliari triumpho: obnoxios imperatores tradi licentiæ atque avaritiæ militari: in uno nimis se per ambitionem peccare. Quid, si domini milites imperatoribus inponantur? In Galbam pro se quisque probra ingerere. Tandem, hoc tumultu sedato, M. Servilius, qui consul et magister equitum fuerat, ut de integro eam rem agerent, ab tribunis petere, dicendique sibi ad populum potestatem facerent. Tribuni, quum ad deliberandum secessissent, vieti auctoritatibus principum, de integro agere cœperunt, revocatuosque se easdem tribus renunciarunt, si M. Servilius aliique privati, qui dicere vellent, dixissent.*

XXXVII. Tum Servilius: *Quantus imperator L. Æmilius fuerit, Quirites, si ex alia re nulla æstimari possit, vel hoc satis erat, quod, quum tam seditiosos et leves milites, tam nobilem, tam temerarium, tam eloquentem ad instigandam multitudinem inimicum in*

U. C. 585.

A. C. 167.

Servilii
oratio pro
triumpho.

U. C. 585. *castris haberet, nullam in exercitu seditionem habuit.*

A. C. 167. *Eadem severitas imperii, quam nunc oderunt, tunc eos continuit. Itaque, antiqua disciplina habiti, neque fecerunt. Ser. quidem Galba, si in L. Paullo accusando tirocinium ponere, et documentum eloquentiæ dare voluit, non triumphum impedire debuit, quem, si nihil aliud, senatus justum esse judicaverat: sed postero die, quam triumphatum est, privatam eum visurus esset, nomen deferret, et legibus interrogaret; aut serius paullo, quum primum magistratus ipse cepisset, diem diceret, inimicum ad populum accusaret. Ita et pretium recte facti triumphum haberet L. Paullus pro egregie bello gesto; et pœnam, si quid et vetere gloria sua et nova indignum fecisset. Sed videlicet, cui crimen nullum, nullum probrum dicere poterat, ejus obtrectare laudes voluit. Diem integrum hesterno die ad accusandum L. Paullum petiit: quatuor horas, quantum supererat diei, dicendo absumsit. Quis umquam tam nocens reus fuit, cujus vitia vitæ tot horis expromi non possent? Quid interim objecit, quod L. Paullus, si causam dicat, negatum velit? Duas mihi aliquis conciones parumper faciat: unam militum Macedonicorum; puram alteram, integrioris judicii, et a favore et odio, universo judicante populo Romano. Apud concionem togatam et urbanam prius reus agatur. Quid apud Quirites Romanos, Ser. Galba, diceres? illa enim tibi tota abscisa oratio esset: “ in statione severius et intentius institisti; vigiliæ acerbius et diligentius circumitæ sunt; operis plus, quam antea, fecisti, quum ipse imperator et exactor circumires; eodem die et iter fecisti, et in aciem ex itinere duxisti. Ne victorem quidem te adquiescere passus est: statim ad persequendos hostes duxit. Quum te*

“ *præda partienda locupletem facere posset, pecuniam* U. C. 585.
 “ *regiam translaturus in triumpho est, et in ærarium* A. C. 167.
 “ *laturus.*”

Hæc sicut ad militum animos stimulandos aliquem aculeum habent, qui parum licentiæ, parum avaritiæ suæ inservitum censet; ita apud populum Romanum nihil valuissent: qui, ut vetera atque audita a parentibus suis non repetat, quæ ambitione imperatorum clades acceptæ sint, quæ severitate imperii victoriæ partæ, proximo certe Punico bello, quid inter M. Minucium magistrum equitum et Q. Fabium Maximum dictatorem interfuerit, meminit. Itaque accusatorem id scire potuisse, et supervacaneam defensionem Paulli fuisse. Transeat ad alteram concionem: nec Quirites vos, sed milites videor adpellaturus, si nomen hoc saltem ruborem incutere, et verecundiam aliquam imperatoris violandi adferre possit.

XXXVIII. *Equidem ipse aliter adfectus animo sum, qui apud exercitum mihi loqui videar, quam paullo ante eram, quum ad plebem urbanam spectabat oratio. Quid etiam dicitis, milites? Aliquis est Romæ, præter Persea, qui triumphari de Macedonibus nolit? et eum non iisdem manibus discerpitis, quibus Macedonas vicistis? Vincere vos prohibuisset, si potuisset, qui triumphantes urbem inire prohibet. Erratis, milites, si triumphum imperatoris tantum, et non militum quoque et universi populi Romani, esse decus censetis. Non unius hoc Paulli. Multi etiam, qui ab senatu non inpetrarunt triumphum, in monte Albano triumpharunt. Nemo L. Paullo magis eripere decus perfecti belli Macedonici potest, quam C. Lutatio primi Punici belli, quam P. Cornelio secundi, quam illis, qui post eos triumphaverunt. Nec L. Paullum minorem aut majorem imperatorem triumphus faciet: militum*

U. C. 585. *magis in hoc universique populi Romani fama agitur:*

A. C. 167. *primum ne invidiæ et ingrati animi adversus clarissimum quemque civem opinionem habeat, et imitari in hoc populum Atheniensem, lacerantem invidia principes suos, videatur. Satis peccatum in Camillo a majoribus vestris est, quem tamen ante receptam per eum a Gallis urbem violarunt: satis insuper a vobis in P. Africano. Literni domicilium et sedem fuisse domitoris Africae! Literni sepulcrum ostendi! Erubescamus, gloria si par illis viris L. Paullus, injuria vestra exæquetur. Hæc igitur primum infamia deleatur, fæda apud alias gentes, damnosa apud nostros. Quis enim aut Africani, aut Paulli, similis esse in ingrata et inimica bonis civitate velit? Si infamia nulla esset, et de gloria tantum ageretur, qui tandem triumphus non communem nominis Romani gloriam habet? Tot de Gallis triumphi, tot de Hispanis, tot de Pænis, ipsorum tantum imperatorum, an populi Romani, dicuntur? Quemadmodum non de Pyrrho modo, nec de Hannibale, sed de Epirotis Karthaginensibusque triumphi acti sunt; sic non M. Curius tantum, nec P. Cornelius, sed Romani triumpharunt. Militum quidem propria est caussa; qui et ipsi laureati, et quisque donis, quibus donati sunt, insignes, triumphum nomine cient, suasque et imperatoris laudes camentes per urbem incedunt. Si quando non deportati ex provincia milites ad triumphum sint, fremunt: et tamen tum quoque se absentes, quod suis manibus parta victoria sit, triumphare credunt. Si quis vos interroget, milites, ad quam rem in Italiam deportati; et non statim, confecta provincia, dimissi sitis? quid Romam frequentes sub signis veneritis, quid moremini hic, et non diversi domos quisque abeat vestras? quid aliud*

respondeatis, quam vos triumphantes videri velle? Vos U. C. 585.
certe victores conspici velle debebatis. A. C. 167.

XXXIX. *Triumphatum nuper de Philippo, patre hujus, et de Antiocho est: ambo regnabant, quum de his triumphatum est. De Perseo capto, in urbem cum liberis abducto, non triumphabitur? Quod si in curru scandentes Capitolium, auratos purpuratosque, ex inferiore loco L. Paullus in turba togatorum unus privatus interroget: L. Anici, Cn. Octavi, utrum vos digniores triumpho esse, an me, censetis? currum accessuri, et præ pudore videntur insignia ipsi sua tradituri. Et vos Gentium, quam Persea, duci in triumphum mavultis, Quirites, et de accessione potius belli, quam de bello, triumphari? Et legiones ex Illyrico laureatæ urbem inibunt, et navales socii? Macedonicæ legiones, suo abrogato, triumphos alienos spectabunt? Quid deinde tam opimæ prædæ, tam opulentæ victoriæ spoliis fiet? Quonam abdentur illa tot millia armorum, detracta corporibus hostium? an in Macedoniam remittentur? Quo signa aurea, marmorea, eburnea, tabulæ pictæ, textilia, tantum argenti cælati, tantum auri, tanta pecunia regia? An noctu, tamquam furtiva, in ærarium deportabuntur? Quid illud spectaculum maximum, nobilissimus opulentissimusque rex captus, ubi victori populo ostendetur? Quos Syphax rex captus, accessio Punici belli, concursus fecerit, plerique meminimus. Perseus rex captus, Philippus et Alexander filii regis, tanta nomina, subtrahentur civitatis oculis? Ipsum L. Paullum, bis consulem, domitorem Græciæ, omnium oculi conspiciere urbem curru ingredientem avent. Ad hoc fecimus consulem, ut bellum, per quadriennium ingenti etiam pudore nostro tractum, perficeret: cui sortito provinciam, cui pro-*

U. C. 585. *ficiscenti præsagientibus animis victoriam triumphum-*
 A. C. 167. *que destinavimus, ei victori triumphum negaturi? et*
quidem non homines tantum, sed Deos etiam suo ho-
nore fraudaturi? Diis quoque enim, non solum homi-
nibus, debetur. Utrum majores vestri omnium mag-
narum rerum et principia exorsi ab Diis sunt, et finem
eum statuerunt? Consul, proficiscens, prætorve, pa-
ludatis lictoribus, in provinciam et ad bellum, vota in
Capitolio nuncupat: victor, perpetrato eodem, in Ca-
pitolio triumphans ad eosdem Deos, quibus vota nun-
cupavit, merita dona populi Romani traducit: pars
non minima triumphi est victimæ præcedentes; ut
adpareat, Diis grates agentem imperatorem ob rem-
publicam bene gestam redire. Omnes illas victimas,
quas traducendas in triumpho vindicavit, alias alio
cædente, mactate: illas quidem epulas senatus, quæ
nec privato loco, nec publico profano, sed in Capitolio
eduntur, utrum hominum voluptatis caussa, an Deo-
rum hominumque, auctore Ser. Galba, turbaturi estis?
L. Paulli triumpho portæ claudentur? Rex Macedo-
num Perseus cum liberis et turba alia captivorum, spo-
lia Macedonum, citra flumen relinquentur? L. Paullus
privatus, tamquam rure rediens, a porta domum ibit?
Et tu, centurio, miles, quid de imperatore Paulo se-
natus decrevit potius, quam quid Ser. Galba fabuletur,
audi: et hoc dicere me potius, quam illum, audi. Ille
nihil, præterquam loqui, et ipsum maledice ac maligne,
didicit: ego ter et vicies cum hoste per provocationem
pugnavi: ex omnibus, cum quibus manum conserui,
spolia retuli: insigne corpus honestis cicatricibus, om-
nibus adverso corpore exceptis, habeo. Nudasse dein-
de se dicitur, et, quo quæque bello vulnera accepta
essent, retulisse: quæ dum ostentat, adaperitis forte,

quæ velanda erant, tumor inguinum proximis risum U. C. 385.
 movit. Tum, *Hoc quoque, quod ridetis, inquit, in* A. C. 167.
equo dies noctesque persedendo habeo: nec magis me
ejus, quam cicatricum harum, pudet pœnitetque;
quando numquam mihi impedimento ad rempublicam
bene gerendam domi militiæque fuit. Ego hoc ferro
sæpe vexatum corpus vetus miles adolescentibus militi-
bus ostendi: Galba nitens et integrum denudet. Re-
vocate, si videtur, tribuni, ad suffragium tribus; ego
ad vos milites,

* * * *

XL. Summam omnis captivi auri argentique Triumphus
 translati sestertiûm millies ducenties fuisse, Vale- Paulli.
 rius Antias tradit: quæ haud dubie major aliquanto
 summa ex numero plaustorum ponderibusque, auri,
 argenti, generatim ab ipso scriptis, efficitur. Alte-
 rum tantum aut in bellum proximum absumtum,
 aut in fuga, quum Samothracen peteret, dissipatum
 tradunt: eoque id mirabilius erat, quod tantum
 pecuniæ intra triginta annos post bellum Philippi
 cum Romanis, partim ex fructu metallorum, partim
 ex vectigalibus aliis, coacervatum fuerat. Itaque
 admodum inops pecuniæ Philippus, Perseus contra
 prædives, bellare cum Romanis cœpit. Ipse pos-
 tremo Paullus in curru magnam, quum dignitate
 alia corporis, tum senecta ipsa, majestatem præ se
 ferens: post currum inter alios inlustres viros filii
 duo, Q. Maximus et P. Scipio: deinde equites tur-
 matim, et cohortes peditum suis quæque ordinibus.
 Pediti in singulos dati centeni, duplex centurioni,
 triplex equiti: tantum pediti daturum fuisse credunt,
 et pro rata aliis, si aut non refragati honori ejus

U. C. 585. fuissent, aut benigne, hac ipsa summa nunciata, ad-
 A. C. 167. clamassent. Sed non Perseus tantum per illos dies
 documentum humanorum casuum fuit, in catenis
 ante currum victoris ducis per urbem hostium duc-
 tus; sed etiam victor Paullus, auro purpuraque
 fulgens. Nam duobus e filiis, quos, duobus datis in
 adoptionem, solos nominis, sacrorum, familiæque
 hæredes retinuerat domi, minor, ferme duodecim
 annos natus, quinque diebus ante triumphum, ma-
 jor, quatuordecim annorum, triduo post triumphum
 decessit: quos prætextatos curru vehi cum patre,
 sibi ipsos similes prædestinantes triumphos, opor-
 tuerat. Paucis post diebus, data a M. Antonio tri-
 buno plebis concione, quum de suis rebus gestis
 more ceterorum imperatorum disseruisset, memo-
 rabilis ejus oratio et digna Romano principe fuit.

Paullus
 duos filios
 amittit.

Oratio
 ejus ad
 populum.

XLI. *Quamquam et quam feliciter rempublicam
 administraverim, et quod duo fulmina domum meam
 per hos dies perculerint, non ignorare vos, Quirites,
 arbitror, quum spectaculo vobis nunc triumphus meus,
 nunc funera liberorum meorum fuerint; tamen paucis,
 quæso, sinatis me cum publica felicitate cōparare eo,
 quo debeo, animo privatam meam fortunam. Pro-
 fectus ex Italia, classem a Brundisio sole orto solvi;
 nona diei hora cum omnibus meis navibus Corcyram
 tenui. Inde quinto die Delphis Apollini pro me, ex-
 ercitusque, et classibus lustra sacrificavi. A Delphis
 quinto die in castra perveni: ubi exercitu accepto, mu-
 tatis quibusdam, quæ magna impedimenta victoriæ
 erant, progressus, quia inexpugnabilia castra hostium
 erant, neque cogi pugnare poterat rex, inter præsidia
 ejus saltum ad Petram evasi, et, ad pugnam rege co-
 acto, acie rici: Macedoniam in potestatem populi Ro-*

mani redegi, et, quod bellum per quadriennium qua- U. C. 585.
tuor ante me consules ita gesserunt, ut semper succes- A. C. 167.
sori traderent gravius, id ego quindecim diebus perfeci.
Aliarum deinde secundarum rerum velut proventus
secutus: civitates omnes Macedoniae se dediderunt; gaza
regia in potestatem venit; rex ipse, tradentibus prope
ipsis Diis, in templo Samothracum cum liberis est
captus. Mihi quoque ipsi nimia jam fortuna mea
videri, eoque suspecta esse. Maris pericula timere
cœpi, in tanta pecunia regia in Italiam trajicienda, et
victore exercitu transportando. Postquam omnia se-
cundo navium cursu in Italiam pervenerunt, neque erat,
quod ultra precarer, illud optavi, ut, quum ex summo
retro volvi fortuna consuesset, mutationem ejus domus
mea potius, quam respublica, sentiret. Itaque defunc-
tam esse fortunam publicam mea tam insigni calami-
tate spero; quod triumphus meus, velut ad ludibrium
casuum humanorum, duobus funeribus liberorum meo-
rum est interpositus. Et, quum ego et Perseus nunc
nobilia maxime sortis mortalium exempla spectemur,
ille, qui ante se captivos captivus ipse duci liberos vidit,
incolumes tamen eos habet: ego, qui de illo triumphavi,
*ab alterius funere filii curru in * * * ex Capitolio*
prope jam exspirantem veni: neque ex tanta stirpe
liberum superest, qui L. Æmilii Paulli nomen ferat.
Duos enim, tamquam ex magna progenie liberorum
in adoptionem datos, Cornelia et Fabia gens habent;
Paulli in domo, præter se, nemo superest. Sed hanc
cladem domus meæ vestra felicitas et secunda fortuna
publica consolatur.

XLII. Hæc, tanto dicta animo, magis confudere ^{Triumphus}
 audientium animos, quam si miserabiliter orbitatem ^{navalis Cn.}
 suam deflendo locutus esset. Cn. Octavius Kalendis ^{Octavii.}

U. C. 585. Decembribus de rege Perseo navalem triumphum
A. C. 167. egit. Is triumphus sine captivis fuit, sine spoliis.

Perseus
Albam
missus.

Dedit sociis navalibus in singulos denarios septuagenos quinos; gubernatoribus, qui in navibus fuerant, duplex; magistris navium quadruplex. Senatus deinde habitus est. Patres censuerunt, ut Q. Cassius Persea regem cum Alexandro filio Albam in custodiam duceret; comites, pecuniam, argentum, instrumentum quod haberet. Bitis, regis Thracum filius, cum obsidibus in custodiam Carseolos est missus. Ceteros captivos, qui in triumpho ducti erant, in carcerem condi placuit. Paucos post dies, quam hæc acta, legati ab Cotye rege Thracum venerunt, pecuniam ad redimendum filium aliosque obsides adportantes. Eis, in senatum introductis, et id ipsum argumenti prætendentibus orationis, non sua voluntate Cotyn bello juvisse Persea, quod obsides dare coactus esset, orantibusque, ut eos pretio, quantum ipsi statuissent Patres, redimi paterentur, responsum ex auctoritate senatus est: *Populum Romanum meminisse amicitiae, quæ cum Cotye, majoribusque ejus, et gente Thracum fuisset. Obsides datos crimen, non criminis defensionem, esse: quum Thracum genti ne quietus quidem Perseus, nedum bello Romano occupatus, timendus fuerit. Ceterum, etsi Cotys Persei gratiam prætulisset amicitiae populi Romani, magis, quid se dignum esset, quam quid merito ejus fieri posset, æstimaturum: filium atque obsides ei remissurum. Beneficia gratuita esse populi Romani: pretium eorum malle relinquere in accipientium animis, quam præsens exigere.* Legati nominati, T. Quinctius Flamininus, C. Licinius Nerva, M. Caninius Rebilus, qui obsides in Thraciam reducerent:

et Thracibus munera data in singulos binûm mil- U. C. 583.
 lium æris. Bitis, cum ceteris obsidibus a Carseolis A. C. 167.
 arcessitus, ad patrem cum legatis missus. Naves
 regiæ, captæ de Macedonibus inusitatæ ante mag-
 nitudinis, in campo Martio subductæ sunt.

XLIII. Hærente adhuc, non in animis modo, sed L. Anicij-
triumphus.
 pene in oculis, memoria Macedonici triumphi, L.
 Anicius Quirinalibus triumphavit de rege Gentio Il-
 lyriisque. Similia omnia magis visa hominibus, quam
 paria : minor ipse imperator, et nobilitate Anicius
 cum Æmilio, et jure imperii prætor cum consule
 conlatus : non Gentius Perseo, non Illyrii Macedo-
 nibus, non spolia spoliis, non pecunia pecuniæ, non
 dona donis comparari poterant. Itaque sicut præ-
 fulgebat huic triumphus recens ; ita adparebat ip-
 sum per se intuentibus nequaquam esse contemnen-
 dum. Perdomuerat intra paucos dies, terra mari-
 que ferocem, locisque munitis fretam, gentem Illy-
 riorum : regem regiæque omnes stirpis ceperat.
 Transtulit in triumphum multa militaria signa, spo-
 liaque alia, et supellectilem regiam : auri pondo
 viginti et septem, argenti decem et novem pondo :
 denariûm tria millia, et centum viginti millia Illyrii
 argenti. Ante currum ducti Gentius rex cum con-
 juge et liberis, et Caravantius frater regis, et aliquot
 nobiles Illyrii. De præda militibus in singulos
 quadragenos quinos denarios, duplex centurioni,
 triplex equiti, sociis nominis Latini quantum civi-
 bus, et sociis navalibus dedit quantum militibus.
 Lætior hunc triumphum est secutus miles, multisque
 dux ipse carminibus celebratus. Sestertiûm ducen-
 ties ex ea præda redactum esse, auctor est Antiás,
 præter aurum argentumque, quod in ærarium sit

U. C. 385. latum : quod quia unde redigi potuerit, non adpa-
 A. C. 167. rebat, auctorem pro re posui. Rex Gentius cum
 Gentius liberis, et conjuge, et fratre Spoletium in custodiam
 cum suis Spoletium ex senatusconsulto ductus, ceteri captivi Romæ in
 missus, carcerem conjecti : recusantibusque custodiam Spo-
 letinis, Igiturvium reges traducti. Reliquum ex
 tum Igu- Illyrico prædæ ducenti viginti lembi erant ; de
 vium. Gentio rege captos eos Corcyræis, et Apolloniatis-
 bus, et Dyrrachinis Q. Cassius ex senatusconsulto
 tribuit.

XLIV. Consules eo anno, agro tantum Ligurum
 populato, quum hostes exercitus numquam eduxis-
 sent, nulla re memorabili gesta, Romam ad magis-
 tratus subrogandos redierunt ; et primo comitali
 die consules crearunt M. Claudium Marcellum, C.
 Sulpicium Gallum. Deinde prætores postero die
 L. Julium, L. Appuleium Saturninum, A. Licinium
 Nervam, P. Rutilium Calvum, P. Quinctilium Va-
 rum, M. Fonteium. His prætoribus duæ urbanæ
 provinciæ sunt decretæ, duæ Hispaniæ, Sicilia ac
 Sardinia. Intercalatum eo anno : postridie Ter-
 minalia intercalares fuerunt. Augur eo anno mor-
 tuus est C. Claudius : in ejus locum augures lege-
 runt T. Quinctium Flamininum : et flamen Quirinalis

Prusias rex mortuus Q. Fabius Pictor. Eo anno rex Prusias
 Romam venit. venit. venit Romam cum filio Nicomede. Is, magno co-
 mitatu urbem ingressus, ad forum a porta tribunal-
 que Q. Cassii prætoris perrexit : concursuque undi-
 que facto, *Deos, qui urbem Romam incolerent, sena-
 tumque et populum Romanum salutatum se dixit ve-
 nisse : et gratulatum, quod Persea Gentiumque reges
 vicissent ; Macedonibusque et Illyriis in ditionem red-
 actis, auxissent imperium. Quum prætor senatum*

ei, si velit, eo die daturum dixisset; biduum petiit, U. C. 585.
A. C. 167.
quo templa Deūm urbemque et hospites amicosque
viseret. Datus, qui circumduceret eum, L. Cornelius Scipio quæstor; qui et Capuam ei obviam
missus fuerat; et ædes, quæ ipsum comitesque ejus
benigne reciperent, conductæ. Tertio post die senatum adit; gratulatus victoriam est; merita sua
in eo bello commemoravit; petiit, *Ut votum sibi
solvere, Romæ in Capitolio decem majores hostias, et
Præneste unam Fortunæ, liceret: ea vota pro victoria
populi Romani esse. Et ut societas secum renovaretur;
agerque sibi, de rege Antiocho captus, quem nulli
datum a populo Romano Galli possiderent, daretur.*
Filiū postremo Nicomedem senatui commendavit.
Omnium, qui in Macedonia imperatores fuerant,
favore est adjutus. Itaque cetera, quæ petebat,
concessa: de agro responsum est, *Legatos ad rem
inspiciendam missuros. Si ager populi Romani fuisset,
nec cuiquam datus esset, dignissimum eo dono
Prusiam habituros esse. Si autem Antiochi non fuisset,
eo ne populi quidepi Romani factum adparere;
aut, si datus Gallis esset, ignoscere Prusiam debere,
si ex nullius injuria quidquam ei datum vellet populus
Romanus. Ne quod detur quidem, gratum esse donum
posse, quod eum, qui det, ubi vellet, ablaturum esse
sciat. Facile Nicomedis commendationem accipere.*
Quanta cura regum amicorum liberos tueatur populus
Romanus, documento Ptolemæum Ægypti regem esse.
Cum hoc responso Prusias est dimissus. Munera
ei ex * sestertiis jussa dari, et vasorum argenteorum
pondo quinquaginta; et filio regis Nicomedi ex ea
summa munera dari censuerunt, ex qua Masgabæ
filio regis Masinissæ data essent: et ut victimæ

U. C. 585. aliaque, quæ ad sacrificium pertinerent, seu Romæ,
 A. C. 167. seu Præneste inmolare vellet, regi ex publico, sicut
 magistratibus Romanis, præberentur: et ut ex
 classe, quæ Brundisii esset, naves longæ viginti
 adsignarentur, quibus uteretur, donec ad classem,
 dono datam ei, rex pervenisset. L. Cornelius Scipio
 ne ab eo abscederet, sumtumque ipsi et comitibus
 præberet, donec navem conscendisset. Mire lætum
 et ea benignitate in se populi Romani regem fuisse,
 ferunt: munera sibi ipsum emisse; filium jussisse
 donum populi Romani accipere. Hæc de Prusia
 nostri scriptores. Polybius, eum regem indignum
 majestate nominis tanti, tradit; pileatum, capite
 raso, obviam ire legatis solitum, libertumque se
 populi Romani ferre; et ideo insignia ordinis ejus
 gerere. Romæ quoque, quum veniret in curiam,
 submisisse se, et osculo limen curiæ contigisse: et
Deos servatores suos senatum adpellasse, aliamque
 orationem, non tam honorificam audientibus, quam
 sibi deformem, habuisse. Moratus circa urbem tri-
 ginta haud amplius dies in regnum est profectus.

Prusiæ
 vilitas.

EPITOMÆ
LIBRORUM
DEPERDITORUM.



EPITOME XLVI.

EUMENES rex Romam venit: qui, quia Macedonico bello medium egerat, ne aut hostis judicatus videretur, si exclusus esset, aut liberatus crimine, si admitteretur; in commune lex lata est, ne cui regi Romam venire liceret. Claudius Marcellus consul Alpinos Gallos, C. Sulpicius Gallus consul Ligures subegit. Legati Prusiæ regis conquesti sunt de Eumene, quod fines suos popularetur: dixeruntque, eum conspirasse cum Antiocho contra populum Romanum. Societas cum Rhodiis deprecantibus juncta est. Lustrum a censoribus conditum est. Censa sunt civium capita trecenta viginti septem millia viginti duo. Princeps senatus lectus M. Æmilius Lepidus. Ptolemæus Ægypti rex, pulsus regno a minore fratre, missis ad eum legatis, restitutus est. Ariarathe Cappadociæ rege mortuo, filius ejus Ariarathes regnum accepit, et amicitiam cum populo Romano per legatos renovavit. Res præterea adversus Ligures, et Corsos, et Lusitanos, vario eventu gestas, et motus Syriæ, mortuo Antiocho, qui filium Antiochum puerum admodum reliquerat, continet. Hunc Antiochum puerum cum Lysia tutore Demetrius, Seleuci filius, qui Romæ obses fuerat, clam, quia non dimittebatur a Romanis, interemit; et ipse in regnum receptus. L. Æmilio Paullo, qui Persen vicerat, mortuo, tanta ejus abstinencia fuit, ut, quum ex Hispania et ex Macedonia immensas opes retulisset, vir ex auctione ejus redactum sit, unde uxori ejus dos

solveretur. Pomptinæ paludes a Cornelio Cethego consule, cui ea provincia evenerat, siccatae, agerque ex iis factus.

XLVII.

CN. Tremellio tribuno plebis multa dicta est, quod cum M. Æmilio Lepido pontifice maximo injuriose contenderat: sacrorumque, quam magistratuum, jus potentius fuit. Lex de ambitu lata. Lustrum a censoribus conditum est. Censa sunt civium capita trecenta triginta octo millia, trecenta quatuordecim. Princeps senatus lectus Æmilius Lepidus. Inter Ptolemæos fratres, qui dissidebant, fœdus ictum, ut alter in Ægypto, alter Cyrenis regnaret. Ariaruthes, Cappadociæ rex, consilio Demetrii, regis Syriæ, et viribus pulsus regno, a senatu restitutus est. Missi a senatu, qui inter Masinissam et Karthaginienses de agro judicarent. C. Marcius consul adversus Dalmatas parum prospere primum, postea feliciter pugnavit; cum quibus bello configendi causa fuit, quod Illyrios, populi Romani socios, vastaverant; eandemque gentem Cornelius Nasica consul domuit. Q. Opimius consul Transalpinos Ligures, qui Massiliensium oppida, Antipolim et Nicæam, vastabant, subegit. Præterea res in Hispania a compluribus parum prospere gestas continet. Consules anno quingentesimo nonagesimo octavo ab urbe condita magistratum, peractis comitiis, insequentisque anni consulibus creatis, inire cæperunt. Mutandi comitia causa fuit, quod Hispani rebellabant. Legati, ad disceptandum inter Masinissam et Karthaginienses missi, renunciaverunt, vim navalis materiæ se Karthagine deprehendisse. Aliquot prætores, a provinciis avaritiæ nomine accusati, damnati sunt.

XLVIII.

LUSTRUM a censoribus conditum est. Censa sunt civium capita trecenta viginti quatuor millia. Semina tertii belli Punici referuntur. Quum in finibus Karthaginiensium ingens Numidarum exercitus, duce Ariobarzane, Syphacis nepote, diceretur esse, M. Porcius Cato suavit, ut Karthaginiensibus, quum Ariobarzanem, specie contra Masinissam regem, sed re vera contra Romanos, aditum in finibus haberent, bellum indiceretur. Contradicente P. Cornelio Nasica, placuit, legatos mitti Karthaginem, qui specularentur, quid ageretur. Castigato senatu Karthaginiensium, quod contra fœdus et exercitum et navales materias haberent, pacem inter eos et Masinissam facere voluerunt, Masinissa agro, de quo lis erat, cedente: sed Gisco, Hamilcaris filius, homo seditiosus, qui tunc in magistratu erat, quum senatus pariturum se iudicio legis dixisset, ita bellum adversus Romanos suadendo concitavit, ut legatos, quo minus violarentur, fuga explicuerit. Id nunciantes, infestum jam senatum Karthaginiensibus, infestiores fecerunt. M. Porcius Cato filii, in prætura mortui, funus tenuissimo, ut valuit, (nam pauper erat) sumtu fecit. Andriscus, qui se Persei filium, regis quondam Macedoniæ, ingenti adseveratione mentiretur, Romam missus. M. Æmilius Lepidus, qui princeps senatus ab sextis jam censoribus erat lectus, antequam expiraret, præcepit filiis, lecto se strato sine linteis, sine purpura efferrent; in reliquum funus ne plus, quam æris denos, consumerent: imaginum specie, non sumtibus, nobilitari magnorum virorum funera solere. De veneficiis quæsitum. Publicia et Licinia, nobiles feminae, quæ viros suos con-

sulares necasse insimulabantur, cognita caussa, quum prætore pro se vades dedissent, cognatorum decreto necatæ sunt. Gulussa, Masinissæ filius, denunciavit, Karthagine delectus agi, classem comparari, et haud dubium bellum strui. Quum Cato suaderet, ut iis bellum indiceretur, P. Cornelio Nasica dicente, nihil temere faciendum, placuit, decem mitti legatos exploratum. L. Licinius Lucullus, A. Postumius Albinus consules, quum delectum severe agerent, nec quemquam gratia dimitterent, ab tribunis plebis, qui pro amicis suis vacationem inpetrare non poterant, in carcerem conjecti sunt. Quum Hispaniense bellum, parum prospere aliquoties gestum, ita confudisset civitatem Romanam, ut ne ii quidem invenirentur, qui aut tribunatum exciperent, aut legati ire vellent, P. Cornelius Æmilianus processit, et excepturum se militiæ genus, quodcumque imperatum esset, professus est: quo exemplo omnes ad studium militandi concitavit. L. Lucullus consul, qui M. Claudio Marcello successerat, quum lacessere omnes Celtiberiæ populi viderentur, Vaccæos, et Cantabros, et alias adhuc incognitas nationes in Hispania subegit. Ibi P. Cornelius Africanus Scipio Æmilianus, L. Paulli filius, Africani nepos, sed adoptivus, provocatorem barbarum tribunus militum occidit: et in obpugnatione Intercatiæ urbis, majus etiam periculum adiit: nam murum primus transcendit. Ser. Sulpicius Galba prætor male adversus Lusitanos pugnavit. Quum legati ex Africa cum oratoribus Karthaginensium, et Gulussa Masinissæ filio, redissent, dicerentque, et exercitum se et classem Karthagineprehendisse, perrogari sententias placuit. Catone et aliis principibus senatui suadentibus, ut in Africam confestim transportaretur exercitus, quod P.

Cornelius Nasica dicebat, nondum sibi justam causam belli videri, placuit, ut bello abstinerent, si Karthaginienses classem exussissent, et exercitum dimisissent: sin minus, proximi consules de Punico bello referrent. Quum locatum a censoribus theatrum exstrueretur; P. Cornelio Nasica auctore, tamquam inutile et nociturum publicis moribus, ex senatusconsulto destructum est, populusque aliquamdiu stans ludos spectavit. Karthaginienses quum adversus fœdus bellum Masinissæ intulissent, victi ab eo, annos habente nonaginta duos, et sine pulpamine mandere et gustare panem tantum solito, insuper Romanum bellum meruerunt.

XLIX.

TERTII Punici belli initium altero et sexcentesimo anno ab urbe condita, intra quintum annum, quam erat cœptum, consummati. Inter M. Porcium Catonem et Scipionem Nasicam, quorum alter sapientissimus vir in civitate habebatur, alter etiam vir optimus a senatu judicatus erat, diversis certatum sententiis est; Catone suadente bellum, et ut tolleretur deletereturque Karthago; Nasica dissuadente. Placuit tamen, quod contra fœdus naves haberent, quod exercitum extra fines duxissent, quod socio populi Romani et amico Masinissæ arma intulissent, quod filium ejus Gulussam, qui cum legatis Romanis erat, in oppidum non recepissent, bellum iis indici. Priusquam ullæ copiæ in naves inponerentur, Uticenses legati Romam venerunt, se suaque omnia dedentes. Ea legatio, veluti omen, grata Patribus, acerba Karthaginiensibus fuit. Diti patri ludi ad Terentum, ex præcepto librorum Sibyllinorum, facti: qui anno centesimo, primo Punico bello, quingentesimo et altero anno ab urbe condita, facti erant. Legati

triginta Romam venerunt, per quos se Karthaginienses dedebant. Catonis sententia pervicit, ut in decreto perstaretur, et ut consules quam primum ad bellum proficiscerentur. Qui ubi in Africam transierunt, acceptis, quos imperaverant, trecentis obsidibus, et armis, omnibusque instrumentis bellicis, si qua Karthagine erant; tunc, quum ex auctoritate Patrum juberent, ut in alium locum, dum a mari decem millia passuum, ne minus, remotum, oppidum facerent, indignitate rei ad bellandum Karthaginienses compulerunt. Obsideri obpugnarique cœpta est Karthago ab L. Marcio, M. Manilio consulibus. In qua obpugnatione quum neglectos ab una parte muros duo tribuni temere cum cohortibus suis inrupissent, et ab oppidanis graviter cæderentur, a Scipione Africano expliciti sunt: per quem et castellum Romanorum, quod nocte expugnabant, paucis equitibus juvantibus, liberatum est: castrorumque, quæ Karthaginienses, omnibus copiis ab urbe pariter egressi, obpugnabant, liberatorum is ipse præcipuam gloriam tulit. Præterea, quum ab irrita obpugnatione Karthaginis consul (alter enim Romam ad comitia ierat) exercitum duceret adversus Hasdrubalem, qui cum altera manu iniquum saltum insederat, suasit primo consuli, ne tam iniquo loco conflingeret: victus deinde complurium, qui et prudentiæ ejus et virtuti invidebant, sententiis, et ipse saltum ingressus est: quumque, sicut prædixerat, fusus fugatuque esset Romanus exercitus, et duæ cohortes ab hoste obsiderentur, cum exiguis equitum turmis in saltum reversus, liberavit eas, et incolumes reduxit. Quam virtutem ejus et Cato, vir promptioris ad vituperandum linguæ, in senatu sic prosecutus est, ut diceret, reliquos, qui in Africa militarent, umbras militare, Scipionem

vigere; et *populus Romanus* eo favore complexus, ut comitiis plurimæ eum tribus consulem scriberent, quum hoc per ætatem non liceret. Quum *L. Scribonius* tribunus plebis rogationem promulgasset, ut *Lusitani*, qui, in fidem *populi Romani* dediti, a *Ser. Galba* in *Galliam* venissent, in libertatem restituerentur, *M. Cato* acerrime suasit: exstat oratio in *Annalibus* ejus inclusa. *Q. Fulvius Nobilior*, et sæpe ab eo in senatu laceratus, respondit pro *Galba*: ipse quoque *Galba*, quum se damnari videret, complexus duos filios prætextatos, et *Sulpicii Galli* filium, cujus tutor erat, ita miserabiliter pro se locutus est, ut rogatio antiquaretur. Exstant tres orationes ejus: duæ adversus *Libonem* tribunum plebis rogationemque ejus, habitæ de *Lusitanis*: una contra *L. Cornelium Cethegum*, in qua *Lusitanos* propter sese castra habentes cæsos fatetur, quod compertum habuerit, equo atque homine suo ritu inmolatis, per speciem pacis adoriri exercitum suum in animo habuisse. *Andriscus* quidam, ultimæ sortis homo, *Persei* regis se filium ferens, et mutato nomine *Philippus* vocatus, quum ab urbe *Romana*, quo illum *Demetrius Syriæ* rex ob hoc ipsum mendacium miserat, clam profugisset, multis ad falsam ejus fabulam, velut ad veram, coëuntibus, contracto exercitu, totam *Macedoniam* aut voluntate incolentium, aut armis occupavit. Fabulam autem talem finxerat. Ex pellice se et *Perseo* rege ortum, traditum educandum *Cretensi* cuidam esse, ut in belli casus, quod ille cum *Romanis* gereret, aliquod velut semen regię stirpis exstaret. *Perseo* demortuo, *Adramyttei* se educatum usque ad duodecimum annum ætatis, patrem eum esse credentem, a quo educaretur, ignarum generis fuisse sui: adfecto deinde eo, quum prope ad vitæ finem ultimum esset, detectam.

tandem ibi originem suam, falsæque matri libellum datum, signo Persei regis signatum, quem sibi traderet, quum ad puberem ætatem venisset; obtestationesque ultimas adjectas, ut res in occulto ad id tempus servaretur: pubescenti libellum traditum: in quo relictis sibi duo thesauri a patre dicerentur: tum scientem mulierem subditum se esse, veram stirpem ignoranti edidisse genus; atque obtestatam, ut prius, quam manaret ad Eumenem res, Perseo inimicum, excederet iis locis, ne interficeretur: eo se exterritum, simul sperantem aliquod a Demetrio auxilium, in Syriam se contulisse: atque ibi primum, quis esset, palam expromere ausum.

L.

THESSALIA, quum et illam invadere armis atque occupare Pseudophilippus vellet, per legatos Romanorum auxiliis Achæorum defensa est. Prusias rex Bithyniæ, omniumque humillimorum vitiorum, a Nicomede filio, adjuvante Attalo rege Pergami, occisus est. Habebat alium filium, qui, pro superiore ordine dentium, enatum habuisse unum os continens dicitur. Quum legatos ad pacem inter Nicomedem et Prusiam faciendam Romani misissent, et unus ex iis multis cicatricibus sparsum caput haberet, alter pedibus æger esset, tertius ingenio socors haberetur; dixit Cato, eam legationem nec caput, nec pedes, nec cor habere. In Syria, quæ eo tempore ex stirpe generis Persei, regis Macedonum, inertia socordiaque similem Prusiæ regem habebat, jacente eo in ganea et lustris, Ammonius regnabat; per quem et amici omnes regis, et Laodice regina, et Antigonus, Demetrii filius, occisi. Masinissa, Numidiæ rex, major nonaginta annis decessit. vir insignis. Inter cetera opera juvenilia, quæ ad ultimum

edidit, adeo, etiam versus in senectam, vixit, ut post sextum et octogesimum annum filium genuerit. Inter tres liberos ejus, maximum natu Micipsam, Gulussam, Mastanabalem, qui etiam Græcis literis eruditus erat, P. Scipio Æmilianus (quum commune eis pater regnum reliquisset, et dividere eos arbitro Scipione jussisset,) partes administrandi regni divisit. Item Phamæ Himilconi, præfecto equitum Karthaginiensium, viro forti, et cujus præcipua opera Pæni utebantur, persuasit, ut ad Romanos cum equitatu suo transiret. Ex tribus legatis, qui ad Masinissam missi fuerant, Claudius Marcellus, coorta tempestate, fluctibus obrutus est. Karthaginienses Hasdrubalem, Masinissæ nepotem, quem prætorem habebant, proditiōis suspectum, in curia occiderunt: quæ suspicio inde emanavit, quod propinquus esset Gulussæ, Romanorum auxilia juvantis. P. Scipio Æmilianus, quum ædilitatem peteret, consul a populo dictus, quoniam per annos consulem fieri non licebat, cum magno certamine suffragantis plebis, et repugnantibus aliquamdiu Patribus, legibus solutus, et consul creatus est. M. Manilius aliquot urbes circumpositas Karthagini expugnavit. Pseudophilippus in Macedonia, cæso cum exercitu P. Juventio prætore, a Q. Cæcilio victus captusque est, et recepta Macedonia.

LI.

KARTHAGO, in circuitu millia viginti tria passuum patens, magno labore obsessa, et per partes capta est; primum a Mancino legato, deinde a Scipione consule, cui extra sortem provincia Africa data erat. Karthaginienses, portu novo (quia vetus obstructus a Scipione erat) facto, et contracta clam exiguo tempore

ampla classe, infelicitèr navali prælio pugnaverunt. Hasdrubalis quoque ducis eorum castra, ad Nepherim oppidum loco difficili sita, cum exercitu deleta sunt a Scipione; qui tandem urbem expugnavit septingentesimo anno, quam erat condita: spoliis major pars Siculis, quibus ablata erant, reddita. Ultimo urbis excidio, quum se Hasdrubal Scipioni dedidisset, uxor ejus, quæ paucis ante diebus de marito inpetrare non potuerat, ut ad victorem transfugerent, in medium se flagrantis urbis incendium, duobus cum liberis, ex arce præcipitavit. Scipio exemplo patris sui naturalis Æmilii Paulli, qui Macedoniam vicerat, ludos fecit, transfugasque ac fugitivos bestiis objecit. Belli Achaici semina referuntur hæc: quod legati populi Romani ab Achaicis pulsati sint Corinthi, missi, ut eas civitates, quæ sub ditione Philippi fuerant, ab Achaico concilio secernerent.

LII.

CUM Achæis, qui in auxilio Bæotos et Chalcidenses habebant, Q. Cæcilius Metellus ad Thermopylas bello conflictit: quibus victis, dux eorum Critolaus veneno sibi mortem conscivit: in cujus locum Diaus, Achaici motus primus auctor, ab Achæis dux creatus, ad Isthmon a L. Mummius consule victus est: qui, omni Achaia in deditionem accepta, Corinthon ex senatusconsulto diruit, quia ibi legati Romani violati erant. Thebæ quoque et Chalcis, quæ auxilio fuerant, dirutæ. Ipse L. Mummius abstinentissimum virum egit; nec quidquam ex iis opibus ornamentisque, quæ prædives Corinthos habuit, in domum ejus pervenit. Q. Cæcilius Metellus de Andrisco triumphavit; P. Cornelius Scipio Africanus Æmilianus de Karthagine et de Hasdrubale.

Viriathus in Hispania primum ex pastore venator, ex venatore latro, mox justi quoque exercitus dux factus, totam Lusitaniam occupavit; M Vetilium prætorem, fuso ejus exercitu, cepit: post quem C. Plautius prætor nihilo felicius rem gessit: tantumque terroris is hostis intulit, ut adversus eum consulari opus esset et duce, et exercitu. Præterea motus Syriæ, et bella inter reges gesta referuntur. Alexander, homo ignotus et incertæ stirpis, occiso (sicut ante dictum est) Demetrio rege, in Syria regnabat: hunc Demetrius, Demetrii filius, qui a patre quondam ob incertos belli casus ablegatus Gnidon fuerat, contempta socordia inertiaque ejus, adjuvante Ptolemæo Ægypti rege, cujus filiam Cleopatram in matrimonium acceperat, bello interemit. Ptolemæus in caput graviter vulneratus, inter curationem, dum ossa medici terebrare contendunt, expiravit: atque in locum ejus frater minor Ptolemæus, qui Cyrenis regnabat, successit. Demetrius ob crudelitatem, quam per tormenta in suos exercebat, a Diodoto quodam, uno ex subjectis, qui Alexandri filio, bimulo admodum, regnum adserebat, bello superatus, Seleuciam confugit. L. Mummius de Achæis triumphavit: signa ærea, marmoreaque, et tabulas pictas in triumpho tulit.

LIII.

AP. CLAUDIUS consul Salassos, gentem Alpinam, domuit. Alter Pseudophilippus in Macedonia a L. Tremellio quæstore cum exercitu cæsus est. Q. Cæcilius Metellus proconsul Celtiberos cecidit: a Q. Fabio proconsule pars magna Lusitaniae, expugnatis aliquot urbibus, recepta est. C. Julius senator Græce res Romanas scribit.

LIV.

Q. POMPEIUS consul in Hispania Terrestinos subegit: cum eisdem et Numantinis pacem ab infirmitate fecit. Lustrum a censoribus conditum est. Censa civium capita trecenta viginti octo millia, quadringenta quadraginta duo. Quum Macedonum legati conquestum de D. Junio Silano pratore venissent, quod acceptis pecuniis provinciam spoliasset, et senatus de querelis eorum vellet cognoscere; T. Manlius Torquatus, pater Silani, petiit, inpetravitque, ut sibi cognitio mandaretur: et, domi caussa cognita, filium condemnavit, abdicavitque; ac ne funeri quidem ejus (quum suspendio vitam finisset) interfuit; sedensque domi potestatem consultantibus ex instituto fecit. Q. Fabius proconsul rebus in Hispania prospere gestis labem inposuit, pace cum Viriatho æquis conditionibus facta. Viriathus a proditoribus, consilio Servilii Cæpionis, interfectus est, et ab exercitu suo multum comploratus, ac nobiliter sepultus; vir duxque magnus, et per quatuordecim annos, quibus cum Romanis bellum gessit, frequentius superior.

LV.

P. CORNELIO Nasica, cui cognomen Serapion fuit ab inidente Curiatio tribuno plebis inpositum, et D. Junio Bruto consulibus delectum habentibus, in conspectu tironum res saluberrimi exempli facta est: nam C. Matienus accusatus est apud tribunos plebis, quod exercitum in Hispania deseruisset: damnatusque, sub furca diu virgis casus est, et sestertio nummo venit. Tribuni plebis, quia non inpetrarent, ut sibi denos, quos vellent, milites eximere liceret, consules in carce-

rem duci jusserunt. *Junius Brutus* consul in *Hispania* iis, qui sub *Virintho* militaverant, agros et oppidum dedit, quod *Valentia* vocatum est. *M. Popillius* a *Numantinis*, cum quibus pacem factam senatus irritam fieri censuerat, cum exercitu fusus fugatusque est. *C. Hostilio Mancino* consule sacrificante, pulli ex cavea evolaverunt: conscendenti deinde navim, ut in *Hispaniam* proficisceretur, accidit vox, *Mane, Mancine*: quæ auspicia tristia fuisse, eventu probatum est. *Victus* enim a *Numantinis* et castris exutus, quum spes nulla servandi exercitus esset, pacem cum eis fecit ignominiosam, quam ratam esse senatus vetuit. *Triginta* millia *Romanorum* a *Numantinorum* millibus quatuor victa erant. *D. Junius Lusitaniam*, *triginta* urbium expugnationibus, usque ad occasum et oceanum perdomuit: et, quum fluvium *Oblivionem* transire nolent milites, ereptum signifero signum ipse transtulit, et sic, ut transgrederentur, persuasit. *Alexandri* filius, rex *Syriæ*, decem annos admodum habens, a *Diodoto*, qui *Tryphon* cognominabatur, tutore suo, per fraudem occisus est; corruptis medicis, qui, eum calculi dolore consumi ad populum mentiti, dum secant, occiderunt.

LVI.

D. JUNIUS Brutus in *Hispania* ulteriore feliciter adversus *Gallæcos* pugnavit: dissimili eventu *M. Æmilius Lepidus* proconsul adversus *Vaccæos* rem gessit, clademque similem *Numantinæ* passus est. Ad exsolvendum *Numantini* fœderis religione populum, *Mancinus*, quum hujus rei auctor fuisset, deditus *Numantinis*, non est receptus. *Lustrum* a censoribus conditum est. Censa sunt civium capita trecenta viginti tria millia. *Fulvius Flaccus* consul *Vardæos* in *Illyrico*

subegit. *M. Cosconius prætor in Thracia cum Scordiscis prospere pugnavit. Quum bellum Numantinum vitio ducum non sine pudore publico duraret, delatus est ultro Scipioni Africano a senatu populoque Romano consulatus: quem quum illi capere ob legem, quæ vetabat, quemquam iterum consulem fieri, non liceret, sicuti priori consulatu, legibus solutus est. Bellum servile, in Sicilia ortum, quum obprimi a prætoribus non potuisset, C. Fulvio consuli mandatum est: hujus belli initium fuit Eunus servus, natione Syrus; qui, contracta agrestium servorum manu, et solutis ergastulis, justus exercitus numerum inplevit. Cleon quoque, alter servus, ad septuaginta millia servorum contraxit; et, copiis junctis, contra populum Romanum exercitumque ejus bellum sæpe gesserunt.*

LVII.

SCIPIO Africanus Numantiam obsedit, et corruptum licentia luxuriaque exercitum ad severissimam militiæ disciplinam revocavit: omnia deliciarum instrumenta recidit; duo millia scortorum a castris ejecit; militem quotidie in opere habuit, et triginta dierum frumentum ad septenos vallos ferre cogebat: ægre propter onus incedenti dicebat, Quum gladio te vallare scieris, vallum ferre desinito. Alii, scutum parvum habiliter ferenti, scutum amplius justo ferre jussit: neque id se reprehendere, quando melius scuto, quam gladio, uteretur. Quem militem extra ordinem deprehendit, si Romanus esset, vitibus; si extraneus, fustibus cecidit. Jumenta omnia, ne exonerarent militem, vendidit. Sæpe adversus eruptiones hostium feliciter pugnavit. Vaccæi obsessi, liberis conjugibusque trucidatis, ipsi se interemerunt. Scipio amplissima munera, missa sibi

ab Antiocho rege Syriae, quum celare aliis imperatoribus regum munera mos esset, pro tribunali accepturum se esse dixit, omniaque ea referre quaestorem in publicas tabulas jussit: ex iis se viris fortibus dona daturum. Quum undique Numantiam obsidione clausisset, et obsessos fame videret urgeri; hostes, qui pabulatum exierant, vetuit occidi; quod diceret, velocius eos assumpturos, frumenti quod haberent, si plures fuissent.

LVIII.

TI. SEMPRONIUS Gracchus tribunus plebis, quum legem agrariam ferret adversus voluntatem senatus et equestris ordinis, ne quis ex publico agro plus, quam quingenta jugera, possideret, in eum furorem exarsit, ut M. Octavio collegæ, causam diversæ partis defendenti, potestatem lege lata abrogaret: seque, et Gracchum fratrem, et Ap. Claudium socerum, triumviros ad dividendum agrum crearet. Promulgavit et aliam legem agrariam, qua sibi latius agrum patefaceret, ut iidem triumviri judicarent, qua publicus ager, qua privatus esset: deinde, quum minus agri esset, quam quod dividi posset sine offensa etiam plebis, (quoniam eos ad cupiditatem amplum modum sperandi incitaverat) legem se promulgaturum ostendit, ut iis, qui Sempronia lege agrum accipere deberent, pecunia, quæ regis Attali fuisset, divideretur. Hæredem autem populum Romanum reliquerat Attalus, rex Pergami, Eumenis filius. Tot indignitatibus commotus graviter senatus, ante omnes T. Annius consularis, qui, quum in senatu in Gracchum perorasset, raptus ab eo ad populum, delatusque plebi, rursus in eum pro rostris concionatus est. Quum iterum tribunus plebis creari vellet Gracchus, auctore P. Cornelio Nasica, in Capitolio ab optimatibus

occisus est, ictus primum fragmentis subselliorum, et inter alios, qui in eadem seditione occisi erant, impultus in flumen projectus. Res præterea in Sicilia vario eventu adversus fugitivos gestas continet.

LIX.

NUMANTINI, fame coacti, ipsi se per vicem tradentes trucidaverunt. Captam urbem Scipio Africanus delevit, et de ea triumphavit, quartodecimo anno post Karthaginem deletam. P. Rupilius consul in Sicilia cum fugitivis debellavit. Aristonicus, regis Eumenis filius, Asiam occupavit; quum, testamento Attali regis legata populo Romano, libera esse deberet. Adversus eum P. Licinius Crassus consul, quum idem pontifex maximus esset, (quod numquam antea factum erat) extra Italiam profectus, prælio victus et occisus est. M. Perperna consul victum Aristonicum in deditionem accepit. Q. Pompeius et Q. Metellus, tunc primum uterque ex plebe facti censores, lustrum condiderunt. Censa sunt civium capita trecenta septemdecim millia, octingenta viginti tria, præter pupillos et viduas. Q. Metellus censor censuit, ut omnes cogerentur ducere uxores, liberorum creandorum causa: exstat oratio ejus, quam Augustus Cæsar, quum de maritandis ordinibus ageret, velut in hæc tempora scriptam in senatu recitavit. C. Atinius Labeo tribunus plebis Q. Metellum censorem, a quo in senatu legendo præteritus erat, de saxo dejecti jussit: quod ne fieret, ceteri tribuni plebis, auxilio fuerunt. Quum Carbo tribunus plebis rogationem tulisset, ut eundem tribunum plebis, quoties vellet, creare liceret; rogationem ejus P. Africanus gravissima oratione dissuasit; in qua dixit, Ti. Gracchum jure cæsum videri. Gracchus contra suasit ro-

gationem : sed Scipio tenuit. *Bella inter Antiochum Syriæ, et Phraatem Parthorum regem gesta, nec magis quietæ res Ægypti referuntur. Ptolemæus, Evergetes cognominatus, ob nimiam crudelitatem suis invisus, incensa a populo regia, clam Cyprum profugit : et, quum sorori ejus Cleopatrac, quam (filia ejus virgine per vim compressa, atque in matrimonium ducta) repudiaverat, regnum a populo datum esset, infensus filium, quem ex illa habebat, Cypri occidit, caputque ejus, et manus, et pedes matri misit. Seditiones a triumviris Fulvio Flacco, et C. Graccho, et C. Papirio Carbone, agro dividendo creatis, excitatæ : quibus quum P. Scipio Africanus adversaretur, fortisque ac validus de die domum se recepisset, mortuus in cubiculo inventus est. Suspecta fuit, tamquam ei venenum dedisset, Sempronia uxor, hinc maxime, quod soror esset Gracchorum : cum quibus simulas Africano fuerat : de morte tamen ejus nulla quæstio acta. Eo defuncto, seditiones triumvirales acrius exarserunt. C. Sempronius consul contra Iapydas primo rem male gessit : mox victoria cladem acceptam emendavit virtute D. Junii Bruti, ejus, qui Lusitaniam subegerat.*

LX.

L. AURELIUS consul rebellantes Sardos subegit. M. Fulvius Flaccus primus Transalpinos Ligures bello domuit, missus in auxilium Massiliensibus adversus Salluvios Gallos, qui fines Massiliensium populabantur. L. Opimius prætor Fregellanos, qui defecerant, in seditionem accepit, Fregellas diruit. Pestilentia in Africa ab ingenti locustarum multitudine, et deinde necatarum strage, fuisse traditur. Lustrum a censoribus conditum est. Censa sunt civium capita trecenta nonaginta.

millia septingenta triginta sex. *C. Gracchus, Tiberii frater, tribunus plebis, eloquentior quam frater, perniciosus aliquot leges tulit: inter quas frumentariam, ut semisse et triente frumentum plebi daretur: alteram legem agrariam, quam et frater ejus tulerat: tertiam, qua equestrem ordinem, tunc cum senatu consentientem, conrumperet: ut sexcenti ex equitibus in curiam sublegerentur: et quia illis temporibus trecenti tantum senatores erant, sexcenti equites trecentis senatoribus admiscerentur: id est, ut equester ordo bis tantum virium in senatu haberet: et, continuato in alterum annum tribunatu, legibus agrariis latis effecit, ut complures coloniæ in Italia deducerentur, et una in solo dirutæ Karthaginis, quo, ipse triumvir creatus, coloniam deduxit. Præterea res a Q. Metello consule adversus Baliares gestas continet: quas Græci Gymnesias adpellant, quia æstatem nudi exigant: Baliares a teli missu adpellati, aut a Baleo, Herculis comite, ibi relicto tunc, quum Hercules ad Geryonem navigaret. Motus quoque Syriæ referuntur, in quibus Cleopatra Demetrium virum suum et Seleucum filium, indignata quod, occiso patre ejus a se, injussu suo diadema sumsisset, interemit.*

LXI.

C. SEXTIUS proconsul, victa Salluviorum gente, coloniam Aquas Sextias condidit, ob aquarum copiam et calidis frigidisque fontibus, atque a nomine suo ita adpellatas. Cn. Domitius proconsul adversus Allobrogas ad oppidum Vindalium feliciter pugnavit. Quibus bellum inferendi caussa fuit, quod Teutomalium, Salluviorum regem, fugientem recepissent, et omni ope juvisent; quodque Æduorum agros, sociorum populi Ro-

mani, vastassent. C. Gracchus, seditioso tribunatu acto, quum Aventinum quoque armata multitudo occupasset, a L. Opimio consule, ex senatusconsulto vocato ad arma populo, pulsus et occisus est; et cum eo Fulvius Flaccus consularis, socius ejusdem furoris. Q. Fabius Maximus consul, Paulli nepos, adversus Allobrogas et Bituitum, Arvernorum regem, feliciter pugnavit. Ex Bituiti exercitu cæsa millia hominum centum viginti. Ipse, quum ad satisfaciendum senatui Romam profectus esset, Albam custodiendus datus est, quia contra pacem videbatur, ut in Galliam remitteretur. Decretum quoque est, ut Congentiatus, filius ejus, comprehensus Romam mitteretur. Allobroges in deditionem accepti. L. Opimius, accusatus apud populum a Q. Decio tribuno plebis, quod indemnatos cives in carcerem conjecisset, absolutus est.

LXII.

Q. MARCIUS consul Stænos, gentem Alpinam, expugnavit. Micipsa, Numidarum rex, mortuus regnum tribus filiis reliquit, Adherbali, Hiempsali, et Jugurthæ, fratris filio, quem adoptaverat. L. Cæcilius Metellus Dalmatas subegit. Jugurtha Hiempsalem fratrem bello petiit, quem victum occidit: Adherbalem regno expulit: is a senatu restitutus est. L. Cæcilius Metellus, Cn. Domitius Ahenobarbus, censores, duos et triginta senatu moverunt. Præterea motus Syriæ regum continet.

LXIII.

CATO Porcius consul in Thracia male adversus Scordiscos pugnavit. Lustrum a censoribus conditum est. Censa sunt civium capita trecenta nonaginta quatuor

millia, trecenta triginta sex. *Æmilia, Licinia, Marcia*, virgines *Vestales*, incesti damnatæ sunt : idque incestum quemadmodum et commissum, et deprehensum, et vindicatum sit, refertur. *Cimbri*, gens vaga, populabundi in *Illyricum* venerunt : ab iis *Papirius Carbo* consul cum exercitu fusus est. *Livius Drusus* consul adversus *Scordiscos*, gentem a *Gallis* oriundam, in *Thracia* feliciter pugnavit.

LXIV.

ADHERBAL, bello petitus a *Jugurtha*, et in oppido *Cirta* obsessus, contra denunciationem senatus ab eo occisus est. Ob hoc ipsi *Jugurthæ* bellum indictum : idque *Calpurnius Bestia* consul gerere jussus, pacem cum *Jugurtha* injussu populi et senatus fecit. *Jugurtha*, fide publica evocatus ad indicandos auctores consiliorum suorum, quod multos pecunia in senatu corrupisse dicebatur, *Romam* venit : et, propter cædem, admissam in regulum quemdam, nomine *Massivam*, qui regnum ejus populo *Romano* invisum adfectabat, *Romæ* interfectum, quum periclitaretur, causam capitis dicere jussus, clam profugit, et, cedens urbe, fertur dixisse : O urbem venalem, et cito perituram, si emptorem invenerit ! *A. Postumius* legatus infeliciter prælio adversus *Jugurtham* gesto pacem quoque adjecit ignominiosam, quam non esse servandam senatus censuit.

LXV.

Q. CÆCILIUS Metellus consul duobus præliis *Jugurtham* fudit, totamque *Numidiam* vastavit. *M. Junius Silanus* consul adversus *Cimbros* infeliciter pugnavit : legatis *Cimbrorum* sedem et agros, in quibus consistèrent, postulantis senatus negavit. *M. Minucius*

proconsul adversus *Thracas* prospere pugnavit. *L. Cassius* consul a *Tigurinis Gallis*, pago *Helvetiorum*, qui a civitate secesserant, in finibus *Allobrogum* cum exercitu cæsus est: milites, qui ex ea clade superaverunt, obsidibus datis, et dimidia rerum omnium parte, ut incolumes dimitterentur, cum hostibus pacti sunt.

LXVI.

JUGURTHA, pulsus a *C. Mario* *Numidia*, auxilio *Bocchi*, *Maurorum* regis, adjutus est: et, cæsis prælio *Bocchi* quoque copiis, nolente *Boccho* bellum infeliciter susceptum diutius sustinere, vinctus ab eo et *Mario* traditus est: in qua re præcipua opera *L. Cornelii Sullæ*, quæstoris *Marii*, fuit.

LXVII.

M. AURELIUS Scaurus, legatus consulis, a *Cimbris* fuso exercitu, captus est: et, quum, in consilium ab iis evocatus, deterreret eos, ne *Alpes* transirent *Italiam* petaturi, eo quod diceret, *Romanos* vinci non posse, a *Boiorige* rege, feroci juvene, occisus est. Ab iisdem hostibus *Cn. Manlius* consul et *Q. Servilius Cæpio* proconsul, victi prælio castrisque binis exuti sunt: militum millia octoginta occisa, calonum et lixarum quadraginta. Secundum populi *Romani* jussionem, *Cæpionis*, cujus temeritate clades accepta erat, damnati bona publicata sunt, primi post regem *Tarquinium*; imperiumque ei abrogatum. In triumpho *C. Marii* ductus ante currum ejus *Jugurtha* cum duobus filiis, et in carcere necatus est. *Marius* triumphali veste in senatum venit, quod nemo ante eum fecerat: eique propter *Cimbrici* belli metum continuatus per complures annos magistratus est. Secundo et tertio absens

consul creatus, quartum consulatum dissimulanter captans consecutus est. Cn. Domitius pontifex maximus populi suffragio creatus est. Cimbri, vastatis omnibus, quæ inter Rhodanum et Pyrenæum sunt, per saltum in Hispaniam transgressi, ibique multa loca populati, a Celtiberis fugati sunt: reversique in Galliam, bellicosius se Teutonis conjunxerunt.

LXVIII.

M. ANTONIUS prætor in Ciliciam maritimos prædones persecutus est. **C. Marius** consul summa vi obpugnata a Teutonis et Ambronibus castra defendit: duobus deinde præliis circa Aquas Sextias eos hostes delevit, in quibus cæsa traduntur hostium ducenta millia, capta nonaginta. **Marius** absens quintum consul creatus est: triumphum oblatum, donec et Cimbros vinceret, distulit. **Cimbri**, repulso ab Alpibus fugatoque **Q. Catulo** proconsule, qui fauces Alpium obsederat, et ad flumen Athesim castellum editum insederat, reliqueratque, quum, virtute sua expliciti, fugientem proconsulem exercitumque consecuti, in Italiam trajecissent, junctis ejusdem Catuli et **C. Marii** exercitibus, prælio victi sunt ab eis: in quo cæsa traduntur hostium centum quadraginta millia, capta sexaginta. **Marius**, totius civitatis consensu exceptus, pro duobus triumphis, qui obferebantur, uno contentus fuit. **Primores civitatis**, qui aliquamdiu ut novo homini, ad tantos honores evecto, inviderant, conservatam ab eo rempublicam fatebantur. **Publicius Malleolus**, matre occisa, primus insutus culeo, in mare præcipitatus est. **Ancilia** cum strepitu mota esse, antequam Cimbricum bellum consummaretur, referuntur. **Bella præterea** inter Syriæ reges esta continet.

LXIX.

L. APPULEIUS Saturninus, adjuvante **C. Mario**, et per milites occiso **A. Nonio** competitore, tribunus plebis per vim creatus, non minus violenter tribunatum, quam petierat, gessit; et, quum legem agrariam per vim tulisset, **Metello** Numidico, eo quod in eam non juraverat, diem dixit: qui quum a bonis civibus defenderetur, ne caussa certaminum esset, in exsilium voluntarium Rhodum profectus est: ibique legendo et audiendis magnis viris vocabatur. Profecto **C. Marius**, seditionis auctor, qui sextum consulatum per tribus sparsa pecunia emerat, aqua et igni interdixit. Idem **Appuleius** Saturninus tribunus plebis **C. Memmii** candidatum consulatus, quem maxime adversarium actionibus suis timebat, occidit: quibus rebus concitato senatu, (in cujus caussam et **C. Marius**, homo varii et mutabilis ingenii consiliique semper secundum fortunam, transierat, quum eum tueri minime posset) oppressus armis cum **Glaucia** prætore, et aliis ejusdem furoris sociis, bello quodam interfectus est. **Q. Cæcilius Metellus** ab exsilio, ingenti totius civitatis favore, reductus est. **M. Aquillius** proconsul in Sicilia bellum servile excitatum confecit.

LXX.

QUUM **M. Aquillius** de pecuniis repetundis caussam diceret, ipse iudices rogare noluit. **M. Antonius**, qui pro eo perorabat, tunicam a pectore ejus discidit, ut honestas cicatrices ostenderet: quibus conspectis, indubitanter absolutus est. **Cicero** ejus rei solus auctor. **T. Didius** proconsul adversus Celtiberos feliciter pug-

navit. *Ptolemæus*, *Cyrenarum* rex, cui cognomentum *Apioni* fuit, mortuus hæredem populum Romanum reliquit, et ejus regni civitates senatus liberas esse jussit. *Ariobarzanes* in regnum *Cappadociæ* a *L. Cornelio Sulla* reductus est. *Parthorum* legati, a rege *Arsace* missi, venerunt ad *Sullam*, ut amicitiam populi Romani peterent. *P. Rutilius*, vir summæ innocentiae, quoniam legatus *Q. Mucii* præconsulis a publicanorum injuriis *Asiam* defenderat, invisus equestri ordini, penes quem judicia erant, repetundarum damnatus, in exilium missus est. *C. Sentius* prætor contra *Thracas* infelicitè pugnavit. Senatus, quum impotentiam equestris ordinis in judiciis exercendis ferre nollet, omni vi niti cæpit, ut ad se judicia transferrentur, sustinente causam ejus *M. Livio Druso* tribuno plebis: qui, ut vires sibi adquireret, perniciosa spe largitionum plebem concitavit. Præterea motus *Syriæ* regum continet.

LXXI.

M. LIVIUS Drusus, tribunus plebis, ut majoribus viribus senatus causam susceptam tueretur, socios et *Italicos* populos spe civitatis Romanæ sollicitavit: iisque adjuvantibus, per vim legibus agrariis frumentariisque latis, judicariam quoque pertulit; ut æqua parte judicia penes senatum et equestrem ordinem essent. Quum deinde promissa sociis civitas præstari non posset, irati *Italici* defectionem agitare cæperunt. Eorum cõitus, conjurationesque, et orationes in conciliis principum referuntur: propter quæ *Livius Drusus*, invisus etiam senatui factus, velut socialis belli auctor, incertum a quo, domi occisus est.

LXXII.

ITALICI populi defecerunt, Picentes, Vestini, Mar-
 si, Peligni, Marrucini, Samnites, Lucani, initio belli a
 Picentibus moto. Q. Servilius proconsul in oppido
 Asculo cum omnibus civibus Romanis, qui in eo oppido
 erant, occisus est: saga populus sumsit. Ser. Galba,
 a Lucanis comprehensus, unius feminæ opera, ad quam
 devertebatur, captivitate exemptus est. Æsernia et Alba
 coloniæ ab Italicis obsessæ sunt. Auxilia deinde La-
 tini nominis externarumque gentium missa populo
 Romano, et expeditiones invicem expugnationesque ur-
 bium referuntur.

LXXIII.

L. JULIUS Cæsar consul male adversus Samnites
 pugnavit. Nola colonia in potestatem Samnitium ve-
 nit cum L. Postumio prætore, qui ab iis interfectus est.
 Complures populi ad hostes defecerunt. Quum P.
 Rutilius consul male adversus hostes Marsos pugnas-
 set, et in prælio cecidisset, C. Marius, legatus ejus, me-
 liore eventu cum hostibus conflixit. Ser. Sulpicius
 Pelignos prælio fudit. Q. Cæpio, legatus Rutilii,
 quum obsessus prospere in hostes erupisset, et ob eum
 successum æquatum ei cum C. Mario esset imperium,
 temerarius factus, et circumventus insidiis, fuso exer-
 citu cecidit. L. Julius Cæsar consul feliciter adversus
 Samnites pugnavit: ob eam victoriam Romæ saga po-
 sita sunt: et, ut varia belli fortuna esset, Æsernia
 colonia cum M. Marcello in potestatem Samnitium
 venit. Sed C. Marius prælio Marsos fudit, Herio
 Asinio, prætore Marrucinatorum, occiso. C. Cæcilius in
 Gallia Transalpina Salluvios rebellantes vicit.

LXXIV.

CN. POMPEIUS *Picentes prælio fudit, et obsedit: propter quam victoriam Romæ prætextæ et alia magistratuum insignia sumta sunt. C. Marius cum Mar- sis dubio eventu pugnavit. Libertini tum primum militare cæperunt. A. Plotius legatus Umbros, L. Porcius prætor Marsos, quum uterque populus defe- cisset, prælio vicerunt. Nicomedes in Bithyniæ, Ario- barzanes in Cappadociæ regna reducti sunt. Cn. Pom- peius consul Marsos acie vicit. Quum ære alieno ob- pressa esset civitas, A. Sempronius Asellio prætor, quoniam secundum debitores jus dicebat, ab iis, qui fœnerabantur, in foro occisus est. Præterea incur- siones Thracum in Macedoniam populationesque con- tinet.*

LXXV.

A. POSTUMIUS *Albinus legatus, quum classi præ- esset, infamis crimine proditoris, ab exercitu suo in- terfectus est. L. Cornelius Sulla legatus Samnites prælio vicit, et bina castra eorum expugnavit. Cn. Pompeius Vestinos in deditionem accepit. L. Porcius consul, rebus prospere gestis, fuisque aliquoties Mar- sis, dum castra eorum expugnat, cecidit: ea res hos- tibus victoriam ejus prælii dedit. Cosconius et Luc- ceius Samnites acie vicerunt, Marium Egnatium, no- bilissimum hostium ducem, occiderunt, compluraque eorum oppida in deditionem acceperunt. L. Sulla Hirpinos domuit, Samnites multis præliis fudit, ali- quot populos recepit: quantisque raro quisquam alius ante consulatum rebus gestis, ad petitionem consulatus Romam est profectus.*

LXXVI.

A. GABINIUS legatus, rebus adversus *Lucanos* prospere gestis, et plurimis oppidis expugnatis, in obsidione castrorum hostilium cecidit. *Sulpicius* legatus *Marrucinos* cecidit, totamque eam regionem recepit. *Cn. Pompeius* proconsul *Vestinos* et *Pelignos* in deditionem accepit. *Marsi* quoque, a *L. Murena*, et *Cæcilio Pinnâ* legatis aliquot præliis fracti, pacem petierunt. *Asculum* a *Cn. Pompeio* captum est, cæsis et a *Mam. Æmilio* legato *Italicis*. *Silo Pompædus*, dux *Marso- rum*, auctor hujus rei, in prælio cecidit. *Ariobarzanes* *Cappadociæ*, *Nicomedes* *Bithyniæ* regno a *Mithridate* *Ponti* rege pulsi sunt. Præterea incursiones *Thracum* in *Macedoniam* populationesque continet.

LXXVII.

QUUM *P. Sulpicius* tribunus plebis, auctore *C. Mario*, perniciosas leges promulgasset, ut exsules revocarentur, et novi cives libertinique distribuerentur in tribus, et ut *Marius* adversus *Mithridatem* *Ponti* regem dux crearetur, et adversantibus consulibus *Q. Pompeio* et *L. Sullæ* vim intulisset, occiso *Q. Pompeio* consulis filio, genero *Sullæ*; *L. Sulla* consul cum exercitu in urbem venit, et adversus factionem *Sulpicii* et *Marii* in ipsa urbe pugnavit, eamque expulit: ex qua duodecim a senatu hostes, inter quos *C. Marius* pater et filius, judicati sunt. *P. Sulpicius*, quum in quadam villa lateret, indicio servi sui retractus et occisus est: servus, ut præmium promissum indici haberet, manumissus, et ob scelus proditi domini de saxo dejectus est. *C. Marius* filius in *Africam* trajecit. *C. Marius* pater, quum in paludibus *Minturnensium* lateret, extractus

est ab oppidanis: et, quum missus ad occidendum eum servus, natione Gallus, majestate tanti viri perterritus recessisset, inpositus publice in navim delatus est in Africam. L. Sulla civitatis statum ordinavit: exinde colonias deduxit. Q. Pompeius consul, ad accipiendum a Cn. Pompeio proconsule exercitum profectus, consilio ejus occisus est. Mithridates, Ponti rex, Bithynia et Cappadocia occupatis, et pulso Aquillio legato, Phrygiam, provinciam populi Romani, cum ingenti exercitu intravit.

LXXVIII.

MITHRIDATES Asiam occupavit: Q. Oppium proconsulem, item Aquillium legatum, in vincula conjecit: jussuque ejus, quidquid civium Romanorum in Asia fuit, uno die trucidatum est. Urbem Rhodum, quæ sola in fide permanserat, obpugnavit, et aliquot præliis navalibus victus recessit. Archelaus, præfectus regis, in Græciam cum exercitu venit; Athenas occupavit. Præterea trepidationem urbium insularumque, aliis ad Mithridatem, aliis ad populum Romanum civitates suas trahentibus, continet.

LXXIX.

L. CORNELIUS Cinna, quum perniciosas leges per vim atque arma ferret, pulsus urbe a Cn. Octavio collega, cum sex tribunis plebis: imperioque ei abrogato, corruptum Ap. Claudii exercitum in potestatem suam redegit, et bellum urbi intulit, accessito C. Mario ex Africa cum aliis exsulibus: in quo bello duo fratres, alter ex Pompeii exercitu, alter ex Cinnae, ignorantes concurrerunt: et, quum victor spoliaret occisum, agnito fratre, ingenti lamentatione edita, rogo ei ex-

structo, ipse supra rogum se transfodit, et eodem igni consumtus est. Et quum obprimi inter initia potuissent, Cn. Pompeii fraude, qui, utramque partem fovendo, vires Cinnae dedit, nec nisi profligatis optimatum rebus auxilium tulit, et consulis segnitie confirmati Cinna et Marius quatuor exercitibus, ex quibus duo Q. Sertorio et Carboni dati sunt, urbem circum-sederunt. Ostiam coloniam Marius expugnavit, et crudeliter diripuit.

LXXX.

ITALICIS populis a senatu civitas data est. Samnites, qui soli arma retinebant, Cinnae et Mario se conjunxerunt: ab iis Plautius cum exercitu cæsus est. Cinna et Marius cum Carbone et Sertorio Janiculum occupaverunt, et fugati ab Octavio consule recesserunt. Marius Antium, et Ariciam, et Lanuvium colonias devastavit. Quum nulla spes esset optimatibus resistendi propter segnitiam et perfidiam et ducum et militum, qui corrupti aut pugnare nolebant, aut ad diversas partes transibant, Cinna et Marius in urbem recepti sunt: qui, velut captam, eam cædibus et rapinis vastarunt, Cn. Octavio consule occiso, et omnibus adversæ partis nobilibus trucidatis, inter quos M. Antonio eloquentissimo viro, L. et C. Cæsare, quorum capita in rostris posita sunt. Crassus filius ab equitibus Fimbriæ occisus: pater Crassus, ne quid indignum virtute sua pateretur, gladio se transfixit. Et citra ulla comitia consules in sequentem annum se ipsos renunciaverunt: eodemque die, quo magistratum inierant, Marius Sex. Licinium senatorem de saxo dejici jussit; editisque multis sceleribus, Idibus Januariis decessit: vir, cujus si examinentur cum virtutibus vitia, haud

facile sit dictu, utrum bello melior, an pace perniciosior fuerit: adeo, quam rempublicam armatus servavit, eam primo togatus omni genere fraudis, postremo armis hostiliter evertit.

LXXXI.

L. SULLA Athenas, quas Archelaus, præfectus Mithridatis, occuparat, circumscedit, et cum magno labore expugnavit: urbi libertatem, et civibus, quæ habuerant, reddidit. Magnesia, quæ sola in Asia civitas in fide manserat, summa virtute adversus Mithridatem defensa est. Præterea Thracum in Macedonia continet gesta.

LXXXII.

SULLA copias regis, quæ, Macedonia occupata, in Thessaliam venerant, prælio vicit, cæsis hostium centum millibus, et castris quoque expugnatis. Renovato deinde bello, iterum exercitum regis fudit ac delevit. Archelaus cum classe regia Sullæ se tradidit. **L. Valerius Flaccus** consul, collega Cinnae, missus, ut Sullæ succederet, propter avaritiam invisus exercitui suo, a **C. Fimbria** legato ipsius, ultimæ audaciæ homine, occisus est, et imperium ad Fimbriam translatum. Præterea expugnatae in Asia urbes a Mithridate, et crudeliter direpta provincia, incursionesque Thracum in Macedoniam, referuntur.

LXXXIII.

C. FIMBRIA in Asia fusis prælio aliquot præfectis Mithridatis, urbem Pergamum cepit, obsessumque regem, non multum abfuit, quin caperet. Urbem Ilion, quæ se potestati Sullæ reservabat, expugnavit ac dele-

vit, et magnam partem Asiæ recepit. Sulla multis præliis Thracas cecidit. Quum L. Cinna et Cn. Papirius Carbo, ab se ipsis consules per biennium creati, bellum contra Sullam pararent, effectum est per L. Valerium Flaccum principem senatus, qui orationem in senatu habuit, et per eos, qui concordia studebant, ut legati ad Sullam de pace mitterentur. Cinna ab exercitu suo, quem invitum cogebat naves conscendere, et adversus Sullam proficisci, interfectus est. Consulatum Carbo solus gessit. Sulla, quum in Asiam trajecisset, pacem cum Mithridate fecit; ita ut is cederet provinciis Asia, Bithynia, Cappadocia. Fimbria, desertus ab exercitu, qui ad Sullam transierat, ipse se percussit: inpetravitque de servo suo, præbens cervicem, ut se occideret.

LXXXIV.

SULLA legatis, qui a senatu missi erant, futurum se in potestate senatus respondit, si cives, qui pulsi a Cinna ad se confugerant, restituerentur: quæ conditio quum justa senatui videretur, per Carbonem factionemque ejus, cui bellum videbatur utilius, ne conveniret, effectum est. Idem Carbo, quum ab omnibus oppidis Italiae coloniisque obsides exigere vellet, ut fidem eorum contra Sullam obligaret, consensu senatus prohibitus est. Novis civibus senatusconsulto suffragium datum est. Q. Metellus Pius, qui partes optimatum secutus erat, quum in Africa bellum moliretur, a C. Fabio prætore pulsus est: senatusque consultum per factionem Carbonis et Marianarum partium factum est, ut omnes ubique exercitus dimitterentur. Libertini in quinque et triginta tribus distributi sunt. Præterea belli adparatum, quod contra Sullam excitabatur, continet.

LXXXV.

SULLA in Italiam cum exercitu trajecit, missisque legatis, qui de pace agerent, a consule C. Norbano violatis, eundem Norbanum prælio vicit. Et quum *L. Scipionis* alterius consulis, cum quo per omnia id egerat, ut pacem jungeret, nec potuerat, castra obpugnaturus esset, universus exercitus consulis, sollicitatus per emissos a *Sulla* milites, signa ad *Sullam* transtulit. *Scipio*, quum occidi posset, dimissus est. *Cn. Pompeius*, *Cn. F. ejus*, qui *Asculum* ceperat, conscripto voluntariorum exercitu, cum tribus legionibus ad *Sullam* venerat; ad quem se nobilitas omnis conferebat, ita ut deserta urbe ad castra veniretur. Præterea expeditiones per totam Italiam utriusque partis ducum referuntur.

LXXXVI.

QUUM C. Marius, C. Marii filius, consul ante annos viginti per vim creatus esset, C. Fabius in Africa propter crudelitatem et avaritiam in prætorio suo vivus exustus est. *L. Philippus* legatus *Sullæ* Sardiniam, *Q. Antonio* prætore pulso et occiso, occupavit. *Sulla* cum *Italicis* populis, ne timeretur ab iis, velut erepturus civitatem et suffragii jus nuper datum, fœdus percussit. Idemque, ex fiducia jam certæ victoriæ, litigatores, a quibus adibatur, vadimonia Romam differre jussit, quum a parte diversa urbs adhuc teneretur. *L. Damasippus* prætor, ex voluntate C. Marii consulis quum senatum contraxisset, omnem, quæ in urbe erat, nobilitatem trucidavit: ex cujus numero *Q. Mucius Scaevola* pontifex maximus fugiens in vestibulo adis

Vestæ occisus est. Præterea bellum a L. Murena adversus Mithridatem in Asia renovatum continet.

LXXXVII.

SULLA C. Marium, exercitu ejus fuso delectoque ad Sacriportum, in oppido Præneste obsedit: urbem Romanam ex inimicorum manibus recepit. Marium erumpere tentantem repulit. Præterea res a legatis ejus, eadem ubique fortuna partium, gestas continet.

LXXXVIII.

SULLA Carbonem, exercitu ejus fuso ad Clusium, ad Faventiam Fidentiamque cæso, Italia expulit: cum Samnitibus, qui soli ex Italicis populis nondum arma posuerant, juxta urbem Romanam ante portam Collinam debellavit: recuperataque republica, pulcherriam victoriam crudelitate, quanta in nullo hominum fuit, inquinavit. Octo millia deditorum in villa publica trucidavit: tabulam proscriptionis posuit: urbem ac totam Italiam cædibus replevit: inter quas omnes Prænestinos inermes concidi jussit: Marium, senatorii ordinis virum, cruribus brachiisque fractis, auribus præsectis, et effossis oculis, necavit. C. Marius, Præneste obsessus a Lucretio Ofella, Sullanarum partium viro, quum per cuniculum captaret evadere, septus ab exercitu, mortem sibi conscivit: id est, in ipso cuniculo, quum sentiret se evadere non posse, cum Pontio Telesino, fugæ comite, stricto utrimque gladio, concurrir: quem quum occidisset, ipse saucius inpetravir a servo, ut se occideret.

LXXXIX.

M. BRUTUS a Cn. Papirio Carbone, qui Cossuram adpulerat, missus nave piscatoria Lilybæum, ut explo-

raret, an ibi Pompeius esset, et circumventus a navibus, quas Pompeius miserat, in se mucrone verso, ad trans-trum navis obnixus corporis pondere, incubuit. Cn. Pompeius, in Siciliam cum imperio a senatu missus, Cn. Carbonem, qui flens muliebriter mortem tulit, captum occidit. Sulla, dictator factus, quod nemo umquam fecerat, cum fascibus viginti quatuor processit. Rebus novis reipublicæ statum confirmavit, tribunorum plebis potestatem minuit, et omne jus legum ferendarum ademit. Pontificum augurumque collegium ampliavit, ut essent quindecim; senatum ex equestri ordine subplevit: proscriptorum liberis jus petendorum honorum eripuit, et bona eorum vendidit: ex quibus plurima primo rapuit: redactum est sestertium ter millies quingenties. Q. Lucretium Ofellam, consulatum adversus voluntatem suam petere ausum, jussit occidi in foro: et, quum hoc indigne ferret populus Romanus, concione advocata, se jussisse dixit. Cn. Pompeius in Africa Cn. Domitium proscriptum, et Hiarbam, regem Numidiæ, bellum molientes, victos occidit; et, quatuor et viginti annos natus, adhuc eques Romanus, quod nulli contigerat, ex Africa triumphavit. Cn. Norbanus consularis proscriptus, in urbe Rhodo quum comprehenderetur, ipse se occidit. Mutilus, unus ex proscriptis, clam capite adoperto ad posticas ædes Bastiæ uxoris quum accessisset, admissus non est, quia illum proscriptum diceret, itaque se transfodit, et sanguine suo fores uxoris respersit. Sulla Nolam in Samnio recepit: quadraginta septem legiones in agros captos deduxit, et eos iis divisit. Volaterras, quod oppidum adhuc in armis erat, obsessum, in deditionem accepit. Mitylenæ quoque in Asia, quæ sola urbs post victum Mithridatem arma retinebat, expugnata dirutaque sunt.

XC.

SULLA decessit, honosque ei a senatu habitus est, ut in campo Martio sepeliretur. *M. Æmilius Lepidus*, quum acta Sullæ tentaret rescindere, bellum excitavit: et a *Q. Catulo* collega Italia pulsus est: et in Sardinia, frustra bellum molitus, periit. *M. Brutus*, qui Cisalpinam Galliam obtinebat, a *Cn. Pompeio* occisus est. *Q. Sertorius* proscriptus in ulteriore Hispania ingens bellum excitavit. *L. Manlius* proconsul et *M. Domitius* legatus ab *Herculeio* quæstore prælio victi sunt. Præterea res a *P. Servilio* proconsule adversus Cilicas gestas continet.

XCI.

CN. POMPEIUS, quum adhuc eques esset, cum imperio consulari adversus Sertorium missus est. Sertorius aliquot urbes expugnavit, plurimasque civitates in potestatem suam redegit. *Ap. Claudius* proconsul Thracas pluribus præliis vicit. *Q. Metellus* proconsul *L. Herculeium*, quæstorem Sertorii, cum exercitu cecidit.

XCII.

CN. POMPEIUS dubio eventu cum Sertorio pugnavit, ita ut singula ex utraque parte cornua vicerint. *Q. Metellus* Sertorium et *Perpernam* cum duobus exercitibus prælio fudit: cujus victoriæ partem cupiens ferre Pompeius parum prospere pugnavit. Obsessus deinde *Cluniæ* Sertorius, adsiduis eruptionibus non leviora damna obsidentibus intulit. Præterea ab *Curione* proconsule in Thracia res gestas adversus *Dardanos*, et *Q. Sertorii* multa crudelia in suos facta

continet ; qui plurimos ex amicis et secum proscriptis, crimine proditiōis insimulatos, occidit.

XCIII.

P. SERVILIUS proconsul in Cilicia Isauros domuit, et aliquot urbes piratarum expugnavit. Nicomedes, Bithyniæ rex, moriens populum Romanum fecit heredem, regnumque ejus in provinciæ formam redactum est. Mithridates, fœdere cum Sertorio icto, bellum populo Romano intulit. Adparatus deinde regiarum copiarum pedestrium navaliumque : et, occupata Bithynia, M. Aurelius Cotta consul ad Chalcedonem prælio a rege victus est : resque a Pompeio et Metello adversus Sertorium gestas continet ; qui omnibus belli militiæque artibus par fuit : quos etiam, ab obsidione Calagurris oppidi depulsos, coëgit diversas regiones petere, Metellum ulteriorem Hispaniam, Pompeium Galliam.

XCIV.

L. LICINIUS Lucullus consul adversus Mithridatem equestribus præliis feliciter pugnavit, et expeditiones aliquot prosperas fecit, poscentesque pugnam milites a seditione inhibuit. Deiotarus, Gallogræciæ tetrarches, præfectos Mithridatis, bellum in Phrygia moerentes, cecidit. Præterea res a Cn. Pompeio in Hispania contra Sertorium prospere gestas continet.

XCV.

C. CURIO proconsul Dardanos in Thracia domuit. Quatuor et septuaginta gladiatores Capuæ ex ludis Lentuli profugerunt : et, congregata serritorum ergastulorumque multitudine, Crixo et Spartaco ducibus bello excitato, Claudium Pulchrum legatum et P.

Varenus prætorem prælio vicerunt. L. Lucullus proconsul ad Cyzicum urbem exercitum Mithridatis fame ferroque delevit; pulsumque Bithynia regem, variis belli ac naufragiorum casibus fractum, coëgit in Pontum profugere.

XCVI.

Q. ARRIUS prætor Crixum, fugitivorum ducem, cum viginti millibus hominum cecidit. Cn. Lentulus consul male adversus Spartacum pugnavit. Ab eodem L. Gellius consul et Q. Arrius prætor acie victi sunt. Sertorius a M. Antonio, et M. Perperna, et aliis conjuratis in convivio interfectus est, octavo ducatus sui anno: magnus dux, et adversus duos imperatores, Pompeium et Metellum, sæpe par, vel frequentius victor: ad ultimum desertus et proditus. Imperium partium ad Marcum translatum est: quem Cn. Pompeius victum captumque interfecit, ac recepit Hispanias decimo fere anno, quam cæptum erat bellum. C. Cassius proconsul et Cn. Manlius prætor male adversus Spartacum pugnaverunt: idque bellum M. Crasso prætori mandatum est.

XCVII.

M. CRASSUS prætor primum cum parte fugitivorum, quæ ex Gallis Germanisque constabat, feliciter pugnavit, cæsis hostium triginta quinque millibus, et duce eorum Granico. Cum Spartaco deinde bellavit, cæsis cum ipso millibus sexaginta. M. Antonius prætor bellum adversus Cretenses, parum prospere susceptum, morte sua finivit. M. Lucullus proconsul Thracas subegit. L. Lucullus in Ponto adversus Mithridatem feliciter pugnavit, cæsis hostium amplius quam sexa-

ginta millibus. *M. Crassus et Cn. Pompeius consules facti (sed Pompeius, antequam quæsturam gereret, ex equite Romano) tribunitiam potestatem restituerunt. Judicia quoque per L. Aurelium Cottam prætorem ad equites Romanos translata sunt. Mithridates, desperatione rerum suarum coactus, ad Tigranem Armeniæ regem confugit.*

XCVIII.

MACHARES, filius Mithridatis, Bospori rex, ab L. Lucullo in amicitiam receptus est. Cn. Lentulus et L. Gellius censores asperam censuram egerunt, quatuor et sexaginta senatu motis: a quibus, lustro condito, censa sunt civium capita quadringenta quinquaginta millia. L. Metellus prætor in Sicilia adversus piratas prospere rem gessit. Templum Jovis in Capitolio, quod incendio consumtum ac reffectum erat, a Q. Catulo dedicatum est. L. Lucullus in Armenia Mithridatem et Tigranem, et ingentes utriusque regis copias, pluribus præliis fudit. Q. Metellus proconsul, bello sibi adversus Cretenses mandato, Cydoniam urbem obsedit. C. Triarius, legatus Luculli, adversus Mithridatem parum prospere pugnavit. Lucillum, ne persequeretur Mithridatem ac Tigranem, summamque victoriæ inponeret, seditio militum tenuit, quia sequi volebant: id est, quia legiones Valerianæ, inpleta a se stipendia dicentes, Lucillum reliquerunt.

XCIX.

Q. METELLUS proconsul Gnosson, et Lyctum, et Cydoniam, et alias plurimas urbes expugnavit. L. Roscius tribunus plebis legem tulit, ut equitibus Romanis in theatro quatuordecim gradus proximi adsig-

narentur. Cn. Pompeius, lege ad populum lata, persequi piratas jussus, qui commercium annonæ intercluserant, intra quadragesimum diem toto mari eos expulit; belloque cum iis in Cilicia confecto, acceptis in deditionem piratis agros et urbes dedit. Præterea res gestas a Q. Metello adversus Cretenses continet: et epistolas Metelli et Cn. Pompeii in vicem missas. Queritur Metellus, gloriam sibi rerum gestarum a Pompeio præripi, qui in Cretam miserit legatum suum ad accipiendas urbium deditiones. Pompeius rationem reddit, hoc se facere debuisse.

C.

C. MANILIUS tribunus plebis magna indignatione nobilitatis legem tulit, ut Pompeio Mithridaticum bellum mandaretur. Concio ejus bona. Q. Metellus, perdomitis Cretensibus, liberæ in id tempus insulæ leges dedit. Cn. Pompeius, ad gerendum bellum adversus Mithridatem profectus, cum rege Parthorum Phraate amicitiam renovavit, equestri prælio Mithridatem vicit. Præterea bellum inter Phraatem Parthorum regem, et Tigranem Armeniorum, ac deinde inter Tigranem filium patremque gestum, continet.

CI.

CN. POMPEIUS Mithridatem, nocturno prælio victum, coëgit Bosporon profugere. Tigranem in deditionem accepit, eique, ademptis Syria, Phænice, Cilicia, regnum Armeniæ restituit. Conjunctio eorum qui in petitione consulatus ambitus damnati erant, facta de interficiendis consulibus, obpressa est. Cn. Pompeius, quum Mithridatem persequeretur, in ultimas ignotasque gentes penetravit. Iberos Albanosque, qui transitum

non dabant, prælio vicit. Præterea fugam Mithridatis per Colchos, Heniochosque, et res ab eo in Bosporo gestas continet.

CII.

CN. POMPEIUS in provinciæ formam Pontum redegit. Pharnaces, filius Mithridatis, bellum patri intulit. Ab eo Mithridates obsessus in regia, quum veneno sumto parum profecisset ad mortem, a milite Gallo, nomine Bitæto, a quo, ut adjuvaret se, petierat, interfectus est. Cn. Pompeius Judæos subegit : fanum eorum in Hierosolyma, inviolatum ad id tempus, cepit. L. Catilina, bis repulsam in petitione consulatus passus, cum Lentulo prætore, et Cethego, et pluribus aliis, conjuravit de cæde consulum et senatus, incendiis urbis, et obprimenda republica ; exercitu quoque in Etruria comparato. Ea conjuratio industria M. Tullii Ciceronis cruta est. Catilina urbe pulso, de reliquis conjuratis supplicium sumtum est.

CIII.

CATILINA a C. Antonio proconsule cum exercitu cæsus est. P. Clodius accusatus, quod in habitu muliebri in sacrarium, in quod virum intrare nefas est, intrasset, et uxorem maximi pontificis stuprasset, absolutus est. C. Pontinius prætor Allobrogas, qui rebel- laverant, ad Solonem domuit. P. Clodius ad plebem transiit. C. Cæsar Lusitanos subegit : eoque consula- tus candidato, et captante rempublicam invadere, conspiratio inter tres principes civitatis facta est, Cn. Pompeium, M. Crassum, C. Cæsarem. Leges agrariæ a Cæsare consule cum magna contentione, invito senatu, et altero consule M. Bibulo, latæ sunt. C. Antonius

proconsul in Thracia parum prospere rem gessit. M. Cicero, lege a P. Clodio tribuno plebis lata, quod indemnatos cives necavisset, in exsilium missus est. Cæsar, in provinciam Galliam profectus, Helvetios, vagam gentem, domuit : quæ, sedem quærens, per provinciam Cæsaris Narbonem iter facere volebat. Præterea situm Galliarum continet. Pompeius de liberis Mithridatis, Tigrane, et Tigranis filio, triumphavit : Magnusque a tota concione consalutatus est.

CIV.

PRIMA pars libri situm Germaniæ moresque continet. C. Cæsar, quum adversus Germanos, qui Ariovisto duce in Galliam transcenderant, exercitum duceret, rogatus ab Æduis et Sequanis, quorum ager possidebatur, trepidationem militum, propter metum novorum hostium ortam, adlocutione exercitus inhibuit, et victos prælio Germanos Gallia expulit. M. Cicero, Pompeio inter alios orante, et T. Annio Milone tribuno plebis agente, ingenti gaudio senatus ac totius Italiæ, ab exsilio reductus est. Cn. Pompeio per quinquennium annonæ cura mandata est. Cæsar Ambianos, Suesiones, Veromanduos, Atrebates, Belgarum populos, quorum ingens multitudo erat, prælio victos in dedicationem accepit : ac deinde contra Nervios unius civitatis cum magno discrimine pugnavit, eamque gentem delevit ; quæ bellum gessit, donec ex sexaginta millibus armatorum trecenti superessent : ex sexcentis senatoribus tres tantum evaderent. Lege lata de redigenda in provinciæ formam Cypro, et publicanda pecunia regia, M. Catoni administratio ejus rei mandata est. Ptolemæus, Ægypti rex, ob injurias, quas patiebatur a suis, regno pulsus, Romam venit. C. Cæsar Vene-

tos, gentem oceano junctam, navali prælio vicit. Præterea res a legatis ejus eadem fortuna gestas continet.

CV.

QUUM C. Catonis tribuni plebis intercessionibus comitia tollerentur, senatus vestem mutavit. M. Cato in petitione præturæ, prælato Vatinio, repulsam tulit: idem quum legem inpediret, qua provinciæ consulibus in quinquennium, Pompeio Hispaniæ, Crasso Syria et Parthicum bellum, Cæsari Gallia et Germania dabantur, a C. Trebonio tribuno plebis, legis auctore, in vincula ductus est. A. Gabinius proconsul Ptolemæum reduxit in regnum Ægypti, ejecto Archelao, quem sibi regem adsciverant. Cæsar, victis Germanis in Gallia cæsisque, Rhenum transcendit, et proximam partem Germaniæ domuit: ac deinde oceano in Britanniam, primo parum prospere tempestatibus adversis, trajecit; iterum parum felicius: magnæque multitudine hostium cæsa, aliquam partem insulæ in potestatem redegit.

CVI.

JULIA Cæsaris filia, Pompeii uxor, decessit: honosque ei a populo habitus est, ut in campo Martio sepeliretur. Gallorum aliquot populi, Ambiorige duce Eburonum, defecerunt: a quibus Cotta et Titurius, legati Cæsaris, circumventi insidiis, cum exercitu, cui præerant, cæsi sunt: et quum aliarum quoque legionum castra obpugnata magno labore defensa essent, interque eos, qui in Nervii præerat, Q. Cicero, ab ipso Cæsare hostes prælio fusi sunt. M. Crassus, bellum Parthis inlaturus, Euphratem fluvium transiit, victusque prælio in quo et filius ejus cecidit, quum reliquias

exercitus in collem recepisset, evocatus in colloquium ab hostibus, velut de pace acturis, quorum dux erat Surenas, comprehensus, et, ne quid vivus pateretur, repugnans interfectus est.

CVII.

*C. CÆSAR, Treviris in Gallia victis, iterum in Germaniam transiit: nulloque ibi hoste invento, reversus in Galliam, Eburones et alias civitates, quæ conspiraverant, vicit, et Ambiorigem in fuga persecutus est. P. Clodii, a T. Annio Milone, candidato consulatus, Appia via ad Bovillas occisi, corpus plebs in curia cremavit. Quum seditiones inter candidatos consulatus Hypsæum, Scipionem, et Milonem essent, qui armis ac vi contendebant; ad comprimendas eas Cn. Pompeius legatus a senatu consul tertium factus est, obsens et solus, quod nulli alii umquam contigit. Quæstione decreta de morte P. Clodii, Milo iudicio damnatus in exilium actus est. Lex lata est, ut ratio absentis Cæsaris in petitione consulatus haberetur, invito et contradicente M. Catone. Præterea res gestas a C. Cæsare adversus Gallos, qui prope universi, Vercingentorige Arverno duce, defece-
runt, et laboriosas obsidiones urbium continet: inter quas Avarici Biturigum, et Gergoviæ Arvernorum.*

CVIII.

C. CÆSAR Gallos ad Alesiam vicit, omnesque Galliæ civitates, quæ in armis fuerant, in deditionem accepit. C. Cussius, quæstor M. Crassi, Parthos, qui in Syriam transcenderant, cecidit. In petitione consulatus M. Cato repulsam tulit, creatis consulibus Ser. Sulpicio, M. Marcello. C. Cæsar Bellovacos cum aliis Gallorum populis domuit. Præterea contentiones in-

ter consules de successore C. Cæsari mittendo, agente in senatu M. Marcello consule, ut Cæsar ad petitionem consulatus veniret, quum is lege lata in id tempus consulatus provincias obtinere deberet, resque a M. Bibulo in Syria gestas continet.

CIX.

CAUSSÆ civilium armorum et initia referuntur, contentionesque de successore C. Cæsari mittendo, quum se dimissurum exercitus negaret, nisi a Pompeio dimitterentur. Et C. Curionis tribuni plebis primum adversus Cæsarem, dein pro Cæsare actiones continet. Quum senatusconsultum factum esset, ut successor Cæsari mitteretur, M. Antonio et Q. Cassio tribunis plebis, quoniam intercessionibus id senatusconsultum inpediebant, urbe pulsus, mandatum est a senatu consulibus et Cn. Pompeio, ut viderent, ne quid respublica detrimenti caperet. C. Cæsar, bello inimicos persecuturus, cum exercitu in Italiam venit: Corfinium cum L. Domitio et L. Lentulo cepit, eosque dimisit. Cn. Pompeium ceterosque partium ejus Italia expulit.

CX.

C. CÆSAR Massiliam, quæ portas ipsi clauserat, obsedit: et, relictis in obsidione urbis ejus legatis, C. Trebonio et D. Bruto, profectus in Hispaniam, L. Afranium et M. Petreium, legatos Cn. Pompeii, cum septem legionibus ad Ilerdam in deditionem accepit, omnesque incolumes dimisit, Varrone quoque legato Pompeii cum exercitu in potestatem suam redacto. Gaditanis civitatem dedit. Massilienses, duobus navalibus præliis victi, post longam obsidionem potestati Cæsaris se permiserunt. C. Antonius, legatus Cæsaris,

male contra Pompeianos in Illyrico rebus gestis, captus est. In quo bello Opitergini Transpadani, Cæsaris auxiliares, rate sua ab hostilibus navibus clausa, potius, quam in potestatem hostium venirent, inter se concurrentes obcubuerunt. C. Curio, legatus Cæsaris in Africa, quum prospere adversus Varum, Pompeianarum partium ducem, pugnasset, a Juba rege Mauritaniæ cum exercitu cæsus est. C. Cæsar in Græciam trajecit.

CXI.

M. CÆLIUS Rufus prætor, quum seditiones in urbe concitaret, novarum tabularum spe plebe sollicitata, abrogato magistratu pulsus urbe, Miloni exsuli, qui fugitivorum exercitum contraxerat, se conjunxit: uterque, quum bellum molirentur, interfecti sunt. Cleopatra, Ægypti regina, a Ptolemæo fratre regno pulsa est. Propter Q. Cassii prætoris avaritiam crudelitatemque Cordubenses in Hispania cum duabus Varianis legionibus a partibus Cæsaris desciverunt. Cn. Pompeius, ad Dyrrachium obsessus a Cæsare, et, præsidii ejus cum magna clade diversæ partis expugnatis, obsidione liberatus, translato in Thessaliam bello, apud Pharsaliam acie victus est. Cicero in castris remansit, vir nihil minus quam ad bella natus: omnibusque adversarum partium, qui se potestati victoris permiserunt, Cæsar ignovit.

CXII.

TREPIDATIO victarum partium in diversas orbis terrarum partes et faga referuntur. Cn. Pompeius, quum Ægyptum petisset, jussu Ptolemæi regis pupilli, auctore Theodoto præceptore, cujus magna apud re-

gem auctoritas erat, et Pothino, occisus est ab Achilla, cui id facinus erat delegatum, in navicula, antequam in terram exiret. Cornelia uxor et Sex. Pompeius filius Cypron refugerunt. Cæsar, post tertium diem insecutus, quum ei Theodotus caput Pompeii et annulum obtulisset, et infensus est, et inlacrimavit: sine periculo Alexandriam tumultuantem intravit. Cæsar, dictator creatus, Cleopatram in regnum Ægypti reduxit, et inferentem bellum iisdem auctoribus Ptolemæum, quibus Pompeium interfecerat, cum magno suo discrimine vicit. Ptolemæus dum fugit, in Nilo navicula subsedit. Præterea laboriosum M. Catonis in Africa per deserta cum legionibus iter, et bellum a Cn. Domitio contra Pharnacem parum prospere gestum continet.

CXIII.

CONFIRMATIS in Africa Pompeianis partibus, imperium earum P. Scipioni delatum est; Catone, cui ex æquo deferebatur imperium, cedente. Et quum de diruenda urbe Utica propter favorem civitatis ejus in Cæsarem deliberaretur, idque ne fieret, M. Cato tenuisset, Juba suadente, ut dirueretur; tutela ejus et custodia mandata est Catoni. Cn. Pompeius Magni filius in Hispania, contractis viribus, quarum ducatum nec Afranius, nec Petreius excipere volebant, bellum adversus Cæsarem renovavit. Pharnaces, Mithridatis filius, rex Ponti, sine ulla belli mora victus est. Quum seditiones Romæ a P. Dolabella tribuno plebis, legem ferente de novis tabulis, excitata essent, et ex ea causa plebs tumultuaretur, inductis a M. Antonio magistro equitum in urbem militibus, octingenti e plebe cæsi sunt. Cæsar veteranis cum seditione missionem postu-

lantibus dedit: et, quum in Africam trajecisset, contra copias Jubæ regis cum discrimine magno pugnavit.

CXIV.

BELLUM in Syria Cæcilius Bassus, eques Romanus Pompeianarum partium excitavit, relicto a legione Sex. Cæsare, quæ ad Bassum transierat, occisoque eo. Cæsar Scipionem prætorem, Afranium, Jubamque vicit ad Thapsum, castris eorum expugnatis. Cato, audita re, quum se percussisset Uticæ, et, interveniente filio, curaretur, inter ipsam curationem rescisso vulnere exspiravit, anno ætatis quadragesimo nono. Petreius Jubam seque interfecit. P. Scipio in nave circumventus honestæ morti vocem quoque adjecit: quærentibus enim imperatorem hostibus dixit, Imperator bene se habet. Faustus et Afranius occisi. Catonis filio venia data. Brutus, legatus Cæsaris, in Gallia Bellovacos rebelantes prælio vicit.

CXV.

CÆSAR quatuor triumphos duxit; ex Gallia, ex Ægypto, ex Ponto, ex Africa. Epulum et omnis generis spectacula dedit. M. Marcello consulari, senatu rogante, reditum concessit. Qui Marcellus beneficio ejus frui non potuit, a Cn. Magio Cilone cliente suo Athenis occisus. Recensum egit, quo censa sunt civium capita centum quinquaginta millia. Profectusque in Hispaniam adversus Cn. Pompeium, multis utrimque expeditionibus factis, et aliquot urbibus expugnatis, summam victoriam cum magno discrimine ad Mundam urbem consecutus est. Pompeius Sextus effugit.

CXVI.

C. CÆSAR ex Hispania quintum triumphum egit. Et quum plurimi maximique honores ei a senatu decreti essent, inter quos ut Pater Patriæ adpellaretur, et sacrosanctus, ac dictator in perpetuum esset, invidiæ causam adversus eum præstitere, quod senat i deferenti hos honores, quum ante ædem Veneris Genitricis sederet, non adsurrexit : et quod a M. Antonio consule collega suo, inter Lupercos currente, diadema capiti suo inpositum in sella reposuit : et quod Epidio Marullo et Cæsetio Flavo tribunis plebis, invidiam ei tamquam regnum adfectanti moventibus, potestas abrogata est. Ex iis causis conspiratione in eum facta, (cujus capita fuerunt M. Brutus et C. Cassius, et ex Cæsaris partibus D. Brutus et C. Trebonius) in Pompeii curia occisus est viginti tribus vulneribus, occupatumque ab interfectoribus ejus Capitolium. Oblivione deinde cædis ejus a senatu decreta, obsidibus Antonii et Lepidi liberis acceptis, conjurati a Capitolio descenderunt. Testamento Cæsaris hæres ex parte dimidia institutus C. Octavius sororis nepos, et in nomen adoptatus est. Cæsaris corpus, quum in campum Martium ferretur, a plebe ante rostra crematum est. Dictaturæ honos in perpetuum sublatus est. C. Amatius, humillimæ sortis homo, qui se C. Marii filium ferebat, quum apud credulam plebem seditiones moveret, necatus est.

CXVII.

C. OCTAVIUS Romam ex Epiro venit, (eo enim illum Cæsar præmiserat, bellum in Macedonia gesturus) omnibusque prosperis exceptus etiam nomen Cæsaris sumpsit. In confusione rerum ac tumultu Lepidus pon-

tificatum maximum interceptit. Sed M. Antonius consul, quum inpotenter dominaretur, legemque de permutatione provinciarum per vim tulisset, et Cæsarem quoque, petentem, ut sibi adversus percussores avunculi adesset, magnis injuriis adfecisset: Cæsar, et sibi, et reipublicæ vires adversus eum paraturus, deductos in colonias veteranos exivit. Legiones quoque quarta et Martia signa ab Antonio ad Cæsarem tulerunt. Deinde et complures savitia M. Antonii, passim in castris suis trucidati, quia et suspecti erant, ad Cæsarem desciverunt. D. Brutus, ut petenti Cisalpinam Galliam Antonio obsisteret, Mutinam cum exercitu occupavit. Præterea discursus utriusque partis virorum ad accipiendas provincias, adparatusque belli continet.

CXVIII.

M. BRUTUS in Græcia sub prætextu reipublicæ et suscepti contra M. Antonium belli exercitum, cui Vatinius præerat, cum provincia in potestatem suam redegit. C. Cæsori, qui primus reipublicæ arma sumserat, proprætoris imperium a senatu datum est cum consularibus ornamentis; adjectumque ut senator esset. M. Antonius D. Brutum Mutinæ obsedit: missique ad eum a senatu legati de pace parum ad eam componendam valuerunt. Populus Romanus sagu sumsit. M. Brutus in Epiro C. Antonium prætorem cum exercitu potestati suæ subjecit.

CXIX.

C. TREBONIUS in Asia fraude P. Dolabellæ occisus est. Ob id facinus Dolabella hostis a senatu judicatus est. Quum Pansa consul male adversus Antonium pugnasset, A. Hirtius consul cum exercitu super-

veniens, fuis *M. Antonii* copiis, fortunam utriusque partis æquavit. Fictus deinde ab *Hirtio* et *Cæsare* *Antonius* in Galliam confugit, et *M. Lepidum* cum legionibus, quæ sub ipso erant, sibi junxit: hostisque a senatu cum omnibus, qui intra præsidia ejus essent, judicatus est. *A. Hirtius*, qui post victoriam in ipsis hostium castris ceciderat, et *C. Pansa*, e vulnere, quod in adverso prælio exceperat, defunctus, in campo *Murtio* sepulti sunt. Adversus *C. Cæsarem*, qui solus e tribus ducibus supererat, purum gratus senatus fuit: qui, *D. Bruto*, obsidione *Mutinensi* a *Cæsare* liberato, honore triumphii decreto, *Cæsaris* militumque ejus mentionem non satis gratam habuit: ob quæ *C. Cæsar*, reconciliata per *M. Lepidum* cum *M. Antonio* gratia, Romam cum exercitu venit, et, perculsis adventu ejus, qui in eum iniqui erant, quum annos novemdecim haberet, consul creatus est.

CXX.

CÆSAR consul legem tulit de quæstione habenda in eos, quorum opera pater occisus esset: postulatique ea lege *M. Brutus*, *C. Cassius*, *D. Brutus*, absentes damnati sunt. Quum *M. Antonio* vires *Asinius* quoque *Pollio* et *Munatius Plancus*, cum exercitibus suis adjuncti, ampliassent, et *D. Brutus*, cui senatus, ut persequeretur *Antonium*, mandaverat, relictus a legionibus suis, profugisset; jussu *Antonii*, in cujus potestatem venerat, a *Capeno Sequano* interfectus est. *C. Cæsar* pacem cum *Antonio* et *Lepido* fecit: ita ut tresviri reipublicæ constituendæ per quinquennium essent ipse, et *Lepidus*, et *Antonius*; et ut suos quisque inimicos proscriberent: in qua proscriptione plurimi equites *Romani*, centum triginta senatorum nomina fuerunt, et

inter eos L. Paulli fratris M. Lepidi, et L. Cæsaris Antonii avunculi, et M. Ciceronis: hujus, occisi a Popillio legionario milite, quum haberet annos sexaginta tres, caput quoque cum dextra manu in rostris positum est. Præterea res a M. Bruto in Græcia gestas continet.

CXXI.

C. CASSIUS, cui mandatum a senatu erat, ut Dolabellam hostem judicatum bello persequeretur, auctoritate reipublicæ adjutus, Syriam cum tribus exercitibus, qui in eadem provincia erant, in potestatem suam redegit. Dolabellam in urbe Laodicea obsessum, mori cœgit. M. quoque Bruti jussu C. Antonius captus, occisus est.

CXXII.

M. BRUTUS adversus Thracas parum prospere rem gessit; omnibusque transmarinis provinciis exercitibusque in potestatem ejus et C. Cassii redactis, cœerunt Smyrnæ uterque ad ordinanda belli futuri consilia. M. Messallæ Poplicolam fratrem victum communi consilio condonaverunt.

CXXIII.

SEX. Pompeius, Magni filius, lectis ex Epiro proscriptis ac fugitivis, cum exercitu diu, sine ulla loci cujusquam possessione, prædatus in mari, Messanam oppidum in Sicilia primum, deinde totam provinciam occupavit: occisoque A. Pompeio Bithynico prætore, Q. Salvidienum legatum Cæsaris navali prælio vicit. Cæsar et Antonius cum exercitibus in Græciam trajecterunt, bellum contra Brutum et Cassium gesturi. Q.

Cornificius in Africa T. Sextium, Cassianarum partium ducem, prælio vicit.

CXXIV.

C. CÆSAR et Antonius apud Philippos vario eventu adversus Brutum et Cassium pugnaverunt, ita ut dextra utriusque cornua vincerent, et castra quoque utrimque ab iis, qui vicerant, expugnarentur. Sed inæqualem fortunam partium mors Cassii fecit: qui, quum in eo cornu fuisset, quod pulsum erat, totum exercitum fusum ratus, mortem sibi conscivit. Altero deinde prælio victus M. Brutus et ipse vitam finivit, exorato Stratone fugæ comite, ut sibi gladium adigeret, annorum circiter quadraginta, inter quos Q. Hortensius occisus est.

CXXV.

C. CÆSAR, relicto Antonio, transmarinæ provinciæ ex parte imperium ei cessit: reversus in Italiam veteranis agros divisit. Seditiones exercitus sui, quas corrupti a Fulvia, M. Antonii uxore, milites adversus imperatorem suum concitaverant, cum gravi periculo inhibuit. L. Antonius consul, M. Antonii frater, eadem Fulvia consiliante, bellum Casari intulit; receptis in partes suas populis, quorum agri veteranis adsignati erant, et M. Lepido, qui custodiæ urbis cum exercitu præerat, fuso, hostiliter in urbem inrupit.

CXXVI.

C. CÆSAR, quum esset annorum viginti trium, obsessum in oppido Perusia L. Antonium conatumque aliquoties erumpere, et repulsum, fame coëgit in deditionem venire; ipsique et omnibus militibus ejus igno-

vit. *Perusiam diruit: redactisque in potestatem suam omnibus diversæ partis exercitibus, bellum citra ullum sanguinem confecit.*

CXXVII.

PARTHI, Labieno, qui Pompeianarum partium fuerat, duce, in *Syriam* intruperunt: victoque *Decidio Saxa*, *M. Antonii* legato, totam eam provinciam occupaverunt. *M. Antonius*, quum ad bellum contra *Cæsarem* gerendum incitaretur, uxore *Fulvia* dimissa, ne concordie ducum obstaret, pace facta cum *Cæsare*, sororem ejus *Octaviam* in matrimonium duxit. *Q. Salvidienum*, consilia nefaria contra *Cæsarem* molitum, indicio suo protraxit, isque damnatus mortem sibi conscivit. *P. Ventidius*, *Antonii* legatus, *Parthos*, prælio victos, *Syria* expulit, *Labieno* eorum duce occiso. Quum vicinus *Italiæ* hostis *Sex. Pompeius* *Siciliam* teneret, et commercium annonæ impediret, cum eo postulatam pacem *Cæsar* et *Antonius* fecerunt, ita ut *Siciliam* provinciam haberet. Præterea motus *Africæ* et bella ibi gesta continet.

CXXVIII.

QUUM *Sex. Pompeius* rursus latrociniis mare infestum redderet, nec pacem, quam acceperat, præstaret, *Cæsar*, necessario adversus eum bello suscepto, duobus navalibus præliis dubio eventu pugnavit. *P. Ventidius*, legatus *M. Antonii*, *Parthos* in *Syria* prælio vicit, regemque eorum occidit. *Judæi* quoque a legatis *Antonii* subacti sunt. Præterea belli *Siculi* adparatum continet.

CXXIX.

ADVERSUS Sex. Pompeium vario eventu navalibus præliis pugnatum est: ita ut ex duabus Cæsaris classibus altera, cui Agrippa præerat, vinceret; altera, quam Cæsar duxerat, deleta, expositi in terram milites in magno periculo essent. Victus deinde Pompeius in Siciliam profugit. M. Lepidus, qui ex Africa velut ad societatem belli, contra Sex. Pompeium a Cæsare gerendi, trajecerat, quum bellum Cæsari quoque inferret, relictus ab exercitu, abrogato triumviratus honore, vitam inpetravit. M. Agrippa navali corona a Cæsare donatus est: qui honos nulli ante eum habitus erat.

CXXX.

M. ANTONIUS, dum cum Cleopatra luxuriatur, tarde Mediam ingressus, bellum cum legionibus octodecim et sexdecim millibus equitum Parthis intulit: et quum, duabus legionibus amissis, nulla re prospere cedente, retro rediret, insecutis subinde Parthis, et ingenti trepidatione, et magno totius exercitus periculo, in Armeniam reversus est, viginti et uno diebus trecenta millia fuga emensus: circa octo millia hominum tempestatibus amisit: tempestates quoque infestas, super tam infelicitè susceptum Parthicum bellum, culpa sua passus est; quia hiemare in Armenia nolebat, dum ad Cleopatram festinat.

CXXXI.

SEX. Pompeius, quum in fidem M. Antonii veniret, bellum adversus eum in Asia moliens, obpressus a legatis ejus, occisus est. Cæsar seditionem veteranorum,

cum magna perniciæ motam, inhibuit: Iapydas, et Dalmatas, et Pannonios subegit. Antonius Artavasdem, Armeniæ regem, fide data perductum, in vincula conjici jussit, regnumque Armeniæ filio suo, ex Cleopatra nato, dedit; quam uxoris loco, jam pridem captus amore ejus, habere cæperat.

CXXXII.

CÆSAR in Illyrico Dalmatas domuit. Quum M. Antonius ab amore Cleopatræ, ex qua duos filios habebat, Philadelphum et Alexandrum, neque in urbem venire vellet, neque, finito triumviratus tempore, imperium deponere, bellumque moliretur, quod urbi et Italiæ inferret, ingentibus tam navalibus quam terrestribus copiis ob hoc contractis, remissoque Octaviæ sorori Cæsaris repudio, Cæsar in Epirum cum exercitu trajecit. Pugnæ deinde navales et prælia equestria secunda Cæsaris referuntur.

CXXXIII.

M. ANTONIUS, ad Actium classe victus, Alexandriam profugit; obsessusque a Cæsare, in ultima rerum desperatione, præcipue occisæ Cleopatræ falso rumore impulsus, se ipse interfecit. Cæsar, Alexandria in potestatem redacta, Cleopatra, ne in arbitrium victoris veniret, voluntaria morte defuncta, in urbem reversus, tres triumphos egit: unum ex Illyrico, alterum ex Actiaca victoria, tertium de Cleopatra, inposito fine civilibus bellis altero et vigesimo anno. M. Lepidus, Lepidi, qui triumvir fuerat, filius, conjuratione contra Cæsarem facta, bellum moliens, obpressus et occisus est.

CXXXIV.

CÆSAR, rebus compositis, et omnibus provinciis incertam formam redactis, Augustus quoque cognominatus est: et mensis Sextilis in honorem ejus adpellatus est. Quum ille conventum Narbone ageret, census a tribus Galliis, quas Cæsar pater vicerat, actus. Bellum adversus Bastarnas, et Mæsos, et alias gentes, a M. Crasso gestum, refertur.

CXXXV.

BELLUM a M. Crasso adversus Thracas, et a Cæsare adversus Hispanos gestum refertur: et Salassi, gens Alpina, perdomiti.

CXXXVI.

RÆTIA a Ti. Nerone et Druso, Cæsaris privignis, domita. Agrippa, Cæsaris gener, mortuus; et a Druso census actus est.

CXXXVII.

CIVITATES Germaniæ, cis Rhenum et trans Rhenum positæ, obpugnantur a Druso; et tumultus, qui ob censum exortus in Gallia erat, compositus; ara Cæsari ad confluentem Araris et Rhodani dedicata, sacerdote creato C. Julio Vercundari Dubio Æduo.

CXXXVIII.

THRACES domiti a L. Pisone; item Cherusci, Tenceteri, Chatti, aliæque Germanorum trans Rhenum gentes subactæ a Druso referuntur. Octavia, soror Augusti, defuncta, antea amisso filio Marcello: cujus monumenta sunt theatrum et porticus, nomine ejus dedicata.

CXXXIX.

BELLUM adversus Transrhenanas gentes a Druso gestum refertur : in quo inter primores pugnaverunt Senectius et Anectius tribuni, ex civitate Nerviorum. Dalmatas et Pannonios Nero, frater Drusi, subegit. Pax cum Parthis facta est, signis a rege eorum, quæ sub Crasso, et postea sub Antonio capta erant, redditis.

CXL.

BELLUM adversus Germanorum trans Rhenum civitates, gestum a Druso, refertur. Ipse ex fractura, equo super crus ejus collapsus, tricesimo die, quam id acciderat, mortuus est. Corpus a Nerone fratre, qui, nuncio valetudinis evocatus, raptim adcurrerat, Romam pervectum, et in C. Julii tumultu conditum. Laudatus est a Cæsare Augusto vitrico, et supremis ejus plures honores additi.



FRAGMENTUM

LIBRI XCI.

TAMEN insequenti ipso pervigilante in eodem loco alia excitata turris prima luce miraculo hostibus fuit, simul et oppidi turris, quæ maximum propugnaculum fuerat, subrutis fundamentis, dehiscere ingentibus rimis, et tu * * * * * jus * * * um igni cœpit; incendiique simul et ruinæ metu territi Contrebienses de muro trepidi effugerunt; et ut legati mitterentur ad dedendam urbem, ab universa multitudine conclamatum est. Eadem virtus, quæ inritantes oppugnaverat, victorem placabiliorem fecit. Obsidibus acceptis, pecuniæ modicam exegit summam, armaque omnia ademit; transfugas liberos vivos ad se adduci jussit, et fugitivos, quorum major multitudo erat: ipsis imperavit, ut interficerent: jugulatos de muro dejecerunt. Cum magna jactura militum quatuor et quadraginta diebus Contrebia expugnata, relictoque ibi L. Justeio * * * ad Hiberum flumen copias adduxit. Ibi hibernaculis secundum oppidum quod Castra Ælia vocatur, ædificatis, ipse in castris manebat, interdiu conventum sociarum civitatum in oppido agebat. Arma ut fierent pro copiis cujus-

que populi per totam provinciam edixerat, quibus inspectis referre cetera arma milites jussit, quæ aut itineribus crebris aut oppu * * * f. * * an * * * * * tione inita, qu * * di * culo effici possit.

Itaque omnes simul insta * * m * * * tur, neque materia artificibus, præparatis ante omnibus * inixo (f. *enixo*) civitium * * (l. *civitatum* vel *civium*) udio, (f. *studio*) nec suo quisque operi artifex deerat * * * * * * * * * quæque in oppugnandis urbibus hostium gessisset, exposuit, et ad reliqua belli cohortatus est, paucis edoctos, quantum Hispaniæ provinciæ interesset, suas partes superiores esse. Dimisso deinde conventu, jussisque omnibus ibi * * * * re suas principio veris M. Perpernam cum viginti millibus peditum, equitibus mille quingentis in Ilurcaonum (*Ilercaonum*) gentem misit, ad tuendam regionis ejus maritimam oram, datis præceptis, quibus itineribus duceret ad defendendas socias urbes, quas Ponpeius oppugnaret, quibusque ipsum agmen Ponpei ex insidiis adgrederetur.

Eodem tempore et ad Herennuleium, qui in isdem locis erat, litteras misit, et in alteram provinciam, ad L. Hertuleium (*Hirtuleium*) præcipiens, quemadmodum bellum administrare vellet: (*administrari* vel *administrare ipsum vellet*) ante omnia ut ita socias civitates tueretur, ne acie cum Metello dimicaret, cui neque auctoritate, neque viribus par esset * * * * m consilium * * * verum * * neque in aciem descensurum eum credebatur, si traheretur bellum: hosti, cum mare ab tergo, provinciasque omnes in potestate haberet, navibus un-

dique commeatus venturos ; ipsi autem, consumptis priore æstate quæ præparata fuissent, omnium rerum inopiam fore.

Perpernam in maritimam regionem sub * *
 * tum * * * * a geri, cum ab se
 oppugnarentur Celtiberi ut * * * *
 * * armis * * * *
 æmu * * * maritimamne oram,
 ut Ponpeium ab Ilercaonia, et Contestania arceat,
 utraque socia gente, an ad Metellum et Rusitaniam
 (*Lusitaniam*) se convertat ? Hæc secum agitans Ser-
 torius præter Hiberum amnem per pacatos agros
 quietum exercitum sine ullius noxa duxit. Profec-
 tus inde in Bursaonum, et Casuantinorum (*Cascan-*
tinorum) et Graccuritanorum fines, evastatis omnibus
 proculecatisque segitibus, ad Calagurim Nasicam so-
 ciorum urbem benit ; (*venit*) transgressusque amnem
 propinquum urbi, ponte facto, castra posuit.

Postero die M. Masium quæstorem in Arvacos,
 (*Arevacos*) et Cerindones (*Pelendones*) misit ad con-
 scribendos ex iis gentibus milites, frumentumque
 inde Contrebiæ quæ Leucada appellatur, conpor-
 tandum, præter quam urbem opportunissimus ex
 Beronibus transitus erat in quamcumque regionem
 ducere exercitum statuisset ; et C. Instelum (*In-*
steium v. Justeium) præfectum equitum Segoviam, et
 in Vacreorum (*Vacæorum* vel *Vaccæorum*) gentem ad
 equitum conquisitionem misit, jussum cum equiti-
 bus Contrebiæ sese opperiri. Dimissis iis ipse pro-
 fectus, per Umconum (*Vasconum*) agrum ducto ex-
 exercitu, in confinio Vironum (*Beronum*) posuit cas-
 tra. Postero die cum equitibus prægressus ad iti-
 nera exploranda, jusso pedite quadrato agmine se-

qui, ad Vareiam validissimam regionis ejus urbem
venit. Haud inopinantibus * * * advenerat,
undique et suæ gentis et Autrig * * * *
* * * * *

FRAGMENTA
DEPERDITORUM LIBRORUM
T. LIVII,

EX ANTIQUIS GRAMMATICIS ALIISQUE COLLECTA.

EX LIB. XIV.

Privato nos tenuissemus. *Priscian. lib. xv. Gramm. pag. 1009.*

EX LIB. XVII.

Pridie Nonas. Pridie Idus. *Priscian. lib. xiv. Gramm. pag. 992.*

EX LIB. XVIII.

Imberbi vulgariter. *Charis. lib. i. Gramm. pag. 74.*

EX LIB. XCIV.

Livius in libro nonagesimo quarto Inarimem in partibus Mæoniæ esse dicit; ubi per quinquaginta millia terræ igni exustæ sunt. Hoc etiam Homerum significasse vult. *Servius ad Virg. Æn. ix. 715.*

EX LIB. CIII.

Horrendus magis est, premit qui corpora, carbo.
Urit hic inclusus, vitalia rumpit acerbus :
Hunc veteres quondam variis pepulere medelis.

Tertia namque Titi simul et centesima Livi
 Charta docet, ferro talem candente dolorem
 Exactum, aut poto raporum semine pulsum :
 Infecti dicens vix septem posse diebus
 Vitam produci : tanta est violentia morbi.

Q. Seren. Samon. de Medic. cap. 39. v. 725.

EX LIB. CVII.

Qui Pompeium morbum excusasse ferunt, ne, quum
 interesset deditiōi, animos Numantinorum irritaret.
Priscian. lib. xviii. Gramm. pag. 1198.

EX LIB. CXII.

Castra quoque diversis partibus Cassius et Bogud
 adorti haud multum abfuere, quin opera perrumpe-
 rent.

Quo tempore firmandi regni Bogudis caussa exer-
 citum in Africam velociter trajicere conatus sit.

Cassius gessisset cum Trebonio bellum, si Bogu-
 dem trahere in societatem furoris potuisset.

Priscian. lib. vi. Gramm. pag. 686 et 687.

EX LIB. CXIII.

Bogud, Bogudis, nomen barbarum, quod Livius in
 cxiii. declinavit Bogudis. *Priscian. lib. v. Gramm.
 pag. 643.*

Et ipse circa Pulpud oram tuebatur. *Priscian. lib.
 vi. Gramm. pag. 687.*

EX LIB. CXVIII.

Adversus interfectores C. Cæsaris ultoribus ma-
 num comparans concibat. *Priscian. lib. ix. Gramm.
 pag. 865.*

EX LIB. CXXVII.

Quoniam inter Augustum et Antonium reliquiae adhuc erant dissensionis, Cocceius Nerva, proavus Nervæ, qui postea imperavit Romæ, mandavit Augusto, ut mitteret, qui de summa rerum tractarent. Ergo missus est Mæcenus cum Agrippa, qui utrumque exercitum in una castra coëgerunt, ut ait Livius lib. cxxvii. Intelligendum autem, quod, Fonteio misso ab Antonio, Augustus Mæcenatem et ceteros ad eundem locum emisit. *Acro ad Horatii lib. i. Sat. v. 29.*

Porphyrio notat: Dissensione orta inter Cæsarem Augustum Antoniumque, Cocceius Nerva, avus ejus, qui postea Romæ imperavit, petiit a Cæsare, ut aliquem, qui de summa rerum tractaret, mitteret Taracinam. Et primum Mæcenus, mox et Agrippa congressi sunt, hique pepigerunt fidem confirmatissimam, et in una castra conferri signa utriusque exercitus jusserunt. Hoc et T. Livius lib. cxxvii. refert, excepta Capitonis mentione.

Commentator vero Cruquii: Ab Antonio missus fuerat Fonteius Capito legatus, ab Augusto Mæcenus, intercedente Cocceio Nerva, proavo Nervæ imperatoris, (qui et Augusto et Antonio gratus erat) cum Agrippa. Ea autem conditione convenerant legati, ut de summa rerum tractarent, exortamque dissensionem inter duos hos imperatores componerent; quod et fecerunt, et utrumque exercitum juxta Brundisium in una castra cum magna lætitia coëgerunt, ut infert Livius lib. cxxvii.

EX LIB. CXXXVI.

Eodem anno ludos seculares Cæsar ingenti apparatu fecit; quos centesimo quoque anno (is enim terminus seculi) fieri mos. *Censorin. de die natal. cap. xvii.*

LIBRORUM INCERTORUM.

Curribus falcatis usos esse maiores, et Livius et Sallustius docent. *Servius ad Virg. Æn. i. 476.*

Ni Pyrrhus unicus pugnandi artifex, magisque in prælio, quam bello, bonus. *Servius ad Virg. Æn. i. 456.*

Sichæus, Sicharbas dictus est; Belus, Didonis pater, Methres; Carthago a Carthada, ut lectum est: quod invenitur in historia Pœnorum, et in Livio. *Servius ad Virg. Æn. i. 343.*

Carthago est lingua Pœnorum nova civitas, ut docet Livius. *Servius ad Virg. Æn. i. 366.*

Bitias classis Punicæ fuit præfectus, ut docet Livius. *Servius ad Virg. Æn. i. 738.*

Serpentis quoque a T. Livio curiose pariter ac facunde relatæ fiat mentio. Is enim ait, in Africa apud Bagradam flumen tantæ magnitudinis anguem fuisse, ut Atilii Reguli exercitum usu annis prohiberet: multisque militibus ingenti ore correptis, compluribus candæ voluminibus elisis, quum telorum jactu perforari nequiret, ad ultimum balistarum tormentis undique petitam, silicum crebris et ponderosis verberibus procubuisse, omnibusque et cohortibus et legionibus ipsa Karthagine visam terribiliorem. Atque etiam cruore suo gurgitibus imbutis, corporisque jacentis pestifero afflatu vicina regione

polluta, Romana inde submovisse castra. Dicit belluæ etiam corium centum viginti pedes longum in urbem missum. *Valer. Max. lib. i. cap. viii. ex. ext. ult.*

Tertii ludi (*seculares*) fuerunt, Antiæ Livioque auctoribus, P. Claudio Pulchro, C. Junio Pullo consulibus. *Censorin. de die natal. cap. xvii.*

De quartorum ludorum (*secularium*) anno triplex opinio est. Antias enim, et Varro, et Livius relatos esse prodiderunt L. Marcio Censorino, M. Manilio consulibus, post Romam conditam anno sexcentesimo quinto. *Censorin. de die natal. cap. xvii.*

Sulla nobilissimum conjugium contrahit, Cæcilia ducta Metelli pontificis maximi filia. Ob quod cecinit multa in eum probrose vulgus, multique ex primoribus inviderunt ei, indignum illa femina existimantes, ut Titus ait, quem consulatu judicaverant dignum. *Plutarch. in vita Sullæ, pag. 455.*

Sulla quum primum ad urbem contra Marium castra movisset, adeo læta exta immolanti fuisse scribit Livius, ut custodiri se Postumius aruspex voluerit, capitis supplicium subiturus, nisi ea, quæ in animo Sulla haberet, Diis juvantibus implevisset. *Augustin. de civit. Dei, lib. ii. cap. xxiv.*

Eversis quippe et incensis omnibus cum oppido simulacris, solum Minervæ simulacrum sub tanta ruina templi illius, ut scribit Livius, integrum stetit perhibetur. *Augustin. de civit. Dei, lib. iii. cap. vii.*

Hoc primum prælium inter Sertorium et Pompeium fuit: decem millia hominum de Pompeii exercitu amissa, et omnia impedimenta, Livius auctor est. *Frontin. lib. ii. Strateg. cap. v. ex. 31.*

Triginta quinque millia armatorum eo proelio interfecta cum ipsis ducibus Livius tradit, receptas quinque Romanorum aquilas, signa sex et viginti, multa spolia, inter quæ quinque fascēs cum securibus. *Frontin. lib. ii. Strateg. cap. v. ex. 34.*

Livius ait, numquam Romanos signa cum hostibus contulisse tanto numero inferiores. Neque enim vigesimam propemodum partem, immo nec minorem, æquarunt victores victorum. *Plutarch. in Lucull. pag. 511.*

Livius auctor est, priore proelio plures fuisse, in hoc nobiliores hostium cæsos et captos. *Plutarch. in Lucull. pag. 513.*

Creta primo quidem centum habuit civitates: unde Hecatompolis dicta est: post viginti quatuor: inde, ut dicitur, duas, Gnoson et Hierapidnam. Quamvis Livius plures a Metello expugnatas dicat. *Servius ad Virg. Æn. iii. 106.*

Quod quum diluisset. (*de morte Mithridatis*) *Agræti-
tius de orthogr. in Putschii corpore grammat. pag.
2267. et Gothofr. Auctor. Ling. Lat. pag. 1352.*

Etenim capta urbe, tertio demum mense, die jejunii, Olympiade centesima septuagesima nona, C. Antonio et M. Tullio Cicerone consulibus, quum vi ingressi hostes eos, qui erant in fano, jugularent, nihilo secius rem divinam facere perseverabant, neque metu vitæ amittendæ, neque jam cæsorū multitudinē in fugam compulsi, quicquid pati necesse erat, illud ad aras ipsas laturos esse melius putantes, quam ut aliquid legibus patriis præscriptum omitterent. Quod autem ista non sint fabula, unice ad falsæ pietatis laudem ostentandam adhibita, sed ipsam et veritas, testimonio sunt, qui res a Pompeio gestas

memoriæ prodiderunt ; et in his Strabo, et Nicolaus, ac præterea T. Livius, historiæ Romanæ scriptor. *Joseph. lib. xiv. antiq. Jud. cap. iv. sect. iii. pag. 689.*

Britanniæ licet magnitudinem olim nemo (ut refert Livius) circumvectus est, multis tamen data est varia opinio de ea loquendi. *Jornandes de rebus Getic. cap. ii.*

Septingentesimo conditionis suæ anno, quatuordecim vicos ejus [*Romæ*] incertum unde consurgens flamma consumsit : nec unquam, ut ait Livius, majore incendio vastata est ; adeo ut post aliquot annos Cæsar Augustus ad reparationem eorum, quæ tunc exusta erant, magnam vim pecuniæ ex ærario publico largitus sit. *Orosius lib. vii. cap. ii.*

Cæsar, Rubicone flumine transmeato, mox ut Ariminum venit, quinque cohortes, quas tunc solas habebat, cum quibus (ut ait Livius) orbem terrarum adortus est, quid facto opus esset, edocuit. *Orosius lib. vi. cap. xv.*

Primus hostem percussit nuper pilo sumpto primo C. Crastinus. *Scholiastes vetus Lucani ad lib. vii. 471.*

Patavii C. Cornelius, auguralis scientiæ peritus, Livii historici civis et familiaris, sub idem forte tempus operam dabat auspicio. Hic primum (ut Livius auctor est) tempus prælii cognovit, præsentibusque geri ait nunc rem, et prælium duces committere. Ut iterum aves inspexit, advertitque signa, fanaticus exiliit, clamans, Vincis Cæsar. Obstupescens illis, qui aderant, detracta capiti corona juravit, non prius se repositurum eam, quam arti res esset adstipulata. Hoc Livius verum esse affirmat. *Plut. in vita Cæsar. pag. 730.*

Quadringenta millia librorum Alexandria arserunt, pulcherrimum regiæ opulentia monumentum. Alius laudaverit, sicut Livius; qui elegantia regum curæque egregium id opus ait fuisse. *Seneca de tranquill. anim. cap. ix.*

Hæc de Basso quidam produnt: Livius vero, militasse illum Pompeii auspiciis; quo victo privatim egisse Tyri; corruptisque quibusdam legionibus effecisse, ut, interfecto Sexto, ipsum sibi ducem adsumerent. *Appian. Alex. lib. iii. bell. civil. pag. 576.*

Optarem mihi contingere, quod T. Livius scribit de Catone: cujus gloriae neque profuit quisquam laudando, nec vituperando quisquam nocuit, quum utrumque summis præditi fecerint ingeniis. Significat autem M. Ciceronem et C. Cæsarem, quorum alter laudes, alter vituperationes supra dicti scripsit viri. *Hieronymus prol. lib. ii. in Oseam.*

Quum Cæsaris ædibus esset ex senatusconsulto adjunctum, (ut auctor est Livius) velut ad ornamentum et amplitudinem, pinnaculum, id per quietem imaginata collabi Calpurnia videbatur sibi ideo lamentari et lacrimari: ac, quum lux appetisset, rogavit Cæsarem, si qua fieri posset, ne prodiret, sed in aliud tempus rejiceret senatum. *Plutarch. in vit. Cæsar. pag. 738.*

Malum omen est, quoties Ætna, mons Siciliae, non fumum, sed flammarum egerit globos: et, ut dicit Livius, tanta flamma ante mortem Cæsaris ex Ætna monte defluxit, ut non tantum vicinae urbes, sed etiam Rhagina civitas, quæ multo spatio ab ea distat, afflaretur. *Servius ad Virg. Georg. i. 471.*

Quod de Cæsare olim majore vulgo dictitatum est,

et a T. Livio positum, in incerto esse, utrum illum magis nasci reipublicæ profuerit, an non nasci, dici etiam de ventis potest. *Seneca lib. v. natur. quæst. xviii.*

M. Cicero sub adventum triumvirorum cesserat urbe, pro certo habens, id quod erat, non magis Antonio eripi se, quam Cæsari Cassium et Brutum, posse. Primo in Tusculanum fugit, inde transversis itineribus in Formianum, ut ab Caieta navim conscensurus, proficiscitur. Unde aliquoties in altum provectum quum modo venti adversi retulissent, modo ipse jactationem navis, cæco volvente fluctu, pati non posset, tædium tandem eum et fugæ et vitæ cepit: regressusque ad superiorem villam quæ paullo plus mille passibus a mari abest, *Moriar*, inquit, *in patria sæpe servata*. Satis constat, servos fortiter fideliterque paratos fuisse ad dimicandum; ipsum deponi lecticam, et quietos pati, quod fors iniqua cogeret, jussisse. Prominenti ex lectica, præbentique immotam cervicem caput præcisum est. Nec satis stolidæ crudelitati militum fuit. Manus quoque, scripsisse in Antonium aliquid exprobrantes, præciderunt. Ita relatum caput ad Antonium, jussuque ejus inter duas manus in rostris positum; ubi ille consul, ubi sæpe consularis, ubi eo ipso anno adversus Antonium, quanta nulla unquam humana vox, cum admiratione eloquentiæ auditus fuerat. Vix attollentes lacrimis oculos homines intueri trucidata membra ejus poterant.

Vixit tres et sexaginta annos, ut, si vis abfuisset, ne immatura quidem mors videri possit: ingenium et operibus et præmiis operum felix: ipse fortunæ diu prosperæ, et in longo tenore felicitatis magnis

interim ictus vulneribus, exsilio, ruina partium, pro quibus steterat, filiae morte, exitu tam tristi atque acerbo, omnium adversorum nihil, ut viro dignum erat, tulit præter mortem: quæ vere æstimanti minus indigna videri potuit, quod a victore inimico nil crudelius passus erat, quam quod ejusdem fortunæ compos ipse fecisset. Si quis tamen virtutibus vitia pensarit, vir magnus, acer, memorabilis fuit, et in cujus laudes persequendas Cicerone laudatore opus fuerit. *M. Seneca suasor. vii.*

Livius refert, Cleopatram, quum ab Augusto capta indulgentius de industria tractaretur, dicere solitam, *Non triumphabor.* *Commentator vetus Cruquii ad Horat. i. od. xxxvii. 30.*

Vir ingenii magni magis, quam boni. *Seneca lib. i. de ira cap. xvi.*

Profitetur, mirari me T. Livium, auctorem celeberrimum, in Historiarum suarum, quas repetit ab origine urbis, quodam volumine sic exorsum: satis jam sibi gloriæ quæsitum, et potuisse se desinere, ni animus inquires pasceretur opere. *Plinius in præfat. lib. i. hist. natur.*

T. Livius ac Nepos Cornelius latitudinis [*freti Gaditani*] tradiderunt, ubi minimum, septem millia passuum; ubi vero plurimum, decem millia. *Plinius præfat. lib. iii. hist. natur.*

Completis consulibus. *Servius ad Virg. Georg. iii. 1.*


Verba sunt, ut habemus in Livio, imperatoris transfugam recipientis in fidem; Quisquis es, noster eris. *Servius ad Virg. Æn. xi. 148.*

Impubes libripens esse non potest, neque antestari. *Priscian. lib. viii. Gramm. pag. 792.*

Apud Nympham Atlantis filiam Calypsonem.
Priscian. lib. vi. Gramm. pag. 685.

Est in Livio, quod quum quidam cupidus belli gerendi a tribuno plebis arceretur, ne iret, pullos jussit adferri : qui quum missas non ederent fruges, irridens consul augurium ait, Vel bibant ; et eos in Tiberim præcipitavit. Inde navibus victor revertens ad Africam in mari cum omnibus, quos ducebat, extinctus est. *Servius ad Virg. Æn. vi. 198.*







PA
6452
A2
1800
t.4

Livius, Titus
Historiarum quae
supersunt

PLEASE DO NOT REMOVE
CARDS OR SLIPS FROM THIS POCKET

UNIVERSITY OF TORONTO LIBRARY

